

तमसो मा ज्योतिर्गमय

SANTINIKETAN
VISWA BHARATI
LIBRARY

T3

20.6

কুরুপাণ্ডব

কুরুপাণ্ডব

কুরু পাণ্ডব
কুরু পাণ্ডব =

বনীন্দ্রনাথ ঠাকুর
বনীন্দ্রনাথ ঠাকুর =



42810

বিশ্বভারতী-গ্রন্থালয়
২১০ নং কর্নওয়ালিস্ স্ট্রীট, কলিকাতা।

বিশ্বভারতী গ্রন্থন-বিভাগ
২১০ নং কর্নওয়ালিস স্ট্রীট, কলিকাতা
প্রকাশক—শ্রীকিশোরীমোহন মিত্র।

কুরু পাণ্ডব

প্রথম সংস্করণ ... চৈত্র, ১৩৩৮ সাল।
দ্বিতীয় সংস্করণ ... ভাদ্র, ১৩৪৫ সাল।

মূল্য—এক টাকা আট আনা।

শান্তিনিকেতন প্রেস হইতে
প্রভাতকুমার মুখোপাধ্যায় কর্তৃক মুদ্রিত।

বিজ্ঞাপন

কিছুকাল হইল আমার ভ্রাতৃপুত্র কল্যাণীয় শ্রীমান
সুরেন্দ্রনাথ মহাভারতের মূল আখ্যানভাগ বাংলায় সংকলন
করেন। তাহাকেই সংহত করিয়া কুরুক্ষেত্রের যুদ্ধকাহিনী
এই গ্রন্থে বর্ণিত হইয়াছে। আধুনিক বাংলাসাহিত্যের
উৎপত্তিকাল হইতেই সংস্কৃতভাষার সহিত তাহার ঘনিষ্ঠ সম্বন্ধ
ঘটিয়াছে একথা বলা বাহুল্য। এই কারণে যে বাংলা-
রচনারীতি বিশেষভাবে সংস্কৃত ভাষার প্রভাবান্বিত তাহাকে
আয়ত্ত করিতে না পারিলে বাংলাভাষায় ছাত্রদের অধিকার
সম্পূর্ণ হইতে পারিবে না ইহাতে সন্দেহ নাই। এই কথা
মনে রাখিয়া শাস্তিনিকেতন বিদ্যালয়ের উচ্চতরবর্গের ক্রম
এই গ্রন্থখানির প্রবর্তন হইল। অন্ততঃ অন্ত বিদ্যালয়েও যদি
ইহা ছাত্রদের পাঠ্যরূপে ব্যবহারযোগ্য বলিয়া গণ্য হয়
তবে আমার শ্রম সার্থক হইবে।

২৫শে বৈশাখ, ১

১৩৩৮।

রবীন্দ্রনাথ ঠাকুর

সূচীপত্র

বিষয়	পৃষ্ঠা
১	
রাজকুমারদিগের বাল্যক্রীড়া—ভীমের প্রতি দুরোধনের বিদ্রোহ—দ্রোণাচার্যের নিকট অস্ত্রশিক্ষা—অস্ত্র-পরীক্ষা—কর্ণের আগমন	... ১—১৪
২	
পাণ্ডবদিগের বারণাবতে গমন—জতুগৃহদাহ— পাণ্ডবদের পলায়ন—হিড়িম্বার বিবাহ	... ১৫—২৭
৩	
পাণ্ডবদের পাকাল দেশে গমন—দ্রোণদীর স্বয়ংবর ও বিবাহ—খাণ্ডবপ্রস্থে রাজ্য স্থাপন	... ২৭—৪১
৪	
ময়দানবের সভানির্মাণ—দুরোধনের বিদ্রোহ— দ্যুতক্রীড়া—যুধিষ্ঠিরের পুরাজয় ও বনগমন	... ৪১—৬৬
৫	
যুধিষ্ঠির প্রভৃতির বৈতবনে বাস—বিরাটরাজের গৃহে অজ্ঞাতবাস	... ৬৬—৮০
৬	
কৌরবদিগের সহিত বিরাটরাজ্যের যুদ্ধ—অর্জুনের জয়লাভ	... ৮০—১০১

১

পাণ্ডবদিগের আত্মপ্রকাশ—উত্তরার বিবাহ—

যুতরাষ্ট্রের সভায় দূতপ্রেরণ ... ১০২—১১১

৮

উভয়পক্ষের দূত প্রেরণ—কৌরবগণের রাজ্যদানে

অস্বীকার—কর্ণ ও কুন্তীর কথোপকথন ... ১১১—১৩২

৯

যুদ্ধের উদ্যোগ—যুদ্ধার্থ যাত্রা

... ১৩২—১৪৩

১০

ভীষ্মের সেনাপতিত্বে যুদ্ধ আরম্ভ—

ভীষ্মের শরশয্যা ... ১৪৪—১৭৮

১১

দ্রোণ, অভিমন্যু, জয়দ্রথ, কর্ণ, শল্য, দুর্ধোধন প্রভৃতি

বীরগণের যুদ্ধ ও মৃত্যু ... ১৭৯—২৬২

১২

সকলের হস্তিনাপুরে গমন—যুদ্ধিষ্ঠিরের রাজ্যলাভ

... ২৬৩—২৬৪

ভূমিকা

কুরুবংশের মহারাজ শান্তনুর জ্যেষ্ঠপুত্র ভীষ্ম চিরকুমার-
ত্রত লইয়াছিলেন এই কারণে পিতার মৃত্যুর পরে তাঁহার
বৈমাত্রেয় কনিষ্ঠ ভ্রাতা বিচিত্রবীর্ষকে তিনি সিংহাসনের
অধিকার ছাড়িয়া দিলেন। কিন্তু অল্পবয়সেই বিচিত্রবীর্ষের
মৃত্যু হইল।

তখন ভীষ্ম বিচিত্রবীর্ষের দুই পুত্রকে স্বয়ং পালন করিতে
লাগিলেন। তাঁহাদের মধ্যে জ্যেষ্ঠ ধৃতরাষ্ট্র ছিলেন অন্ধ,
তাই তাঁহার ছোটো ভাই পাণ্ডুর হাতে রাজ্যভার পড়িল।
তাঁহাদের আর এক ভাই ছিলেন, বিদুর তাঁহার নাম, তিনি
শূদ্রামাতার গর্ভজাত।

ধৃতরাষ্ট্রের সহিত যাঁহার বিবাহ হইল তাঁহার নাম
গান্ধারী, তিনি গান্ধাররাজ সুবলের কন্যা, রূপে গুণে
যশস্বিনী। আর ভোজরাজের পালিতা কন্যা কুন্তীকে পাণ্ডু
বিবাহ করিলেন। পাণ্ডুর দ্বিতীয় পত্নীর নাম মাত্রী,
মদ্ররাজ শল্যের ভগিনী।

বিবাহের কিছুকাল পরে পাণ্ডু মৃগয়া করিতে বনে গেলেন
আর রাজ্যে ফিরিলেন না। বনে তপস্শায় রত হইলেন,
দুই রানীও তাঁহার সঙ্গ ছাড়িলেন না।

বনে থাকিতেই তিন দেবতার কৃপায় কুন্তীর গর্ভে পাণ্ডুর

তিনি পুত্র জন্ম লইলেন, ধর্মের বরে সুধিষ্ঠির, পবনদেবের বরে ভীম ও দেবরাজ ইন্দ্রের বরে অর্জুন; অশ্বিনীকুমার নামক যুগলদেবতার বরে মাত্রীর গর্ভে দুই পুত্রের জন্ম হইল, তাঁহাদের নাম নকুল ও সহদেব।

ধৃতরাষ্ট্র-মহিষী গান্ধারী একশত পুত্র লাভ করিলেন, তাঁহাদের মধ্যে বড়ো দুইটির নাম দুর্যোধন ও দুঃশাসন। তাঁহার একটিমাত্র কন্যা দুঃশলা।

কুন্তী যখন কুমারী ছিলেন তখনি সূর্যদেবের প্রভাবে বনুসেন নামে তাঁহার এক পুত্রের জন্ম হয়, কর্ণ নামেই তিনি বিখ্যাত। মাতা কতৃক পরিত্যক্ত হইয়া সারথ্যব্যবসায়ী দ্রুতজাতীয় অধিরথের গৃহেই তিনি পুত্রবৎ পালিত হইয়াছিলেন।

কুরু পাণ্ডব

১

ধৃতরাষ্ট্রের পুত্র হর্ষোধন প্রভৃতি একশত ভ্রাতার সহিত
বালককালে পাণ্ডুপুত্র যুধিষ্ঠির, ভীম, অর্জুন, নকুল, সহদেবের
সর্বদা ক্রীড়া কৌতুক চলিত। কিন্তু ভীমের বল এত
অধিক ছিল যে তাহার পক্ষে যাহা ক্রীড়া ধৃতরাষ্ট্রের
পুত্রদের পক্ষে তাহা পীড়ার কারণ হইয়া উঠিল। তাহারা
গাছে চড়িলে গাছে পদাঘাত করিয়া তিনি তাহাদিগকে
শাখাচ্যুত করিয়া দিতেন, জলক্রীড়াকালে তাহাদিগকে বল-
পূর্বক জলমগ্ন করিতেন, কেশাকর্ষণ করিয়া মাটিতে
ফেলিতেন, ছুইজনকে পরস্পরের সহিত নিষ্পেষণ করিতেন,
এইরূপে নানাপ্রকার উৎপীড়নে তিনি ধাত্রীরাষ্ট্রদের অপ্রিয়
হইয়া উঠিলেন।

ভীমের বলদর্পে বিশেষভাবে হর্ষোধনের মনে অপ্রসন্নতা
জন্মিল। ভীমকে বিনাশ করিবার জন্য তিনি মনে মনে এক
উপায় স্থির করিলেন। গঙ্গাতীরে শিবির স্থাপন পূর্বক

একটি রমণীয় ক্রীড়াস্থান নির্মাণ করাইয়া ভ্রাতাদিগকে বলিলেন, “আইস, আমরা উপবনশোভিত গঙ্গাতীরে গিয়া জলক্রীড়া করি।”

যুধিষ্ঠিরপ্রমুখ পাণ্ডবগণ ইহাতে সম্মত হইয়া ক্রীড়াস্থানে উপস্থিত হইলেন। কিছুক্ষণ উচ্চানে ভ্রমণের পর তাঁহাদের আহার করিবার সময়ে দৃষ্টমতি দুর্ধোধন ভীমসেনের আহার্য-মিষ্টান্নে গোপনে বিষ মিশাইয়া দিলেন। অবশেষে আহারের পর তাঁহাদের জলক্রীড়া আরম্ভ হইল।

সূর্য যখন অস্ত গেল সকলে জল হইতে উঠিয়া বিশ্রাম মন দিলেন। কিন্তু এদিকে ভীমসেন যে বিষজঙ্ঘর অবশদেহে গঙ্গাতীরেই পড়িয়া আছেন তাহা দুর্ধোধন ছাড়া আর কাহারো দৃষ্টিগোচর হইল না। ভীমের এই অবস্থা দেখিয়া হৃষ্টচিত্তে সেই ছুরাখা তাঁহাকে লতাপাশে বদ্ধ করিয়া জলে নিক্ষেপ করিল।

নদীতলে নাগলোক আছে, সেখানে ভীম যখন উদ্ধার হইলেন তখন নাগরাজ বাসুকি চিনিতে পারিলেন যে ইনি তাঁহারই দৌহিত্র কুন্তীভোজের দৌহিত্র। তখন ভীমকে তিনি বিষের প্রভাব হইতে মুক্ত করিবার জন্য অমৃতপূর্ণ ভাণ্ড হইতে রসপান করাইলেন। ইহাতে শরীরের সমস্ত ক্লেশ অপহৃত হওয়ায় ভীমসেন নাগদত্ত দিব্যশয্যায় শয়ন করিয়া গভীর নিদ্রামগ্ন হইলেন।

এদিকে কৌরবেরা রাজধানীতে প্রভাগমনকালে দুর্ধোধন ছাড়া আর সকলেই মনে ভাবিলেন ভীম তাঁহাদের

অগ্রেই চলিয়া গিয়াছেন। যুধিষ্ঠির মাতার পাদবন্দন করিয়া সর্বাগ্রে ভীমের আগমন সংবাদ জিজ্ঞাসা করিলেন। কুন্তী-দেবী চমকিত ও ভীত হইয়া যুধিষ্ঠিরকে কহিলেন, “হায়, ভীমসেনকে তো আমি দেখি নাই, সে তো অগ্রে আসে নাই। অতএব যাও বৎস, অবিলম্বে তাহার সন্ধানে প্রবৃত্ত হও।”

ভীম অষ্টম দিনে জাগরিত হইয়া গাত্ৰোত্থান করিলে নাগগণ নিকটে আসিয়া বলিল, “হে মহাবাহো, তুমি যে অমৃত পান করিয়াছ তাহাতে তোমার অমৃতগন্ধোপম বল হইবে। এক্ষণে এই দিব্যজলে স্নান করিয়া গৃহে প্রতিগমন করো, তথায় তোমার অদর্শনে তোমার মাতা ও ভ্রাতৃগণ নিতাস্ত কাতর হইয়া আছেন।”

এই উপদেশ অনুসারে ভীম স্নানাবসানে শুক্ৰমালা ও শুক্লাম্বর পরিধানপূর্বক বিগতক্রম হইয়া হৃষ্টচিত্তে নাগগণের পূজা গ্রহণ করিলেন এবং তাঁহাদিগকে আমন্ত্রণ করিয়া নাগলোক হইতে উত্থানপূর্বক অবিলম্বে জননীর নিকট উপস্থিত হইয়া সকলকে যথাযোগ্য অভিবাদন করিলে, পুত্রবৎসলা কুন্তী ও ভ্রাতৃগণ পূরমানন্দে তাঁহাকে আলিঙ্গন করিলেন ✓

যুধিষ্ঠির ভীমের নিকট সমস্ত বৃত্তান্ত শুনিয়া কহিলেন—ভ্রাতৃঃ সাবধান, যেন এ কথা আর কাহারও নিকট প্রকাশ না পায়। অত্যাধি পরস্পরের রক্ষার্থে আমরাদিগকে বিশেষ যত্নবান থাকিতে হইবে।

একদিন রাজকুমারগণ দলবদ্ধ হইয়া ক্রীড়াক্রমে নগরের

বহির্দেশে উপস্থিত হইলেন। ক্রীড়াকালে তাঁহাদের হস্ত হইতে এক গুলিকা জলহীন কূপের মধ্যে পড়িয়া গেল, তাহা উদ্ধার করিবার অনেক চেষ্টা করিয়াও কুমারগণ কিছুতেই কৃতকার্য হইলেন না। এই নিমিত্ত দুঃখিত ও লজ্জিতভাবে তাঁহারা পরস্পরের মুখাবলোকন করিতেছেন, এমন সময়ে দেখিলেন একটি কৃশকায় শ্যামবর্ণ ব্রাহ্মণ সেই স্থান দিয়া চলিয়াছেন। ভগ্নোৎসাহ কুমারগণ তাঁহাকে বেঁটন করিয়া গুলিকা উদ্ধারের জন্য তাঁহার সাহায্য প্রার্থনা করিলেন।

ব্রাহ্মণ ঈষৎ হাসিয়া বলিলেন—

তোমাদের ক্ষত্রিয়-বলে খিক্। যেহেতু তোমরা ভরত-কূলে জন্মগ্রহণ করিয়াও এই সামান্য কূপ হইতে গুলিকা উঠাইতে পারিতেছ না।

এই বলিয়া তিনি পুনরায় কহিলেন—

তোমরা যদি আমাকে উত্তমরূপে ভোজন প্রদান করো, তাহা হইলে আমি একমুষ্টি তুণের সাহায্যে তোমাদের গুলিকা কূপ হইতে বাহির করিব।

অনন্তর সেই ব্রাহ্মণ একমুষ্টি ঈষিকা গ্রহণ করিয়া প্রথম একটি ঈষিকার দ্বারা গুলিকা বিদ্ধ করিলেন। পরে আর একটি ঈষিকার দ্বারা পূর্ব ঈষিকা বিদ্ধ করিলেন। এইরূপে ক্রমে একটির দ্বারা অপরাধি বিদ্ধ করিয়া এই ঈষিকা-পরস্পরাযোগে গুলিকা উদ্ধার করিলেন। কুমারগণ বিস্ময়-বিস্ফারিতলোচনে এই আশ্চর্য কৌশল নিরীক্ষণ করিতে

লাগিলেন, এবং গুলিকা পাইয়া তাঁহারা ব্রাহ্মণকে প্রণাম-পূর্বক कहিলেন—

হে দ্বিজোত্তম, আপনি কে। অশ্ব কাহাতেও এরূপ দক্ষতা দেখা যায় না। আপনার কী প্রত্যাশকার করিব অনুমতি করুন।

ব্রাহ্মণ कहিলেন—তোমরা মহামতি ভীষ্মের নিকট আমার বর্ণনা করিয়া, তিনি নিশ্চয়ই আমায় চিনিতে পারিবেন।

ভীষ্ম এই ব্রাহ্মণের পরিচয় পাইয়া তাঁহাকে कहিলেন—
হে বিপ্রর্ষে, অমুগ্রহপূর্বক এইখানেই অবস্থিতি করুন।
আমাদের ভাগ্যবলেই আপনি এ সময়ে উপস্থিত হইয়াছেন।
এ রাজ্যের সমস্ত ভোগ্যবস্তু অতঃপর আপনারই অধীন জানিবেন।

দ্রোণাচার্য ভীষ্মকর্তৃক সংকৃত হইয়া রাজভবনে কিয়ংকাল বিশ্রাম করিলে, প্রচুর অর্থের সহিত কোরবকুমারদিগকে তাঁহার হস্তে সমর্পণ এবং তাঁহার বাসের জন্য এক উপযুক্ত গৃহ নির্দেশ করা হইল।

দ্রোণ শিক্ষাকার্য আরম্ভ করিলে সুতপালিত কুন্তীপুত্র বনুসেন (যিনি পরে লোকমধ্যে কর্ণ নামে খ্যাত হইয়া ছিলেন) তাঁহার শিষ্যদলভুক্ত হইলেন। সমাগত শিষ্যমণ্ডলী-মধ্যে ভূজবলে উত্তোগে এবং ধনুর্বেদশিক্ষায় অর্জুন ক্রমে আচার্যের সমকক্ষ হইয়া উঠিলেন। একমাত্র কর্ণই তাঁহার সহিত স্পর্ধা করিতে সাহস করিতেন।

. অনন্তর শিষ্ণুগণ প্রত্যেকে সাধ্যমতো বিজালাভ করিয়াছেন

বিবেচনা করিয়া আচার্য এক দিন রাজসভায় উপস্থিত হইয়া সমবেত ভীষ্ম ব্যাস বিহর কৃপ প্রভৃতির সমক্ষে ধৃতরাষ্ট্রকে বলিলেন—

মহারাজ, কুমারগণ সকলেই বিবিধ প্রকার অস্ত্রশিক্ষায় কৃতবিদ্য হইয়াছেন, অমুমতি হইলে তাঁহারা এক্ষণে বিদ্যার পরিচয় দিতে পারেন। ✓

দ্রোণবাক্যে পরম পরিতুষ্ট হইয়া ধৃতরাষ্ট্র বলিলেন—

হে দ্বিজশ্রেষ্ঠ, আপনি আমাদের এক মহৎ কর্ম সাধন করিলেন। এক্ষণে কুরুপ রজভূমিতে কুমারদিগের শিক্ষার উত্তমরূপ পরীক্ষা হইতে পারে তাহা আজ্ঞা করুন। অস্ত্র আমার চক্ষু নাই বলিয়া যথার্থই কষ্টবোধ হইতেছে, যাহা হউক পরীক্ষার বৃত্তান্ত শুনিতে উৎসুক হইয়া রহিলাম।

এই বলিয়া ধৃতরাষ্ট্র সম্মুখোপবিষ্ট বিহরকে কহিলেন—

হে ধর্মবৎসল, আচার্য দ্রোণ আমাদের পরম উপকার সাধন করিয়াছেন। এক্ষণে তাঁহার উপদেশ অনুসারে অস্ত্র-কৌশল, পরিদর্শনের উপযুক্ত রজস্থলের আয়োজন করো।

বিহর রাজাজ্ঞা শিরোধারণ করিয়া দ্রোণের অভিপ্রায় অনুসারে অবিলম্বে কার্যে প্রবৃত্ত হইলেন। তরুণ-বিহীন একটি সুপরিচ্ছন্ন সমতল ক্ষেত্রে রজভূমির সীমা পরিমাপ করা হইল। নিদিষ্ট ভূমির এক পার্শ্বে রাজশিল্পীগণ অভি-বিস্তীর্ণ দর্শনাগার ও তাহার মধ্যে মহিলাদের অবলোকনের জন্য সুরমা গৃহসকল প্রস্তুত করিল। পুরবাসীরাও নিজ নিজ

সামর্থ্য অনুসারে চতুর্দিকে অভ্যাস মঞ্চ ও মহামূল্য পটবাস-সকল স্থাপন ও সুসজ্জিত করিতে লাগিল।

(অনন্তর পরীক্ষার নির্দিষ্ট দিন উপস্থিত হইলে মহারাজ স্বতরাষ্ট্র মন্ত্রিগণসহ কৃপাচার্য ও ভীষ্মকে সম্মুখীন করিয়া, মুক্তাজাল-সনলাংকৃত, বৈদূর্যমণি-শোভিত সুবর্ণময় এক দর্শনাগারে প্রবিষ্ট হইলেন। মহাভাগা গাঙ্কারী কুন্তী ও অন্যান্য রাজমহিলাগণ মহামূল্য পরিচ্ছদ পরিধান করিয়া দাসীগণপরিবেষ্টিত হইয়া নির্দিষ্ট গৃহে গমন করিলেন। রাজধানী হইতে চতুর্বর্ণের নানাবিধ লোক রাজকুমারগণের অঙ্গশিক্ষা-দর্শনার্থী হইয়া দ্রুত আগমন করিতে লাগিল। ক্রমে রক্তস্থলে প্রবেশার্থীর আর সংখ্যা রহিল না। অভ্যাগতদের কোলাহলে সে স্থান উচ্ছলিত মহাসমুদ্রের স্তায় ধ্বনিত হইতে লাগিল।)

নিরূপিত সময় আগতপ্রায় হইলে বাদকবৃন্দ মৃদুমন্দ রবে বাদন আরম্ভ করিয়া দর্শকমণ্ডলীর কৌতুহল পূরিত করিতে লাগিল। ইত্যবসরে গুরুত্বরধারী গুরুশ্রদ্ধা গুরুচন্দনামূলিগু-কলেবর মহাতেজা জ্যোতাচার্য পুত্র অশ্বখামার সহিত রক্তমধ্যে প্রবেশ করিয়া, পুরোহিতের দ্বারা মাজলিক ক্রিয়ার অনুষ্ঠান করাইতে লাগিলেন। পুণ্যকর্ম সমাপনান্তে অনুচরবর্গ অঙ্গশ্রদ্ধা আনয়নপূর্বক যথাস্থানে স্থাপন করিল।

অনন্তর মহাবীর্ষ রাজপুত্রগণ অঙ্গুলিতে অঙ্গুলিত্র বন্ধনপূর্বক বন্ধুত্ব ও বন্ধপরিচয় হইয়া যুধিষ্ঠিরকে অগ্রে করিয়া জ্যেষ্ঠ কনিষ্ঠক্রমে হস্তে ধনুর্ধারণপূর্বক রক্তস্থলে প্রবেশ করিলেন।

প্রথমে কুমারগণ নানাবিধ অস্ত্রনিক্ষেপপূর্বক স্ব স্ব হস্তলাঘব দেখাইতে লাগিলেন। চতুর্দিকে ক্ষিপ্যমাণ অস্ত্র-সকল দেখিয়া অনেক ভয়ে মস্তক অবনত করিয়া ফেলিল। অজুনের অস্তুত ক্ষমতা সকলেরই দৃষ্টি আকর্ষণ করিতে লাগিল।

পরে কুমারগণ বেগবান তুরঙ্গমে আরোহণপূর্বক কখনও স্বনামাঙ্কিত বাণদ্বারা লক্ষ্যভেদ করিয়া, কখনও বা তীরের দ্বারা অস্থির লক্ষ্য পাত করিয়া বিশেষ প্রশংসা লাভ করিলেন।

৬। তৎপরে তাঁহারা রথারোহণপূর্বক পরস্পরকে মণ্ডলাকারে প্রদক্ষিণ করিয়া অশ্বচালনা-কৌশল দেখাইলেন।

পরে অসিচর্ম ধারণপূর্বক কেহ অশ্বে কেহ বা গজে আরুঢ় হইয়া পরস্পর দ্বন্দ্বযুদ্ধ করিলেন। ভ্রাম্যমাণ শাণিত তরবারির রশ্মিজাল চতুর্দিকে বিকীর্ণ হইয়া অপূর্ব শোভা ধারণ করিল। দর্শকমণ্ডলী প্রচুর সাধুবাদ প্রদান করিতে লাগিলেন।

অনন্তর গদাযুদ্ধ আরম্ভ হইলে ভীম ও দুর্যোধনকে পরস্পরকে বামে রাখিয়া মণ্ডলাকারে পরিভ্রমণ করিতে দেখা গেল। দুই তুলাবীর ভীম ও দুর্যোধন পরস্পরের সহিত স্পর্ধাপূর্বক গদাযুদ্ধ আরম্ভ করায় তাঁহাদের প্রতি দর্শক-বৃন্দের মনোযোগ আকৃষ্ট হইল। দুই দল দুই পক্ষ অবলম্বন করিয়া কেহ—হা দুর্যোধন, কেহ বা হা ভীম, বলিয়া স্ব স্ব পক্ষকে উৎসাহ দান করিয়া মহা কোলাহল বাধাইয়া,

তুলিল। পাছে ইহাতে উত্তেজनावশে যোদ্ধাদের ক্রোধের উদ্বেক হয়, সেই নিমিত্ত ধীমান দ্রোণ দুই বীরকে নিবারণ করিবার জন্ত অশ্বখামাকে যুদ্ধস্থলে প্রেরণ করিলেন। অশ্বখামার চেষ্টায় ভীম ও দুর্যোধন নিরস্ত হইলেন।

অনন্তর দ্রোণ বাহুধ্বনি নিবারণপূর্বক রঙ্গপ্রাঙ্গণে দণ্ডায়মান হইয়া কহিলেন—

‘হে দর্শকগণ, আমার শিষ্যদের বিদ্যা ও কৌশল তোমাদের নিকট প্রদর্শিত হইল। ইহাদের মধ্যে আমি অর্জুনকেই সর্বশ্রেষ্ঠ জ্ঞান করি, অতএব তোমরা বিশেষরূপে তাঁহাকে দর্শন করে।’

তখন অর্জুন আচার্যের আদেশক্রমে গোধিকা-চর্মের অঙ্গুলিত্রাণ ও কাঞ্চনময় কবচ পরিধানপূর্বক ধনুর্বাণ লইয়া রঙ্গস্থলে একাকী অবতীর্ণ হইবামাত্র তুমুল শঙ্খধ্বনি ও বাজোচ্চম হইল।

ইনি শ্রীমান কুন্তীনন্দন।—ইনি তৃতীয় পাণ্ডব।—ইনি দেবরাজ ইন্দ্রদত্ত পুত্র।—ইনি শ্রেষ্ঠ অস্ত্রবেত্তা।—ইনি কৌরবদের রক্ষক হইবেন।—প্রভৃতি প্রশংসাধ্বনি চতুর্দিক হইতে উথিত হইতে লাগিল। পুত্রের সুযশ ঘোষণায় কুন্তী অশেষ প্রীতি লাভ করিলেন।

এই সকল মহৎকার্য সমাপনান্তে সভা যখন ভগ্নপ্রায়, বাজকোলাহল নিস্তরক এবং দর্শকবৃন্দ নির্গমনোন্মুখ, সেই সময়ে রঙ্গভূমির দ্বারদেশে সহসা কিঞ্চিৎ চঞ্চলতা অনুভূত হইল এবং কোনো বীরপুরুষের বাহ্যাকাটন-শব্দ শুনা গেল।

দ্বারের দিকে সকলের কৌতূহল দৃষ্টি নিক্ষিপ্ত হইল। পঞ্চ-পাণ্ডববেষ্টিত দ্রোণাচার্য দণ্ডায়মান হইয়া সে দিকে নিরীক্ষণ করিতে লাগিলেন।

দ্বারের নিকটস্থ সকলে পথ মুক্ত করিলে মহাবীর সূত-নন্দন কর্ণ সহজাত দিব্য কবচ ও কুণ্ডলে শোভমান হইয়া রঙ্গমধ্যে প্রবেশপূর্বক সগর্বে ইতস্তত দৃষ্টিপাত করিয়া ঈষৎ অবহেলাভরে দ্রোণ ও কৃপ আচার্যদ্বয়কে অভিবাদন করিলেন। সভাস্থ সকলে এই সূর্যসদৃশ দীপ্তিমান বীরের পরিচয় জানিবার জন্য ব্যগ্র হইয়া উঠিলেন।

অনন্তর কর্ণ অজ্ঞাতভ্রাতা অর্জুনকে সম্বোধন করিয়া বলিলেন—

‘তুমি মনে করিতেছ একমাত্র তুমিই এই সকল স্থিতির অধিকারী, কিন্তু বিস্মৃত হইয়ো না, আমিও এই সমস্ত অদ্বুত কর্ম সাধন করিব।’

দুর্যোধন এতক্ষণ অর্জুনের অজ্ঞপ্র প্রশংসাবাদে অতিশয় ঈর্ষান্বিত হইতেছিলেন, এক্ষণে তাঁহার উপযুক্ত প্রতিপক্ষ উপস্থিত হওয়ায় অনুরূপ হর্ষযুক্ত হইলেন। লোকসমক্ষে রূঢ় বাক্য শ্রবণে অর্জুনের একান্ত লজ্জা ও ক্রোধের উদ্রেক হইল।

কর্ণ স্বীয় অঙ্গীকার অনুসারে অর্জুনকৃত সমস্ত কার্য সুসম্পন্ন করিয়া দর্শকবৃন্দকে চমৎকৃত করিলে দুর্যোধন আনন্দের উচ্ছ্বাসে থাকিতে না পারিয়া কর্ণকে আলিঙ্গন-পূর্বক কহিলেন—

হে বীরবর, তোমার অদ্বুত কৌশল দেখিয়া অজ্ঞ আমরা অত্যন্ত প্রীত হইলাম।

কর্ণ বলিলেন—প্রভো, বোধ করি আমি অজুঁনকৃত সর্বপ্রকার কার্যই সম্পাদন করিয়াছি, এক্ষণে দ্বন্দ্বযুদ্ধ করিয়া অজুঁনের শ্রেষ্ঠত্বের প্রকৃত পরীক্ষা করিতে ইচ্ছা করি।

কর্ণের স্পর্ধায় ও ছুর্যোধনের অনুমোদনে অজুঁনের রোষের আর সীমা রহিল না। তিনি কর্ণকে সম্বোধনপূর্বক ছুর্যোধনকে উদ্দেশ্য করিয়া বলিলেন—

হে সূতপুত্র, যাহারা অনাহুত সমক্ষে উপস্থিত হয়, এবং অযাচিত বাক্যবিজ্ঞাস করে, তাহারা যে-লোকে গমন করে, অজ্ঞ আমার হস্তে প্রাণত্যাগ করিয়া তুমি সেই লোকে গমন করিবে।

কর্ণ উত্তর করিলেন—

হে অজুঁন, এই রঙ্গভূমি যোদ্ধামাত্রেরই অধিকৃত, ইহাতে কাহাকেও আহ্বান বা নিবারণ করা সম্বন্ধে তোমার কোনো প্রভুতা নাই।

অনন্তর অজুঁন দ্রোণের অনুমতি প্রাপ্ত হইয়া এবং ভ্রাতৃগণকর্তৃক ঈৎসাহিত হইয়া যুদ্ধার্থে কর্ণের দিকে অগ্রসর হইলেন।

সভাস্থ সকলেই মনে মনে ছুই দলে বিভক্ত হইয়া পড়িলেন, দ্রোণ কৃপ ও পাণ্ডবভ্রাতৃগণ অজুঁনের পক্ষ এবং ধাতার্যাদ্বি শতভ্রাতা ও অন্বখামা কর্ণের পক্ষ লইলেন।

৯ ছুই পুত্রের মধ্যে আসন্ন সাজ্জাতিক যুদ্ধসম্ভাবনায় কুন্তী

মনের আবেগে একেবারে সংজ্ঞাহীন হইয়া পড়িলেন।
কুশলী কুপাচার্য সমূহ বিপদ বুঝিয়া যুদ্ধনিবারণ-কামনায়
কর্ণকে বলিলেন—

হে বনুসেন, অজ্ঞাতকুলশীল ব্যক্তির সহিত রাজ-
কুমারের তো যুদ্ধ করিবার নিয়ম নাই। তোমাকে সকলে
স্মৃতপালিত বলিয়া জানে, স্মৃতপুত্রের সহিত রাজপুত্র কী
প্রকারে যুদ্ধ করিবেন। তবে হে মহাবাহো, তুমি যদি
তোমার প্রকৃত পিতামাতার নামোল্লেখপূর্বক কোন রাজ-
বংশকে তুমি অলংকৃত করিয়াছ তাহা আমাদের নিকট জ্ঞাপন
করো, তাহা হইলে পাণ্ডুনন্দন অর্জুন অনায়াসেই তোমার
প্রতিযোদ্ধা হইতে পারেন।

এইরূপে অভিহিত হইলে কর্ণ স্বীয় কুলশীল না জানায়
লজ্জায় অধোবদন হইয়া রহিলেন। দুর্যোধন স্বীয় শরণাগত
বীরের অবমাননা সহ্য করিতে না পারিয়া উত্তর প্রদান
করিলেন।—

হে আচার্য, আমি তো জানিতাম যে, বীরের সহিত
বীরমাত্রই যুদ্ধের অধিকারী। যাহা হউক অর্জুন যদি রাজা
ব্যতীত অন্ত্রের সহিত যুদ্ধ না করেন, তবে আমি এইক্ষণেই
বনুসেনকে অঙ্গরাজ্যে অভিষিক্ত করিতেছি।

এই বলিয়া তিনি তৎক্ষণাৎ সুবর্ণপীঠ আনয়নপূর্বক
তত্পরি কর্ণকে উপবিষ্ট করাইয়া, নদ্রবিদ ব্রাহ্মণগণকে
আহ্বানপূর্বক লাজ কুসুম ও সুবর্ণদ্বারা তাঁহাকে যথাবিধি
অঙ্গরাজ্যে অভিষিক্ত করিলেন।

দারুণ অবমাননাকালে এইরূপে মর্যাদা রক্ষা হওয়ায় কর্ণ তুর্ঘোধনের প্রতি যৎপরোনাস্তি কৃতজ্ঞ হইলেন। তাঁহাকে সম্বোধন করিয়া বলিলেন—

মহারাজ, রাজ্যদানের অনুরূপ তোমার কোনো প্রত্যুপকার করিবার আমার সাধ্য নাই। তবে আমার সাধ্য অনুসারে যাহা বলিবে, আমি তাহাই করিতে প্রস্তুত আছি।

তুর্ঘোধন শ্রীতিসহকারে কহিলেন—

হে অঙ্গরাজ, এক্ষণে তোমার সহিত চিরস্থায়ী স্থাপন করিবার ইচ্ছা করি।

কর্ণ তথাস্তু, বলিয়া তাহা স্বীকার করিলেন এবং যাবজ্জীবন ক্ষণকালের নিমিত্তও এ প্রতিজ্ঞার তিনি অশ্রুত্যাচরণ করেন নাই।

এই সময়ে রাজ-স্মৃত অধিরথ অর্জুনের সহিত কর্ণের বিবাদের কথা শ্রবণ করিয়া যুদ্ধ নিবারণ উদ্দেশে ঘর্মান্ত-কলেবর ও স্থলিতোত্তরচ্ছদ হইয়া সহসা রঙ্গমধ্যে প্রবেশ করিলেন। মহাবীর কর্ণ পিতৃতুল্য সারথির গৌরব-রক্ষার্থ শরাসন পরিত্যাগপূর্বক তাঁহাকে সভাস্থ সকলের সমক্ষে প্রণাম করিলেন। অধিরথ কর্ণকে অক্ষত দেখিয়া আনন্দভরে তাঁহাকে পুত্রসম্বোধনপূর্বক তাঁহার অভিষেকার্জ মন্তক পুনবার আনন্দাশ্রুপাতে অভিষিক্ত করিলেন।

ইহা অবলোকন করিয়া ভীমসেন বিক্রমবাক্যে কহিলেন—

হে সূতনন্দন, যুদ্ধক্ষেত্রে অর্জুনের মতো বীরের হস্তে প্রাণবিসর্জন করিতে আলা তোমার পক্ষে শ্রুত্বের কার্য হয়

নাই। কুরুর যেমন যজ্ঞিয় হবি সেবনের অমুণ্যযুক্ত, তোমাকে তেমনি অঙ্গরাজ্য শোভা পায় না। তোমার পক্ষে কুলোচিত বল্গা-গ্রহণই শ্রেয়স্কর।

এই উক্তবাক্যে কর্ণ ক্রোধে অধীর হইলেন, তাঁহার অধর কম্পিত হইতে লাগিল, কিন্তু বহুকাষ্টে আত্মসম্বরণপূর্বক তিনি অস্তাচলগামী সূর্যকে এক দৃষ্টে নিরীক্ষণ করিতে লাগিলেন। কিন্তু অসহিষ্ণু দুর্যোধন ভীমের শ্লেষ বাক্যে সহসা উদ্ভিত হইয়া কহিলেন—

হে ভীম, এ অশিষ্ট উক্তি তোমার উপযুক্ত হয় নাই। ক্ষত্রিয়দের বলই শ্রেষ্ঠ। যিনি নিজবলে সমস্ত পৃথিবী জয় করিতে সমর্থ, তাঁহার পক্ষে অঙ্গরাজ্য তো সামান্য। বনুসেন যেরূপ সহজাত কুণ্ডল ও কবচে শোভমান, তাহাতে তিনি সামান্য বংশসম্বৃত নহেন বলিয়া বিলক্ষণ প্রত্যয় হয়। যাহা হউক বনুসেনের অঙ্গরাজ্যপ্রাপ্তি-সম্বন্ধে যাহার বিদ্বেষ থাকে, তিনি আমার সহিত যুদ্ধে প্রবৃত্ত হউন।

এই বাক্যে সভাস্থ অনেকে ধন্য ধন্য করিল।

এই সময়ে সূর্যাস্ত হওয়ায় সেদিনকার অস্ত্রপরীক্ষাব্যাপার সমাধা হইল। দুর্যোধন কর্ণের হস্তধারণপূর্বক রক্তস্থল হইতে নিজ্রাস্ত হইলেন। পাণ্ডবগণ দ্রোণ ও ভীষ্মের সহিত স্ব স্ব গৃহে গমন করিলেন। সভাস্থ হইলে পৌরগণ কেহ অর্জুনের, কেহ কর্ণের, কেহ দুর্যোধনের প্রশংসা করিতে করিতে প্রস্থান করিল।

২

এদিকে পৌরগণ পাণ্ডবদিগকে অশেষগুণসম্পন্ন দেখিয়া সর্বদাই তাঁহাদের গুণকীর্তন করিত। সভায় বা চত্বরে যেখানে জনকতক একত্র হইত, সেখানেই পাণ্ডবদের রাজ্য-প্রাপ্তিসম্বন্ধে আলোচনা হইত।

এই সকল কথোপকথন ক্রমে হর্ষোধনের কর্ণগোচর হওয়ায় তিনি যৎপরোনাস্তি ক্রুদ্ধ ও ঈর্ষান্বিত হইলেন এবং সম্বর ধৃতরাষ্ট্রের নিকট উপস্থিত হইয়া বলিলেন—

হে পিতঃ, পৌরগণ আপনাকে ও ভীষ্মকে অতিক্রম করিয়া যুধিষ্ঠিরকে রাজ্য দিবার পরামর্শ করিতেছে। শুনিতে পাই ইহাতে রাজ্যপরাধ ভীষ্মেরও সম্মতি আছে। এ বিষয়ে উদাসীন থাকিলে আর নিস্তার নাই।

পুত্রের কাতরোক্তি শ্রবণে ধৃতরাষ্ট্র দোলাচলচিহ্ন হইলেন, কিন্তু তথাপি অধর্মভীতিনিবন্ধন কোনো কার্য করিলেন না।

কিন্তু হর্ষোধন নিশ্চিন্ত রহিলেন না। তিনি বহু কর্ণ ও মাতুল শকুনির সহিত মন্ত্রণা করিয়া পুনরায় ধৃতরাষ্ট্রের নিকট আসিয়া বলিলেন—

হে তাত, আপনি পাণ্ডবগণকে কোনো সুনিপুণ উপায়ে কিয়ৎকালের নিমিত্ত বারণাবৎ নগরে প্রেরণ করুন। এক্ষণে সমুদায় ধন ও অমাত্যবর্গ আমারই অধীন, আমি ইত্যবসরে উপযুক্ত উপায়ে পৌরগণকে বশীভূত করিয়া

সাম্রাজ্য হস্তগত করিলে পর অনায়াসে আশঙ্কানুশ্রুত হইয়া তাঁহাদিগকে ফিরাইয়া আনিতে পারেন।

ধৃতরাষ্ট্র এই সকল যুক্তি সর্বদাই অস্তঃকরণে আলোচনা করিতে লাগিলেন। দুর্যোধনও কার্যসিদ্ধি উপলক্ষ্যে প্রজাবর্গকে ধন মান দ্বারা বশীভূত করিতে যত্নবান হইলেন। অবস্থা যখন অমুকূল বিবেচিত হইল, তখন একদিন পূর্ব-পরামর্শ অনুসারে মন্ত্রণাকুশল জ্ঞানৈক অমাত্য রাজসভায় সকলের উপস্থিতিতে বলিতে লাগিলেন—

বারণাবৎ নগর অতি বৃহৎ ও পরম রমণীয় স্থান। তথায় ভগবান ভবানীপতি প্রতিষ্ঠিত আছেন, এই সময়ে তাঁহার পূজনার্থে নানা দিগ্দেশ হইতে জনসমাগম হইবে।

এই প্রশংসাবাক্য শুনিয়া বারণাবৎ নগর দর্শন করিবার ইচ্ছা পাণ্ডবদের মনে উদয় হইল। ধৃতরাষ্ট্র তাঁহাদের কৌতূহলের উদ্রেক বৃদ্ধিতে পারিয়া দুর্যোধনের শ্রীতিসাধন-মানসে প্রবৃত্ত হইয়াও অধর্মভয়ে সংকুচিত হইয়া কুণ্ঠিতাস্তঃকরণে তাঁহাদিগকে উৎসাহ দান করিয়া বলিলেন—বৎসগণ, সকলেই আমার নিকট বারণাবতের প্রশংসা করে, অতএব ইচ্ছা হয় তো কিছুদিন তথায় কালযাপন করিয়া আসিতে পারো।

ধীমান যুধিষ্ঠির ধৃতরাষ্ট্রের ভাবে কোনো একটা ছুরভি-সন্ধির সন্দেহ করিলেন, কিন্তু নিজেকে নিরুপায় বোধে “তথাস্তু” বলিয়া তাহা স্বীকার করিলেন।

এই ঘটনায় দুর্যোধনের আনন্দের সীমা রহিল না।

তিনি ইতিপূর্বেই ধৃতরাষ্ট্রের অজ্ঞাতসারে এক অতি ঘোর
পাপাভিসন্ধি মনে পোষণ করিতেছিলেন, তাহা এক্ষণে কার্যে
পরিণত করিবার সুযোগ পাইলেন। পুরোচননামা এক ছর্মতি
সচিবকে আহ্বান করিয়া ছর্যোধন তাহাকে কহিতে লাগিলেন—

হে পুরোচন, পাণ্ডবগণ পাণ্ডপত-উৎসবে বিহারার্থ
বারণাবৎ নগরে গমন করিবেন। তুমি দ্রুতগামী অশ্ব-
তরযোজিত রথে অত্নই তথায় গমন করো। নগরের প্রান্তদেশে
শ্রীশ্রী সর্জরস জতুকাঠ প্রভৃতি যাবতীয় অগ্নিভোজ্য দ্রব্যদ্বারা
একটি সুদর্শন চতুঃশালাগৃহ নির্মাণ করাইবে। মৃত্তিকায়
প্রচুর পরিমাণে তৈল ও লাক্ষাদি সংযোগ করিয়া তাহা দ্বারা
ঐ গৃহের ভিত্তি লেপন করাইবে। চতুর্দিকে বিবিধ আগ্নেয়
দ্রব্য গুপ্তভাবে রক্ষা করিবে। পাণ্ডবেরা বারণাবতে উপস্থিত
হইলে সুযোগ বুঝিয়া পরম সমাদরে তাহাদিগকে তথায়
বাস করিবার জন্ত অভ্যর্থনা করিবে। এবং দিব্য আসন
যান ও শয্যা প্রদানে পরিতুষ্ট করিবে।^১ কিছুকাল পর
তাঁহারা আশ্বস্তচিত্তে তথায় বাস করিতে আরম্ভ করিলে
রাত্রিকালে ঐ গৃহে অগ্নিসংযোগপূর্বক উহাদিগকে ধ্বংস
করিবে। সাবধান, যেন পিতা এবং পুরবাসিগণ ইহাকে
অকস্মাৎ অগ্নি বলিয়া মনে করেন—যেন পাণ্ডববধ-জনিত
কলঙ্ক আমাদিগকে স্পর্শ না করে।

পাপাত্মা পুরোচন এই কথায় সন্মত হইয়া তৎক্ষণাৎ
দ্রুতগমনে বারণাবতে উপস্থিত হইয়া জতুগৃহনির্মাণকার্য
আরম্ভ করিল।

অনন্তর শুভদিবসে পাণ্ডবদের যাত্রার জন্ত বায়ুবেগগামী সদশযুক্ত রথ প্রস্তুত হইল। তাঁহারা মাতৃগণকে প্রদক্ষিণ-পূর্বক তাঁহাদের নিকট বিদায় লইলেন এবং প্রজাগণকে বিনয়নম্র-বচনে সাদরসম্ভাষণ করিয়া রথারোহণপূর্বক যাত্রা আরম্ভ করিলেন।

অনন্তর অষ্টম দিবসে মাতৃসহ পাণ্ডবগণ বারণাবতে উপস্থিত হইলেন।

১০। পুরোচন তাঁহাদের সেবার্থে অত্যাৎকষ্ট ভক্ষ্য, পেয়, আসন ও শয্যা-প্রভৃতি সকল প্রকার রাজভোগ্য দ্রব্য প্রস্তুত রাখিয়াছিল। সেই ছরাস্বাকর্ষক সংকৃত ও প্রজাগণদ্বারা পূজিত হইয়া পাণ্ডবগণ দশদিন ঐ স্থানে অবস্থান করিলেন।

একাদশ দিবসে পুরোচন স্বীয় গহিত অভিসন্ধিসিদ্ধির নিমিত্ত তাঁহাদিগকে সাদর নিমন্ত্রণে জতুগৃহে বাসার্থে লইয়া গেল।

গৃহে প্রবেশ করিয়াই যুধিষ্ঠির ভীমকে বলিলেন—

ভ্রাতঃ, আমি নিঃসন্দেহ এই গৃহে ঘৃত ও জতুমিশ্রিত বিসাগন্ধ পাইতেছি। এই দেখো কোনো নিপুণ শিল্পী ঘৃতাক্ত মুক্ত ববজ ও বংশপ্রভৃতি আগ্নেয় দ্রব্যসমূহে এই গৃহ নির্মাণ করিয়াছে। অহো, হৃষোধনের কী ক্রুর অভিপ্রায়। আমি এক্ষণে প্রত্যক্ষবৎ উহার সমস্ত কৌশল অবগত হইতেছি। সে পুরোচনের দ্বারা আমাদিগকে এই গৃহের সহিত দন্ধ করিবার সংকল্প করিয়াছে।

ভীম স্তম্ভিতের স্থায় এই সকল যুক্তি শুনিয়া কহিলেন—

হে আৰ্য, যদি এই গৃহ স্পষ্টই আগ্নেয় বলিয়া বোধ হয়, তবে আর এখানে কালবিলম্ব করিবার কী প্রয়োজন। চলো, আমরা যেখানে ছিলাম সেখানেই ফিরিয়া যাই।

যুধিষ্ঠির কহিলেন—হে বৃকোদর, বিবেচনা করিয়া দেখিলে আমাদের এখানেই বাস করা কৰ্তব্য। নরাধম পুরোচন যদি বৃষ্টিতে পারে যে, আমাদের মনে সন্দেহ জন্মিয়াছে, তাহা হইলে সে আমাদেরকে তদুপে দগ্ধ করিবে, কারণ সে ভূমতির অধম বা লোকনিন্দা কিছুরই ভয় নাই। এই জতুগৃহের মধ্যে বিবর খনন করিয়া রাত্রিকালে গোপন-ভাবে সেখানে বাস করিলে অগ্নি হইতে আর আমাদের কোনো ভয় থাকিবে না।

এই সময়ে বিচুর-প্রেরিত এক বিশ্বাসী ব্যক্তি পাণ্ডবদের নিকট আসিয়া নিবেদন করিল—

হে মহাস্বগণ, আমি খনক, আপনাদের পরমহিতৈষী পিতৃব্য আমাকে প্রেরণ করিয়াছেন। দুর্ঘোধনের আদেশে কোনো কক্ষপক্ষীয় চতুর্দশীর রাত্রে পুরোচন এই গৃহে অগ্নি প্রয়োগ করিবে, এ কথা তিনি অবগত হইয়াছেন।

যুধিষ্ঠির কহিলেন—হে খনক, তোমাকে যখন আমাদের পরমহিতাকাঙ্ক্ষী পিতৃব্য পাঠাইয়াছেন, তখন তোমাকেও আমাদের সূক্ষ্ম বলিয়া জানিলাম।

খনক সেই গৃহমধ্যে এক মহাগত প্রস্তুত করিয়া তাহা হইতে বহির্গমনের এক সুরঙ্গ পথ নির্মাণ করিল। যাহাতে গৃহে কেহ আসিলেও ইহা বৃষ্টিতে না পারে, এই নিমিত্ত

গতের মুখ এক কবাটদ্বারা বন্ধ করা হইল। পুরোচনকে বধনা করিবার জন্ত দিবাভাগে পাণ্ডবগণ বিশ্বস্তের শ্রায় ইতস্তত মৃগয়া করিয়া বেড়াইতেন। রাত্রিকালে খনক-নির্মিত গহ্বরে অতি সতর্কতার সহিত শয়ন করিতেন।

এইরূপে সংবৎসরকাল কাটিয়া গেলে পুরোচন পাণ্ডব-দিগকে একান্ত বিশ্বস্ত জ্ঞান করিয়া কার্য সুসিদ্ধ হইবার আশায় উৎফুল্ল হইয়া উঠিল। তাহাকে হৃষ্টচিত্ত দেখিয়া যুধিষ্ঠির ভ্রাতাদিগকে বলিলেন—

ছুরায়া পুরোচন আমাদিগকে বিশ্বস্তবোধে পরিতুষ্ট হইয়াছে। এই আমাদের পলায়নের উপযুক্ত সময়। পুরোচনের দ্বারা অগ্নিসংযোগের অপেক্ষা না করিয়া আইস, আমরাই জতুগৃহ দাহপূর্বক সুরঙ্গপথ অবলম্বনে অলক্ষিত-ভাবে পলায়ন করি।

অনন্তর ঘোর তিমিরাবৃত রাত্রিকাল উপস্থিত হইল। পাণ্ডবগণ সকলকে নিদ্রিত ও অসন্দিগ্ধ জানিয়া পলায়নের উদ্যোগ করিলেন। ভীম নিঃশব্দ পদবিক্ষেপে পূর্বপরামর্শ অনুসারে অগ্রে পুরোচন-অধিকৃত আয়ুধাগারে, পরে জতুগৃহের দ্বারে এবং চতুর্দিকের প্রাচীরে দ্রুত অগ্নিপ্রদান করিলে সকলে মিলিয়া বহুকণ্ঠে সুরঙ্গপথ অবলম্বনে নির্জন বনমধ্যে নিষ্ক্রান্ত হইলেন।

অগ্নির উত্তাপ ও শব্দ প্রবল হইয়া উঠিলে জাগ্রত পুর-বাসি সকল চতুর্দিক হইতে ধাবমান হইল। পাণ্ডবদিগের অলস্ত আবাসস্থানকে সুস্পষ্টরূপে আগ্নেয়দ্রব্য-নির্মিত বৃষ্টিতে

কুরু পাণ্ডব

পারিয়া তাহারা বিস্তর বিলাপ পরিতাপ করিতে করিতে
বলিতে লাগিল—

অহো, ইহা নিশ্চয়ই কুরুকুলকলঙ্ক হ্র্যোধনের কার্য।
তাহারই আদেশে পুরোচন এই গৃহ নির্মাণ করাইয়া তাহার
অসদভিপ্রায় সিদ্ধ করিয়াছে। কিন্তু ধর্মের কী অনির্বচনীয়
মহিমা। দেখো সে নরাধমের গৃহেও অগ্নি লাগিয়া সে দন্ধ
হইতেছে। দহমান জতুগৃহের চতুর্দিকে পৌরজন সমস্ত রাত্রি
এরূপ বিলাপ করিতে লাগিল ✓

ইত্যবসরে মাতাকে লইয়া পঞ্চপাণ্ডব দ্রুতগমনে নিরাপদ
স্থানে উত্তীর্ণ হইবার বিশেষ যত্ন করিলেন। কিন্তু রাত্রি-
জাগরণ ও দাহভয়ে পরিশ্রান্ত হইয়া সকলেই পদে পদে
স্থলিত হইতে লাগিলেন। তখন একাকী ভীমসেন কাহাকেও
স্বন্ধে কাহাকেও ক্রোড়ে লইয়া এবং কাহারও বা হস্তধারণ-
পূর্বক নির্ভর দান করিয়া চলিলেন।

হস্তিনাপুরে পাণ্ডবদের বিনাশবার্তায় সকলে পাণ্ডব-
নির্বাসনের প্রকৃত অর্থ বুঝিয়া ঘোর শোকাকুল হইলেন।
কিন্তু হ্র্যোধনের চতুরতায় ইতিমধ্যে পৌরবর্গ বশীভূত হওয়ায়
কেহ কিছু করিতে পারিলেন না।

ওদিকে হ্র্যোধনের ভয়ে প্রচ্ছন্নবেশ ধারণপূর্বক পাণ্ডবগণ
নক্ষত্রদ্বারা দিগ্নিরূপণ করিয়া স্থলপথে ক্রমাগত দক্ষিণদিকে
গমন করিতে লাগিলেন। ভীম পূর্ববৎ সকলকে আশ্রয়-
দানপূর্বক বজ্র পথে মাতাকে পৃষ্ঠে বহন করিতে
লাগিলেন।

ক্রমে এক ফলমূলজল-বিহীন হিংস্রজন্তুসমাকুল মহারণের মধ্যে ঘোর অন্ধকারময় সন্ধ্যা সমাগত হইল। দারুণ পশু-পক্ষিরব চতুর্দিকে শ্রুত হইল, ভীষণ শব্দকারী বায়ু প্রবাহিত হইতে লাগিল। কুমারগণ নিদ্রাবেশে জড়তাক্রান্ত এবং ক্ষুধায় কাতর হওয়ায় চলৎশক্তিরহিতপ্রায় হইলেন। তৃষ্ণাতুরা কুস্তী বিলাপ করিতে লাগিলেন—

হায়, আমি পঞ্চপাণ্ডবের জননী হইয়া এবং পুত্রগণের মধ্যে থাকিয়া পিপাসায় কাতর হইলাম।

কোমলহৃদয় ভীমসেন ইহা সহ্য করিতে না পারিয়া চতুর্দিকে বিহ্বল দৃষ্টিপাতে ইতস্তত ভ্রমণ করিয়া নির্জন বনমধ্যে এক বিপুলচ্ছায় রমণীয় বটবিটপী দেখিতে পাইলেন। সকলকে তথায় বিজ্রামার্থ উপবেশন করাইয়া তিনি যুধিষ্ঠিরকে কহিলেন—

হে আর্য, তোমরা এখানে ক্রান্তি দূর করো, আমি জল অন্বেষণ করি। দূরে সারসস্রনি শুনা যাইতেছে, ঐ স্থানে নিশ্চয়ই জলাশয় আছে। ১৬৫

১৬ (জ্যেষ্ঠ অমুমতি প্রদান করিলে ভীম দ্রুতগতিতে সেই জলচর পক্ষীর শব্দ অনুসরণ করিয়া এক জলাশয়ে উপনীত হইলেন। অবগাহন ও জলপানে বিগতক্লেশ হইয়া উত্তরীয় বসনে মাতা ও ভ্রাতাদের জন্ত জলবহন করিয়া তিনি অতি দ্রুত সমাগত হইলেন। আসিয়া দেখিলেন, তাঁহার ইতি-মধ্যেই একান্ত আশ্রিতরে ধরণীতলে শয়ন করিয়া নিদ্রাভিত্ত হইয়াছেন। প্রিয়তমদের এই অবস্থাদর্শনে ভীমের শোকের আর পরিসীমা রহিল না। তিনি ভাবিলেন—

কুরু পাণ্ডব

এই বনের অনতিদূরে নগর আছে বলিয়া অহুমান হইতেছে, এখানে একরূপ বিশ্বস্তচিত্তে নিদ্রামগ্ন থাকি অকর্তব্য। কিন্তু ইহারা নিতান্ত পরিশ্রান্ত, অতএব ইহাদের নিদ্রার ব্যাঘাত না করিয়া আমি একাকী সতর্কভাবে জাগরণ করি।

এইরূপ স্থির করিয়া ভীম উহাদের পানার্থ জল রক্ষা করিয়া স্বয়ং জাগ্রত রহিলেন।

এই স্থানের নিকটবর্তী শালবৃক্ষে মেঘের স্তায় কৃষ্ণবর্ণ ভীষণাকৃতি হিড়িম্বনামে এক নরমাংসান্ধী রাক্ষস বাস করিত। বহুদিবসাবধি ক্ষুধাত' থাকায় সে মনুষ্যগন্ধজ্ঞানে সাতিশয় লোক হইয়া স্বীয় ভগিনী হিড়িম্বাকে আহ্বান করিয়া বলিল—

আজ বহুদিন পর সুকোমল মনুষ্য-মাংসে দশন নিমগ্ন করিয়া উৎকর্ষের পান করিবার সুযোগ উপস্থিত। তুমি শীঘ্র ঐ বৃক্ষতলস্থিত মনুষ্যদিগকে বধ করিয়া আনয়ন করো, আমরা দুইজন উদর পূরণপূর্বক পরমানন্দে নৃত্য করিব।

হিড়িম্বা রাক্ষসী ভ্রাতৃবাক্য শ্রবণে সহর পাণ্ডবগণের নিকট আসিয়া ভীমসেনকে নিদ্রিত মাতা ও ভ্রাতৃবর্গের প্রহরিরূপে জাগ্রত দেখিল। বিশালবক্ষ মহাবল ভীমসেনের যৌবনকান্তি অবলোকনে রাক্ষসী তাঁহাকে পতিভে বরণ করিতে অভিলাষিনী হইল এবং দিব্যান্তরণবেশ ধারণপূর্বক যুহ্মন্দগমনে ভীমের নিকট আসিয়া তাঁহাকে জিজ্ঞাসা করিল—

হে পুরুষশ্রেষ্ঠ, তুমি কে। এই দেবকী পুরুষগণ এবং এই সুকুমারী রমণীই বা কী সাহসে নিদ্রিত আছেন।

তোমরা কি জানো না যে, এ স্থান আমার ভ্রাতা হিড়িম্বনামক রাক্ষসের অধিকৃত। সে তোমাদের মাংসভোজনে ও রুধির পানে লোলূপ হইয়া আমাকে পাঠাইয়াছে, কিন্তু হে মহাবাহো, আমি তোমার রূপলাবণ্যে মুগ্ধ হইয়া ভ্রাতৃবাক্য পালনে অসমর্থ হইয়াছি।

ভীমসেন হিড়িম্বার কথা শ্রবণে বলিলেন—

হে রাক্ষসি, আমি কি তোমার ছুরাশ্রা ভ্রাতাকে ভয় করি। আমি একাকী সকলকে তাহার হস্ত হইতে রক্ষা করিতে সক্ষম, অতএব তুমি ইচ্ছা হয় থাকো, ইচ্ছা হয় গিয়া তোমার ভ্রাতাকে পাঠাইয়া দাও, আমি ইহাদিগকে পরিত্যাগ করিতে সম্মত নহি।

এদিকে হিড়িম্ব ভগিনীর বিলম্বে অস্থির হইয়া স্বয়ং পাণ্ডবদের দিকে অগ্রসর হইতে লাগিল। হিড়িম্বা তদ্রূপে ভীত হইয়া ভীমকে ব্যগ্রস্বরে বলিল—

হে মহাত্মন, ঐ দেখুন আমার সহোদর ক্রুদ্ধ হইয়া এদিকে আসিতেছে, এবার আর নিস্তার নাই। দাসীর বাক্য গ্রহণ করুন, আপনার আদেশ পাইলে আমি সকলকে উত্তোলনপূর্বক আকাশে উড়ীন হই।

ভীমসেন রাক্ষসকে বাহুপ্রসারণপূর্বক সম্মুখাগত দেখিয়া ভ্রাতৃগণের নিজাত্মজের ভয়ে তাহার হস্ত ধরিয়া অষ্টধনু পরিমাণ স্থানান্তরে তাহাকে আকর্ষণ করিলেন। রাক্ষস ভীমের বলদর্শনে বিস্মিত হইয়া সবলে তাহাকে ধারণপূর্বক গর্জন করিতে লাগিল। তখন উভয়ে মত্তমাতঙ্গের

শ্রায় বিক্রম প্রকাশপূর্বক পরস্পরকে নিষ্পেষণ করিতে লাগিল।

তাহাদের ভীষণ গর্জনে মাতৃসহ পাণ্ডুরগণ জাগরিত হইয়া সম্মুখে উপস্থিত হিড়িম্বার মনোহর রমণী-মূর্তি দেখিয়া বিস্ময়াপন্ন হইলেন। কুন্তী স্তম্ভুরস্বরে জিজ্ঞাসা করিলেন—

হে বরবর্গিনি, তুমি কে, কী অভিপ্রায়ে এখানে আসিয়াছ।

হিড়িম্বা কহিল—হে দেবি, এই যে গগনস্পর্শিবৃক্ষ-সমাকুল শ্রামল অরণ্যানী দেখিতেছ, ইহা আমার সহোদর রাক্ষসেন্দ্র হিড়িম্বের বাসস্থান। এই রাক্ষসরাজ তোমাকে ও তোমার পুত্রদিগকে সংহার করিবার নিমিত্ত আমাকে এখানে প্রেরণ করিয়াছিল, কিন্তু হে শুভে, আমি তোমার তপ্ত-কাঞ্চন-সদৃশ-কলেবর পুত্রকে দেখিয়া বিমোহিত হইয়াছি। আমি তোমাদের রক্ষার্থে সকলকে লইয়া পলায়ন করিবার প্রস্তাব করিয়াছিলাম, কিন্তু তাহাতে তোমার পুত্র সম্মত হইলেন না। এক্ষণে আমার সেই ভ্রাতার সহিত তোমার পুত্রের ঘোরতর দ্বন্দ্বযুদ্ধ হইতেছে।

হিড়িম্বার এই কথা শুনিবামাত্র যুধিষ্ঠির অর্জুন নকুল ও সহদেব তৎক্ষণাৎ ভীমসমীপে উপস্থিত হইলেন। তাহাকে দীর্ঘযুদ্ধে কিছু ক্লান্ত দেখিয়া উদ্ভেজনার্থ অর্জুন বলিলেন—

হে অর্ঘ, তোমার যদি শ্রান্তিবোধ হইয়া থাকে, তো বোলো, আমি তোমার সহায়তা করি।

ভীম ইহাতে দ্বিগুণ রোষাবিষ্ট হইয়া বলিলেন—

তোমরা ভীত হইয়ো না, আমি একাকী এই বনকে এ
রাক্ষসের পাপাচরণ হইতে মুক্ত করিব।

এই বলিয়া ভীম পূর্ণ বলপ্রয়োগে হিড়িম্বকে ভূমি হইতে
উত্তোলনপূর্বক চতুর্দিকে বিঘৃণিত করিয়া তাহাকে পুনরায়
ভূমিতে নিক্ষেপ ও পশুবৎ বধ করিলেন। ত্রাতৃগণ পরম
পরিভূষ্ট মনে ভীমকে আলিঙ্গনপূর্বক ধন্যবাদ প্রদান করিলেন।

অনন্তর পাণ্ডবগণ পুনরায় চলিতে আরম্ভ করিলে
হিড়িম্বা তাঁহাদের সঙ্গ লইল। ইহাতে ভীম কিঞ্চিৎ ক্রুদ্ধ
হইয়া বলিলেন—

হে রাক্ষসি, তোমরা মায়ার দ্বারা সর্বদাই মনুষ্যদিগকে
ছলনা করিয়া থাকো, অতএব তোমার আমাদের সঙ্গে
আসিবার কোনো প্রয়োজন নাই।

☞ (এইরূপ প্রত্যাখ্যানে দুঃখিত হইয়া হিড়িম্বা কুস্তীর শরণা-
গত হইয়া কহিল—

মাতঃ, আপনি আমার প্রতি অনুকম্পা প্রদর্শনপূর্বক
ভীমসেনাকে আমার সহিত বিবাহে অনুমতি প্রদান করুন,
আমি তাঁহার সহিত যথেষ্ট ভ্রমণ করিয়া পুনরায় তাঁহাকে
আপনাদের নিকট ফিরাইয়া আনিব।

যুধিষ্ঠির ইহা শুনিয়া বলিলেন—

হে সুমধ্যমে, তোমার অভিলাষ পূর্ণ হউক। তুমি
দিবাভাগে ভীমসেনাকে লইয়া যদৃচ্ছা ভ্রমণ করিয়ো, কিন্তু
রজনীযোগে তাহাকে আমাদের নিকট আনয়ন করিতে
হইবে।

কুরু পাণ্ডব

ভীম জ্যেষ্ঠের এইরূপ অনুমতি পাইয়া বিবাহে সম্মত হওয়ায় হিড়িম্বা পরমানন্দে তাঁহাকে লইয়া আকাশমার্গে প্রস্থান করিল।

ভীমের সহিত বাসকালে হিড়িম্বার এক বিক্রপাক্ষ মহাবল অমাত্য পুত্র জন্মগ্রহণ করিল। ইহার নাম ঘটোৎকচ। এই ঘটোৎকচ পরে পাণ্ডবগণের প্রতি বিশেষ অনুরক্ত ও শ্রদ্ধাবান হইয়াছিল এবং তাঁহারাও তাঁহাকে যথেষ্ট স্নেহ করিতেন।

৩

পাণ্ডব রমণীয় সরোবরাদির নিকট বিশ্রাম করিতে করিতে কুন্তীসমেত পাণ্ডবগণ ক্রমে দক্ষিণ পাকালদেশাভিমুখে গমন করিতে লাগিলেন। পথিমধ্যে বহুতর ব্রাহ্মণের সহিত তাঁহাদের সাক্ষাৎ হইল। ব্রাহ্মণগণ পাণ্ডবদের গন্তব্য স্থান না জানিয়া ও তাঁহাদিগকে স্বশ্রেণীয় বিবেচনা করিয়া কহিতে লাগিলেন—

ভোমরা আমাদের সহিত পাকালদেশে চলো। তথায় পরমাদ্বুত মহোৎসবের আয়োজন হইতেছে। ক্রপদরাজ যজ্ঞবেদিমধ্য হইতে এক পরমানন্দরী ছহিতা প্রাপ্ত হইয়াছিলেন। সেই কমলনয়নার স্বয়ংবরাগ্ৰহণ হইবে।

এই কথায় পাণ্ডবগণ ব্রাহ্মণদলভুক্ত হইয়া অনতিবিলম্বে

পাঞ্চালদেশে উপনীত হইলেন। স্বদ্ধাবার ও নগর সম্যকরূপে পরিদর্শন করিয়া তাঁহার। ব্রাহ্মণবৃত্তি অবলম্বনপূর্বক এক কুন্তকারের গৃহে বাস করিতে লাগিলেন।

দ্রুপদরাজ শ্রেষ্ঠ ধনুর্ধরকে কন্যাসম্প্রদান করিবার মানসে এক সুদৃঢ় ছরাগম্য শরাসন এবং ঘূর্ণ্যমান আকাশযন্ত্র-রক্ষিত অত্যাচ্চ লক্ষ্য প্রস্তুত করাইলেন, এবং ঘোষণা করিলেন যে, যিনি এই ধনুতে জ্যা-রোপণপূর্বক পক্ষশরের দ্বারা ঘূর্ণ্যমান যন্ত্রের ছিদ্র ভেদ করিয়া লক্ষ্যপাত করিতে পারিবেন, তাঁহাকেই তিনি কন্যাদান করিবেন।

এই উপলক্ষে নগরের প্রাস্তবর্তী এক পরিষ্কৃত সমতল ভূমিতে স্বয়ংবর সমাজ প্রতিষ্ঠিত হইল।

দ্রুপদরাজের ঘোষণা শ্রবণে চতুর্দিক হইতে ভূপালগণ আগমন করিতে লাগিলেন। তন্মধ্যে কর্ণ-সমভিব্যাহারী দুর্যোধনপ্রমুখ কুরুবর্গ এবং বলদেব ও কৃষ্ণাদি যাদবগণ উপস্থিত হইলেন এবং নানাস্থানের ঋষি ও ব্রাহ্মণগণ উৎসব-দর্শনার্থ সমাগত হইতে লাগিলেন। দ্রুপদরাজ সকলেরই উপযুক্ত সংকার করিয়া স্বয়ংবরের নির্দিষ্ট দিন না আসা পর্যন্ত অভ্যাগতদের চিত্তরঞ্জনার্থ সভাস্থলে নৃত্যগীত বাতোগ্রাম ও জনগণের বিবিধ কলাকৌশল ও ব্যায়ামনৈপুণ্য প্রদর্শনের ব্যবস্থা করিলেন।

পঞ্চদশ দিবস এইরূপে অতিবাহিত হইলে, নির্দিষ্ট শুভদিন উপস্থিত হইল।

শুভমুহূর্ত উপস্থিত হইলে, ভ্রাতা ধৃষ্টদ্যায়ের সহিত

কৃতস্নানা অপূৰ্ণাবশ্যময়ী কৃষ্ণা অনুপম বসনভূষণে অলংকৃতা হইয়া হস্তে বিচিত্র কাঞ্চনী মালা ধারণপূৰ্বক রঙ্গমধ্যে অবতীর্ণ হইলেন। ধৃষ্টদ্যুম্ন স্তব্ধতা ভঙ্গ করিয়া যুগ্মগম্ভীরস্বরে সকলকে বিজ্ঞাপিত করিলেন—

হে সমাগত নরেন্দ্রগণ, আপনারা সকলে শ্রবণ করুন। এই ধনুৰ্বাণ ও লক্ষ্য উপস্থিত রহিয়াছে; যিনি আকাশ-যন্ত্রের ছিদ্ৰমধ্যদিয়া পঞ্চশর নিক্ষেপপূৰ্বক লক্ষ্যপাত করিতে পারিবেন, তাঁহাকেই আমার ভগিনী বরমালা প্রদান করিবেন।

তখন ত্রিভুবনললামভূতা কৃষ্ণার দৰ্শনে মোহিত নরপতিগণ পরস্পর জিগীষু হইয়া রাজাসন হইতে গাত্ৰোত্থান করিলেন। সভাস্থ সমস্ত লোকে মুগ্ধনয়নে কৃষ্ণার প্রতি একদৃষ্টে চাহিয়া রহিল।

এই সময়ে ধীমান কৃষ্ণ ইতস্তত দৃষ্টিপাত করিতে করিতে ব্রাহ্মণবেশধারী তেজঃপুঞ্জ পঞ্চ সুপুরুষকে জনসাধারণের মধ্যে উপবিষ্ট দেখিলেন, তাহাতে সহসা তাঁহার মনোযোগ আকৃষ্ট হইল। কিয়ৎকাল চিন্তামগ্ন থাকিয়া তিনি বাল্যসখা অৰ্জুনকে নিঃসন্দেহ চিনিতে পারিলেন এবং বলদেবকেও সে দিকে দৃষ্টিপাত করিতে ইঙ্গিত করিলেন। তখন বলদেবও কৃষ্ণের অনুমান সমর্থন করিলে, উভয়ে তাঁহাদের গৃহদাহ হইতে পরিত্রাণ সম্বন্ধে আশঙ্ক হইলেন।

একে একে দুর্যোধন, শাশ্ব, শল্য, বক্রাধিপ, বিদেহরাজ প্রভৃতি রাজতনয় কিরীট, হার, অঙ্গদ, ও চক্রবান্, প্রভৃতি বিবিধ অলংকারে ভূষিত হইয়া স্ব স্ব বলবীৰ্য প্রদৰ্শন

করিলেন। কিন্তু সেই ভীষণ কামুকে জ্যা-সংযোগ করা দূরে থাক্, উহাকে কিয়ৎপরিমাণ আনমিত করিতে না করিতেই উহার প্রবল প্রতিঘাতে তাঁহারা ইতস্তত বিক্লিপ্ত এবং তাঁহাদের আভরণসকল চতুর্দিকে বিস্তৃত হইতে লাগিল। ইহাতে বিফলমনোরথ রাজপুত্রগণ লজ্জিত ও নিস্তেজ হইয়া জ্যোপদীর আশা ত্যাগ করিলেন।

মহাধনুর্ধর কর্ণ রাজগণকে এইরূপে পরাভূত দেখিয়া সম্বর ধনুর নিকট উপস্থিত হইলেন। অনায়াসে তাহা উন্মোলন-পূর্বক তিনি সকলকে চমৎকৃত করিয়া সেই প্রচণ্ড কামুক জ্যায়ুক্ত করিলেন। পরে পঞ্চবাণ হস্তে লইয়া লক্ষ্যের নিকট গমনপূর্বক শরসঙ্কানে প্রবৃত্ত হইলে সকলে ভাবিল— ইনিই লক্ষ্য ভেদ করিয়া বরমাল্য প্রাপ্ত হইবেন। পাণ্ডবগণ কর্ণের কণ্ঠালাভ-সম্ভাবনায় নিতাস্ত অবসন্ন হইয়া পড়িলেন।

মহানুভবা জ্যোপদী সকলের মুখে—ইনি রাধেয়, ইনি অধিরথ-পালিত, ইনি সূতপুত্র—এইরূপ শ্রবণ করিয়া এবং অস্ত্রাস্ত্র রাজগণের অবজ্ঞার হাস্ত অবলোকন করিয়া সহস্র বলিয়া উঠিলেন—

আমি সূতপুত্রকে বরণ করিতে পারিব না।

এই কথা অভিমানী কর্ণের কর্ণগোচর হইবামাত্র তিনি ঈষৎ বিমর্ষহাস্তসহকারে তৎক্ষণাৎ ধনুর্বাণ পরিত্যাগপূর্বক স্তম্ভিতবৎ সূর্যের প্রতি একদৃষ্টে চাহিয়া রহিলেন।

ঈর্ষজ্বল আর থাকিতে পারিলেন না। তিনি ব্রাহ্মণবেশ বিস্তৃত হইয়া স্বীয় ক্ষত্রিয়তেজ ও কৃষ্ণার রূপমাধুরীর বশবর্তী

হইয়া সহসা উত্থানপূর্বক পরীক্ষাভূমির দিকে অগ্রসর হইতে লাগিলেন। ১৫

ইহাতে বিপ্রমণ্ডলীর মধ্যে মহা কোলাহল উপস্থিত হইল। কেহ চোৎকার করিয়া অর্জুনকে উৎসাহ দান করিতে লাগিলেন, কেহ বা বিমনা হইয়া বলিতে লাগিলেন—

অহো কী আশ্চর্য। সুবিখ্যাত ধর্ম্মধারী ক্ষত্রগণ যে বিষয়ে অসমর্থ হইলেন, তাহাতে অকুতান্ত্র ব্রাহ্মণকুমার কী প্রকারে কৃতকার্য হইবার চূরাশা করিতে পারে। ইহাকে নিবারণ করা যাউক।

অর্জুনের পক্ষাবলম্বীরা বলিলেন—

এই যুবার পীনশ্চক্ক দীর্ঘবাহু ও গতির উৎসাহ দেখিয়া আমাদের ভরসা হইতেছে। সকলে সুস্থির হইয়া ইহার কার্য অবলোকন করো।

এই কথায় সকলে শান্ত হইয়া অর্জুনকে মনোযোগ-সহকারে নিরীক্ষণ করিতে লাগিলেন।

অনন্তর অর্জুন প্রথমে বরপ্রদ মহাদেবকে প্রণাম করিয়া সেই ভীষণ শরাসনকে প্রদক্ষিণ করিলেন; পরে বাল্যবন্ধু কৃষ্ণের সন্মুখে দৃষ্টি আপনার প্রতি আবদ্ধ দেখিয়া প্রীত মনে ও মহা উৎসাহে কামূ'ক উত্তোলনপূর্বক ধর্ম্মবেদপারগ নৃসিংহ-সকলের নিফলপ্রযত্নকে লঙ্ঘা দিয়া তিনি নিমেষমধ্যে তাহাতে জ্যা-রোপণ করিলেন। এবং পাঁচটি বাণ গ্রহণপূর্বক শরসঙ্কান করিয়া সূর্য্যমান যজ্ঞের ছিত্রের মধ্য দিয়া কষ্টে দৃশ্য লক্ষ্য বিদ্ধ ও ভূতলে পাতিত করিলেন।

সভাময় মহা ছলস্থল পড়িয়া গেল। দেবগণ অজ্ঞানের মস্তকোপরি পুষ্পবর্ষণ করিতে লাগিলেন। সহস্র সহস্র ব্রাহ্মণ স্বীয় উত্তরীয় অজিন বিধূননপূর্বক মহোল্লাস প্রকাশ করিতে লাগিলেন। বাদকগণ শতঙ্গ তুষ্য বাদন এবং মুকঠ মৃত ও মাগধগণ স্তুতিপাঠ করিতে আরম্ভ করিল।

কৃষ্ণা অজ্ঞানের অতুলকান্তি সন্দর্শনে সহর্ষে তাঁহার গলে বরমালা অর্পণ করিলেন। দ্রুপদরাজও পার্থের অসাধারণ বল ও অদ্ভুত কৌশলে প্রীত হইয়া তাঁহাকে কন্যাদানের আয়োজনে প্রবৃত্ত হইলেন।

এদিকে পুত্রগণ ভিক্ষার্থে গমন করিয়া এত বিলম্বেও প্রত্যাবর্তন না করায় পৃথা কুন্তকারের গৃহে চিন্তিতাবস্থায় কালক্ষেপ করিতেছিলেন। রাত্রি যখন আগতপ্রায় তখন কৃষ্ণাকে লইয়া পাণ্ডবগণ ভার্গবালয়ের নিকটবর্তী হইলেন। গৃহের দ্বারে উপস্থিত হইয়াই উৎফুল্লবচনে তাঁহারা নিবেদন করিলেন—

মাতঃ, অত্ৰ এক পরমরমণীয় বস্তু ভিক্ষালব্ধ হইয়াছে।

পৃথা গৃহাভ্যন্তর হইতে সবিশেষ বিবেচনা না করিয়া প্রত্যুত্তর করিলেন—

বৎসগণ, যাহা প্রাপ্ত হইয়াছ, সকলে মিলিয়া তাহা ভোগ করো।

পরে কৃষ্ণাকে নয়নগোচর করিয়া—আমি কী কুর্ম করিলাম—ভাবিয়া তিনি যুধিষ্ঠিরকে কহিলেন—

হে পুত্র, তোমরা কী আনিয়াছ না জানায়, আমি সকলে

মিলিয়া ভোগ করিবার কথা বলিয়া ফেলিয়াছি। এক্ষণে আমার কথা মিথ্যা না হয় অথচ অধর্ম না হয়, এমন কিছু বিধান করো।

মতিমান যুধিষ্ঠির কিয়ৎকাল চিন্তা করিয়া স্বার্থত্যাগ-পূর্বক কহিলেন—

হে অর্জুন, দ্রোণদৌ তোমারই জয়লক্ষ ধন, অতএব তুমিই যথারীতি ইহার পাণিগ্রহণ করো।

অর্জুন জ্যেষ্ঠের স্থায় একমাত্র ধর্মের প্রতি দৃষ্টি রাখিয়া কহিলেন—

হে অর্ঘ্য, আমাকে অধর্মে লিপ্ত করিয়ে না। জ্যেষ্ঠেরই অগ্রে বিবাহ করা উচিত। অতএব আমাদের এবং পাণ্ডালে-শ্বরের হিতের প্রতি দৃষ্টি রাখিয়া কর্তব্য স্থির করো। আমা-দিগকে তোমার একান্ত বশব্দ জানিবে।

যুধিষ্ঠির ভ্রাতৃগণকে বিষম্বদনে উপবিষ্ট দেখিয়া তাঁহাদের মানসিক অবস্থা বুঝিয়া লইলেন। এই উপলক্ষে পাছে ভ্রাতৃ-বিচ্ছেদের সূচনা হয়, এই ভয়ে বিশেষ চিন্তান্বিত হইয়া যুধিষ্ঠির তাঁহাদিগকে নির্জনে লইয়া গিয়া কহিলেন—

আমি বিবেচনা করি এই দ্রোণদৌ আমাদের সকলেরই হউক। বর্তমান সমস্তার এই একমাত্র উপায় দেখিতেছি, ইহাতে মাতারও বাক্য রক্ষা হইবে, আমাদের মধ্যেও কাহার কোনো ঈর্ষার কারণ থাকিবে না।

এই সময়ে যাদবশ্রেষ্ঠ কৃষ্ণ ও বলদেব, পাণ্ডবগণ স্বয়ংবর-সভা হইতে কোথায় গমন করিয়াছেন, অনুসন্ধান করিতে

করিতে এইস্থানে উপস্থিত হইলেন। পাণ্ডবদিগকে একত্র দেখিয়া দ্রুতগমনে অগ্রসর হইয়া তাঁহারা যুধিষ্ঠিরাদি ভ্রাতৃগণকে যথাযোগ্য সম্ভাষণ করিলে সকলের আনন্দের আর সীমা রহিল না। তখন যুধিষ্ঠির কুশলজিজ্ঞাসাস্থে প্রশ্ন করিলেন—

হে বাসুদেব, ছদ্মবেশী আমাদিগকে তোমরা কিরূপে জ্ঞাত হইলে।

কৃষ্ণ হাস্য সহকারে উত্তর করিলেন—

রাজন্, অগ্নি প্রকৃত থাকিলেও অনায়াসেই পরিজ্ঞাত হয়। পাণ্ডব বাতীত কোন মনুষ্য এইরূপ পরাক্রম প্রদর্শন করিতে পারে। হে কুরুশ্রেষ্ঠ, আমাদের ভাগ্যবলে ধাতু-রাষ্ট্রগণের দুর্ভিক্ষ ব্যর্থ হইয়াছে এবং তোমরা জুহুগৃহ হইতে পরিত্রাণ পাইয়াছ। তোমাদের হতপ্রায় মঙ্গল পুনর্বীর সমুজ্জল হউক। এক্ষণে অনুমতি করো, আমরা শিবিরে প্রতিগমন করি।

এই বলিয়া ভ্রাতৃদ্বয় প্রস্থান করিলেন।

পাণ্ডবগণ যখন কৃষ্ণাকে লইয়া সভাস্থল হইতে চলিয়া আসিয়াছিলেন, তখন পরিচয় পাইবার উদ্দেশে ধৃষ্টদ্যুম্ন অলক্ষিতভাবে তাঁহাদিগকে অনুসরণ করেন এবং ভার্গবালয়ে তাঁহাদিগকে প্রবেশ করিতে দেখিয়া তিনি নিকটবর্তী নিভৃত স্থানে লুকাইয়া থাকেন। ঐ স্থান হইতে কথোপকথনের কিয়দংশ শুনিতে পাইয়া তিনি পিতার নিকট সমস্ত বৃত্তান্ত নিবেদন করিবার জন্য সহর রাজসভায় প্রত্যাগমন করিলেন।

কৃষ্ণাকে কতিপয় অজ্ঞাতকুলশীল ব্রাহ্মণতনয়ের সহিত

প্রস্থান করিতে দেখিয়া দ্রুপদ বিষণ্ণচিত্তে বসিয়া ছিলেন।
দৃষ্টদৃষ্ট্যম্বে দেখিবামাত্র তিনি সাগ্রহে প্রশ্ন আরম্ভ করিলেন—

হে পুত্র, কৃষ্ণা কাহার সহিত কোথায় গমন করিলেন।
কুসুমমালা আশানে পতিত হয় নাই তো ?

দৃষ্টদৃষ্ট্যম্বে আশ্বাস প্রদানপূর্বক কহিলেন—

হে পিতা, পরিতাপের কোনই কারণ দেখিলাম না।
আমি ইহাদের পদানুসরণ করিয়া যে-সকল আচার-
বাবহার ও কথোপকথনের ভঙ্গি দেখিতে লাগিলাম, তাহাতে
ইহাদিগকে ক্ষত্রকুলজাত বলিয়া অনুমান হইতেছে।
কিয়দ্বিবসাবধি জনশ্রুতি শুনা যাউতেছে যে, পাণ্ডবগণ
গৃহদাহ হইতে উদ্ধার পাইয়া প্রচ্ছন্নবেশে ভ্রমণ করিতেছেন।
নিশ্চয় ইহারা সেই পঞ্চভ্রাতা, আমাদেরই ভাগ্যবলে
কৃষ্ণাকে জয় করিয়াছেন। অজুঁন ব্যতীত কর্ণের তেজ
কে সহ্য করিতে সমর্থ। পাণ্ডব ব্যতীত কাহারো দুর্যোধন-
প্রমুখ নরেন্দ্রশ্রেষ্ঠগণের দীপ্তি আচ্ছাদন করিয়া রাখিতে
পারে।

দ্রুপদ তখন পরিতুষ্ট মনে পুরোহিতকে আহ্বানপূর্বক
কুন্তকাবের কুটীরে প্রেরণ করিয়া তাঁহাকে লক্ষ্যভেদকারীর
কুলশীল জিজ্ঞাসা করিয়া আসিতে বলিলেন।

পুরোহিত পাণ্ডবসমীপে উপনীত হইয়া বাগাড়ম্বর-
পূর্বক তাঁহাদের ভূরি ভূরি প্রশংসা করিয়া কৌশলে বলিতে
লাগিলেন—

মহাত্মা পাণ্ডু দ্রুপদরাজের প্রিয়সখা ছিলেন, অতএব

অজুনের সহিত কৃষ্ণার বিবাহ হয়, ইহাই তাঁহার চিরকাল ইচ্ছা ছিল।

তখন যুধিষ্ঠির ভীমকে পুরোহিতের পাণ্ডু এবং অর্ঘ্য প্রদান করিতে বলিয়া কহিলেন—

পাঞ্চালরাজের মনোরথ সিদ্ধ হইয়াছে। অজুনই তাঁহার চুহিতাকে জয় করিয়াছেন।

এইরূপ কথাবাতা হইতেছে, এমন সময় দ্রুপদপ্রেরিত কাঞ্চনপদ্মখচিত সদশ্বযুক্ত রাজোচিত রথদ্বয় এবং বিবিধ উৎকৃষ্ট খাদ্যদ্রব্য লইয়া আর এক দূত উপস্থিত হইয়া বলিল—

মহারাজ পাঞ্চালাধিপতি দ্রৌপদীর পাণিগ্রহণার্থে আপনা-দিগকে প্রাসাদে সাদর আহ্বান করিতেছেন; অতএব আর বিলম্ব করিবেন না।

এই কথা শ্রবণে পুরোহিতকে অগ্রে বিদায় দিয়া পৃথা ও কৃষ্ণাকে এক রথে আরোহণ করাইয়া ভ্রাতৃগণ অপর রথ অবলম্বনপূর্বক রাজপ্রাসাদাভিমুখে যাত্রা করিলেন।

অজিনোত্তরীয় পুরুষপ্রবীর পাণ্ডুতনয়গণকে দেখিয়া রাজা, রাজকুমার, সচিব, মুহূর্ত্তবর্গ এবং ভৃত্যগণ আনন্দ-প্রবাহে নিমগ্ন হইলেন। কুন্তী দ্রৌপদীর সহিত অন্তঃপুরে প্রবিষ্ট হইয়া স্ত্রীগণদ্বারা উপযুক্তরূপে সংকৃত হইলেন।

অনন্তর কুন্তী ও দ্রৌপদীকে অন্তঃপুর হইতে আনয়নপূর্বক দ্রুপদ সকলের সমক্ষে যুধিষ্ঠিরকে বলিলেন—

অত শুভদিন, অতএব অজুন অতাই কৃষ্ণার পাণিগ্রহণ করুন।

যুধিষ্ঠির বলিলেন,—রাজন্, জ্যেষ্ঠ আমি অবিবাহিত থাকিতে অর্জুনের কিরূপে বিবাহ হইতে পারে। ৩৫

তদন্তরে দ্রুপদ কহিলেন—

হে সৌম্য, তবে তুমিই আমার কন্যাকে বিবাহ করো, অথবা অন্য কোন্ কন্যা তোমার মনোনীত, তাহা অনুমতি করো।

তখন যুধিষ্ঠির বলিতে লাগিলেন—

মহাশয়, আমার বা ভীমসেনের কাহারও বিবাহ হয় নাই। অর্জুন আপনার কন্যাকে জয় করিয়াছে বটে, কিন্তু আমাদের মধ্যে ভ্রাতৃস্নেহবন্ধন এত অধিক যে, কেহ কোনো উৎকৃষ্ট বস্তু প্রাপ্ত হইলে আমরা সকলে মিলিয়া তাহা ভোগ করিয়া থাকি। মাতাও আমাদের সকলকে একত্র হইয়া কৃষ্ণাকে বিবাহ করিতে অনুমতি দিয়াছেন, সুতরাং আমাদের মধ্যে এই চিরপ্রচলিত নিয়ম আমরা এস্থলে লঙ্ঘন করিতে পারিব না। আপনার কন্যা ধর্মত আমাদের সকলেরই পত্নী হইবেন। অতএব অগ্নি সাক্ষী করিয়া জ্যেষ্ঠানুক্রমে সকলেরই সহিত তনয়ার পরিণয়-ক্রিয়া সম্পাদন করুন।

দ্রুপদ কহিলেন,—হে ধর্মরাজ, তোমার যদি ইহা প্রকৃতপক্ষে সদনুষ্ঠান বলিয়াই বিবেচনা হয়, তবে আমি আর কী বলিব। যাহা হউক অতঃপুর্ন পুনরায় এ বিষয়ে মাতার সহিত বিশেষরূপে পর্যালোচনা করিয়া দেখো। কল্য তোমরা সকলে মিলিয়া যাহা কর্তব্য স্থির করিবে, আমি তাহাই করিব।

এবিষয়ে নানারূপ কথোপকথন হইতেছে, এমন সময়ে মহর্ষি দ্বৈপায়ন তথায় উপস্থিত হইলেন। তাঁহাকে দেখিয়া দ্রুপদাদি পাঞ্চালগণ এবং যুধিষ্ঠিরপ্রমুখ পাণ্ডবগণ গাত্ৰোত্থান-পূর্বক ভক্তিভরে অভিবাদন করিলেন।

ব্যাসদেব সমস্ত অবস্থা অবগত হইয়া সকলকে আশ্বাস প্রদানপূর্বক দ্রুপদকে একান্তে লইয়া দেশকাল ও অবস্থা-ভেদে ধর্মের বিভিন্ন গতি সম্বন্ধীয় নিগূঢ় তত্ত্বসকল সুস্পষ্টরূপে বুঝাইয়া দিলেন।

অনন্তর দ্রুপদরাজ সভায় উপস্থিত হইয়া সকলের সমক্ষে কহিলেন—

পাণ্ডবগণ বিধিপূর্বক কৃষাকে বিবাহ করুন, আমার কন্যা তাঁহাদের নিমিত্তই জন্মগ্রহণ করিয়াছেন।

বিবাহব্যাপার সমাধানান্তে দ্রুপদরাজ ভ্রাতাদিগকে বহুবিধ ধন, মহোন্নত হস্তী, বস্ত্রালাংকারবিভূষিত দাসী ও অশ্বচতুষ্টয়যোজিত সুবর্ণময় রথ প্রদান করিলেন। অভাগত-বৃন্দকেও পৃথক্ পৃথক্ ধন ও মহামূল্য পরিচ্ছদাদি বিতরণ-পূর্বক বিদায় করা হইল।

পাণ্ডবগণ সেই দেবতুল্য ভ্রাতার লালচয় করিয়া পরমসুখে পাঞ্চালরাজ্যে কালযাপন করিতে লাগিলেন। পাঞ্চাল ও পাণ্ডবগণ পরস্পরকে সহায় পাইয়া শত্রুভয় হইতে মুক্ত হইলেন। পুরবাসিগণ সর্বদাই কুন্তীর নাম সংকীর্তনপূর্বক চরণবন্দন করিতেন।

এদিকে চরের দ্বারা হস্তিনাপুরে সংবাদ পৌঁছিল যে

পাণ্ডুনয়নগণ জীবিত আছেন। এবং তাঁহারা ই দ্রৌপদীর পাণিগ্রহণপূর্বক পাঞ্চালরাজ্যে বাস করিতেছেন।

এই সংবাদ শুনিয়া ধৃতরাষ্ট্র বিহ্বরকে কহিলেন—হে বিহ্বর, মহাবীর পাণ্ডুপুত্রগণ আমারও পুত্রস্থানীয় এবং এ রাজ্যেরও সমাংশভাগী সে বিষয়ে কোনো সন্দেহ নাই, অতএব তুমি স্বয়ং গিয়া সংকারপ্রদর্শনপূর্বক কুন্তী ও দ্রৌপদীসমভিব্যাহারে পাণ্ডুনন্দনদিগকে আনয়ন করো।

অনন্তর ধর্মজ্ঞ ও সর্বশাস্ত্রবিশারদ বিহ্বর ধৃতরাষ্ট্রের আদেশ অনুসারে বিবিধ রত্ন ও ধনসম্পত্তি গ্রহণপূর্বক পাঞ্চালরাজ্যে উপনীত হইয়া দ্রুপদকে সংবর্ধনা করিলেন। এবং পাণ্ডবদিগকে নয়নগোচর করিয়া স্নেহভরে আলিঙ্গনপূর্বক কুশলপ্রশ্ন করিলেন। তৎপরে কুন্তী দ্রৌপদী পাণ্ডব ও পাঞ্চালদিগকে যথানীত ধন ও অলংকারসকল প্রদান করিয়া সকলের সমক্ষে দ্রুপদকে নিবেদন করিলেন—

মহারাজ, পুত্র ও অমাত্য সহ মহারাজ ধৃতরাষ্ট্র আপনাদের সহিত এই সমৃদ্ধ সংস্থাপনে সান্তিশয় প্রীত হইয়া বারংবার আপনার কুশল জিজ্ঞাসা করিয়াছেন। কুরু-প্রধান ভীষ্ম আপনার সর্বাঙ্গীন মঙ্গল কামনা করেন, এবং আপনার সখা দ্রোণ আপনাকে উদ্দেশে আলিঙ্গন করিতেছেন। এক্ষণে বহুদিবসের বিয়োগান্তে সকলে পাণ্ডুনন্দনদিগকে দেখিবার জন্য অতীব উৎসুক আছেন; ইহারাও বহুকাল প্রবাসে থাকিয়া রাজধানীতে গমন করিতে ব্যগ্র। কৌরবগণ ও পৌরজন পাঞ্চালীকে নয়নগোচর করিবার জন্য ব্যাকুল চিত্তে

প্রতীক্ষা করিতেছেন। অতএব আপনি অনতিবিলম্বে সস্ত্রীক পাণ্ডবগণকে স্বগৃহে গমন করিবার অনুমতি প্রদান করুন।

দ্রুপদ কহিলেন—হে মহাপ্রাজ্ঞ বিদুর, তুমি যাহা কহিলে তাহা যথার্থ। কৌরবগণের সহিত বৈবাহিক সম্বন্ধে আমিও যথেষ্ট পরিতোষ লাভ করিয়াছি। আর মহাত্মা পাণ্ডবগণের স্বরাজ্যে গমন করা কর্তব্য তাহার সন্দেহ নাই।

তখন যুধিষ্ঠির বিনয়পূর্বক কহিলেন—

হে পাঞ্চালেশ্বর, আমি এবং আমার অন্তঃকণ আনন্দে আপনারই অধীন, সুতরাং আপনি যাহা আজ্ঞা করিবেন, আমরা তাহাই শিরোধার্য করিব।

পরে কৃষ্ণও হস্তিনাপুরগমনে সম্মতি প্রকাশ করিলে মাতৃসমেত পাণ্ডবগণ কৃষ্ণাকে লইয়া কৃষ্ণ ও বিদুর সমভিব্যাহারে যাত্রা করিলেন।

তাহাদের আগমনবার্তা শ্রবণে ধৃতরাষ্ট্র তাহাদের প্রত্যাদ-গমনের নিমিত্ত অশ্রান্ত কৌরবগণের সহিত দ্রোণ কৃপকে প্রেরণ করিলেন।

তদনন্তর পাণ্ডবগণ পিতামহ ভীষ্ম, জ্যেষ্ঠতাত ধৃতরাষ্ট্র এবং অশ্রান্ত গুরুজনের পাদবন্দন করিয়া অনুমতি গ্রহণপূর্বক বিশ্রামার্থে গৃহমধ্যে প্রবেশ করিলেন। তাহারা সম্পূর্ণ বিশ্রান্ত হইলে ভীষ্ম ও ধৃতরাষ্ট্র সকলকে আহ্বানপূর্বক কহিলেন—

বৎস যুধিষ্ঠির, তোমরা অর্ধেক রাজ্য গ্রহণপূর্বক খাণ্ডবপ্রস্থে রাজধানী স্থাপন করিয়া পরমশুখে রাজত্ব করিতে

থাকো, তাহা হইলে হুঁযোধনাদির সহিত তোমাদের বিবাদের কোনো কারণ থাকিবে না। তোমরা স্বীয় ভূজবলে সকল অনিষ্ট হইতে অনায়াসে আত্মরক্ষা করিতে পারিবে।

অধঃরাজ্যভোগের অনুমতি পাইয়া পাণ্ডবগণ রাজাজ্ঞা স্বীকার করিয়া গুরুজনদিগকে প্রণিপাতপূর্বক কৃষ্ণের সহিত অরণ্যপথে খাণ্ডবপ্রস্থানভিমুখে প্রস্থান করিলেন। তাঁহাদের আগমনে নগরী অলংকৃত ও সুসজ্জিত হইল। বিস্তীর্ণ রাজপথ, সুধা-ধবলিত ভবন ও চতুঃপার্শ্বস্থ আম্র নীপ অশোক চম্পক বকুল প্রভৃতি বৃক্ষরাজি অবলোকন করিয়া পাণ্ডবগণ পরম প্রীত হইলেন।

পাণ্ডবদের আগমন সংবাদে তথায় বহু ব্রাহ্মণ বণিক ও শিল্পী বাস করিতে আসিল। কৃষ্ণ ও বলদেব পাণ্ডবদিগকে রাজ্যাভিষিক্ত দেখিয়া বিদায় লইয়া দ্বারকায় প্রতিগমন করিলেন। সত্য-প্রতিজ্ঞ যুধিষ্ঠির সিংহাসনাক্রুত হইয়া ভ্রাতৃ-চতুষ্টয়-সমভিব্যাহারে ধর্মাস্ত্রসারে প্রজাপালন করিতে লাগিলেন। ✓

৪

একদা কৃষ্ণ শিল্পনিপুণ ময়দানবকে আদেশ করিলেন—
হে শিল্পকর্মবিশারদ, তুমি মহারাজ যুধিষ্ঠিরের জন্ত খাণ্ডব-
প্রস্থে এমন এক সভা নির্মাণ করিয়া দাও, যাহা কেহ পূর্বেও

দেখে নাই এবং বহু চেষ্টায়ও ভবিষ্যতে অনুকরণ করিতে সক্ষম হইবে না।

ময়দানব কৃষ্ণের এই অনুজ্ঞা প্রাপ্ত হইয়া সভা নির্মাণের আয়োজনে প্রবৃত্ত হইল।

ময়দানব পূর্বোক্তর দিগ্বিভাগে প্রস্থান করিয়া কৈলাসের উত্তরাংশে মৈনাক-সন্নিধানে দানবরাজ্যাস্তর্গত এক সুমহান পর্বতে উপনীত হইল। অদূরস্থিত বিন্দুনাথক সরোবরের নিকটে পূর্বে দানবগণ এক মহাযজ্ঞ অনুষ্ঠান করেন, তদুপলক্ষে রচিত সভামণ্ডপের অত্যাশ্চর্য দ্রব্যসম্ভার তথায় রক্ষিত ছিল।

ইহা হইতে ইচ্ছানুরূপ দ্রব্যজাত আহরণপূর্বক ময় খাণ্ডবপ্রস্থে উপস্থিত হইয়া যুদ্ধিষ্ঠিরের সহিত সাক্ষাৎ করিল এবং তাঁহার দ্বারা যথেষ্ট সংকৃত হইয়া পুণ্যদিবসে সভাভূমির পরিসর পঞ্চসহস্র হস্ত পরিমাপ করিয়া কৃষ্ণের অভিপ্রায় অনুসারে কতক দিব্য, কতক মানুষ্য, কতক আশুরছন্দে এক অলোকসামান্য সুবর্ণময় অত্যন্ত বৃক্ষাকার-স্তম্বরক্ষিত মণি-খচিত সভামণ্ডপ-নির্মাণ-কার্য আরম্ভ করিল।

ক্রমে মণ্ডপস্থ বিবিধ ক্ষটিক মণিমাণিকা অলংকৃত কুট্টিম ও ভিত্তি অপূর্ব শোভা ধারণ করিতে লাগিল। সভার মধ্যে ক্ষটিকময়সোপান-বিশিষ্ট ও রত্নমণ্ডিত-পুরিসর-বেদিকা-শোভিত এক স্বচ্ছ জল কৃত্রিম সরোবর সন্নিবেশিত হইল। মণ্ডপের চতুর্দিকস্থিত ভূমি পদ্মবিশিষ্ট বিবিধ পুষ্করিনী, ছায়াসম্পন্ন তরুরাজি ও সুরভি কাননের দ্বারা অলংকৃত

হওয়ায় জলজ স্থলজ পুষ্পগন্ধযুক্ত সমীরণে সভাস্থলী
আমোদিত হইয়া উঠিল।

এদিকে চতুর্দশ মাস অবিশ্রাস্ত কার্যে ব্যাপ্ত থাকিয়া
অবশেষে ময়দানব যুধিষ্ঠিরকে সভাসমাপ্তির সংবাদ প্রেরণ
করিলে ধর্মরাজ শ্রীত হইয়া নানাदिदेशাগত ব্রাহ্মণগণকে
ঘৃত পায়স ফলমূল যুগমাংসাদি ভোজন ও বস্ত্রমাল্যাदिদানে
পরিভূপ্ত করিয়া সভাপ্রবেশ করিলেন। তথায় গগনস্পর্শী
পুণ্যাচরনিত উদ্বোধিত হইয়া গীতবাহু পুষ্পাদির দ্বারা
দেবার্চনা ও দেব-স্থাপনা করিলেন।

একদা রাজা দুর্যোধন শকুনির সহিত ভ্রমণ করিতে
করিতে ক্রমে ক্রমে যুধিষ্ঠিরের ময়দানবনির্মিত সভার
সৌন্দর্য সকল পর্যবেক্ষণ করিতে লাগিলেন। তিনি
তাহাতে যে-সকল অত্যাশ্চর্য নির্মাণচন্দ দেখিতে পাইলেন,
তাহা তৎপূর্বে কখনো দৃষ্টিগোচর করেন নাই।

এক গৃহের ফটিকময় কুটিমে ফটিকদলশালিনী প্রকুল-
নলিনী দেখিয়া জলভ্রমে তথায় সমুপগে পদবিক্ষেপ করিতে
গিয়া সহসা ভূপতিত হইলেন। ইহাতে ভীম ও তাহার
অনুচরবর্গ হাস্য করিলেন।

আর এক সময়ে ফটিকময় ভিত্তিতে দ্বার ভ্রম করিয়া
তথা হইতে বহির্গমনের চেষ্টা করায় মস্তকে কঠিন আঘাত
প্রাপ্ত হইয়া বিঘ্নিত হইলে সহদেব দ্রুতগমনে আসিয়া
তাহাকে ধারণ করিলেন।

পরে কৃত্রিম সরোবরের স্বচ্ছজলকে ফটিক ভাবিয়া সবস্ত্রে

তাহাতে পতিত হইলেন। তখন ভীমার্জুন বা নকুল সহদেব কেহই হস্ত্য সংবরণ করিতে পারেন নাই। সে সময় যুধিষ্ঠিরের আজ্ঞায় কিঙ্করগণ সত্বর উত্তমোত্তম বস্ত্র আনিয়া তাঁহাকে প্রদান করিল।

ইহার পর দুর্যোধন আর বুদ্ধিস্থির রাখিতে না পারিয়া সর্বত্রই জলভাগে স্থলের এবং স্থলভাগে জলের আশঙ্কা করিতে লাগিলেন এবং স্থানে স্থানে ফটিকভিত্তিপ্রায়ে হস্তদ্বারা বিঘটিত করিতে গিয়া পতনোন্মুখ হইলেন।

এই সকল ছরবস্থা দেখিয়া পাণ্ডবগণ অনেকপ্রকার উপহাস করিতে আরম্ভ করিলেন। কোপনস্বভাব দুর্যোধন তাহা যেন শুনিয়াও শুনিলেন না, কিন্তু প্রকৃতপক্ষে তাহা মর্মস্থলে বিদ্ধ হইয়া তাঁহার মনোমধ্যে অনেক প্রকার দুর্মতির উদ্বেক করিতে লাগিল। অনন্তর বিবিধ অদ্ভুত ব্যাপার সন্দর্শনপূর্বক যুধিষ্ঠিরের অন্তঃপ্রাণ গ্রহণ করিয়া দুর্যোধন হস্তিনাপুরে প্রস্থান করিলেন ১৫৭

পথে তিনি মহাত্মা পাণ্ডবগণের মহিমা, পাণ্ডবগণের বশবর্তিতা, যুধিষ্ঠিরের ঐশ্বর্য এবং সভার অদৃষ্টপূর্ব শোভা চিন্তা করিতে করিতে অতিশয় বিমর্ষচিত্তে গমন করিতে লাগিলেন। শকুনি তাঁহাকে তদবস্থা দেখিয়া কহিলেন—

হে দুর্যোধন, তুমি কী নিমিত্ত একরূপ বিষণ্ণ মনে গমন করিতেছ।

দুর্যোধন কহিলেন—মাতুল, এই সমাগরা বস্করাকে

যুধিষ্ঠিরের নিতান্ত বশব্দ এবং এই ইন্দ্রযজ্ঞসদৃশ মহাবজ্র
নিরীক্ষণে আমি অমর্যানে দগ্ধ হইতেছি । ১২১:৫১

শকুনি দুর্যোধনকে সাস্থনা দিয়া কহিলেন—

হে দুর্যোধন, পাণ্ডবগণ তোমারই জ্ঞায় রাজ্যার্থ প্রাপ্ত
হইয়া নিজচেষ্টায় তাহা বধিত করিয়াছে, ইহাতে পরি-
বেদনার বিষয় কী আছে, বরং ইহাতে আশ্বাসের যথেষ্ট
কারণ বর্তমান । তুমিও বীর, তুমি সহায়-সম্পন্ন, তুমিই বা
কেন অশুভ ভ্রমগুল জয় করিতে সক্ষম হইবে না ।

তখন দুর্যোধন কিঞ্চিৎ আশ্বস্ত হইয়া কহিলেন—

হে রাজন, তুমি যদি অনুমতি করো, আমি তোমাকে
এবং অন্ত্যাত্ম মুহূর্ত্তবর্গকে সহায় করিয়া এখনই পাণ্ডবদিগকে
পরাজয় করি ।

দুর্যোধনের আগ্রহাতিশয় দেখিয়া শুবলান্বজ শকুনি
ঈষৎ হাস্ত সহকারে কহিলেন—

হে রাজন, সমিত্র পাণ্ডবগণ একত্র হইলে তাহারা
সম্মুখসমরে দেবগণেরও অজেয়, অতএব একটু বিবেচনাপূর্বক
কার্য করিতে হইবে । যে উপায়ে যুধিষ্ঠিরকে পরাস্ত করা
সম্ভব, তাহাই অবলম্বন করা আবশ্যক ।

এই কথায় দুর্যোধন আশ্লাদে উচ্ছ্বসিত হইয়া বলিয়া
উঠিলেন—

তুমি যে উপায় বিধান করিবে, আমি ও আমার সহায়বর্গ
তাহারই অনুষ্ঠান করিব ।

তখন ধৃত শকুনি বলিতে লাগিলেন—

রাজা যুধিষ্ঠির দ্যুতক্রীড়া প্রিয়, কিন্তু তাহাতে তাঁহার নৈপুণ্য নাই। আমি অক্ষক্রীড়ায় বিশেষরূপ দক্ষ, অতাবধি ইহাতে কেহই আমাকে পরাস্ত করিতে পারে নাই। অতএব যুধিষ্ঠিরকে পাশক্রীড়া নিমিত্ত আহ্বান করো, আহূত হইলে তিনি অনিচ্ছা থাকিলেও লজ্জায় নিবৃত্ত হইতে পারিবেন না, তখন আমি তোমার নিমিত্ত অক্ষকৌশল প্রদর্শনপূর্বক যুধিষ্ঠিরের প্রদীপ্ত রাজলক্ষ্মী জয় করিয়া লইব। কিন্তু এ বিষয়ে তোমার পিতাকে পূর্বাহু সম্মত করা আবশ্যিক, তাঁহার অনুজ্ঞা লইয়া যুধিষ্ঠিরকে নিমন্ত্রণ করা যাউন।

দুর্যোধন কহিলেন—পিতার নিকট আমি একরূপ প্রস্থান করিতে সাহস করি না, তুমি উপযুক্ত অবসর বুঝিয়া তাঁহাকে সম্মত করাষ্টবে।

এই যুক্তি অনুসারে রাজধানীতে প্রত্যাগত হইবার পর একদিন শকুনি ধৃতরাষ্ট্রকে বলিতে লাগিলেন—

মহারাজ, দুর্যোধন ক্রশ, বিবর্ণ ও সর্বদা চিন্তাপরবশ হইয়া পড়িতেছে। জ্যেষ্ঠপুত্রের শোকের কারণ আপনার পরিত্রাত হওয়া কত ব্যা।

ধৃতরাষ্ট্র অতিশয় উদ্বিগ্ন হইয়া দুর্যোধনকে আহ্বানপূর্বক জিজ্ঞাসা করিলেন—

বৎস, কী নিমিত্ত তুমি কাতর হইয়াছ, আমার যদি শ্রোতব্য হয় তো বলো। তোমার মাতুল কহিতেছেন যে তুমি পাণ্ডুর ও ক্রশ হইয়া যাউতেছ, কিন্তু আমি তো চিন্তা করিয়াও তোমার শোকের কারণ দেখি না। এই রাজ্যের সমস্ত ঐশ্বর্য

তোমাতেই প্রতিষ্ঠিত, তোমার ভ্রাতৃগণ ও রাজপুরুষগণ তোমার অনুগত, যাবতীয় ভোগ্যবস্তু তোমার ইচ্ছামাত্র সুলভ, তবে কী নিমিত্ত দীনচিন্তে কানক্ষিপ করিতেছ।

তহুত্তরে দুর্যোধন কহিলেন—

হে তাত, আমি যেদিন যুধিষ্ঠিরের দীপ্যমান রাজলক্ষ্মী দর্শন করিয়াছি, তদবধি আর ভোগ বিষয় আমাকে তৃপ্ত করে না।

পুত্রের দৃশ্যে ধৃতরাষ্ট্রকে একান্ত ব্যথিত দেখিয়া শকুনি স্বেযোগ বুঝিয়া দুর্যোধনকে সম্বোধনপূর্বক বলিতে লাগিলেন—

হে সত্যপরাক্রম, পাণ্ডবদের যে অনুপম ঐশ্বর্য দৃষ্টিগোচর করিতেছ, তাহা প্রাপ্ত হওয়া নিতান্ত অসম্ভব নহে। যুধিষ্ঠির অক্ষকৌড়াপ্রিয় আমিও দ্যুতজ্ঞ, অতএব উহাকে কৌড়ার্থ আহ্বান করো, দেখা যাক আমি উহাকে পরাজয় করিয়া তোমার নিমিত্ত সেই দিব্য সমৃদ্ধি আনয়ন করিতে পারি কি না।

শকুনির বাক্যাবসানমাত্র দুর্যোধন পিতাকে কহিতে লাগিলেন—

হে পিতঃ, অক্ষবিং গান্ধাররাজের এ প্রস্তাব সংগত এবং সম্ভবপর, অতএব আপনি এ বিষয়ে ইহাকে অনুমতি প্রদান করুন।

ধৃতরাষ্ট্র পুত্রের উদ্বিগ্ন দেখিয়া তাঁহাকে শাস্ত করিবার জন্ত তদন্ততনু হইয়া অনুচরবর্গকে আহ্বান করিয়া বলিলেন—

শিল্পিগণকে অবিলম্বে স্থূণাসহস্রশোভিত শতদ্বারবিশিষ্ট রত্নাস্তরণমণ্ডিত এক ক্ষটিকময় ক্রীড়াগৃহ নির্মাণ করিতে বলিয়া দাও । ১১

বিহুর দ্যুতক্রীড়া-সমাচার অবগত হইয়া চিন্তাকুলচিত্তে দ্রুতগমনে জ্যেষ্ঠ ধৃতরাষ্ট্রের নিকট উপস্থিত হইয়া ব্যগ্রভাবে বলিতে লাগিলেন—

মহারাজ, আপনার এ সংকল্পের অনুমোদন করিতে পারিতেছি না। এই ক্রীড়া উপলক্ষে আপনার পুত্রগণের মধ্যে ঘোর বৈরানল প্রজ্জ্বলিত হইবার সম্ভাবনা, এখনও সময় থাকিতে উহা নিবারণ করুন।

ধৃতরাষ্ট্র হৃষ্যোধনকে নিবারণ করা অসম্ভব জানিয়া বিহুরের পরামর্শ অগ্রাহ্য করিয়া কহিলেন—

হে বিহুর, তুমি এ সংকল্পকে আমার বলিয়া জ্ঞান করিতেছ কেন। সুকলই দৈবের হাত, দৈব হইতেই ইহা ঘটিয়াছে—দৈব সুপ্রসন্ন থাকিলে কোনো বিপদ ঘটিবে না, অতএব তুমি নির্ভয়ে খাণ্ডবপ্রাস্থ গমনপূর্বক যুধিষ্ঠিরকে ক্রীড়ার্থে আমার নিমন্ত্রণ জ্ঞাপন করো।

অনন্তর বিহুর ধৃতরাষ্ট্রকর্তৃক নিযুক্ত হইয়া অনিচ্ছাসহেও অশ্বারোহণে পাণ্ডবগণের রাজধানীতে উপস্থিত হইলেন এবং কুবেরভবনোপম রাজপ্রাসাদে প্রবিষ্ট হইয়া ধর্মাস্থা যুধিষ্ঠিরের সমীপবর্তী হইলেন।

বিহুর কহিলেন, মহাস্থা ধৃতরাষ্ট্র তোমার অক্ষয়কুশল প্রদ্বপূর্বক তোমাকে ভ্রাতৃগণের সহিত দ্যুতক্রীড়ার্থে নিমন্ত্রণ

করিতেছেন। তথায় তোমার সভার অনুরূপ ক্রীড়া-সভা দেখিতে পাইবে এবং তোমাদের দর্শনে কৌরবগণের প্রীতির পরিসীমা থাকিবে না। তোমাকে এই কথা বিজ্ঞাপনার্থে আমি আসিয়াছি, এক্ষণে তোমার যাহা অভিপ্রায় বলা।

যুধিষ্ঠির কহিলেন—মহাশয়, দ্যুতক্রীড়া কলহের কারণ হইয়া থাকে, অতএব উহাতে প্রবৃত্ত হওয়া কি আপনার ভালো বিবেচনা হয়।

তদন্তরে বিহুর বলিলেন—

দ্যুত যে অনর্থের মূল, তাহা আমি বিলক্ষণ অবগত আছি, আমি ধৃতরাষ্ট্রকে এবিষয়ে নিবারণ করিবার চেষ্টাও করিয়াছি, কিন্তু তিনি আমার কথা গ্রাহ্য করেন নাই। এক্ষণে তোমার যাহা শ্রেয়স্কর বোধ হয়, তাহাই করো।

যুধিষ্ঠির ক্ষণকাল বিবেচনা করিয়া জিজ্ঞাসা করিলেন—

হে প্রাজ্ঞ, ক্রীড়ার্থে কোন্ কোন্ অক্ষবিৎ তথায় উপস্থিত থাকিবেন।

বিহুর কহিলেন—অক্ষনিপুণ শকুনি, চিত্রসেন, রাজা সত্যব্রত এবং পুরুষিত্র তথায় উপস্থিত হইবার কথা।

যুধিষ্ঠির বলিলেন—হে ভাত, ধৃতরাষ্ট্র বলিতেছেন বলিয়া আমি নিশ্চিন্ত হইতে পারিতেছি না, কারণ আমি জানি তিনি নিতান্ত পুত্রপক্ষপাতী। তবে আপনি যখন সভামধ্যে আমাকে ক্রীড়ানিমিত্ত আহ্বান জানাইয়াছেন, তখন আমি কোন্ লজ্জায় অস্বীকার করি। ক্রীড়ায় আহৃত হইলে আমি কখনই নিবৃত্ত হই না, ইহাই আমার নিয়ম, তা না

হইলে কপটদ্যুতকর শকুনির সহিত আমি ক্রীড়া করিতাম না।

এই বলিয়া রাজা যুধিষ্ঠির অমুয্যাজিগণকে প্রস্তুত হইতে আদেশ দিলেন এবং পরদিন দ্রৌপদীপ্রভৃতি স্ত্রীগণ ও ভ্রাতৃগণ সমভিব্যাহারে রথারোহণপূর্বক যাত্রা করিলেন।

হস্তিনাপুরে উপনীত ধর্মরাজ প্রভৃতির সহিত ধৃতরাষ্ট্র ভীষ্ম দ্রোণ কর্ণ কুপ অশ্বথামা প্রভৃতি সকলের সাক্ষাৎ হইলে, প্রজ্ঞাচক্ষু ধৃতরাষ্ট্র সকলের মন্তকাজ্ঞাণ করিলেন এবং কৌরবগণ প্রিয়দর্শন পাণ্ডবদের দর্শন পাইয়া আহ্লাদের পরাক্রান্ত প্রাপ্ত হইলেন। ধৃতরাষ্ট্রের পুত্রবধূগণ অপ্রশান্ত মনে দ্রৌপদীর পরমোৎকৃষ্ট বস্ত্রালাংকার দর্শন করিতে লাগিলেন।

প্রথমত ব্যায়ামাদি করিয়া, স্নানান্তে চন্দনভূষিত ও কৃতাহিক হইয়া পথশ্রান্ত পাণ্ডবগণ ভোজনান্তর চক্ষুফেননিভ-শয্যায় নিদ্রাসুখ উপভোগ করিলেন।

প্রাতঃকালে বিগতক্রম হইয়া ক্রীড়ামণ্ডপে প্রবেশপূর্বক পূজার্থ পাণ্ডবগণকে যথাক্রমে পূজা করিয়া সকলে বিচিত্র আস্তরণযুক্ত আসনে উপবিষ্ট হইলেন। তখন শকুনি মহারাজ যুধিষ্ঠিরকে বলিলেন—

হে পার্শ্ব, সভাস্থ সকলে তোমার প্রতীক্ষা করিতেছেন। আইস, ক্রীড়া আরম্ভ করি।

যুধিষ্ঠির কহিলেন—ক্রীড়ায় আহুত হইলে আমি কদাচ নিবৃত্ত হই না। দ্যুতে অদৃষ্টই বলবান, অতএব তাহার উপরই

নিৰ্ভর করিয়া আমি অণু ক্রীড়া করিব। আমার সহিত উপযুক্ত পণ রাখিতে কে প্রস্তুত আছেন।

দুর্যোধন কহিলেন—হে যুধিষ্ঠির, আমার রাজ্যের সমুদায় ধন ও রত্ন আমি প্রদান করিব, মাতুল আমার প্রতিনিধি হইয়া ক্রীড়া করিবেন।

যুধিষ্ঠির কহিলেন—ভ্রাতঃ, একজনের প্রতিনিধিস্বরূপ অশ্বের ক্রীড়া আমার মতে নিতান্ত অসংগত, যাহা হউক ক্রীড়া আরম্ভ করা যাক।

দ্যুতারম্ভ-সংবাদে রাজপুরুষগণ ধৃতরাষ্ট্রকে অগ্রে করিয়া সভাপ্রবেশ করিলেন। মহামতি ভীষ্ম দ্রোণ কৃপ ও বিহুর অনতিপ্রসন্ন মনে তাঁহাদের অভিবর্তী হইলেন। সকলে উপবিষ্ট হইলে ক্রীড়া আরম্ভ হইল।

যুধিষ্ঠির দুর্যোধনকে বলিলেন—

হে রাজন, আমার এই কাঞ্চননির্মিত মণিময় হার পণ রাখিলাম, তোমার প্রতিপণের বস্তু কী।

দুর্যোধন কহিলেন—আমিও বহুতর মণি পণ রাখিতেছি, কিন্তু তন্নিমিত্ত অহংকার করি না। যাহা হউক এক্ষণে এইগুলি জয় করো।

{যুধিষ্ঠিরের অক্ষ ক্লেপান্তে শংকুনি অক্ষগুলি গ্রহণপূর্বক অবলীলাক্রমে ঞ্জেষ্ট-দান-নিষ্ক্রেপপূর্বক বলিলেন—

দেখো মহারাজ, আমিই জিতলাম।

যুধিষ্ঠির এই সহসা পরাজয়ে রুষ্ট হইয়া কহিলেন—

শংকুনে, তুমি কি ক্লেপণচাতুরীদ্বারা বারবার সকলতা

লাভ করিবে ভাবিয়াছ। আইস, আমার অক্ষয় কোষ এবং
১৭রাসীকৃত হিরণ্য পণ রাখিলাম।

এইবারও শকুনি অক্ষপেপমাত্র তাহা জয় করিয়া লইলেন।

যুধিষ্ঠির দৈবপরিবর্তনের প্রতি আশায়ুক্ত হইয়া এবং
পরাজয়জনিত লজ্জায় উত্তেজিত হইয়া উত্তরোত্তর পণ বৃদ্ধি
করিতে আরম্ভ করিলেন, রথ, গজ, অশ্ব, দাস, দাসী এবং
অবশেষে শ্রেষ্ঠরথী ও যোদ্ধৃগণকে একে একে পণ রাখিলেন,
কিন্তু কৃতবৈর ছুরায়া শকুনি স্বনিমিত্ত অভ্যস্ত অক্ষের
উপর সম্পূর্ণ প্রভুবশত ছলনাক্রমে সেই সকলই অপহরণ
করিল।

সেই সর্বনাশিনী দ্যুতক্রীড়া এইরূপ ভয়াবহ আকার
ধারণ করিলে বিহ্বল আর মোন না থাকিতে পারিয়া বলিয়া
উঠিলেন—

মহারাজ, মুমূর্ষু ব্যক্তির যেরূপ ঔষধসেবনে প্রবৃত্তি হয়
না, আপনারও সম্ভবত সেইরূপ আমার উপদেশবাক্যে
অভিক্রটি হইবে না, তথাপি যাহা বলি, একবার শ্রবণ করুন।
আপনি পাণ্ডবগণের ধনলাভের নিমিত্ত এত বিপদের
অবতারণা করিতেছেন, তদপেক্ষা ন্যায়ব্যবহারদ্বারা স্বয়ং
পাণ্ডবগণকে লাভ করুন। সৌবলেন্দ্র কপটক্রীড়া বিলক্ষণ
অবগত আছি, অতএব তাঁহাকে স্বস্থানে প্রস্থানের অনুমতি
প্রদান করুন।

ধৃতরাষ্ট্র কিংকর্তব্যবিমূঢ় হইয়া কোনো কথাই কহিলেন না।

শকুনি বলিলেন—হে যুধিষ্ঠির, তুমি তো পাণ্ডবগণের

সমস্ত সম্পত্তিই নষ্ট করিলে। এক্ষণে আর কিছু থাকে তো বলো, না হয় ক্রীড়ায় ক্ষান্ত হওয়াই শ্রেয়।}

যুধিষ্ঠির রুষ্ট হইয়া বলিলেন—

হে সুবলনন্দন, তুমি কী নিমিত্ত আমার ধনসম্বন্ধে সন্দেহ করিতেছ। আমার এখনও যথেষ্ট অবশিষ্ট রহিয়াছে।

এই বলিয়া তিনি আর যেখানে যত রজতকাঞ্চন মণি-মাণিক্য ছিল তৎসমস্ত ভ্রাতৃগণ ও অমুচরবর্গের পরিহিত অলংকারসমেত পণ রাখিয়া পুনরায় ক্রীড়া করিলেন এবং পূর্ববৎই তাহা হারাইলেন।

অবশেষে হতবুদ্ধির স্থায় বিবেচনাশূন্য হইয়া বলিলেন—
হে সুবলান্বজ, আমার কনিষ্ঠ ভ্রাতৃদ্বয় আমার নিতান্ত প্রিয় এবং পণের অযোগ্য হইলেও আমি ইহাদিগকে পণ রাখিয়া তোমার সহিত ক্রীড়া করিব। শকুনি অক্ষক্ষেপমাত্রই জয়লাভ করিয়া বলিলেন—

এই তোমার প্রিয় মাজীপুত্রদ্বয়কে জয় করিলাম। এক্ষণে বোধ করি তোমার প্রিয়তর ভীমার্জুনকে লইয়া ইহাদের স্থায় পণ্যভব্যবৎ ক্রীড়া করিতে সাহসী হইবে না, অতএব বিফল ক্রীড়ায় প্রয়োজন কী।

যুধিষ্ঠির ক্রুদ্ধ হইয়া কহিলেন—

রে মূঢ়, তুমি কি মনে করিতেছ একরূপ অযথাবাক্যের দ্বারা আমাদের মধ্যে ভেদ উৎপাদন করিবে। এই দেখো ভীমার্জুন পণের নিতান্ত অযোগ্য হইলেও আমি ইহাদিগকে পণ রাখিয়া ক্রীড়া করিতেছি।

তখন ইহারাও অক্ষবলে শকুনির বশীভূত হইলেন ।

পরিশেষে ক্ষোভে জ্ঞানশূন্য হইয়া যুধিষ্ঠির নিজেকে পণস্বরূপ অর্পণ করিয়া সকলে মিলিয়া দাসত্বশৃঙ্খলে বদ্ধ হইলেন ।

ইহাতেও তৃপ্ত না হইয়া নৃশংস দুরাশ্বা শকুনি পুনরায় বলিতে লাগিলেন—

দেখিতেছি প্রমত্ত ব্যক্তি নিতান্তই গতমধ্যে পতিত হয় । হে ধর্মরাজ, তুমি পাণ্ডবশ্রেষ্ঠ, তোমাকে নমস্কার । {দেখিতেছি দ্যুতাসক্ত ব্যক্তি যে সকল প্রলাপ কহে, তাহা স্বপ্নেও কল্পনা করা কঠিন } হে রাজন্, তোমার প্রণয়িনী দ্রৌপদী থাকিতে তুমি নিজেকে কী বলিয়া বদ্ধ করিলে । অগ্রাণ্য সম্পত্তি থাকিতে নিজেকে পণ রাখা মূঢ়ের কর্ম । হে প্রমত্ত, আমি তোমাকে পণ রাখিতেছি, তুমি কক্ষাকে পণ রাখিয়া আপনাকে মুক্ত করো ।

যুধিষ্ঠির কহিলেন—হে শকুনে, যিনি স্ত্রীলা প্রিয়বাদিনী এবং লক্ষ্মীস্বরূপিণী সেই সর্বাঙ্গসুন্দরী দ্রৌপদীকেই আমি পণ রাখিলাম ।

ধর্মরাজের মুখে এই প্রলাপবাক্য শ্রবণ করিবামাত্র সভাসদগণের দিক্কারে সভা ক্ষুব্ধ হইয়া উঠিল । ভূপতিগণ শোকসাগরে নিমগ্ন হইলেন । ভীষ্ম জ্যেষ্ঠ কৃপ প্রভৃতি মহাত্মাদের কলেবর হইতে ঘর্মবারি বিনির্গত হইতে লাগিল । বিহ্বর মস্তকধারণপূর্বক ঘন ঘন শ্বাস পরিত্যাগ করিয়া অচেতনের স্থায় অধোমুখ হইয়া রহিলেন । পুত্রের এই

ভাগ্যবলে আনন্দ গোপন না করিতে পারিয়া ধৃতরাষ্ট্র আগ্রহভরে জয় হইল কি, জয় হইল কি, বারংবার জিজ্ঞাসা করিতে লাগিলেন। যুধিষ্ঠিরের মতিচ্ছন্নতা দেখিয়া কর্ণ হর্ষোধন এবং দুঃশাসনের হর্ষের আর সীমা রহিল না।

অনন্তর পূর্ববৎ শকুনিরই জয়লাভ হইলে হর্ষোধন প্রতিশোধ লিপ্সায় উৎফুল্ল হইয়া বিহ্বরকে কহিলেন—

তুমি শীঘ্র গিয়া পাণ্ডবদের প্রাণপ্রিয়া দ্রৌপদীকে আনয়ন করো। কৃষ্ণা দাসীগণ-সমভিব্যাহারে গৃহমার্জন করুক।

বিহ্বর কহিলেন—রে মূঢ়, তুমি আপনাকে পতনোন্মুখ না জানিয়া এই দুর্বাচ্য কহিতে সাহসী হইলে। স্মিগ হইয়া ব্যাজকে কোপিত করিলে। তুমি যখন লোভ-পরভ্রম হইয়া সহপদে শ্রবণ করিলে না, তখন স্পষ্টই বোধ হইতেছে যে, অচিরেই সবংশে ধ্বংস হইবে। ৫

মদমত্ত হর্ষোধন বিহ্বরকে ধিক, এইমাত্র বলিয়া সভাস্থ সূত প্রাতিকামীর প্রতি দৃষ্টিপাত করিয়া কহিলেন—

হে প্রাতিকামিন্, দেখিতেছি বিহ্বর ভীত হইয়াছেন। তুমি শীঘ্র গিয়া দ্রৌপদীকে আনয়ন করো, পাণ্ডবগণ হইতে তোমার কোনো ভয় নাই।

প্রাতিকামী এই আদেশ প্রাপ্ত হইয়া সহরগমনে পাণ্ডবগণের ভবনে প্রবেশপূর্বক দ্রৌপদীকে নিবেদন করিল—

হে পাঞ্চালি, যুধিষ্ঠির দ্যুতক্রীড়ায় নির্ভান্ত আসক্ত হইয়া তোমাকে পণ রাখিয়াছিলেন, হর্ষোধন তোমাকে জয় করিয়াছেন। তিনি তোমায় সভায় আহ্বান করিতেছেন।

দ্রৌপদী কহিলেন—হে প্রাতিকামিন্, তুমি কি প্রলাপ বকিতেছ। কোন্ রাজপুত্র পত্নীকে পণ রাখিয়া ক্রৌড়া করে, যুধিষ্ঠিরের কি আর সম্পত্তি ছিল না।

প্রাতিকামী কহিল—হে দ্রুপদনন্দিনি, মহারাজ যুধিষ্ঠির পূর্বে অগ্নি সমস্ত ধন এবং পরে ভ্রাতৃগণসমেত আপনাকে হারাইয়া পরিশেষে তোমাকে দ্যুতমুখে সমর্পণ করিয়াছেন।

দ্রৌপদী কহিলেন—হে সূতনন্দন, তুমি সভায় গমন করিয়া যুধিষ্ঠিরকে জিজ্ঞাসা করো যে, তিনি অগ্রে আমাকে কি আপনাকে পণ রাখিয়াছিলেন।

প্রাতিকামী কৃষ্ণার আদেশানুসারে সভাস্থ সকলের সমক্ষে অধোমুখোপবিষ্ট যুধিষ্ঠিরকে দ্রৌপদীর প্রশ্ন নিবেদন করিল, কিন্তু সেই বিচেনপ্রায় পাণ্ডবের নিকট কোনো উত্তর পাইল না।

দুর্যোধন কহিলেন—হে প্রাতিকামিন্, পাঞ্চালী এই স্থানে আসিয়া তাহার যাহা কিছু প্রশ্ন থাকে, নিজে করুক।

তখন প্রাতিকামী পুনরায় দ্রৌপদীর নিকট উপস্থিত হইয়া শোকাকুল বচনে বলিল—

হে রাজপুত্রি, পাণ্ডায়া দুর্যোধন মন্ত হইয়া তোমায় বারংবার আহ্বান করিতেছেন।

দ্রৌপদী কহিলেন—হে সূতনন্দন, ইহা বিধাতারই বিধান। পৃথীতলে ধর্মই সর্বশ্রেষ্ঠ, অতএব সভ্যগণকে জিজ্ঞাসা করিয়া আইস, ধর্মত আমার একগুণে কী করা কর্তব্য, তাঁহারা সকলে যাহা বলিবেন, আমি তাহাই করিব।

প্রাতিকামী প্রত্যাগত হইয়া পূর্ববৎ সভাস্থ সকলকে দ্রৌপদীর বাক্য নিবেদন করিল। সভ্যগণ হৃষোধনের আগ্রহ দেখিয়া তাঁহার অভিপ্রায়ের বিরুদ্ধে কিছু বলিতে সাহস করিলেন না, অথচ দ্রৌপদীকে কোনো অধর্মযুক্ত কথা বলিতেও তাঁহাদের প্রবৃত্তি হইল না, সুতরাং তাঁহারা অধোবদনে নিরুত্তর রহিলেন—

যুধিষ্ঠির দ্রৌপদীকে সভায় আনয়নসম্বন্ধে হৃষোধনকে কৃতসংকল্প দেখিয়া গোপনে দূতদ্বারা তাঁহাকে শ্বশুরের সমক্ষে আসিয়া রোদন করিতে উপদেশ প্রেরণ করিলেন।

প্রাতিকামী সমূহ বিপদ অমুভব করিয়া হৃষোধনের ভয় পরিত্যাগপূর্বক পুনরায় সভাসদগণকে উদ্বেজিত করিবার নিমিত্ত কহিতে লাগিল—

আমি দ্রৌপদীকে আপনাদের কী উত্তর প্রদান করিব। তখন হৃষোধন প্রাতিকামীর প্রতি রোষ প্রকাশপূর্বক কহিল—

হে হৃঃশাসন, এই সূতপুত্র নিতান্ত অল্পচেতা, এ দেখিতেছি বৃকোদরকে ভয় করে, তুমি স্বয়ং গিয়া কৃষ্ণাকে আনয়ন করো। অবশ শক্রগণ তোমার কী করিতে পারিবে।

হুরাত্মা হৃঃশাসন আজ্ঞা পাইবামাত্র দ্বারায় দ্রৌপদীর গৃহে প্রবেশ করিয়া বলিল—

হে পাঞ্চালি, তুমি দ্বাতে পরাজিত হইয়াছ, অতএব লজ্জা পরিত্যাগপূর্বক সভায় আগমন করো।

দ্রৌপদী হৃঃশাসনের আরক্ত নেত্র অবলোকনে সাতিশয়

ভীত হইয়া জীগণবেষ্টিত গান্ধারীর আশ্রয় লইবার উদ্দেশ্যে
ক্ষতবেগে গমন করিলেন।

নির্লজ্জ দুঃশাসন ক্রোধভরে তর্জন গর্জন করিতে করিতে
তঁাহার অনুধাবন করিয়া কেশ গ্রহণ করিল। দীর্ঘকেশী
ক্রৌপদী বাতান্দোলিত কদলীপত্রের শ্রায় কম্পিত হইয়া
বিনীতভাবে বলিলেন—

হে দুঃশাসন, আমি একবস্ত্রা রহিয়াছি, এ অবস্থায়
আমাকে সভায় লইয়া যাওয়া উচিত হয় না।

কিন্তু দুঃশাসন তঁাহার বাক্য উপেক্ষা করিয়া বলিল—

একবস্ত্রাই হও আর বিবস্ত্রাই হও, তুমি পরাজিত হইয়া
আমাদের দাসী হইয়াছ, অতএব আমাদের আজ্ঞা পালন
করিতেই হইবে।

এই বলিয়া দুর্মতি কৃষ্ণার কেশ সবলে আকর্ষণপূর্বক
অনাধার শ্রায় তঁাহাকে সভাসমীপে আনয়ন করিল।

যে কুন্তলদাম রাজশূরযজ্ঞের অবভূথস্নানসময়ে মন্ত্রপূত
জলদ্বারা সিক্ত হইয়াছিল, তাহা পাষণ্ডের হস্তস্পর্শে কলুষিত
দেখিয়া সভাস্থ সকলে অসহ্য শোকে অভিভূত হইলেন।

দারুণ আকর্ষণে প্রকীর্ত্তকেশ্য ও স্থলিতাধ্বসনা কৃষ্ণা
এককালে লজ্জা ও ক্রোধে দগ্ধ হইয়া বলিতে লাগিলেন—

রে দুরাত্মন, এই সভামধ্যে আমার ইন্দ্রতুল্য গুরুজনগণ
উপবিষ্ট আছেন, তঁাহাদের সমক্ষে তুই কোন্ সাহসে
আমাকে এই অবস্থায় আনিলা। স্বয়ং ইন্দ্র তোর সহায়
থাকিলেও রাজপুত্রগণ তোকে ক্ষমা করিবেন না।

কিন্তু দুঃশাসনকে কেহই নিবারণ করিতেছেন না দেখিয়া অভিমানিনী পাঞ্চালী পুনরায় বলিলেন—

হায়, ভারতবংশীয়গণের ধর্মে দিক, অতু বুঝিলাম ক্ষত্রচরিত্র নষ্ট হইয়াছে, যেহেতু সভাস্থ সকলে বিনা প্রতিবাদে কুলধর্মের ব্যতিক্রম নিরীক্ষণ করিতেছেন।

এই বলিয়া রোহুতমানা কৃষ্ণা স্বীয় পতিগণের প্রতি কটাক্ষপাত করিলেন। রাজ্য ধন মান সম্ভ্রম সমস্ত যাওয়ায় তাঁহাদের যাহা না হইয়াছিল, দ্রৌপদীর এই স্কন্ধ কটাক্ষে তাঁহাদের মনে ছুনিবার অন্তর্দাহ উপস্থিত হইল।

কর্ণ পূর্ব অপমান স্মরণ করিয়া অতীব ক্ষুব্ধ হইলেন, শকুনিও দ্রৌপদীর অবমাননায় যোগদান করিলেন, দুঃশাসন . দাসী, দাসী, বলিয়া উচ্চৈঃস্বরে হাস্য করিল।

ভীমসেন প্রিয়ভ্রাতার এ অবমাননায় উন্মত্তপ্রায় হইয়া বলিয়া উঠিলেন—

হে যুধিষ্ঠির, দ্যুতপ্রিয় ব্যক্তিগণ গৃহস্থিত দাসীকেও পণ রাখিয়া কখনও ক্রীড়া করে না, তাহাদের প্রতিও কিঞ্চিদয়াপ্রকাশ করিয়া থাকে। দেখো, তুমি বহুকষ্টলব্ধ ধনসকল এবং তোমার অধীন আমাদিগকে একে একে পরবশে বিসর্জন দিলে, আমি তাহাতেও ক্রোধ প্রকাশ করি নাই। কিন্তু তোমার এই শেষকার্য যৎপরোনাস্তি গহিত হইয়াছে। তোমারই অপরাধে ক্ষুদ্রাশয় কৌরবগণ এই অসহায় বালাকে ক্লেশ দিতে সাহসী হইল। তোমার দ্যুতাসক্ত হস্তদ্বয়

ভস্মসাৎ করিলে তোমার এই পাপের প্রায়শ্চিত্ত হইবে।
সহদেব, হারায় অগ্নি আনয়ন করো। ✓

অর্জুন এই কথায় অগ্রজকে তিরস্কারপূর্বক কহিলেন—

হে আর্ষ, তুমি পূর্বে তো কখনো ঈদৃশ দুর্বাক্য প্রয়োগ
করো নাই। মনের আবেগে শত্রুগণের মনোবাক্ষ্য পূর্ণ করিয়া
না। দেখো জ্যেষ্ঠ ভ্রাতা ক্ষত্রধর্মামুসারেই ক্রোধ করিয়াছেন,
ক্ষত্রধর্মামুসারেই অবনত মস্তকে পরাজয় স্বীকার করিয়াছেন।

এদিকে যখন দুঃশাসন সভামধ্যে একবস্ত্রা দ্রোপদীর বসন
আকর্ষণ করিবার উপক্রম করিল, তখন দ্রোপদী একান্ত
বিপন্ন হইয়া আত্নাদ করিতে লাগিলেন। সেই বিপদে
স্বয়ং ধর্ম-সম্মত হইয়া দ্রোপদীকে নানাবিধ বস্ত্রে
আচ্ছাদিত করিয়া রক্ষা করিলেন।

তদর্শনে সভামধ্যে ঘোরতর কলরব আরম্ভ হইল।
মহীপালগণ দুঃশাসনকে ভৎসনা করিয়া নিবারণ করিলেন।
ভীমসেন আর বসিয়া থাকিতে পারিলেন না। তাঁহার
ওষ্ঠাধর ক্রোধভরে বিক্ষুব্ধ হইতে লাগিল। তিনি করে
কর নিষ্পেষণ করিয়া শপথপূর্বক কহিলেন—

হে ক্ষত্রিয়গণ, শ্রবণ করো, যদি আমি যুদ্ধে এই ভারতা-
ধর্ম কুলাজ্ঞার দুঃশাসনের বক্ষোবিদীর্ণ করিয়া রুধির পান না
করি, তবে আমি যেন পূর্বপুরুষের গতি প্রাপ্ত না হই।

এমন সময় ঘোর দুর্নিমিত্তসকল দৃষ্ট হইতেছে একরূপ
সংবাদ আসিল। মহারাজ ধৃতরাষ্ট্র অত্যন্ত ভীত হইয়া
অমঙ্গল শাস্ত করিবার নিমিত্ত পুত্রকৃত দুর্ধর্ম খণ্ডনের

চেষ্টা করিতে লাগিলেন। দুর্যোধনকে ভৎসনা করিয়া তিনি কহিলেন—

ওহে দুর্বিনীত দুর্যোধন, তুমি কিরূপ বিবেচনায় কুরুকুল-কামিনীকে সভামধ্যে সম্ভাষণ করিতেছ।

পরে তিনি সাস্থনাবাক্যে দ্রৌপদীকে কহিলেন—

হে কল্যাণি, তুমি আমার বধূগণের মধ্যে শ্রেষ্ঠ, তুমি অভিলষিত বর গ্রহণ করো।

দ্রৌপদী কহিলেন—যদি প্রসন্ন হইয়া থাকেন, তবে আমার পতিগণকে দাসত্ব হইতে মুক্তি দিবার আজ্ঞা হউক।

ধৃতরাষ্ট্র—তথাস্তু,—বলিয়া পাণ্ডব-গণকে স্বাধীনতা প্রদান করিলেন।

কর্ণ উপহাসপূর্বক কহিতে লাগিলেন—

জীলোকের অনেক অদ্ভুত কর্মের কথা শ্রবণ করিয়াছি, কিন্তু পতিগণকে তরণীস্বরূপ হইয়া বিপদসাগর হইতে উদ্ধার একমাত্র পাঞ্চালীই করিলেন।

ভীম তাহাতে বলিলেন—

হাঁ, পাণ্ডবগণ জীৱ দ্বারাই রক্ষিত হইলেন।

ধৃতরাষ্ট্র কহিলেন—হে অজাতশত্রু, তুমি তোমার সমস্ত পরাজিত ধনসম্পত্তি প্রত্যাগ্রহ করিয়া স্বরাজ্য শাসন করো। হে তাত, তুমি দুর্যোধনের দুর্যাক্য এবং নির্ধুর ব্যবহার নিজগুণে ক্ষমা করিয়ো, ইহাই আমার একমাত্র অনুরোধ।

পরাজিত ধনরত্ন পুনঃপ্রাপ্ত হইয়া পাণ্ডবগণ ধৃতরাষ্ট্রের অনুজ্ঞাক্রমে স্বরাজ্যে প্রতিগমনে উদ্ভূত হইয়াছেন অবগত

হইবামাত্র, দৃঃশাসন ব্যতিব্যস্ত হইয়া মন্ত্রিসহিত দুর্যোধনের নিকটে দ্রুতগমনে উপস্থিত হইয়া আকুলস্বরে বলিতে লাগিলেন—

হে আর্য, আমরা অতীব ক্লেশে যাহা কিছু সঞ্চয় করিয়াছিলাম, বৃদ্ধ রাজা তাহা সকলই নষ্ট করিলেন, ধনাদি সমস্তই শত্রুগণের হস্তগত হইল। এক্ষণে যাহা বিবেচনা হয় করো।

এই কথা শ্রবণ করিবামাত্র একান্ত অভিমানপরতন্ত্র হইয়া দুর্যোধন, কর্ণ ও শকুনি তৎক্ষণাৎ ধৃতরাষ্ট্র-সমীপে উপস্থিত হইয়া কহিলেন—

মহারাজ, আপনি এ কী সর্বনাশ করিলেন। চতুর্দিকে ক্রুদ্ধ ভূজঙ্গের মধ্যে বাস করিয়া কি কেহ পরিভ্রাণ পাঠিতে পারে। আপনি কি অবগত নহেন যে, ক্রোধাক্ত পাণ্ডবগণ রথারোহণপূর্বক যুদ্ধের আয়োজন করিতেছেন। আমরা তাঁহাদের যেরূপ অপকার করিয়াছি, তাঁহারা কি কখনও ক্ষমা করিবেন। দ্রৌপদীর প্রতি দাসীবৎ ব্যবহার তাঁহারা কি কখনও সহ্য করিতে পারিবেন।

এ কথায় ধৃতরাষ্ট্রকে ভীতিবিহ্বল দেখিয়া দুর্যোধন পুনরায় বলিতে লাগিলেন—

অতএব এবার পাণ্ডবদিগের প্রতিশোধের পথ একবারেই অবরুদ্ধ করিয়া কার্য করিতে হইবে। পুনরায় উহাদিগকে অক্ষে পরাজিত করিতে হইবে, কিন্তু ক্রোধের কারণ বাহাতে থাকে, এমন কোনো পণ রাখা হইবে না। এইবার পণ

থাক্ যে নির্জিতপক্ষকে বহুবৎসর বনবাসে যাপন করিতে হইবে। শকুনি স্বীয় শ্রেষ্ঠ কৌশলের দ্বারা নিশ্চয়ই জয়লাভ করিবেন, কিন্তু তাহাতে উপস্থিত কলহেরও কোনো সম্ভাবনা থাকিবে না, ভবিষ্যদ্ভাবনারও কোনো কারণ থাকিবে না।

ধৃতরাষ্ট্র এ প্রস্তাবে আশ্বস্ত হইয়া কহিলেন—

বৎস, তুমি অবিলম্বে পাণ্ডবগণকে আবার দূতে আহ্বান করো। এ কথা অবগমাত্র ভীষ্ম দ্রোণ বিহুর অশ্বখামা এবং ধৃতরাষ্ট্রের কোনো কোনো পুত্র প্রভৃতি উপস্থিত অনেকে ধৃতরাষ্ট্রকে নিষেধ করিয়া কহিলেন—

মহারাজ, বহু কষ্টে শাস্তিসন্ধার হইয়াছে, বারবার কুলক্ষয়কর বিবাদেব সূত্রপাত করিবেন না।

কিন্তু ভীষ্মস্বভাব পুত্রবৎসল মোহান্বিত ধৃতরাষ্ট্র সে কথায় কর্ণপাত করিলেন না। পুত্রদের ক্রুর অভ্যুজ্ঞোচিত ব্যবহারে একান্ত শোকনিমগ্না ধর্মপরায়ণা রাজমহিষী গান্ধারীও এ সংবাদে উদ্ভিগ্না হইয়া কহিলেন—

মহারাজ, হৃদোধনের জন্মমূহূর্তেই সকলে তাহাকে পরিত্যাগ করিতে বলিয়াছিল, তুমি তাহা করো নাই। অতঃপর তাহার বিষম ফল একবার দেখিলে; আবার তুমি কোন্ সাহসে এই কুলপাণ্ডুল হৃবিনীত বালকের কথায় অনুমোদন করিতেছ। উহাকে তোমার আজ্ঞানুবর্তী না করিতে পারো, তবে পরিত্যাগ করো। সেতুবন্ধ হইলে তাহা ইচ্ছাপূর্বক কে ভগ্ন করে। হে মহারাজ, পুত্রস্নেহবশত নির্বাপিতপ্রায় অগ্নি প্রজ্জ্বলিত করিয়া কুলনাশের হেতু হইয়ো না।

ধৃতরাষ্ট্র বিষমবদনে উত্তর করিলেন—

প্রিয়ে, যদি একান্ত বংশনাশ হয়, তবে আমি নিরুপায় ।
কিন্তু প্রাণপ্রিয় পুত্রের বিরুদ্ধাচরণে আমি সক্ষম নহি ।

পিতার অনুমতি প্রাপ্তিমাত্র হৃষীকেশ গমনোন্মুখ
যুধিষ্ঠিরের নিকটে উপস্থিত হইয়া কহিলেন—

হে পার্থ, সভায় এখনও বহুসংখ্যক লোক উপস্থিত
আছে । পিতার অনুমতি হইয়াছে যে, তোমরা বিদায় হইবার
পূর্বে আমরা আর একবার সকলে মিলিয়া ক্রীড়া করি ।

যুধিষ্ঠির বলিলেন—জ্যেষ্ঠভাতের যদি সেরূপ আদেশ
হইয়া থাকে, তবে অক্ষ ক্রয়কর জানিয়াও আমি ক্রীড়া
হইতে নিবৃত্ত হইব না ।

এইমাত্র বলিয়া যুধিষ্ঠির মৌনাবলম্বনপূর্বক ভ্রাতাদের
সহিত ক্রীড়াগৃহে প্রবেশ করিলেন ।

শকুনি বলিলেন—মহারাজ, বৃদ্ধ রাজা তোমাঙ্গিকে
যাহা কিছু প্রত্যর্পণ করিয়াছেন, তাহাতে আমরা আর হস্ত-
ক্ষেপ করিতে চাহি না ; এবার অশ্ব প্রকার পণ নির্ধারণ
করা যাক । আমাদের বা তোমাদের যে পক্ষেরই পরাজয়
হইবে, তাহাদের দ্বাদশ বৎসর বনবাস এবং এক বৎসর
অজ্ঞাতবাস করিতে হইবে ; অজ্ঞাতবাসকালে জ্ঞাত হইলে
পুনরায় দ্বাদশবর্ষের জন্ত বনগমন করিতে হইবে ;—এই পণে
যদি তুমি ভীত না হও, তবে আইস দ্যুতারস্ত করি ।

সভাস্থ লোকে ইহাতে উদ্ভিগ্ন হইয়া ব্যস্তচিত্তে হস্ত-
প্রসারণপূর্বক কহিতে লাগিলেন—

হে বাঙ্কবগণ, তোমাদিগকে ধিক, যুধিষ্ঠির বোধ হয় এই ভয়ংকর পণের পরিণাম না বিবেচনা করিয়াই দ্বাভে হস্তক্ষেপ করিতেছেন। ক্রৌড়া-ভীকু-অপবাদের লঙ্ঘ্য যুধিষ্ঠির আসন্নকালীন মোহাচ্ছন্ন ব্যক্তির দ্বায় হিতাহিত জ্ঞানশূণ্য হইয়া পণে অঙ্গীকারপূর্বক অঙ্গনিক্ষেপ করিতে লাগিলেন। কিন্তু সিদ্ধহস্ত শকুনি অনায়াসে জয়লাভ করিয়া পাণ্ডবগণকে বনবাস-প্রতিজ্ঞাবদ্ধ করিলেন।

অনন্তর ধর্মাত্মা পাণ্ডবগণ পূর্ববৎ শাস্তভাবে পরাজয় স্বীকার করিয়া বনবাসের আয়োজন করিলেন। দীনভাবে বঙ্কলাজিন ধারণপূর্বক তাঁহারা যখন ক্রৌড়াসভা হইতে নিজ্জাস্ত হইতেছেন, তখন উৎফুল্ল চর্ম্মতি ধাত্তরাষ্ট্রগণ পাণ্ডবদিগকে নানাপ্রকারে অবমাননা না করিয়া থাকিতে পারিল না।

অনন্তর যুধিষ্ঠির রাজ-সভায় উপস্থিত হইয়া কহিলেন—

এক্ষণে আমি পিতামহ, কুরুবৃদ্ধগণ, দ্রোণপ্রভৃতি গুরুগণ, ধৃতরাষ্ট্র ও ধাত্তরাষ্ট্রগণ এবং বিত্বরের নিকট বিদায় লইলাম। যদি বনবাসান্তে প্রত্যাগত হই, তবে আবার সাক্ষাৎ হইবে।

সকলেই মৌন থাকিয়া মনে মনে পাণ্ডবগণকে বিবিধ-প্রকার আশীর্বাদ করিলেন।

বিত্বর কহিলেন—হে পাণ্ডবগণ, তোমাদের সর্বত্র মঙ্গল হউক, তোমাদের মাতা সুকুমারী এবং সুখলালিতা, এক্ষণে বৃদ্ধাও হইয়াছেন। তাঁহার বনগমন কোনো ক্রমেই উচিত

হয় না; অতএব তিনি সংকৃত হইয়া আমার ভবনে বাস করুন।

পাণ্ডবগণ নিবেদন করিলেন—

হে প্রাজ্ঞপ্রবীর, তুমি আমাদের পিতৃতুল্য এবং পরম গুরু, তোমার আজ্ঞা আমরা অবশ্য প্রতিপালন করিব। আর যাহা অভিলাষ থাকে বলো।

বিহুর বলিলেন—হে ধর্মরাজ, যে ধর্মবুদ্ধিবলে তুমি এই সমস্ত লাজ্জনা ও অবমাননা উপেক্ষা করিলে, তাহা যেন তোমার চিরকালই থাকে। আশীর্বাদ করি নির্বিশেষে প্রত্যাগত হও।

তদনন্তর যুধিষ্ঠির সকলকে যথোচিত অভিবাদনপূর্বক প্রস্থান করিলেন।

৫

যুধিষ্ঠির ভ্রাতৃগণকে কহিতে লাগিলেন—

আমাদিগকে যখন দ্বাদশ বৎসর এইভাবে যাপন করিতে হইবে তখন যুগপক্ষিসমাকীর্ণ ফুলফল-সম্পন্ন কোনো কল্যাণকর স্থান আন্বেষণ করা কর্তব্য।

অর্জুন কহিলেন—তুমি যদি কোনো বিশেষ স্থান মনস্থ করিয়া না থাকো, তবে আমি নিকটবর্তী স্বচ্ছসরোবরবিশিষ্ট

দ্বৈতবন নামক এক অতি রমণীয় স্থান অবগত আছি, তথায় অক্লেশে দ্বাদশ বৎসর কালক্ষেপ করিতে পারিব।

ক্রমে বনবাসের নিরূপিত দ্বাদশ বৎসর অতিবাহিত হইল। সত্যপ্রতিজ্ঞ পাণ্ডবগণ ত্রয়োদশবর্ষীয় অজ্ঞাতবাসের আয়োজন করিতে প্রবৃত্ত হইলেন।

যুধিষ্ঠির কহিলেন—হে ভ্রাতৃগণ, প্রথমত একটি গুঢ় অথচ রমণীয় স্থান স্থির করা আবশ্যক যেখানে অরতিগণের অজ্ঞাতসারে অথচ স্বচ্ছন্দে আমরা একবৎসর যাপন করিতে পারি।

অজুঁন কহিলেন—মহারাজ, কুরুমণ্ডলের চতুর্দিকে পাকাল চেদি মৎস্য প্রভৃতি যে সকল বন্ধুগণের রাজ্য আছে, ইহার মধ্যে যে কোনো একটায় আমরা নিশ্চয়ই প্রচ্ছন্ন থাকিতে সক্ষম হইব।

যুধিষ্ঠির কহিলেন—হে মহাবাহো, ইহার মধ্যে মৎস্য রাজ্যই আমার মনোনীত হইতেছে। বিরাটরাজা পিতার বন্ধু ছিলেন ও সর্বদাই আমাদের হিতকামনা করিতেন। তিনি বৃদ্ধ ধর্মশীল এবং বদান্ত। তাঁহার নিকট গমন করিয়া আমরা যদি ছদ্মবেশে প্রত্যেকে এক একটি উপযুক্ত কর্মে নিযুক্ত হই, তাহা হইলে নিশ্চয়ই সংবৎসরকাল তথায় অকুতোভয়ে বাস করিতে পারিব।

অজুঁন কহিলেন—হায়, তুমি চিরকালই সুখে পালিত ও রাজপদে প্রতিষ্ঠিত, তুমি এক্ষণে অস্ত্রের অধীনে কোন্ কর্ম করিবে।

যুধিষ্ঠির কহিলেন—হে ভ্রাতৃগণ, তোমরা চকল হইয়ো

না। আমি যে কর্ম করিতে পারিব তাহা স্থির করিয়াছি, শ্রবণ করো। আমি কঙ্ক নাম ধারণপূর্বক অক্ষনিপুণ ব্রাহ্মণ-বেশে হস্তে শারিফলক গজদন্ত-নির্মিত চতুর্বর্ণ শারি ও সুবর্ণময় অক্ষ লইয়া বিরাটরাজের সভাসদপদের প্রার্থী হইব। বিশেষ পরিচয় জিজ্ঞাসিত হইলে বলিব আমি পূর্বে রাজা যুধিষ্ঠিরের প্রিয়সখা ছিলাম। এই কর্মে আমি বিনা ক্লেশে রাজার মনোরঞ্জন করিতে পারিব। এক্ষণে, হে বৃকোদর, বলো তুমি কোন্ কর্মে নিযুক্ত হইয়া কালাতিপাত করিবে।

ভীমসেন কহিলেন—হে ধর্মরাজ, আমি মনে করিতেছি বল্লব নাম ধারণ করিয়া সূপকার বলিয়া পরিচয় দিব। পাককার্যে আমার বিশেষ নৈপুণ্য আছে। বিরাটরাজের উপস্থিত কিঙ্করগণ অপেক্ষা আমি নিশ্চয়ই উৎকৃষ্টতর ব্যঞ্জন প্রস্তুত করিয়া রাজাকে তৃপ্ত করিতে পারিব। এতদ্ব্যতীত মল্লক্রীড়াশ্লে আমি বাহুবলের পরিচয় প্রদান করিয়া সকলের সম্মানভাজন হইতে পারিব সন্দেহ নাই। পরিচয় চাহিলে আমিও কহিব যে, আমি রাজা যুধিষ্ঠিরের সূপকার ও মল্লযোদ্ধা ছিলাম। হে রাজন্, এইভাবে আমি নির্বিঘ্নে কালক্ষেপ করিতে পারিব।

তখন যুধিষ্ঠির অজুর্নকে লক্ষ্য করিয়া বলিতে লাগিলেন—

যে মহাবীর তেজস্বীর মধ্যে অগ্নিতুল্য, ষাঁহার বাহুদ্বয় সমভাবে জ্যা-ঘাতদ্বারা কিণাক্রিত, সেই সব্যসাচী কোন্ ছদ্মবেশ অবলম্বন করিবেন।

ভদ্রস্বরে অর্জুন কহিলেন—

হে ধর্মরাজ, তুমি যথার্থই বলিতেছ যে, আমার জ্যা-ঘাতচিহ্নিত ভুজদ্বয় ও যুদ্ধগর্ভিত সুদৃঢ় শরীর গোপন করা সহজ নহে, সেইজন্য আমি সংকল্প করিয়াছি যে, মস্তকে বেণী ও কর্ণে কুণ্ডল ধারণপূর্বক কিণাক্ষিত হস্ত বলয়শ্রেণীদ্বারা আচ্ছাদিত করিয়া বৃহন্নলা নামে নর্তক সাজিব। আমি ইন্দ্রালায়ে বাসকালে গান্ধর্ব-বিজ্ঞায় বিশেষ পারদর্শিতা লাভ করিয়াছিলাম, সুতরাং আমি মহিলাদিগকে নৃত্যগীতাদি শিক্ষা দিলে অন্তঃপুরে নিশ্চয়ই সমাদৃত হইব। আমিও জিজ্ঞাসিত হইলে বলিব যে, জ্যৌপদীর পরিচর্যায় নিযুক্ত ছিলাম। হে ধর্মরাজ। আমি এইরূপে ভস্মাচ্ছাদিত বহির্গায় সুখে বিরাটভবনে বিহার করিতে পারিব।

অনন্তর যুধিষ্ঠির কহিলেন—

হে নকুল, তুমি সুখসম্ভোগসমুচিত এবং সুকুমার, তুমি কোন্ কর্ম করিতে পারিবে।

নকুল কহিলেন—মহারাজ, আমার চিরকালই অশ্বের প্রতি প্রীতি আছে, আমি তাহাদের শিক্ষা ও চিকিৎসাসম্বন্ধে অনেক তথ্য অবগত আছি; অতএব আমি ঐশ্বিক নাম ধারণ করিয়া অশ্বপরিদর্শকের পদ প্রার্থনা করিব। এ কার্য আমারও প্রীতিকর হইবে, রাজাকেও ইহাদ্বারা সন্তুষ্ট করিতে পারিব। আমিও পরিচয়স্থলে বলিব যে, রাজা যুধিষ্ঠিরের অশ্বাধিকারে নিযুক্ত ছিলাম।

সহদেব জিজ্ঞাসিত হইলে বলিলেন—

হে রাজন, তুমি যৎকালে আমাকে গো-তত্ত্বাবধারণে প্রেরণ করিতে, আমি সে সময়ে গোগণের দোহন পালন ও শুভাশুভ লক্ষণসম্বন্ধে ব্যুৎপত্তি লাভ করিয়াছিলাম ; অতএব আমার জ্ঞান চিস্তিত হইয়ো না, আমি তদ্বিপাল নামে গো-চর্যায় নিযুক্ত থাকিয়া নিশ্চয়ই রাজার তুষ্টিসাধন করিতে পারিব ।

পরিশেষে কাতরস্বরে ধর্মরাজ বলিতে লাগিলেন—

হে ভ্রাতৃগণ, আমাদের প্রাণপ্রিয়া ভাষা, যিনি আমাদের পালনীয় ও মাননীয়, তাঁহাকে কী প্রকারে আমরা পরের সেবায় নিযুক্ত দেখিব, তিনি আজন্মকাল কেবল পরের সেবা গ্রহণই করিয়াছেন, সাজসজ্জা ব্যতীত কোনো বিষয়েই স্বয়ং অন্তর্ধান করেন নাই, অতএব তিনি কোন্ কর্মই বা করিতে পারিবেন ।

দ্রৌপদী কহিলেন—মহারাজ, লোকে সাজসজ্জাসম্বন্ধীয় সূক্ষ্ম শিল্পকর্মের নিমিত্ত কিস্করী নিযুক্ত করিয়া থাকে ; অতএব আমি দ্রৌপদীর পরিচারিকা কেশসংস্কারকুশল সৈরিক্রী বলিয়া পরিচয় দিয়া রাজমহিষী সূদেষ্ণার পরিচর্যা করিব । এই কার্যে সহায়হীনা সাধ্বী স্ত্রীরাই নিযুক্ত থাকেন, সুতরাং ইহা আমার পক্ষে অনুপযুক্ত হইবে না, আমি নিশ্চয়ই রাজমহিষীর সম্মানিতা হইব ; অতএব আমার নিমিত্ত আর মনস্তাপ প্রাপ্ত হইয়ো না ।

যুধিষ্ঠির কহিলেন—হে কৃষ্ণে, তুমি উত্তম কর্মই স্থির করিয়াছ । কিন্তু রাজভবন বড়ো বিপদসংকুল স্থান, সাবধানে

থাকিয়ো, যেন কেহ তোমাকে অপমানিত করিতে না পারে।

পরে সকলকে সম্বোধনপূর্বক তিনি কহিতে লাগিলেন—

আমরা কৌ ভাবে প্রচ্ছন্ন থাকিয়া কোন্ কোন্ কর্ম করিব তাহা তো স্থির হইল। এক্ষণে পুরোহিত ধোম্য, আমাদের ভৃত্য ও দ্রৌপদীর পরিচারিকাগণ ক্রপদরাজ্যভবনে গমনপূর্বক আমাদের অজ্ঞাতবাসাবসানের প্রতীক্ষা করুন। ইন্দ্রসেন প্রভৃতি সারথীগণ শূশ্রুত লইয়া সহর দ্বারকায় গমন করিয়া তথায় সেগুলি রক্ষা করুক। কেহ জিজ্ঞাসা করিলে সকলে কহিবেন যে, পাণ্ডবগণ আমাদের দ্বৈতবনে পরিত্যাগ করিয়া কোথায় গিয়াছেন, আমরা তাহার কিছুই জ্ঞানি না।

পাণ্ডবগণ কেবলমাত্র অস্ত্রশস্ত্র গ্রহণ করিয়া পাদচারে মৎস্য-রাজ্যাভিমুখে চলিতে লাগিলেন। কালিন্দী নদীর দক্ষিণ তীর অবলম্বনপূর্বক কখনও গিরিভূগ কখনও বনভূগ আশ্রয় করিয়া পাকালদেশের উত্তর দ্বীপা ক্রমশ মৎস্যদেশে প্রবেষ্ট হইলেন। পথের অবস্থা ও চতুর্দিকস্থিত ক্ষেত্র দেখিয়া দ্রৌপদী বলিতে লাগিলেন—

হে ধর্মরাজ, স্পষ্টই বোধ হইতেছে যে এখনও বিরাট-নগরী বহুদূরে; আমিও সাতিশয় পরিশ্রান্তা; অতএব আজ রাত্রি এখানেই অবস্থান করা যাক।

যুধিষ্ঠির কহিলেন—হে অর্জুন, তুমি যত্নসহকারে কৃষাকে বহন করো। যখন অরণ্যের আশ্রয় অতিক্রম করিয়া

আসিয়াছি, তখন একেবারে রাজধানীতে গিয়া অবস্থিতি করাই ভালো।

তখন গজরাজবিক্রম অর্জুন পাঞ্চালীকে গ্রহণ করিয়া দ্রুতপদসঞ্চারে গমনপূর্বক তাঁহাকে বিরাট-রাজধানীর সমীপে অবতারণা করিলেন। অনন্তর নগরপ্রবেশের প্রণালীসম্বন্ধে সকলে পরামর্শ করিতে লাগিলেন।

যুধিষ্ঠির কহিলেন—হে ভ্রাতৃগণ, আমরা যে সকল ছদ্মবেশ ধারণ করিবার সংকল্প করিয়াছি, তাহাতে আমাদের সঙ্গে এই সকল অস্ত্রশস্ত্র লইলে চলিবে না, বিশেষত অর্জুনের গাণ্ডীব কাহারও অবিদিত নাই; অতএব এই এক বৎসর অজ্ঞাতবাসকালে আয়ুধগুলিকে কোনো নিরাপদ স্থানে রক্ষা করিতে হইবে।

অর্জুন কহিলেন—মহারাজ, ঐ পর্বতশৃঙ্গস্থ শ্যামানের সমীপবর্তী এক ছুরারোহ শমীবৃক্ষ দৃষ্ট হইতেছে। উহার শাখায় যদি উত্তমরূপে বস্ত্রাচ্ছাদিত করিয়া আমাদের শস্ত্র-সকল রক্ষা করি, তবে তৎকালে কেহ আমাদের দেখিতে পাইবে এমন সম্ভাবনা নাই এবং ভবিষ্যতে কেহ ঐ স্থানে গমনাগমন করিবে তাহাও বোধ হয় না। অর্জুনের কথায় সকলে তথায় আয়ুধসংস্থাপন করিতে প্রবৃত্ত হইয়া স্ব স্ব শরাসনের জ্যামোচনপূর্বক তাহার সহিত ভূগ খড়্গ এবং অস্ত্রাশ্রয় অস্ত্রসমুদায় একত্র সংকলিত করিয়া বস্ত্রের দ্বারা তাহা আচ্ছাদন করিলেন। অনন্তর নকুল সেই সমীপবর্তী আরোহণ করিয়া উপযুক্ত দৃঢ় এবং পল্লবাচ্ছাদিত

শাখা নির্বাচনপূর্বক তাহাতে পাশদ্বারা সেই বস্ত্রমণ্ডি-
অস্ত্রগুচ্ছ বন্ধন করিলেন। পরে স্থানীয় কৃষকাদির
মধ্যে ‘ঐ বৃক্ষে মৃতদেহ বাঁধা আছে’ প্রচার করিয়া
দেওয়ায় কেহই আর তাহার নিকট গমন করিত
না। ।

অনন্তর কৃষার সহিত পঞ্চভ্রাতা নগরে প্রবিষ্ট হইয়া
প্রত্যেকে স্বীয় নির্বাচিত ছদ্মবেশের উপযোগী বস্ত্র ও উপকরণ
সংগ্রহ করিয়া রাজসভায় কর্ম প্রার্থনায় একে একে উপস্থিত
হইতে লাগিলেন।

সর্বপ্রথমে রাজা যুধিষ্ঠির শারিফলকবেষ্টিত কাঞ্চনময়
অঙ্গশুটिकासকল কক্ষে ধারণপূর্বক ব্রাহ্মণবেশে বিরাটভবনে
উপস্থিত হইলেন। অচিরকাল মধ্যেই ভাস্মাচ্ছন্ন বস্ত্রের ন্যায়
দীপ্তিমান ধর্মরাজের প্রতি বিরাটের দৃষ্টি আকৃষ্ট হইল।
তিনি বিস্মিত হইয়া অগ্ন্যাগ্ন সভাসদদিগকে জিজ্ঞাসা করিতে
লাগিলেন—

হে সভাগণ, যিনি ব্রাহ্মণবেশে রাজার ন্যায় শোভা
পাইতেছেন, ইনি কে। ইহার সহিত অনুচরবর্গ বা
বাহনাদি কিছুই নাই, অথচ ইনি নৃপতির ন্যায় নির্ভীকচিত্তে
আমাদের নিকট আগমন করিতেছেন।

বিরাটরাজ একপ আলোচনা করিতেছেন, ইত্যবসরে
যুধিষ্ঠির সমীপে উপস্থিত হইয়া কহিলেন—

মহারাজ, আমি ব্রাহ্মণ, দৈবহুবিপাকে সর্বস্বাস্তু হইয়া
আপনার নিকট জীবিকালভার্থে আসিয়াছি, আপনি অনুমতি

করিলে এই স্থানে অবস্থান করিয়া আপনার অভিলাষানুরূপ কার্য সম্পাদন করিব।

বিরাটরাজ সাতিশয় প্রহৃষ্ট মনে কহিলেন—

হে তাত, তোমাকে নমস্কার, তুমি কোন্ রাজ্য হইতে আগমন করিতেছ, তোমার নাম ও গোত্র কী এবং কোন্ শিল্প কার্যই বা অনুষ্ঠান করিয়া থাকে।

যুধিষ্ঠির কহিলেন—মহারাজ, আমি ব্যাস্রপদী গোত্র-সম্ভূত ব্রাহ্মণ, আমার নাম কঙ্ক। আমি পূর্বে রাজ্য যুধিষ্ঠিরের প্রিয়সখা ছিলাম, দ্যুতে আমার বিশেষ নিপুণতা আছে।

বিরাট কহিলেন—দ্যুতদক্ষ ব্যক্তি আমার অতিশয় প্রিয়পাত্র; অতএব অতঃ হইতে তুমি আমারও সখা হইলে। তুমি কখনই হীন কর্মের উপযুক্ত নহ; অতএব তুমি আমার সহিত সমানভাবে এ রাজ্য শাসন করো।

যুধিষ্ঠির কহিলেন—আমার কেবল একটি প্রার্থনা এই আছে যে, আমাকে কোনো নীচ বা কপটাচারী ব্যক্তির সহিত ক্রীড়া না করিতে হয়।

বিরাট ইহাতে সন্মত হইয়া কহিলেন—

তোমার সহিত যে কেহ অন্তায় ব্যবহার করিবে, তাহাকে আমি অবশ্যই উপযুক্ত দণ্ড দিব। পুরবাসিগণ শ্রবণ করুক, অতঃ হইতে এ রাজ্যে আমারই শ্রায় তোমার প্রভুতা রহিল।

যুধিষ্ঠির এইরূপ সমাদরসহকারে কর্মে নিযুক্ত হইয়া পরম সুখে কালাতিপাত করিতে লাগিলেন।

অনন্তর ভীমবল ভীমসেন কৃষ্ণবস্ত্র পরিধান করিয়া কৃষ্ণ ছুরিকা ও পাককার্ষোপযোগী সামগ্রী হস্তে ধারণপূর্বক আগমন করিলেন। মৎস্যরাজ তাঁহাকে সমাগত দেখিয়া কহিতে লাগিলেন—

এই উন্নতস্কন্ধ রূপবান অদৃষ্টপূর্ব যুবাপুরুষ কে। উহার অভিলাষ কী, কেহ শীঘ্র গিয়া জানিয়া আইস।

এইরূপ আদিষ্ট হইয়া সভাসদগণ সহর ভীমসেন-সমীপে উপস্থিত হইয়া রাজার আদেশান্তরূপ জিজ্ঞাসা করিল। তখন ভীমসেন তাঁহার সজ্জার উপযোগী দীনভাবে রাজার সম্মুখে আগমনপূর্বক কহিলেন—

আমি উত্তমব্যাঞ্জনকার সূদ, আমার নাম বল্লভ। আমাকে সূপকারের কর্ম নির্বাহার্থে আপনি গ্রহণ করুন।

বিরাট কহিলেন—হে সৌম্য, তোমাকে সামান্য সূপকার বলিয়া কিছুতেই বিশ্বাস হইতেছে না। তোমার যেরূপ শ্রী ও বিক্রম দৃষ্ট হইতেছে, তাহাতে তোমাকে নরেন্দ্র হইবার উপযুক্ত বলিয়া বোধ হয়।

ভীম বলিলেন—হে বিরাটেশ্বর, পূর্বে আমি রাজা যুধিষ্ঠিরের কর্মে নিযুক্ত থাকিয়া আমার প্রস্তুত ব্যঞ্জনদ্বারা তাঁহার বিশেষ তৃপ্তিসাধন করিতাম। তাহা ছাড়া আমি বাহ্যযুদ্ধে সুশিক্ষিত; অতএব আমি নিশ্চয়ই আপনার প্রিয়কার্য সম্পাদন করিতে পারিব।

বিরাট কহিলেন—বল্লভ, তোমাকে এ কর্মের

অহুপযুক্ত বোধ করিলেও আমি তোমার অভিলাষ পূর্ণ করিব। তোমাকে আমার মহানসের উপর সম্পূর্ণ আধিপত্য দিলাম।

ভীম এইরূপে নৃপতির সাতিশয় শ্রীতিভাজন হইয়া অভিলষিত কর্মে নিযুক্ত হইলেন। কেহই তাঁহার প্রকৃত পরিচয়ের সন্দেহমাত্র করে নাই।

অনন্তর অসিতলোচনা দ্রৌপদী সুদীর্ঘ ও সুকোমল কেশপাশ বেণীরূপে বন্ধন ও একমাত্র মলিন বসন পরিধান করিয়া সৈরিক্রীর আয় দীনভাবে রাজ্যভবনে গমন করিতে লাগিলেন। নাগরিক পুরুষ ও স্ত্রীলোকগণ তাঁহার অসাধারণ সৌন্দর্য দেখিয়া কৌতূহলচিত্তে ক্রমাগত জিজ্ঞাসা করিতে লাগিল—

তুমি কে, কোথায় যাঈবে, তোমার অভিলাষ কী। দ্রৌপদী সকলকে কহিলেন—

আমি সৈরিক্রী, আমাকে কেহ কার্যে নিযুক্ত করিলে আমি তাহা সুচারুরূপে সম্পন্ন করিব।

বিরাটমহিষী সুদেষ্ণা প্রাসাদের উপর হইতে ইতস্তত দৃষ্টিপাত করিতেছিলেন, ইত্যবসরে অনাথার আয় দীনবসনা অথচ অমাত্যরূপধারিণী দ্রৌপদী তাঁহার নয়নগোচর হইলেন। সুদেষ্ণা তাঁহাকে নিকটে আহ্বানপূর্বক কহিলেন—

ভদ্রে, তুমি কে এবং তোমার অভিলাষই বা কী।

দ্রৌপদী পূর্ববৎ সৈরিক্রীর কর্মপ্রার্থনা জ্ঞাপন করিলেন। তখন রানী কহিলেন—

হে ভাবিনি, আমি তোমাকে সখীরূপে লাভ করিয়া পরম প্রীত হইলাম।

দ্রৌপদী কহিলেন—হে মহিষি, আমি পূর্বে যত্নকুলশ্রেষ্ঠ কৃষ্ণের মহিষী সত্যভামা এবং কুরুকুলশূন্দরী দ্রুপদনন্দিনীর নিকট নিযুক্ত ছিলাম। আমি কেশসংস্কার, বিলেপনপেষণ এবং নানাজাতীয় পুষ্পের মালাগ্রন্থন কার্যে নিপুণা। তবে আমার এই প্রার্থনা যে, উচ্ছিষ্টস্পর্শ বা পাদপ্রক্ষালনকার্য যেন আমাকে না করিতে হয়।

রানী—তথাস্তু,—বলিয়া তাঁহাকে উপযুক্ত বসনভূষণ প্রদানপূর্বক স্বীয় ভবনে আশ্রয় প্রদান করিলেন।

অনন্তর সহদেব অমুত্তম গোপবেশ ধারণ ও গোপভাষা অভ্যাস করিয়া বিরাটের নিকট উপস্থিত হইয়া রাজত্বন-সমীপবর্তী গোষ্ঠের নিকট দণ্ডায়মান রহিলেন। রাজা তাঁহার বেশ ও মুখশ্রীর সম্পূর্ণ বৈষম্য লক্ষ্য করিয়া বিস্ময়াপন্ন হইয়া তাঁহাকে আহ্বানপূর্বক দ্বিজ্ঞাসা করিলেন—

হে ভাত, আমি পূর্বে কখনও তোমাকে দেখি নাই, তুমি কাহার পুত্র, কোথা হইতেই বা আসিলে, আমায় সবিশেষ জ্ঞাপন করো।

সহদেব বলিলেন—আমি বৈশ্য, লোকে আমাকে তদ্বিপাল বলিয়া সম্বোধন করে। আমি পূর্বে রাজা যুধিষ্ঠিরের গোসকলের তত্ত্বাবধারণ করিতাম, এক্ষণে আপনার নিকট সেই কর্মের প্রার্থী আছি।

বিরাট সহদেবের সৌম্যমূর্তি দর্শনে অতিশয় প্রীত হইয়া বলিলেন—

তুমি অগ্গাবধি আমার সমুদয় পশুশালার কর্তৃৎ প্রাপ্ত হইলে।

এবং তাঁহাকে অভিলষিত বেতন প্রদানের আজ্ঞা করিয়া দিলেন। সহদেব এইরূপে সমাদরে গৃহীত হইয়া স্নাত্বে কালযাপন করিতে লাগিলেন।

অনন্তর বলিষ্ঠদেহ উন্নতকায় অর্জুন নর্তকের শ্রী-বিশ পরিধান করিয়া কর্ণে কুণ্ডল, মস্তকে সুদীর্ঘ কেশ-কলাপ ও হস্তে শঙ্খ ও বলয় ধারণপূর্বক বিরাটরাজের সভামণ্ডপে উপস্থিত হইলেন। রাজা সেই তেজঃপূঞ্জ মূর্তির অতীব অসংগত নারীবেশ দেখিয়া সভাগণকে জিজ্ঞাসা করিলেন—

এই ব্যক্তি কে, ইনি কোথা হইতে আসিতেছেন। আমি তো পূর্বে এরূপ মূর্তি কখনও দেখি নাই।

সভ্যগণ বলিল—

ইনি কে আমরা তো কিছুই বুঝিতে পারিতেছি না।

ক্রমে অর্জুন নিকটে উপস্থিত হইলে বিরাট জিজ্ঞাসা করিলেন—

তোমার পুরুষসদৃশ বিক্রম ও স্ত্রীসদৃশ বেশভূষা দেখিয়া আমরা বিস্মিত হইতেছি। তুমি আত্মপরিচয় প্রদান করো।

অর্জুন কহিলেন—মহারাজ, আমার নাম বৃহন্নলা, রাজা যুধিষ্ঠিরের অন্তঃপুরে নৃত্যগীতাদিদ্বারা মহিলাগণের

চিত্তরঞ্জন ও তদ্বিষয়ে শিক্ষা প্রদান করিতাম। এবিষয়ে আমি অতিশয় দক্ষ; অতএব পিতৃমাতৃহীন আমাকে আপনার পুত্র বা কন্যা জ্ঞান করিয়া রাজকুমারী উত্তরার শিক্ষার নিমিত্ত নিযুক্ত করুন।

বিরাট কহিলেন—হে বৃহন্নলে, তুমি আমার কন্যা উত্তরা ও অশ্বাত্থ পুরমহিলাগণকে নৃত্যগীতাদিবিষয়ে সুনিপুণ করো, তাহাতে আমার বিলক্ষণ শ্রীতিসাধন হইবে। তবে তোমার যেরূপ তেজ ও দীপ্তি প্রকাশ পাইতেছে, তাহাতে এ কার্য তোমার নিতান্ত অনুপযুক্ত বিবেচনা হইতেছে।

রাজার অনুমতি অনুসারে অর্জুন অন্তঃপুরে প্রবেশপূর্বক রাজমহিলাগণের শিক্ষাকার্যে নিযুক্ত হইলেন। রাজকুমারী তাঁহাকে পিতার স্থায় মাণ্ড করিতেন, ক্রমশ তিনি সকলেরই অতিশয় প্রিয়পাত্র হইয়া উঠিলেন। পুরুষদের সহিত অর্জুনের সাক্ষাৎ হইত না; সুতরাং উহার পরিচিত হইবারও কোনো আশঙ্কা রহিল না।

পরিশেষে নকুল একদিন অশ্বশালার বাজি সকল নিরীক্ষণ করিতেছেন, এমন সময় তাঁহার অসাধারণ কান্তি রাজার দৃষ্টি আকর্ষণ করিল। তিনি তাঁহাকে সুবিচক্ষণ হয়-তত্ত্ববেত্তা অনুমান করিয়া অনুচরগণকে আদেশ করিলেন—

ঐ দীপ্তিমান পুরুষকে আমার সমক্ষে আনয়ন করো।

রাজাদেশ জ্ঞাত হইবামাত্র নকুল নিকটে আসিয়া কহিলেন—

মহারাজের জয় হউক। আমি একজন প্রসিদ্ধ অশ্বতত্ত্ববিৎ

আমাকে সকলে গ্রন্থিক বলিয়া ডাকে, পূর্বে রাজা যুধিষ্ঠিরের অশ্বশালায় নিযুক্ত ছিলাম, এক্ষণে আপনার নিকট অশ্বপালের কর্ম প্রার্থনা করি। আমি অশ্বগণের প্রকৃতি শিক্ষা ও চিকিৎসা বিশেষরূপে অবগত আছি।

বিরাট কহিলেন—তুমি আমার অশ্বপাল হইবার অতিশয় উপযুক্ত পাত্র; অতএব সমগ্র যানবাহনাদি অত্ন হইতে তোমার অধীনে রহিল।

এইরূপে একে একে পাণ্ডবগণ সকলেই অভিলষিত কর্মে নিযুক্ত হইয়া সম্পূর্ণ অজ্ঞাতভাবে বিরাটভবনে বাস করিতে লাগিলেন।

৬

পাণ্ডবগণের অজ্ঞাতবাসের বৎসর সমাগত হইলে রাজা দুর্যোধন তাঁহাদের অনুসন্ধানার্থে দেশবিদেশে চর প্রেরণ করিলেন। তাহারা নানা গ্রাম নগর ও রাষ্ট্রে বিফল পরিভ্রমণ করিয়া অবশেষে বৎসরের অল্পমাত্র অবশিষ্ট থাকিতে হস্তিনাপুরে প্রত্যাগত হইল। রাজা দুর্যোধনের সভায় জ্ঞোণ কর্ণ কৃপ ভীষ্ম ও মহারথ দ্রিগর্ত রাজ সমাসীন আছেন, এমন সময়ে চরগণ উপস্থিত হইয়া কৃতাজ্জলি-পুটে নিবেদন করিল—

মহারাজ, আমরা অপ্রতিহত-যত্নসহকারে ছুরবগাহ অরণ্যানী ও গিরিশিখর, জনাকীর্ণ প্রদেশ ও অরতিগণের রাজধানী তন্ন তন্ন করিয়া অনুসন্ধান করিলাম, কিন্তু পাণ্ডব-গণের কোনো সংবাদ পাইলাম না।

তখন কর্ণ কহিলেন—

মহারাজ, যাহারা পাণ্ডবগণকে বিশেষরূপে অবগত আছে, এমন কতিপয় ছদ্মবেশী ধূর্ত লোককে প্রত্যেক জনপদ গোপ্তী তীর্থ ও আকরে প্রেরণ করো। তাহারা পুনরায় নদী কুঞ্জ গ্রাম নগর আশ্রম ও গিরিগুহায় অনুসন্ধান করুক।

কর্ণের বাক্য সমর্থন করিয়া দৃশাসন ভ্রাতাকে কহিলেন—

মহারাজ, আপনি অবিচলিত উৎসাহে পাণ্ডবগণের অনুসন্ধান করিতে থাকুন। তাহারা হয় অত্যন্ত গোপনভাবে অবস্থিতি করিতেছেন, নয় একান্ত ছুরবস্থায় পতিত হইয়া প্রাণত্যাগ করিয়াছেন।

কৃপাচার্য কহিলেন—পাণ্ডবগণের প্রতিজ্ঞাত ত্রয়োদশ বৎসর পূর্ণ হইবার আর অতি অল্প দিবস অবশিষ্ট আছে, অতএব উহাদের অভ্যূদয়ের পূর্বেই তুমি এই বেলা কোষশুদ্ধি বলবৃদ্ধি ও নীতিবিধান করো এবং বল মিত্র ও সৈন্য সামন্তের সামর্থ্য বিবেচনা করো।

ইতিপূর্বে ত্রিগর্তরাজ বিরাটরাজকর্তৃক বারবার পরাজিত হইয়াছিলেন; এক্ষণে উপযুক্ত অবসর বুঝিয়া প্রথমে কর্ণের প্রতি দৃষ্টিপাত করিয়া পরে কহিলেন—

হে দুর্যোধন, আমরা সকলে মিলিয়া মৎস্যদেশ আক্রমণ করিলে জয়লাভ করিতে সমর্থ হইব এবং তত্রত্য বহুসংখ্যক গো, ধন ও রত্ন আমরা বিভাগ করিয়া লইতে পারিব। তদ্ব্যতীত মৎস্যরাজ্য হস্তগত হইলে তোমারও বলবৃদ্ধি হইবে সন্দেহ নাই।

কর্ণ সুশর্মার বাক্য অনুমোদনপূর্বক দুর্যোধনকে কহিলেন—

মহারাজ, অর্থহীন ভ্রষ্টবল পাণ্ডবগণের অনুসন্ধানে বৃথা সময়ক্ষেপ করা অপেক্ষা নিজবল বৃদ্ধি করাই শ্রেয়।

দুর্যোধন কর্ণের কথায় হৃষ্ট হইয়া দুর্যোধনকে আজ্ঞা করিলেন—

ভাতঃ, তুমি শীঘ্র বৃদ্ধগণের সহিত মন্ত্ৰণা করিয়া বাহিনী যোজনা করো।

অনন্তর ত্রিগর্তরাজ স্বীয় সৈন্য সজ্জিত করিয়া কৃষ্ণপক্ষীয় সপ্তমীতে মৎস্যদেশাভিমুখে যাত্রা করিলেন। কৌরবগণও পরদিন অপরদিক হইতে বিরাটরাজকে আক্রমণ করিবার মানসে ভিন্ন পথ অবলম্বন করিলেন।

এদিকে পাণ্ডবগণ ছদ্মবেশে বিরাটরাজের কার্যাক্ষতান করিয়া সকল বিষয়ে তাঁহার সহায়-স্বরূপ হইয়া তাঁহাদের প্রতিজ্ঞাত অজ্ঞাতবাসের কাল অতিবাহিত করিয়াছেন, এমন সময়ে ত্রিগর্তাধিপতি মৎস্যদেশে উপস্থিত হইয়া বিরাটনগরের একপ্রান্ত হইতে বহুতর গোধন অপহরণ করিলেন।

তখন সেই গোরক্ষক গোপ সত্বরে রথারোহণ করিয়া

মহাবেগে পুরী প্রবেশপূর্বক যে স্থানে পাণ্ডবগণবেষ্টিত হইয়া বিরাটরাজ আসীন আছেন, সেখানে উপস্থিত হইল এবং সম্মুখ রথ হইতে অবতরণ করিয়া রাজসমীপে অগ্রসর হইয়া প্রণতি-পূর্বক নিবেদন করিল—

মহারাজ, ত্রিগর্তগণ সসৈন্যে আমাদের আক্রমণ করিয়া আপনার সহস্র সহস্র গোধন অপহরণ করিতেছেন। আপনি রক্ষা করুন।

বিরাটরাজ এই কথা শ্রবণ করিবামাত্র রথ-মাতঙ্গ-অশ্ব-পদাতিসমন্বিত স্বীয় সেনাদিগকে যুদ্ধার্থে প্রস্তুত হইতে আদেশ করিলেন ও কহিলেন, বোধ হইতেছে মহাবীর কঙ্ক, বল্লভ, তজ্জিপাল, ও গ্রস্থিক ইহারাও যুদ্ধ করিবেন; অতএব ইহাদিগকে উপযুক্ত রথ, সুদৃঢ় বর্ম ও বিবিধ আয়ুধ প্রদান করো।

রাজ্য প্রাপ্ত হইয়া যুধিষ্ঠির ভীমসেন নকুল ও সহদেব দৃষ্টান্তে নিদিষ্ট অস্ত্রগ্রহণ ও রথারোহণপূর্বক মৎস্যরাজের অনুসরণ করিতে লাগিলেন। মহাবল মৎস্যসেনা অপরাহ্ন-কালে নগর হইতে বহির্গত হইয়া গোধনাপহারী ত্রিগর্ত-দিগকে আক্রমণ করিল।

এই অবস্থায় সূর্য অস্তমিত হইল। সমরক্ষেত্র তিমিরাচ্ছন্ন হইলে যুদ্ধ ক্ষণকাল স্তব্ধ রহিল। অনন্তর চন্দ্রমা অন্ধকার নিরাকৃত করিয়া নভোমণ্ডলে উদিত হইলে ক্ষত্রিয়গণ আলোকপ্রাপ্ত হইয়া পুনরায় পরস্পরের প্রতি ধাবিত হইলেন।

ইত্যবসরে ত্রিগর্তাধিপতি সুশৰ্মা কনিষ্ঠ ভ্রাতাকে রথে লইয়া বিরাটরাজকে আক্রমণ করিলেন এবং সমীপস্থ হইয়া সত্ত্বর রথ হইতে গদাহস্তে অবতরণ করিলেন। মহাবেগে বিরাটের রথের নিকট অগ্রসর হইয়া তিনি মৎস্যরাজের সারথি-সংহারপূর্বক তাঁহাকে গ্রহণ ও স্বীয় রথে আরোপিত করিয়া পলায়ন করিতে লাগিলেন। ইহাতে সৈন্যগণ সাতিশয় ভীত হইয়া চতুর্দিকে বিক্ষিপ্ত হইয়া পড়িল। তখন যুধিষ্ঠির ভীমসেনকে বলিলেন—

হে বুকোদর, ঐ দেখো সুশৰ্মা বিরাটরাজকে লইয়া প্রস্থান করিতেছেন। আমরা এতদিন ইহারই আশ্রয়ে সুখ-স্বচ্ছন্দে কালযাপন করিয়াছি; অতএব তাহার প্রতিদান-স্বরূপ তোমার উহাকে সত্ত্বর অরাতিহস্ত হইতে মোচন করা উচিত।

তখন মহাবল ভীমসেন শরাসন গ্রহণপূর্বক বারিধারার ন্যায় অনবরত শরবর্ষণ করিতে করিতে সুশৰ্মার রথের পশ্চাতে ধাবিত হইলেন। ত্রিগর্তরাজ পশ্চাঙ্গাগে দৃষ্টি করিয়া কালান্তক যমের ন্যায় ভীমসেনকে আসিতে দেখিয়া রথ প্রত্যাবর্তনপূর্বক সমরে প্রবৃত্ত হইলেন। ভীমসেন ক্রোধভরে নিমেষমধ্যে বহুসংখ্যক সৈন্য নিহত করিয়া সুশৰ্মার সমীপস্থ হইলেন। ইত্যবসরে অগ্ন্যাগ্ন পাণ্ডবগণও বেগে তথায় উপস্থিত হইয়া তাঁহার সহায়তা করিলেন। একত্র সকলের বিক্রমপ্রকাশে তত্রত্য সৈন্যগণ নিহত হইলে ভীমসেন অবসর বুঝিয়া সুশৰ্মার সারথিকে বিনষ্ট করিয়া তাঁহার রথারোহণ-

পূৰ্বক বিরাটকে মোচন ও সূক্ষ্মৰ্মাকে রথচ্যুত করিয়া গ্রহণ করিলেন। যুধিষ্ঠির ইহা দেখিয়া সহাস্তবদনে বলিলেন—

এইবার তো ত্রিগত'রাজ পরাজিত হইলেন, এক্ষণে উহাকে পরিত্যাগ করো।

পরে তিনি সূক্ষ্মৰ্মাকে কহিলেন—

এক্ষণে তুমি মুক্ত হইলে, আর কখনও পরের ধনে লুকু হইয়া এরূপ সাহসিক কর্ম করিয়ো না।

ত্রিগত'রাজ যুধিষ্ঠিরের অহুগ্রহে মুক্তিলাভ করিয়া লজ্জা-বনতবদনে বিরাটকে অভিবাদনপূর্বক প্রস্থান করিলেন।

মৎশুরাজ সে রাত্রি সমরক্ষেত্রেই অতিবাহিত করিলেন। পরদিন প্রাতে মৎশুরাজ পাণ্ডবদিগকে প্রভূত ধন প্রদান করিবার আদেশ দিয়া বলিতে লাগিলেন—

আমি তোমাদেরই বিক্রমে মুক্তি ও কল্যাণ লাভ করিলাম। অজ্ঞ হইতে আমার সমুদয় ধনরত্নে তোমাদেরই আমার জায় প্রভুতা রহিল। তোমরা আমাকে অরাতি-হস্ত হইতে উদ্ধার করিয়াছ; অতএব তোমরাই এ রাজ্য শাসন করো।

পাণ্ডবগণ কৃতাজ্জলিপুটে দণ্ডায়মান হইয়া রাজার কৃতজ্ঞ-বচন অভিনন্দন করিলে যুধিষ্ঠির প্রত্যুত্তর প্রদান করিলেন—

মহারাজ, আপনি যে শত্রুহস্ত হইতে পরিত্রাণ পাইয়াছেন, ইহাই আমাদের পরম পরিতোষের বিষয়। এক্ষণে দূতগণ নগরে গমন করিয়া সূক্ষ্মগণকে প্রিয়সংবাদ প্রদান ও আপনার বিজয় ঘোষণা করুক।

এদিকে রাজা নগরে প্রত্যাগত হইবার পূর্বেই দুর্যোধন, ভীষ্ম, দ্রোণ ও কর্ণপ্রভৃতি কৌরবসেনা-সমভিব্যাহারে উপস্থিত হইয়া বিরাটনগরী পরিবৃত্ত করিলেন এবং গোপ-গণকে প্রহার করিয়া ষষ্টিসহস্র গোধন অধিকার করিলেন। গো লইয়া ইহাদিগকে প্রস্থান করিতে দেখিয়া গোপাধ্যক্ষ ভয়ব্যাকুলচিত্তে রাজভবনে উপস্থিত হইয়া রাজপুত্র উত্তরকে নিবেদন করিল—

কৌরবগণ বলপূর্বক আপনাদের ষষ্টিসহস্র গো অপহরণ করিতেছেন; অতএব সে সম্বন্ধে যাহা কৰ্তব্য হয়, অনুষ্ঠান করুন। মহারাজ আপনার উপর সমুদয় ভার সমর্পণ করিয়া গিয়াছেন; অতএব আপনি স্বয়ং শত্রু পরাজয়ে যত্নবান্ হউন।

উত্তর স্ত্রী-সমাজের মধ্যে এক্রূপে অভিহিত হইয়া আত্ম-শ্লাঘা সহকারে কহিতে লাগিলেন—

আমি যদি একজন উপযুক্ত সারথি প্রাপ্ত হই, তবে অনায়াসে সংগ্রামে গমনপূর্বক শত্রুসংহারে প্রবৃত্ত হইতে পারি এবং কৌরবগণও অতীহ আমার বলবীৰ্য্য প্রত্যক্ষ করিতে পারে।

অৰ্জুন রাজপুত্রের এই কথা শুনিয়া নির্জনে ভ্রোপদীকে কহিলেন—

প্রিয়ে, তুমি রাজপুত্র উত্তরকে বলো যে, বৃহন্নলা এক সময়ে পাণ্ডবগণের সারথ্য গ্রহণ করিয়া মহাযুদ্ধে কৃতকার্য হইয়া-ছিল; অতএব উহাকে সারথি করিয়া আপনি অনায়াসে যুদ্ধে গমন করিতে পারেন।

অর্জুনের বাক্য অনুসারে জ্যোতদী রাজপুত্রের নিকট গমনপূর্বক সলঙ্কভাবে ধীরে ধীরে কহিতে লাগিলেন—

এই মহাকায় বৃহন্নলা এক সময়ে মহাবীর ধনঞ্জয়ের সারথি ছিলেন। উনি অর্জুনেরই শিষ্য এবং ধনুর্বিদ্যায় সেই মহাত্মা অপেক্ষা নূন নহেন; আমি পাণ্ডবগৃহে বাসকালে এই বৃত্তান্ত অবগত হইয়াছিলাম।

আপনার ভগিনী উত্তরা বৃহন্নলাকে বলিলে তিনি নিশ্চয়ই রাজকুমারীর কথা রক্ষা করিবেন।

অনন্তর উত্তরের আদেশক্রমে তাঁহার ভগিনী অর্জুনকে লইয়া রাজকুমারের সমীপে উপস্থিত হইলেন।

উত্তর তাঁহাকে দেখিবামাত্র দূর হইতে বলিতে লাগিলেন—

শুনলাম তুমি পূর্বে অর্জুনের সারথ্য করিয়াছ; অতএব এক্ষণে আমার সারথি হইয়া আমাকে কোরবদের নিকট লইয়া চলো।

অর্জুন পরিহাসচ্ছলে বলিলেন—

সারথ্যকর্ম কি আমার সাজে। আমাকে বরং গীত বাণ বা নৃত্য করিতে বলিলে তাহা অনায়াসে সম্পাদন করিতে পারি।

অনন্তর কবচ বিপর্যস্তভাবে অঙ্গে ধারণ করিয়া এবং অনভ্যস্তের ন্যায় নানাবিধ অঙ্গ-ভঙ্গী করিয়া তিনি মহিলাগণের কৌতুক উৎপাদন করিতে লাগিলেন। অবশেষে রাজকুমার স্বয়ং তাঁহাকে বর্মকবচাদি দ্বারা সুসজ্জিত করিয়া সারথ্যপদে বরণ করিলেন। উত্তরাপ্রভৃতি কণ্ঠাগণ বলিলেন—

হে বৃহন্নলে, ভীষ্ম-দ্রোণাদিকে পরাজয় করিয়া তাঁহাদের
রুচির বসন আমাদের পুস্তলিকার নিমিত্ত আনয়ন করিয়ো।

অর্জুন সহাস্তবদনে উত্তর করিলেন—

রাজকুমার যদি কৌরবগণকে পরাজয় করেন, তবে আমি
অবশ্য তাঁহাদের বিচিত্র উত্তরীয়সকল আনয়ন করিব।

এই কথা বলিয়া অর্জুন রথারোহণপূর্বক রাজকুমারকে
কৌরবসৈন্যভিষ্মে লইয়া চলিলেন। উত্তর অকুতোভয়ে
বলিতে লাগিলেন—

হে বৃহন্নলে, সত্বর কৌরবগণের সমীপে রথ উপনীত করো,
আমি সেই ছুরাছাদিগকে উপযুক্ত শাস্তি দিব।

এই কথা শ্রবণে অর্জুন অতি দ্রুতবেগে অশ্বচালনা করিয়া
শ্মশানসমীপস্থ সেই সমীপবৃক্ষের নিকট উপস্থিত হইলেন।
সেস্থান হইতে সাগরোপম কৌরববল দৃষ্ট হইতে লাগিল।
তখন রাজকুমার শ্রেষ্ঠ-মহারথ-রক্ষিত সেই বিপুল কুরুসৈন্য
অবলোকন করিয়া রোমাঞ্চিতকলেবরে ভয়োদ্বিগ্নচিত্তে বলিতে
লাগিলেন—

হে সারথ্যে, ইহাদের সহিত আমি একাকী কী প্রকারে
যুদ্ধ করিব। এই বীর-পরিরক্ষিত সৈন্যদল স্বয়ং দেবগণেরও
অজ্ঞেয় বলিয়া বোধ হয়। যুদ্ধ করা দূরে থাক, ইহাদিগকে
দেখিয়াই আমার অন্তঃকরণ নিরুৎসাহ ও শরীর অবসন্ন
হইতেছে। পিতা আমাকে শূন্য গৃহে রাখিয়া সমগ্র সৈন্য-
সামন্ত লইয়া প্রস্থান করিয়াছেন, আমি একাকী এক্ষণে কী
করিব।

অজুন তাঁহাকে সাহসপ্রদানার্থে কহিলেন—

হে কুমার, এক্ষণে কাতর হইয়া শক্রগণের হর্ষবর্ধন করিয়ো না। উহারা কী করিয়াছে যে, তুমি ইতিমধ্যেই ভীত হইতেছ, তুমি যাত্রাকালে সকলের সমক্ষে ঘেরূপ গর্ব করিলে তাহার পর গো লইয়া না ফিরিলে জ্বী পুরুষ সকলেই উপহাস করিবে। সৈরিক্তী সকলের সমক্ষে আমার সারথ্যের প্রশংসা করিলেন, আমাকেও উপহাসাস্পদ হইতে হইবে; অতএব কৌরবগণের সহিত যুদ্ধ না করিয়া কিন্নাপে ক্ষান্ত হইব।

উত্তর কহিলেন—কৌরবগণ আমাদের যথাসর্বস্ব হরণই করুক, লোকে উপহাসই করুক, কিংবা পিতা তিরস্কারই করুন, আমি কিছুতেই যুদ্ধ করিতে পারিব না।

এই কথা বলিয়া রাজকুমার ধনুর্বাণ ত্যাগ করিয়া রথ হইতে লক্ষপ্রদানপূর্বক পলায়নে উদ্ভূত হইলেন।

অজুন তখন বলিলেন—

হে রাজকুমার, যুদ্ধে পরাভূত হওয়া ক্ষত্রিয়ধর্ম নহে। ভীত হইয়া পলায়ন অপেক্ষা সমরে মরণও শ্রেয়স্কর।

বাক্য বিফল. দেখিয়া ধনঞ্জয় রথ হইতে অবতরণপূর্বক উত্তরের পশ্চাতে ধাবমান হইলেন। তাঁহার গতিবেগে সূদীর্ঘ বেণী আলুলায়িত এবং বসন শিথিল ও বিধ্বংসমান হইতে লাগিল।

এই অদ্ভুত দৃশ্য অবলোকনে অদূরস্থিত কুরুসেনাগণ হাস্য করিতে লাগিল। অজুনের অঙ্গসৌষ্ঠব কেহ কেহ পরিচিতবৎ

বোধ করিয়া এই স্ত্রী-বেশধারী ব্যক্তি কে হইতে পারে ইহা লইয়া নানাপ্রকার বিতর্ক করিতে লাগিল।

এদিকে অর্জুন শতপদমাত্র গমন করিয়া পলায়মান রাজপুত্রের কেশধারণপূর্বক তাঁহাকে সবলে রথে আরোপিত করিলেন। উত্তর কাতরস্বরে অনুন্নয় করিলেন—

হে বৃহন্নলে, তুমি শীঘ্র রথ প্রতিনিবৃত্ত করো। আমি তোমাকে বহু ধন প্রদান করিব।

তখন রাজকুমারকে ভয়ে-মূহিতপ্রায় দেখিয়া অর্জুন তাহাকে সহাস্ত্রবদনে কহিলেন—

হে বীর, তোমার যদি যুদ্ধ করিতে উৎসাহ না হয়, তবে তুমি সারথি হইয়া রথ-চালনা করো। তোমার কিছুমাত্র শঙ্কা নাই, আমি স্থায়ী বাহুবলে তোমাকে রক্ষা করিব।

উত্তর এই কথায় কিঞ্চিৎ আশ্বস্ত হইয়া রথ-চালনায় প্রবৃত্ত হইলেন। ছদ্মবেশী অর্জুনকে রথারোহণ করিতে দেখিয়া ভীষ্ম-দ্রোণাদি মহারথিগণের তাঁহার প্রকৃতপরিচয়-সম্বন্ধে আর সংশয় রহিল না। এদিকে নানাবিধ ছুনিমিত্তও দৃষ্ট হইতে লাগিল। তখন ভীষ্মকে দ্রোণ বলিতে লাগিলেন—

আজ দেখিতেছি পার্শ্বের হস্তে আমাদিগকে পরাজিত হইতে হইবে। আমাদের মধ্যে এমন কেহই নাই, যে তাঁহার প্রতিদ্বন্দ্বী হইতে পারে। তাহাতে কর্ণ কহিলেন—

হে আচার্য, আপনি সর্বদাই অর্জুনের প্রশংসা এবং আমাদের নিন্দা করিয়া থাকেন, কিন্তু আমি ও তুর্ধোধন একত্র হইলে অর্জুনের কী সাধ্য আমাদের পরাজয় করে।

দুর্যোধন এই কথায় শ্রীত হইয়া কহিলেন—

হে কর্ণ, যদি এই স্ত্রীবেশধারী বাস্তবিকই অর্জুন হয়, তবে তো বিনা যুদ্ধেই আমাদের মনোরথ পূর্ণ হইবে; কারণ প্রতিজ্ঞাত ত্রয়োদশ বর্ষ শেষ হইবার পূর্বে আমরা তাঁহার পরিচয় পাইলে পাণ্ডবগণকে পুনরায় দ্বাদশ বৎসর বনবাসে গমন করিতে হইবে। আর অশ্ব কেহ যদি এই অন্ত্য বেশ ধারণ করিয়া আসিয়া থাকে, তবে আমি নিশ্চয়ই উহাকে সংহার করিব।

এদিকে অর্জুন উত্তরকে সেই সমীপক্ষে নিকট গমন করিতে বলিয়া কহিলেন—

হে রাজকুমার, তোমার এই ধনুঃশর অতি অসার, যুদ্ধকালে আমার বাহুবল সহ্য করিতে পারিবে না। এই বৃক্ষে পাণ্ডবগণ তাঁহাদের অস্ত্রসকল রক্ষা করিয়াছেন, তুমি ইহাতে আরোহণপূর্বক সেগুলি আমাকে প্রদান করো। সেই সকল অস্ত্র আমার উপযুক্ত হইবে।

অর্জুনের নির্দেশক্রমে উত্তর সমীপক্ষে আরোহণ করিলেন এবং অস্ত্রশস্ত্র ভূতলে অবতারিত করিয়া বন্ধন ও আচ্ছাদন মোচনপূর্বক একে একে কার্য্যুকাদি বাহির করিতে লাগিলেন।

তখন অর্জুন উত্তরকে নিজের এবং অশ্ব পাণ্ডবগণে প্রকৃত পরিচয় প্রদান করিলেন। বিরাটতনয় চমৎকৃত হইয়া অর্জুনকে সবিনয়ে অভিবাদনপূর্বক কহিলেন—

হে মহাবাহো, আজ আমার পরম সৌভাগ্য

আপনার দর্শন লাভ করিলাম। আমি যদি অজ্ঞতাপ্রযুক্ত ইতিপূর্বে কোনো অযথা কথা বলিয়া থাকি, তবে আমাকে মার্জনা করিবেন। আজ্ঞা করুন, কোন্‌দিকে গমন করিতে হইবে।

অর্জুন কহিলেন—হে রাজকুমার, আমি তোমার প্রতি প্রসন্ন হইয়াছি। তুমি অবিচলিতচিত্তে শক্রমধ্যে অশ্ব-চালনা করিয়ো।

এই বলিয়া অর্জুন স্ত্রীবেশ পরিহারপূর্বক সেই আয়ুধের সঙ্গে রক্ষিত বর্ম ধারণ ও শুক্রবসনে কেশ আচ্ছাদন করিলেন; পরে অস্ত্রসমুদয় ও গাণ্ডীব গ্রহণ করিয়া অতি ভীষণ ধনুষ্ঠংকার ও লোমহর্ষণ শঙ্খধ্বনি করিতে করিতে কৌরবদের দিকে রথ চালনা করিতে বলিলেন। তখন দ্রোণাচার্য কহিতে লাগিলেন—

হে কৌরবগণ, যখন ইহার রথনির্ঘোষে বসুমতী বিকম্পিত হইতেছে, তখন ইনি নিশ্চয়ই অর্জুন হইবেন।

দুর্যোধনও কিঞ্চিৎ শঙ্কিত হইয়া কহিতে লাগিলেন—

পাণ্ডবগণ নির্ধারিত ত্রয়োদশ বৎসর উত্তীর্ণ হইয়াছেন কি না, তাহা নিঃসংশয়রূপে জ্ঞাত হওয়া কর্তব্য। কিয়দ্দিন অবশিষ্ট আছে বলিয়া সকলের ধারণা ছিল, কিন্তু আমার এক্ষণে সন্দেহ হইতেছে। স্বার্থচিন্তার সময়ে লোকের ভ্রমে পতিত হওয়া বিচিত্র নহে। তবে পিতামহ গণনাদ্বারা প্রকৃত অবস্থা জ্ঞাত হইতে পারেন। কিন্তু সে যাহাউক আমি তো ভীত হইবার কোনো কারণ দেখিতেছি না। এ

ব্যক্তি কোনো মংস্রবীরই হউক বা মংস্ররাজই হউক বা স্বয়ং ধনঞ্জয়ই হউক যুদ্ধ করিতেই হইবে, ইহা আমি প্রতিজ্ঞা করিলাম।

সকলে সজ্জিত হইয়া অর্জুনের আগমন প্রতীক্ষা করিতেছেন, এমন সময়ে দ্রোণাচার্য বহুকাল পরে প্রিয় শিষ্যের দর্শনলাভে সকলের প্রতি দৃষ্টিপাত করিয়া কহিতে লাগিলেন—

ঐ শুন মহাশ্বন গাণ্ডীব-টংকার শ্রুত হইতেছে। এই দেখো দুইটি শর আমার পদতলে পতিত হইল এবং অপর দুইটি আমার কর্ণ স্পর্শ করিয়া অতিক্রান্ত হইল। ইহা দ্বারা মহাবীর অর্জুন আমার পাদবন্দন ও কুশলপ্রশ্ন করিলেন।

অনন্তর নিকটবর্তী হইয়া অর্জুন রাজকুমার উত্তরকে কহিলেন—

হে সারথি, তুমি অশ্বের রশ্মি সংযত করো। এই সৈন্যমণ্ডলীর মধ্যে কুরুকুলাধম দুর্যোধন কোথায় আছে দেখি। অশ্ব কৌরবগণের সহিত যুদ্ধ করিবার কোনো প্রয়োজন নাই, দুর্যোধন পরাজিত হইলেই সকলে পরাজিত হইবে। কিন্তু তাহাকে তো ইহার মধ্যে কোথাও দেখিতে পাইতেছি না। ঐ-যে দূরে সৈন্যপদধূলি উড্ডীন হইতেছে, সে দুরাত্মা নিশ্চয়ই উহাদের সহিত পলায়ন করিতেছে; অতএব এই সকল মহারথকে পরিত্যাগ করিয়া ঐ দিকে সশ্বর রথ চালনা করো।

উত্তর পরম যত্নসহকারে রশ্মিসংযম দ্বারা যে দিকে রাজা

দুর্যোধন গমন করিতেছিলেন, সেই দিকে অশ্বচালনা করিলেন। কৌরবগণ তাঁহার অভিপ্রায় বুঝিতে পারিয়া অর্জুনকে নিবারণ করিবার উদ্দেশ্যে ধাবমান হইলেন। তখন অর্জুন শরজালে সৈন্যগণকে অত্যন্ত ব্যাধিত করিয়া প্রথমত ধেনু-সকলকে গৃহাভিমুখে প্রতিনিবৃত্ত করাইলেন। পরে পুনরায় দুর্যোধনকে আক্রমণ করিবার অবসর প্রতীক্ষা করিতে লাগিলেন। সময় বুঝিয়া উত্তরকে সম্বোধনপূর্বক তিনি কহিলেন—

হে রাজপুত্র, সত্বর এই পথে রথ চালনা করো, তাহা হইলে ব্যূহ মধ্যে প্রবিষ্ট হইতে পারিবে। ঐ দেখো, সূতপুত্র মন্তমাতঙ্গের দ্বারা আমার সহিত যুদ্ধ করিতে উত্তত হইয়াছে; অতএব উহার প্রতি প্রথমে অগ্রসর হও।

বিরাটতনয় তাহাই করিলে কর্ণ অর্জুনের উপর শরবর্ষণ করিতে আরম্ভ করিলেন। অর্জুন রুষ্ট হইয়া প্রথমত বিকর্ণকে রথ হইতে পাতিত করিলেন, পরে অধিরথপুত্র কর্ণের ভ্রাতাকে সংহার করিলেন। তখন ক্রোধভরে কর্ণ সম্মুখীন হইয়া দৈরথ যুদ্ধে প্রবৃত্ত হইলেন, অশ্রান্ত কৌরবগণ স্তম্ভিত হইয়া এই ভীষণ ব্যাপার অবলোকন করিতে লাগিলেন।

প্রথমে যখন কর্ণ অর্জুননিক্রিপ্ত বাণসমূহ মধ্যপথেই সম্পূর্ণরূপে প্রতিহত করিয়া তাঁহার অশ্বগণকে বিদ্ধ করিলেন, তখন তাঁহারা মহা আনন্দে করতালি প্রদান ও শঙ্খ ভেরী প্রভৃতি বাদনদ্বারা কর্ণের প্রশংসা আরম্ভ করিলেন। তাহাতে মহাবীর ধনঞ্জয় স্তম্ভোখিত সিংহের দ্বারা ক্রোধান্বিত হইয়া

শরনিকরদ্বারা কর্ণের রথ আচ্ছাদন করিয়া নিশিত ভল্ল
নিক্ষেপপূর্বক তাঁহার গাত্র বিদ্ধ করিলেন। পরে বিবিধ
সুশাণিত অস্ত্রদ্বারা সূতপুত্রের বাহু শির উরু ললাট ও
গ্রীবদেশ ভেদ করিলে কর্ণ যুঁহিতপ্রায় হইয়া রণক্ষেত্র পরি-
ত্যাগপূর্বক পলায়ন করিলেন।

অনন্তর বিরাটনন্দন পার্থের আদেশানুসারে দ্রোণাচার্যের
প্রতি রথচালনা করিলেন। তুল্যবীর গুরুশিষ্যের সংঘটনে সকলে
বিস্মিত হইয়া নিরীক্ষণ করিতে লাগিল এবং সৈন্যদল হইতে
মহান্ শঙ্কান্বিত উদ্ভিত হইল। অর্জুন প্রথম গুরুদর্শনে মহানন্দ-
সহকারে তাঁহাকে অভিবাদনপূর্বক বিনয় বাক্যে কহিলেন—

হে সমরভূজ্য, আমরা বনবাসজনিত বহুকষ্ট ভোগ করিয়া
এক্ষণে কৌরবগণের শত্রুপক্ষের মধ্যে গণ্য হইয়াছি ; অতএব
আমাদের প্রতি রুষ্ট হইবেন না। আপনি প্রথমে প্রহার না
করিলে আমি আপনার সহিত যুদ্ধ করিতে পারিব না, অতএব
আপনি বাণত্যাগ করুন।

অনন্তর দ্রোণ অর্জুনের প্রতি বাণত্যাগ করিলে অর্জুন
পথেই তাহা খণ্ডখণ্ড করিয়া ফেলিলেন। তখন দ্রোণার্জুনের
সমরকৃত্য আরম্ভ হইল। উভয়েই মহারথী, উভয়েই দিব্যাস্ত্র-
বিশারদ, সকলে স্তম্ভিত হইয়া তাঁহাদের অদ্ভুত কর্ম দর্শন
করিতে লাগিল।

কৌরবগণ বলিলেন—অর্জুনব্যতীত কেহই আচার্যের সম-
কক্ষ হইতে পারিত না, ক্ষত্রিয় ধর্ম কী ভয়ানক যে, পার্থকে
গুরুর সহিত যুদ্ধে প্রবৃত্ত হইতে হইল।

এদিকে বীরদ্বয় সম্মুখবর্তী হইয়া পরস্পরকে শরজালে সমাবৃত ও ক্ষতবিক্ষত করিতে লাগিলেন। দ্রোণাচার্য অর্জুনের অভ্রাস্ততা লঘুহস্ততা ও দূরপাতিতা অবলোকন করিয়া বিস্ময়াপন্ন হইলেন। অনন্তর সব্যাসাচী ক্রমেই উত্তপ্ত হইয়া দুই হস্তে এতবেগে বাণবর্ষণ আরম্ভ করিলেন যে, কখন শরগ্রহণ করিতেছেন, কখন নিক্ষেপ করিতেছেন, তাহা কাহারও দৃষ্টিগোচর হইল না। সৈন্যগণ আচার্যকে অর্জুন-বাণে একান্ত সমাচ্ছন্ন দেখিয়া হাহাকার করিতে লাগিল। তখন অশ্বখামা সহসা অর্জুনের প্রতি ধাবমান হইয়া তাঁহার মনোযোগ বিক্ষিপ্ত করিয়া দ্রোণাচার্যকে প্রস্থান করিবার অবসর প্রদান করিলেন।

ইতিমধ্যে কর্ণ কথঞ্চিৎ বিশ্রাস্ত হইয়া পুনরায় সনরক্ষেত্রে আগত হইলেন।

জয়শীল অর্জুন তাঁহার প্রতি বর্মভেদী বাণবর্ষণ আরম্ভ করিলেন। তিনি প্রথমত শরাঘাতে কর্ণের তুণীররজ্জু ছেদন করিলেন। তখন কর্ণ অপার তুণ হইতে বাণগ্রহণপূর্বক অর্জুনের হস্তবিদ্ধ করিলে ক্ষণকালের নিমিস্ত তাঁহার মুষ্টি শিথিল হইল। পরে ক্রুদ্ধ হইয়া তিনি কর্ণের শরাসন ছেদন করিলেন এবং তৎক্ষণি অত্যাশ্র অস্ত্রসমুদায় নিবারণ করিলেন। কর্ণকে এইরূপে অস্ত্রহীন করিয়া সৈন্যদল আগত হইবার পূর্বেই অর্জুন তাঁহার অশ্ব বিনষ্ট করিয়া বক্ষঃস্থলে সুতীক্ষ্ণ বাণ বিদ্ধ করিলেন। তাহাতে কর্ণ পুনরায় বিকলেন্দ্রিয় হইয়া ধরাতলে পতিত ও বিচেতন হইলেন এবং

ক্ষণকালপরে সংজ্ঞালাভপূর্বক বেদনায় অধীর হইয়া রণক্ষেত্রে ত্যাগ করিলেন।

অনন্তর পূর্বপরাজিত যোদ্ধৃগণ বারবার সমরক্ষেত্রে প্রত্যাবৃত্ত হইয়া কখনো পৃথক পৃথক, কখনো ধর্মযুদ্ধ পরিত্যাগপূর্বক দলবদ্ধ হইয়া অর্জুনকে আক্রমণ করিতে লাগিলেন। তখন অর্জুন এক সম্মোহন বাণ গাণ্ডীবে সংযোগ করিয়া প্রচণ্ড নির্ধোষে তাহা পরিত্যাগ করিবামাত্র কৌরবগণ সকলে সংজ্ঞাশূন্য হইয়া ধরাতলশায়ী হইলেন।

এই সময়ে রাজকুমারী উত্তরার বাক্য অর্জুনের স্মৃতিপথে উদয় হওয়ায় তিনি বিরাটনন্দনকে বলিলেন—

হে উত্তর, কৌরবগণ এখন চেতনাশূন্য হইয়া পড়িয়া রহিয়াছেন, এই অবসরে তুমি রথ হইতে অবতরণপূর্বক উহাদের উত্তরীয় বসনসকল রাজকুমারীর নিমিত্ত আহরণ করো। তবে সাবধান, ভীষ্ম এই সম্মোহন অস্ত্রের প্রতিঘাত-কৌশল অবগত আছেন; অতএব তাঁহার অশ্বগণের অন্তরালে সতর্কতার সহিত গমন করিয়ো।

অনন্তর উত্তর নিশ্চেষ্ট বীরগণের মধ্যে বিচরণ করিয়া দ্রোণ ও কৃপের শুল্ক বসনদ্বয় কর্ণের পীতবস্ত্র অশ্বখামা ও হৃষোধনের নীল উত্তরীয় গ্রহণ করিয়া পুনরায় রথারোহণ ও বজ্রাধারণ করিয়া ধেনুগণের পশ্চাতে নগরাভিমুখে চলিলেন। ইতিমধ্যে কুরুবীরগণ ক্রমে ক্রমে সংজ্ঞালাভ করিলেন। অর্জুনকে গোধন লইয়া ধীর নিশ্চিন্ত গতিতে প্রস্থান করিতে দেখিয়া হৃষোধন অতিমাত্র ব্যগ্রতাসহকারে কহিলেন—

হে যোদ্ধৃগণ, তোমরা কী নিমিত্ত অর্জুনকে পরিত্যাগ করিয়াছ। উহাকে এরূপ আহত করো যে আর স্বস্থানে না ফিরিতে পারে।

তখন ভীষ্ম হাস্তবদনে কহিলেন—

হে দুর্যোধন, এতক্ষণ তোমার বলবৃদ্ধি কোথায় প্রস্থান করিয়াছিল। তোমরা যখন সকলে হতচেতন হইয়া পড়িয়াছিলে, তখন মহাবীর পার্থ কোনো নৃশংস কার্য করিতে প্রবৃত্ত হন নাই। ত্রৈলোক্যলাভার্থেও তিনি ধর্ম পরিত্যাগ করেন না। এই নিমিত্তই এই সমরে তোমরা সকলে নিহত হও নাই। এক্ষণে আর আশ্বালন শোভা পায় না। অর্জুন গোধন লইয়া প্রস্থান করুন। তোমরা এক্ষণে প্রাণ লইয়া হস্তিনাপুরে প্রত্যাবর্তন করিতেছ, তাহাই পরম সৌভাগ্য।

পিতামহের এই যথার্থ কথা শ্রবণে দুর্যোধন দীর্ঘ নিশ্বাস পরিত্যাগপূর্বক আর দ্বিরুক্তি করিলেন না।

অর্জুন বিরাটনগরে গমনকালে উত্তরকে কহিলেন—

হে তাত, পাণ্ডবগণ যে তোমার পিতার আশ্রয়ে বাস করিতেছেন, একথা তুমিই অবগত হইলে। কিন্তু উপযুক্ত সময় উপস্থিত হইবার পূর্বে উহা প্রকাশ হওয়া বিধেয় নহে; অতএব তুমি স্বয়ং যুদ্ধে জয়লাভ করিয়া গোধন প্রত্যানয়ন করিয়াছ, এইরূপ সকলকে জানাইবে।

উত্তর কহিলেন—হে বীর, আপনি যে কর্ম সম্পাদন করিয়াছেন, তাহা আমা দ্বারা হইতে পারে বলিয়া কে

বিশ্বাস করিবে না। যাহা-ইউক আপনার অছুমতি না পাইলে আমি একথা পিতার নিকটেও প্রকাশ করিব না।

অর্জুন কহিলেন—এক্ষণে গোপগণ নগরপ্রবেশ করিয়া তোমার জয়ঘোষণা করুক। আমরা অপরাহ্নে গমন করিব, কারণ আমাকে পুনরায় বৃহন্নলার বেশ ধারণ করিতে হইবে।

এদিকে বিরাটরাজ ত্রিগর্তগণকে পরাজয় করিয়া পাণ্ডবদের সহিত জুষ্টচিত্তে স্বনগরে প্রবেশ করিলেন এবং অনতিবিলম্বে অন্তঃপুরে উপনীত হইলেন। তথায় একাকী উত্তরের কৌরবসৈন্যের বিরুদ্ধে যুদ্ধযাত্রার সংবাদ শ্রবণে সাতিশয় উদ্ভিগ্ন হইয়া তিনি যোদ্ধবর্গকে সমগ্র সৈন্যবল লইয়া রাজকুমারের সাহায্যার্থে গমন করিতে আদেশ করিয়া কহিলেন—

হে সৈন্যগণ, কুমার জীবিত আছে কি না এই সংবাদ হরায় আমার নিকট প্রেরণ করিয়ো। সে স্রীবেশধারী নর্তককে সারথি ও একমাত্র সহায় করিয়া কি আর উদ্ধার পাইয়াছে।

তখন যুধিষ্ঠির ঈষৎ হাস্যসহকারে কহিলেন—

মহারাজ, বৃহন্নলা যখন রাজকুমারের সারথ্যগ্রহণ করিয়াছেন, তখন আপনার আর চিন্তা নাই। কৌরবগণ গোধন হরণ করিতে সক্ষম হইবেন না।

এই কথা বলিতে বলিতেই দূতগণ আসিয়া উত্তরের বিজয়-সংবাদ প্রদান করিল। বিরাটরাজ সাতিশয় জুষ্টাশ্বঃ-

করণে তাহাদিগকে পারিতোষিক প্রদান করিয়া মন্ত্রীকে কহিলেন—

এক্ষণে রাজপথে পতাকা উড্ডীন করো এবং পুষ্পোপহার দ্বারা দেবগণের অর্চনা করা হউক। সকলে মন্তবারণে আরোহণ করিয়া চতুর্দিকে জয়সংবাদ প্রচার করুক। উত্তরা কুমারীগণের সহিত উজ্জ্বল বেশ ধারণ করিয়া ভ্রাতার অভ্যর্থনার্থে প্রস্তুত থাকুক।

ইত্যবসরে রাজকুমার ভবনের দ্বারদেশে উপস্থিত হইলে দ্বারী আসিয়া তাঁহার আগমনসংবাদ প্রদান করিল। মৎস্য-রাজ অতিশয় প্রীতমনে কহিলেন—

হে দ্বারপাল, সত্বর উত্তর ও বৃহন্নলাকে আনয়ন করো। উহাদিগকে অবলোকন করিতে আমি অত্যন্ত ব্যগ্র রহিয়াছি।

অনন্তর উত্তর সভাস্থলে প্রবেশপূর্বক পিতার চরণবন্দন ও কঙ্ককে প্রণাম করিলেন।

বৃহন্নলা সকলকে অভিবাদন করিলেন। রাজা তাঁহাকে অভিনন্দন করিয়া তাঁহার সমক্ষেই পুত্রকে প্রশংসা করিয়া কহিতে লাগিলেন—

বৎস, তোমাদ্বারাই আমি যথার্থ পুত্রবান্ হইলাম। যিনি অহোরাত্র যুদ্ধ করিয়াও ক্লান্ত হন না, তুমি কী প্রকারে সেই মহাবীর কর্ণকে পরাজয় করিলে। যাহার সমান যোদ্ধা মনুষ্যলোকে বিদ্যমান নাই, তুমি কী করিয়া সেই কুরুকুলাগ্রগণ্য ভীষ্মের সহিত সংগ্রাম করিলে। সর্বশাস্ত্র-বিশারদ যাদব ও কৌরবগুরু আচার্য দ্রোণের অন্ত্রকৌশলই

বা তুমি কী প্রকারে সহ্য করিলে। কী আর বলিব, তুমি হৃত-গোধন প্রত্যাহরণ করিয়া অতি মহৎ কার্য সম্পাদন করিয়াছ।

উত্তর বিনয়নম্রবচনে কহিলেন—

হে তাত, আমি স্বয়ং এই সকল ভীষণ কর্ম করি, আমার কী সাধ্য। আমি প্রথমত ভীত হইয়া পলায়ন করিতে উদ্যত হইয়াছিলাম, এমন সময় এক দেবকুমার আসিয়া আমাকে অভয়প্রদানপূর্বক কুরুগণকে পরাজয় ও গোধন উদ্ধার করিলেন।

পুত্রের বাক্য শ্রবণাস্তর বিরাট বিস্মিত হইয়া কহিলেন—

বৎস, যে মহাপুরুষ আমাদের এই মহান উপকার সাধন করিলেন, তিনি এক্ষণে কোথায়।

উত্তর কহিলেন—হে পিতঃ, তিনি সেই সময়েই অস্তিত্ব হইয়াছেন, কল্য কি পরশ্ব আবির্ভূত হইবেন।

অনন্তর মহারাজের অনুমতিক্রমে অর্জুন অস্তঃপুরে গমন-পূর্বক স্বয়ং রাজকুমারীকে অপহৃত উত্তরীয় বস্ত্রসমুদয় প্রদান করিলেন। উত্তরা পুত্তলিকার নিমিত্ত মহামূল্য বসন লাভ করিয়া অতিশয় প্রীত হইলেন।

অনন্তর পাণ্ডবগণ বিরাটপুত্রের সহিত নির্জনে মিলিত হইয়া আত্মপ্রকাশের উপযুক্ত সময়সম্বন্ধে মন্ত্রণা করিতে লাগিলেন।

৭

প্রতিজ্ঞামুক্ত পাণ্ডবগণ বিরাটরাজের নিকট আত্মপ্রকাশের উপযুক্ত সময় স্থির করিয়া নির্দিষ্ট দিবসে স্নানান্তর শুরুবসন ও নানাবিধ আভরণে ভূষিত হইয়া রাজসভায় প্রবেশপূর্বক ধর্মরাজকে বিরাটের সিংহাসনে উপবেশন করাইয়া তাঁহাকে বেষ্ঠন করিয়া রহিলেন। দ্রোপদীও সৈরিক্রীবেশ পরিত্যাগ করিয়া তথায় উপস্থিত রহিলেন।

অনন্তর রাজকার্যারম্ভের সময় উপস্থিত হইলে বিরাট-রাজ সভায় সমাগত হইলেন এবং পাণ্ডবগণের এক্রূপ অভিনব আচরণে প্রথমত বিস্মিত ও ক্রোধাবিষ্ট হইলেন, কিন্তু তৎপরে ইহার মধ্যে কোনো নিগূঢ় রহস্য আছে বিবেচনা করিয়া মুহূর্তকাল চিন্তার পর বলিলেন—

হে কঙ্ক, আমি তোমাকে দ্যুতজ্ঞ সভাসদরূপে বরণ করিয়াছিলাম, তুমি এক্ষণে কী নিমিত্ত রাজবৎ অলংকৃত হইয়া আমার সিংহাসন অধিকার করিলে।

অর্জুন সহাস্রবদনে তাঁহাকে উত্তর করিলেন—

হে রাজন্, এই মহাতেজা দেবগণেরও অর্ধাসনে আরোহণ করিবার উপযুক্ত। ইহার কীর্তি সমুদিত সূর্য-প্রভার স্থায়

চতুর্দিক উদ্ভাসিত করিয়াছে। ইনি কুরুবংশাবতংস ধর্মরাজ যুধিষ্ঠির অতএব কৌ নিমিত্ত ইনি আপনার সিংহাসনের যোগ্য নহেন।

মৎস্তরাজ পরম আশ্চর্যাব্বিত হইয়া কহিলেন—

যদি ইনিই রাজা যুধিষ্ঠির হন, তবে ইহার অবশিষ্ট ভ্রাতৃগণ এবং সহধর্মিণী দ্রৌপদী কোথায়।

অর্জুন কহিলেন—হে নরাধিপ, যিনি আপনার সূপকারের কার্যে নিযুক্ত হইয়া বল্লভ নামে পরিচয় দিয়াছেন, তিনিই ভীমপরাক্রম ভীমসেন। আপনার অশ্বপাল ও গোপাল দুইজনে কাস্তিমান্ মাদ্রীপুত্র নকুল-সহদেব। এই অলোকসামাগ্র-রূপসম্পন্ন পতিপরায়ণা সৈরিক্রীই দ্রুপদ-নন্দিনী। আর আমি ভীমসেনের অনুজ অর্জুন। আমার সবিশেষ বুত্তান্ত আপনি শ্রুত হইয়া থাকিবেন। হে রাজন্, আমরা পরম সুখে সংবৎসরকাল আপনার রাজ্যে গর্ভস্থিতের জ্ঞায় অজ্ঞাতবাস করিয়াছি।

বিরাট-তনয় এই অবসরে এত দিনের রুদ্ধ কৃতজ্ঞতা ব্যক্ত করিয়া কহিলেন—

হে তাত, এই মহাবাহু ধর্মুধরাগ্রগণ্য অর্জুনই যুগকুল-সংহারকারী কেশরীর জ্ঞায় অরাতিগণকে নিপাতিত করিয়া-ছিলেন।

বিরাটরাজ এই কথা শুনিয়া প্রফুল্লবদনে প্রথমে রাজা যুধিষ্ঠিরের সমীপবর্তী হইয়া তাঁহাকে উপযুক্ত সম্মান প্রদর্শনার্থে যথাবিধি দণ্ড কোষ ও নগরসমেত সমস্ত রাজ্য

প্রদানপূর্বক অর্চনা করিলেন এবং—কী সৌভাগ্য, কী সৌভাগ্য, বলিয়া অশ্ব পাণ্ডবগণের মস্তকোজ্জ্বলপূর্বক তাঁহাদিগকে আলিঙ্গন করিলেন। পরে তিনি পুনরায় যুধিষ্ঠিরকে কহিলেন—

হে মহাভাগ, ভাগ্যক্রমে তোমরা অরণ্য হইতে নিষ্ক্রমণ ও ছুরাশ্বাদের অজ্ঞাতসারে বাস করিয়া প্রতিজ্ঞামুরূপ হইয়াছ। এক্ষণে আমার রাজ্যের যাহা কিছু সম্পত্তি তাহা তোমাদেরই অধিকারে রহিল। মহাবীর ধনঞ্জয় আমার কন্যার উপযুক্ত পাত্র, অতএব তিনি উত্তরার পাণিগ্রহণ করুন।

অর্জুনের অভিপ্রায় জানিবার নিমিত্ত যুধিষ্ঠির তাঁহার প্রতি দৃষ্টিপাত করিবামাত্র তিনি বিরাটরাজকে কহিলেন—

হে রাজন, আমি আপনার অন্তঃপুরে বাসকালে রাজকুমারীর গুরুস্বরূপ ছিলাম। তিনিও আমাকে পিতার ন্যায় মান্য করিতেন, অতএব যদি অনুমতি করেন, তবে আমি উত্তরাকে আমার পুত্র অভিমন্ত্যর নিমিত্ত বধূরূপে গ্রহণ করি।

অর্জুনের বাক্যে শ্রীত হইয়া বিরাটরাজ কহিলেন—

হে কৌন্তেয়, তুমি একান্ত ধর্মপরায়ণ। স্বয়ং উত্তরার পাণিগ্রহণ করিতে অস্বীকার করা তোমার উপযুক্তই হইয়াছে। এক্ষণে কালবিলম্ব না করিয়া অভিমন্ত্যর সহিত বিবাহের উদ্যোগসম্বন্ধে যাহা কর্তব্য, তাহার অনুষ্ঠান করা যাক।

অনন্তর এ বিষয়ের সংবাদ দিয়া এবং নিমন্ত্রণ জ্ঞাপন করিয়া প্রথমত বামুদেবের নিকট পরে অন্যান্য মিত্রগণের রাজ্যে দূতপ্রেরণ করা হইল। পাণ্ডবগণ সময়পালনান্তে মুক্তিলাভ করিয়াছেন এই সংবাদ প্রচার হওয়ায় মিত্র ভূপতিগণ সসৈন্যে দলে দলে আগমন করিতে লাগিলেন।

প্রথমে যুধিষ্ঠিরের পরম প্রিয়পাত্র কাশীরাজ ও শিবিরাজ এক এক অক্ষৌহিনী সেনা লইয়া বিরাটনগরে সমাগত হইলেন। পরে মহাবল দ্রুপদ ও ধৃষ্টদ্যুম্ন শিখণ্ডী ও দ্রোপদীর পঞ্চপুত্র-সমভিব্যাহারে এক অক্ষৌহিনী সেনা লইয়া উপস্থিত হইলেন।

বিরাটরাজ অর্জুনপুত্র অভিমত্যুর ন্যায় সংপাত্রলাভে পরম আহ্লাদিত হইয়া দিগ্দেশাগত নৃপতিগণকে পরম সমাদরে অভ্যর্থনা করিতে লাগিলেন।

বিবাহ-উৎসবের আনন্দ-প্রমোদ সকল পরিসমাপ্ত হইলে পাণ্ডবগণ বন্ধুবান্ধবগণের সহিত মন্থনা করিবার উদ্যোগ করিলেন। অবস্থা পর্যালোচনাপূর্বক কিংকর্তব্য অবধারণার্থে সকলে বিরাটরাজের সভাগৃহে সমবেত হইলেন।

অনন্তর বিরাট ও দ্রুপদরাজ উপবিষ্ট হইলে সকলেই নিদিষ্ট আসন পরিগ্রহ করিলেন।

প্রথমত পাঞ্চালরাজ স্বীয় প্রজ্ঞাশালী পুরোহিতকে কৌরবগণের নিকট দূতরূপে প্রেরণ করিবার উদ্দেশ্যে আহ্বানপূর্বক কহিলেন—

হে দ্বিজসন্তম, ধৃতরাষ্ট্রের জ্ঞাতসারেই ত্বর্ষোধনাদি

শক্রগণ সরলহৃদয় পাণ্ডবদিগকে প্রতারণা করিয়াছিল। ধর্মবৎসল বিদুর সে সময়ে বারংবার অমুনয় করিলেও কেহ তাঁহার কথায় কর্ণপাত করে নাই। সুতরাং উহার। যে স্বতঃপ্রবৃত্ত হইয়া ধর্মরাজকে রাজ্যার্থ প্রত্যর্পণ করিবে, তাহার বড়ো আশা নাই। তথাপি আপনি ধৃতরাষ্ট্রকে প্রসন্ন করিয়া কুরুপ্রধানগণের মন আবতিত করিবার চেষ্টা করিবেন। বিদুর এবিষয়ে নিশ্চয়ই বাক্যদ্বারা আপনার সাহায্য করিবেন। ভীষ্ম দ্রোণাদিকে বিমুখ করিতে পারিলে একাকী দুর্যোধন যুদ্ধের অভিলাষ করিবে না। অন্তত তাহা হইলে স্বীয় পক্ষীয় প্রধান যোদ্ধাদিগকে পুনরায় স্ববশে আনিতে দুর্যোধনের যে সময় লাগিবে, তাহার মধ্যে আমরা সহায়সংগ্রহের অবসর লাভ করিব।

নীতিশাস্ত্রবিশারদ পুরোহিত ক্রপদের নিকট এই উপদেশ প্রাপ্ত হইয়া পাথেয় গ্রহণপূর্বক হস্তিনাপুরাভিমুখে প্রস্থান করিলেন।

পুরোহিত গমন করিলে নরপতিগণের সাহায্য প্রার্থনার নিমিত্ত চতুর্দিকে দূত প্রেরিত হইল। অর্জুন কৃষ্ণকে প্রাপ্ত হইবার নিমিত্ত স্বয়ং দ্বারকায় চলিলেন। দুর্যোধন গুপ্তচর দ্বারা এই সমস্ত বৃত্তান্ত অবগত হইতেছিলেন এবং প্রত্যেক স্থানে তিনিও দূত প্রেরণ করিতেছিলেন; অর্জুনের দ্বারকায়াত্রার সংবাদ পাইবামাত্র তিনিও বায়ুবেগগামী তুরঙ্গম আরোহণে অন্নমাত্র অনুচর লইয়া অতি দ্বরায় তাঁহার পশ্চাদ্ধাবিত হইলেন।

তুই জনেই একসঙ্গে দ্বারকানগরে সমাগত ও সমকালে রাজভবনে উপস্থিত হইলেন। কৃষ্ণ সে সময়ে নিদ্রিত ছিলেন। দুর্যোধন প্রথমে শয়নাগারে প্রবিষ্ট হইয়া বাসুদেবের শিয়রে বসিলেন, পরে অর্জুন গিয়া পদতলের নিকট অপেক্ষা করিতে লাগিলেন।

অনন্তর জনার্দন জাগ্রত হইয়া প্রথমে অর্জুনকে এবং পরে দুর্যোধনকে নয়নগোচর করিলেন এবং স্বাগতপ্রশ্নপূর্বক তাঁহাদের আগমনের কারণ জিজ্ঞাসা করিলেন। দুর্যোধন সহাস্রবদনে কহিলেন—

হে যাদবশ্রেষ্ঠ, উপস্থিত যুদ্ধে তোমাকে আমাদের পক্ষ অবলম্বন করিতে হইবে। যদিও আমরা উভয়ই তোমার সহিত তুল্যসম্বন্ধ ও সমান সৌহার্দ্যযুক্ত, তথাপি আমি অগ্রে আগমন করিয়াছি, প্রথমাগতের প্রার্থনা সফল করাই সদাচারসংগত।

কৃষ্ণ কহিলেন— হে কুরুবীর, তুমি যে অগ্রে আগমন করিয়াছ সে বিষয়ে আমার সন্দেহ নাই, কিন্তু পার্থই প্রথমে আমার নয়নপথে পতিত হইয়াছেন, এই নিমিত্ত আমি উভয় পক্ষকেই সাহায্য করিব। আমার সুবিখ্যাত এক অবূদ নারায়ণী সেনা আছে, ইহারা একপক্ষের সৈনিকপদ গ্রহণ করুক। অপর পক্ষে আমি একাকী নিরস্ত্র এবং সমরপরামুখ হইয়া অবস্থান করিব। অর্জুন কনিষ্ঠ, অতএব তিনি প্রথমে এতদুভয়ের মধ্যে একপক্ষ বরণ করুন।

কৃষ্ণ যুদ্ধে যোগদান করিবেন না শুনিয়াও ধনঞ্জয় হৃষ্টমনে তাঁহাকেই বরণ করিলেন। তখন রাজা দুর্যোধন এক

অবুদ নারায়ণী সেনা প্রাপ্ত হইয়া এবং কৃষ্ণকে সমরপরাভূত জানিয়া প্রীতির পরাকাষ্ঠা প্রাপ্ত হইলেন।

অনন্তর উভয়ে মহাবলশালী বলদেবের নিকট সাহায্য প্রার্থনার জন্ত গমন করিলে তিনি বলিলেন—এরূপ কুলক্ষয়-কর যুদ্ধে আমি কোনো পক্ষেরই সাহায্য করিব না, তোমরা প্রস্থান করো।

দুর্যোধন প্রস্থিত হইলে বাসুদেব অর্জুনকে জিজ্ঞাসা করিলেন—

হে পার্থ, তুমি আমাকে সমরপরাভূত জানিয়াও কী নিমিত্ত বরণ করিলে।

অর্জুন কহিলেন—হে সখে, আমি বলের নিমিত্ত তোমার নিকট আসি নাই, আমি একাকীই খাতরাষ্ট্র-গণকে বিনষ্ট করিতে সক্ষম। কিন্তু তোমার অদ্বিতীয় নীতি-জ্ঞানের সাহায্য এবং চিরসখ্যজনিত মঙ্গলকামনা প্রাপ্ত হইলে আমরা কৃতার্থ হইব। হে বাসুদেব, আমার চিরপ্রকৃঢ় এক মনোরথ আছে, তাহাও তোমাকে পূর্ণ করিতে হইবে। এ যুদ্ধে তুমি আমার সারথ্য গ্রহণ করো।

কৃষ্ণ প্রীত হইয়া তাঁহার অনুরোধ স্বীকার করিয়া কহিলেন—

হে অর্জুন, তুমি আমার নিকট সকলই বাঞ্ছা করিতে পারো, তোমাকে অদেয় আমার কিছুই নাই।

এদিকে নানা দেশ হইতে ভূপালবৃন্দ প্রভূত সেনাদল-সমভিব্যাহারে যুধিষ্ঠিরের পক্ষ অবলম্বন করিবার নিমিত্ত

আগত হইতে লাগিলেন। বিবাহ উপলক্ষেই অনেকে উপস্থিত ছিলেন, তত্পরি চেদিপতি ধৃষ্টকেতু এবং বৃষ্ণিপ্রবীর সাত্যকি ও বিরাটরাজের অন্তর্গত রাজগণ বহুতর চতুরঙ্গিনী সেনা লইয়া উপস্থিত হইলে পাণ্ডবপক্ষে সপ্তঅক্ষৌহিনী সৈন্য সংগৃহীত হইল। বিরাটরাজ্যান্তর্গত উপপ্লব্য নগরে বিস্তৃত সেনানিবেশ স্থাপনপূর্বক এই বৃহৎ সৈন্যমণ্ডলী লইয়া পাণ্ডবগণসহ সমবেত রাজস্ববর্গ স্থখে সময় প্রতীক্ষা করিতে লাগিলেন।

দুর্যোধনের পক্ষে ভগদত্ত, ভূরিশ্রবা ও শল্য, যাদবগণের মধ্যে ভোজরাজ কৃতবর্মা, সিদ্ধুদেশাধিপতি জয়দ্রথ এবং অন্যান্য বিবিধ নরপতিগণ সমাগত হইলে কৌরবগণের একাদশ অক্ষৌহিনী সেনা সংগ্রহ হইল।

এই সকল বলসঞ্চয় চলিতেছে, এমন সময় পাঞ্চালরাজ-পুরোহিত ধৃতরাষ্ট্রের সমীপে উপনীত হইলেন। ধৃতরাষ্ট্র ভীষ্ম বিদুরাদি তাঁহার যথোচিত অর্চনা করিলে সেই ব্রাহ্মণ উপস্থিত কৌরবপ্রধান ও রাজপুরুষগণকে সম্বোধনপূর্বক বলিতে লাগিলেন—

হে সভ্যগণ, আপনারা সকলেই সনাতন রাজধর্ম অবগত আছেন, তথাপি উপস্থিত প্রসঙ্গে তাহার বিশেষ উপযোগিতা আছে বলিয়া আমি সে সম্বন্ধে দুই এক কথা বলিতেছি। ধৃতরাষ্ট্র ও পাণ্ডু উভয়ই একজনের সন্তান, সূতরাং পৈতৃক ধনে উভয়ের সমান অধিকার। তবে ধাতরাষ্ট্রগণ পাণ্ডবগণকে বঞ্চিত করিয়া সমগ্র সাম্রাজ্য ভোগ করিবেন ইহার অর্থ কী।

আপনারা ধর্মের প্রতি দৃষ্টি রাখিয়া পাণ্ডবগণকে স্বীয় অংশ প্রত্যর্পণের বিধান করুন। এখনও শান্তিস্থাপনের কাল অতীত হয় নাই।

প্রজ্ঞাসম্পন্ন ভীষ্ম ব্রাহ্মণের এই কথা শুনিয়া কহিলেন—

হে দ্বিজশ্রেষ্ঠ, ভাগ্যবলে পাণ্ডবগণ কুশলে আছেন, এবং ভাগ্যবলে তাঁহারা প্রভূতপরিমাণ সৈন্য সংগ্রহ করিয়াও ধর্মপথে নিরত থাকিয়া বান্ধবগণের সহিত সংগ্রামাভিলাষ পরিহারপূর্বক সন্ধির প্রার্থনা করিতেছেন। আপনি যে সমস্ত কথা বলিলেন, তাহা কঠোর হইলেও যথার্থ বটে। পাণ্ডবগণ নির্ধারিত বনবাসাস্ত্রে স্বীয় পূর্বাধিকৃত রাজ্যের অধিকারী হইয়াছেন তাহাতে সন্দেহ নাই। অজুনের অনুরূপ যোদ্ধাও ত্রিলোকমধ্যে প্রাপ্ত হওয়া যায় না।

ধৃতরাষ্ট্র তাঁহার বাক্য অনুমোদন করিয়া কহিতে লাগিলেন—

ভীষ্ম যাহা কহিলেন, তাহা আমাদের শুভকর, পাণ্ডবদের হিতকর এবং সমগ্র ক্ষত্রিয়মণ্ডলীর শ্রেয়স্কর; অতএব আমি তদনুসারে সজ্জয়কে সন্ধিস্থাপননিমিত্ত পাণ্ডবদের নিকট প্রেরণ করিব।

এই বলিয়া ধৃতরাষ্ট্র দ্রুপদ-পুরোহিতকে যথোচিত সংকারপূর্বক বিদায় করিলেন। অনন্তর সজ্জয়কে সভাস্থলে আহ্বান করিয়া তিনি কহিতে লাগিলেন—

হে সজ্জয়, তুমি এক্ষণে উপপ্লব্যানগরে গমনপূর্বক পাণ্ডবগণের সমীপে উপস্থিত হইয়া প্রথমত তাঁহাদের কুশল

জিজ্ঞাসা করিবে। পাণ্ডবগণ অকপট ও সাধু ; তাঁহারা এত দুঃখ সহ্য করিয়াও আমাদের প্রতি ক্রুদ্ধ হন নাই ; তাঁহারা সর্বদাই আত্মসুখ অপেক্ষা ধর্মকে অগ্রে স্থাপন করিয়া থাকেন ; এ নিমিত্ত মন্দবুদ্ধি দুর্ধোধন এবং ক্ষুদ্রাশয় কণ ব্যতীত তাঁহারা আমাদের সকলেরই প্রীতিভাজন হইয়াছেন ; অতএব তুমি এই সকল বুঝিয়া উপযুক্ত বাক্যে যুধিষ্ঠিরের নিকট আমার সন্ধির ইচ্ছা জ্ঞাপন করিবে। হে সঞ্জয়, উভয় পক্ষের যেরূপ বল সংগ্রহ হইয়াছে, তাহাতে আমি বিশেষ ভীত হইয়াছি, সুতরাং তুমি বিবেচনাপূর্বক এমন প্রস্তাব করিবে, যাহাতে আমরা এ ঘোর বিপদাশঙ্কা হইতে উদ্ধার পাইতে পারি।

সঞ্জয় মহারাজ ধৃতরাষ্ট্রের অভিপ্রায় জ্ঞাত হইয়া তাঁহার আদেশানুসারে মৎস্তদেশাভিমুখে যাত্রা করিলেন।

৮

মহারাজ ধৃতরাষ্ট্রের আদেশানুসারে পাণ্ডবদিগকে নিরস্ত করিয়া শাস্তিস্থাপনের প্রস্তাব করিবার জন্য উপপ্লব্য নগরে উপস্থিত হইয়া সঞ্জয় যুধিষ্ঠিরকে প্রীতমনে অভিবাদনপূর্বক কহিলেন—

আপনার পিতৃব্য রাজা ধৃতরাষ্ট্র আমাকে যে কথা

বলিবার নিমিত্ত প্রেরণ করিয়াছেন, তাহা শ্রবণ করুন। বৃদ্ধ রাজার সন্ধিস্থাপনের নিতান্ত ইচ্ছা, অতএব আপনারা সে বিষয়ে অনুমোদন করুন। আপনারা সর্বদাই ধার্তরাষ্ট্র-গণের অপরাধ ক্ষমা করিয়া ক্রোধ পরিহারপূর্বক শ্রুত অপেক্ষা ধর্মকেই প্রধান করিয়াছেন, অতএব এস্থলে অতি ভীষণ লোকহিংসা নিবারণের উপায় একমাত্র আপনাদেরই আয়ত্তে রহিয়াছে।

যুধিষ্ঠির কহিলেন—হে সঞ্জয়, আমি কি যুদ্ধাভিলাষ-সূচক কোনো কথা বলিয়াছি যে, তুমি সংগ্রামভয়ে এত ভীত হইতেছ। আমরা পূর্বনিগ্রহ ও তজ্জনিত ক্রেশ সমুদয় বিস্মৃত হইয়া আমাদের পূর্বাধিকৃত ইন্দ্রপ্রস্থ গ্রহণ করিয়া শান্তিস্থাপন করিতে প্রস্তুত আছি, একথা তো পূর্বেই বলা হইয়াছে।

সঞ্জয় কহিলেন—হে ধর্মরাজ, আপনার কল্যাণ হউক। আমি এক্ষণে চলিলাম। যদি স্বপক্ষসমর্থন করিতে গিয়া কোনো অযথাবাক্য প্রয়োগ করিয়া থাকি, তবে তজ্জন্তু আমাকে মার্জনা করিবেন।

যুধিষ্ঠির কহিলেন, হে সঞ্জয়, আমার শেষ কথা এই যে, আমাদের পঞ্চভ্রাতাকে পঞ্চগ্রামমাত্র প্রদত্ত হইলেও আমরা রাজ্য পরিত্যাগপূর্বক সন্ধিস্থাপনে সম্মত আছি।

অনন্তর সঞ্জয় হস্তিনাপুরে উপস্থিত হইলেন।

ভীষ্ম দ্রোণ ও সমবেত মিত্র-ভূপতিগণকে অগ্রে করিয়া মহারাজ ধৃতরাষ্ট্র এবং কর্ণ শকুনি ও ভ্রাতৃগণসমভিব্যাহারে

দুর্যোধন বিস্তীর্ণ কনক-চন্দ্র-শোভিত ও চন্দন-রস-সিক্ত সভাগৃহে প্রবেশ করিলেন। তথায় সকলে দারুণময়, প্রস্তুতসারময়, দস্তময় ও কাঞ্চনময় বিবিধ নির্দিষ্ট আসনে উপবিষ্ট হইলেন।

অনন্তর কুণ্ডলধারী সঞ্জয় সেই পরিপূর্ণ রাজসভায় প্রবেশ করিয়া সকলকে অভিবাদনাস্ত্রে কহিলেন—

হে কৌরবগণ ও রাজশ্রবণ, আমি পাণ্ডবগণের নিকট হইতে প্রত্যাবৃত্ত হইয়াছি, আপনারা তত্রত্য বৃত্তান্ত সমুদয় শ্রবণ করুন। আমি ধর্মরাজসমীপে উপস্থিত হইয়া মহারাজ ধৃতরাষ্ট্রকর্তৃক উপদিষ্ট বাক্য তাঁহাকে যথাযথরূপে বিজ্ঞাপিত করিলে পাণ্ডবগণ প্রথমত উপস্থিত সকলকে সাদরসম্ভাষণ-সহকারে যথোপযুক্ত অভিবাদনাদি জানাইলেন।

এই বলিয়া সঞ্জয় ক্রমে ক্রমে যুধিষ্ঠিরের মতামত ও যুদ্ধার্থে যেরূপ বলসংগ্রহ ও আয়োজন হইয়াছে তৎসমস্ত তন্ন তন্ন করিয়া বর্ণনা করিলেন। তখন ধৃতরাষ্ট্র মনের আবেগে আর কাহাকেও বলিবার অবসর না দিয়া স্বয়ং পাণ্ডবপ্রস্তাব সমর্থন করিতে উদ্বৃত্ত হইলেন। তিনি বলিলেন—

পাণ্ডবগণ যেরূপ বল সংগ্রহ করিয়াছেন, অর্জুনের যেরূপ দিব্যান্ত্র-শিক্ষা লাভ হইয়াছে এবং ভীমসেন যেরূপ অলৌকিক বলসম্পন্ন, তাহাতে দুর্যোধন উহাদের সহিত কলহ করিয়া অতি অবিবেচকের কার্য করিয়াছেন। এ যুদ্ধ ঘটিলে কৌরবকুলের নিস্তার নাই, তাহা আমার স্পষ্টই উপলব্ধি হইতেছে। অতএব আমার ইচ্ছা পাণ্ডবদের

ধর্মীভূগত প্রস্তাব অনুসারে সন্ধিস্থাপনপূর্বক আমরা চির-কল্যাণ লাভ করি।

এই কথা শ্রবণে ভীষ্ম জ্যেষ্ঠ প্রভৃতি সকলেই ধৃতরাষ্ট্রের উপদেশের প্রশংসা করিয়া তাঁহার প্রস্তাব সমর্থন করিলেন। কিন্তু দুর্যোধন এই অপ্রিয় মন্ত্রণা সহ করিতে না পারিয়া, বলিতে লাগিলেন—

হে পিতঃ, আপনি কেন বৃথা ভয় করিয়া আমাদের নিমিত্ত শোক করিতেছেন। আমাদের শত্রু অপেক্ষা আমরা কিসে হীনবল যে, পরাজয় আশঙ্কায় কাতর হইব। তদ্ব্যতীত এক্ষণে সমগ্র সাম্রাজ্য আমারই হস্তগত এবং এই সকল মহারথ ভূপালবৃন্দ আমারই অধীন, অতএব পাণ্ডবদের নিস্তার কোথায়।

ধৃতরাষ্ট্র পুত্রকে নিতান্তই মোহাবিষ্ট দেখিয়া কাতরস্বরে কহিতে লাগিলেন—

হে কৌরবগণ, আমি বারবার বিলাপ করিতেছি, তথাপি আমার মন্দমতি পুত্রগণ যুদ্ধসংকল্প পরিত্যাগ করিতেছে না। বৎস দুর্যোধন, তুমি কী নিমিত্ত সমগ্র পৃথিবী অধিকার করিবার ছরভিলাষ পোষণ করিতেছ। তদপেক্ষা পাণ্ডবদিগকে তাঁহাদের প্রাপ্যংশ প্রত্যর্পণ করিয়া সুখে আপন রাজ্য পালন করো। পাপযুদ্ধে লিপ্ত হইলে কুরুকুল সমূলে ধ্বংস হইবে। হে পুত্র, আমি অহোরাত্র এইরূপ চিন্তায় বিহ্বল হইয়া নিজানুখে বঞ্চিত হইতেছি, এই নিমিত্তই আমি সন্ধিস্থাপনে সমুৎসুক।

মহাবীর কর্ণ খাভঁরাষ্ট্রগণের হর্ষোৎপাদন করিয়া কহিলেন—

হে মহারাজ, আমি দিব্যাস্ত্রবেত্তা মহাত্মা পরশুরামের নিকট অস্ত্রশিক্ষা করিয়াছি। আমিই এই যুদ্ধে পাণ্ডব-প্রধানগণকে বিনাশ করিবার ভার গ্রহণ করিলাম।

কর্ণের এই আত্মপ্রশংসাই দুর্যোধনের হৃঃসাহস এবং তজ্জনিত সমস্ত অনর্থের মূল বিবেচনা করিয়া মহামতি ভীষ্ম অনিবার্য ক্রোধে কর্ণকে তীব্র ভৎসনা করিয়া কহিতে লাগিলেন—

হে কাল-হত-বুদ্ধি কর্ণ, পাণ্ডবদিগকে সংহার করিবে বলিয়া তুমি সর্বদাই অহংকার করিয়া থাকো। বিরাটনগরে যখন ধনঞ্জয় তোমার প্রিয় ভ্রাতাকে সংহার করিলেন, তখন তুমি কী করিতেছিলে। যখন অর্জুন সমস্ত কৌরবগণকে অচেতন করিয়া তাঁহাদের উত্তরীয় সকল হরণ করিলেন, তখন কি তুমি সে স্থানে ছিলে না। এখন তুমি ব্যর্থ আশ্বালন করিতেছ, তোমার শ্রায় ধর্মভ্রষ্ট ব্যক্তির আশ্রয়ের প্রতি নির্ভর করিয়াই এ ঘোর যুদ্ধে ইহারা কাল-কবলে পতিত হইবে।

ভীষ্মের বাক্যশল্যে অতিশয় সমুত্তপ্ত হইয়া কর্ণ তৎক্ষণাৎ অস্ত্রশস্ত্র পরিত্যাগপূর্বক কহিলেন—

হে পিতামহ, আপনি পাণ্ডবদের যেকোন গুণ কীর্তন করিয়া থাকেন, তাহা সেইরূপই বা ততোধিক হইতে পারে; কিন্তু আপনি আমাকে সভাস্থলে যে সকল পরুষবাক্য

প্রয়োগ করিলেন, তাহার ফল শ্রবণ করুন। আমি এই অস্ত্র ত্যাগ করিলাম, আপনি জীবিত থাকিতে আর ইহা গ্রহণ করিব না।

মহাধনুর্ধর কর্ণ এই কথা বলিয়া তৎক্ষণাৎ সভাগৃহ পরিত্যাগ করিয়া স্বভবনে চলিয়া গেলেন। অনন্তর অতি বিষমমনে ধৃতরাষ্ট্র সেদিনকার সভা ভঙ্গ করিলেন।

এই সভার বিবরণ যুধিষ্ঠিরের নিকট উপস্থিত হইলে তিনি কৃষ্ণকে সম্বোধন করিয়া কহিলেন—

হে মিত্রবৎসল, এক্ষণে আমাদের একুপ সময় আসিয়াছে, যখন তোমার পরামর্শ ভিন্ন আর গতি নাই। হে কৃষ্ণ, আপৎকাল উপস্থিত হইলে তুমি যাদবগণকে যেরূপ রক্ষা করিয়া থাকো, এক্ষণে আমাদেরও সম্বন্ধে তাহাই করিতে হইবে।

কৃষ্ণ কহিলেন—মহারাজ, আমি তো এই উপস্থিত রহিয়াছি, যে বিষয়ে আজ্ঞা করিবে আমি তাহাই সম্পাদন করিব।

যুধিষ্ঠির কহিলেন—সঞ্জয়ের নিকট যাহা শুনা গেল, তাহাতে ধৃতরাষ্ট্রের প্রকৃত মনোভাব স্পষ্টই বুঝা যাইতেছে। বিনা রাজ্যপ্রদানে আমরাগিকে ক্ষান্ত করিতে চাহেন। আমি কুলক্ষয় নিবারণার্থে অবশেষে পঞ্চগ্রাম মাত্র লইয়া বিবাদ-ভঞ্নের প্রস্তাব করিয়াছি; কিন্তু সমগ্র সাম্রাজ্য অধিকারে ক্ষীণ হইয়া উহার তাহাতেও সম্মত হইল না।

কৃষ্ণ কহিলেন, হে ধর্মরাজ, যুদ্ধকার্যে প্রবৃত্ত হইবার পূর্বে আমি মনে করিতেছি আমি নিজে হস্তিনাপুরে গমন-পূর্বক উভয় পক্ষের হিতার্থে শেষচেষ্টা করিব। যদি আমি তোমাদের স্বার্থের অব্যাঘাতে শান্তি স্থাপন করিতে পারি, তাহা হইলে কুরুকুলকে মৃত্যুপাশ হইতে মুক্ত করিয়া আমি মহা পুণ্যফল লাভ করিব।

দ্রৌপদী এতক্ষণ পতিগণের মৃত্যুভাব অবলোকনে নিতান্ত ম্রিয়মাণা হইয়া বসিয়াছিলেন। তিনি আর মৌন থাকিতে পারিলেন না। রোদন করিতে করিতে কৃষ্ণকে কহিতে লাগিলেন—

হে মধুসূদন, তুমি কৌরব-সভায় গিয়া আমাদের সমগ্র রাজ্য প্রদান ব্যতিরেকে কোনো সন্ধির প্রস্তাবে সম্মত হইয়ো না। তুমি এই পাপিষ্ঠ ধাতার ঈর্ষাগণের উপযুক্ত দণ্ড বিধান করো।

অনন্তর রোদ্ধমানা কৃষ্ণা স্বীয় রমণীয় কুটিলাগ্র কুন্তলদাম হস্তে ধারণপূর্বক কহিলেন—

হে কেশব, যখন কৌরব-সভায় শান্তির প্রস্তাব হইবে, তখন পাষণ্ড ছঃশাসনের হস্ত-কলুষিত এই কেশের কথা স্মরণ রাখিয়ো।

কৃষ্ণ তখন দ্রৌপদীকে সাস্বনা দিয়া কহিলেন—

হে কল্যাণি, তুমি এখন যেক্রপ রোদন করিতেছ, অতি অল্পদিনের মধ্যেই কৌরব-মহিলাগণকে সেইক্রপ রোদন করিতে দেখিবে। হে কৃষ্ণে, বাষ্প সংবরণ করো। তোমার

পতিগণ অচিরেই শত্রু-সংহারপূর্বক রাজ্যলাভ করিবেন।

এইরূপ কথোপকথনে সে রাত্রি অতিবাহিত হইল। পর দিন প্রভাতে যত্নবংশাবতংস কৃষ্ণ হস্তিনাপুর যাত্রার আয়োজন করিতে আরম্ভ করিলেন। ব্রাহ্মণগণের মাঙ্গল্যপুণ্যানির্ঘোষ শ্রবণান্তে স্নান করিয়া বসন-ভূষণ পরিধানপূর্বক তিনি সূর্য ও বহ্নির উপাসনা করিলেন। তদনন্তর সাত্যকিকে কহিলেন—

হে যুযুধান, আমার রথমধ্যে শস্ত্র চক্র গদা ও অন্যান্য অস্ত্রসকল সুসজ্জিত করো। ছুর্যোধন শকুনি ও কর্ণ অতি হুঁরাঙ্গা, অতএব তাহাদের পাপাভিসন্ধির নিমিত্ত প্রস্তুত থাকা কর্তব্য।

কৃষ্ণের অভিপ্রায় জ্ঞাত হইয়া সাত্যকি রথসকল উপযুক্তরূপে অস্ত্রসজ্জিত করিলেন। অনন্তর সকলের নিকট বিদায় লইয়া সাত্যকিসহ কৃষ্ণ স্বীয় রথে আরোহণ করিলে দশ শস্ত্রপাণি মহারথী, সহস্র অশ্বরোহী ও সহস্র পদাতি এবং ভক্ষ্য দ্রব্য লইয়া বহুসংখ্যক কিঙ্কর তাঁহার অনুগমন করিল। তখন দারুকসারথি-চালিত বায়ুবেগগামী অশ্বসকল হস্তিনাপুরাভিমুখে ধাবিত হইল।

এদিকে ধৃতরাষ্ট্র দূতমুখে কৃষ্ণের আগমন-বাতী শ্রুত হইয়া রোমাঞ্চিত-কলেবরে ভীষ্ম দ্রোণ বিদুরাদির সমক্ষে ছুর্যোধনকে কহিলেন—

হে কুরুনন্দন, এই অত্যাশ্চর্য সংবাদ শুনিতেছি যে

মহাত্মা বাসুদেব স্বয়ং পাণ্ডবদূত হইয়া এখানে আগমন করিতেছেন। কৃষ্ণ আমাদের পরম আত্মীয় ও মাননীয়, তাঁহার অভির্থনার্থে উপযুক্ত আয়োজন করা কর্তব্য।

ভীষ্ম এই বাক্যের সম্পূর্ণ অমুমোদন করিলে দুর্ধোধন তদনুসারে বিবিধ আসন, উৎকৃষ্ট গন্ধদ্রব্য ও সুস্বাদু অন্ন-পানাদিশোভিত পরমরমণীয় সভাসকল স্থানে স্থানে সংস্থাপন করিলেন।

এদিকে কৃষ্ণ বৃকস্থলে রাত্রিয়াপনপূর্বক প্রভাতে আত্মিক-কার্য সমাধা করিয়া হস্তিনাপুরাভিমুখে আগমন করিতে লাগিলেন। বৃকস্থল-নিবাসিগণ তাঁহাকে চতুর্দিকে বেষ্টন করিয়া সঙ্গে চলিতে লাগিল। ভীষ্ম জ্ঞোণ প্রভৃতি মহাত্মারা এবং দুর্ধোধন ব্যতীত ধৃতরাষ্ট্রের পুত্রসমুদয় কৃষ্ণের প্রত্যুদগমনের নিমিত্ত অগ্রসর হইলেন। পুরবাসিগণ কৃষ্ণ-দর্শনার্থে কেহ কেহ বিবিধ যানে, ও অনেকে পদব্রজে যাত্রা করিল।

যথাক্রমে রাজপ্রাসাদের সম্মুখে উপস্থিত হইয়া কৃষ্ণ রথ হইতে অবতরণপূর্বক ধৃতরাষ্ট্রের ভবনে প্রবেশ করিলেন। একে একে তিন কক্ষ অতিক্রম করিয়া অবশেষে তিনি ধৃতরাষ্ট্রের সমীপস্থ হইলেন। উপস্থিত রাজগণসহ ধৃতরাষ্ট্র আসন হইতে গাত্রোত্থানপূর্বক কৃষ্ণকে সমাদর প্রদর্শন করিলে কৃষ্ণ বিনোদভাবে সকলকে প্রতিপূজা করিয়া বয়ঃক্রমঅনুসারে সকলের সহিত মিলিত হইলেন। অনন্তর তিনি নির্দিষ্ট আসনে উপবিষ্ট হইলে গো. মধুপর্ক ও উদকপ্রদানে তাঁহার অর্চনা করা হইল। বাসুদেব আতিথ্য গ্রহণপূর্বক সকলের

সহিত সম্বন্ধোচিত হস্তপরিহাস ও বাক্যালাপে তথায় কিছুকাল অতিবাহিত করিলেন।

সেই গৃহ হইতে বহির্গত হইয়া কৃষ্ণ বিছরের ভবনে আশ্রয়গ্রহণ করিলেন।

প্রভাতে সুমধুর-স্বরসম্পন্ন বৈতালিকের দ্বারা প্রবোধিত হইয়া মহাত্মা কৃষ্ণ জপ ও হোমাস্তে বসনপরিধানপূর্বক নবোদিত আদিত্যের উপাসনা করিলেন। ইত্যবসরে ছর্ষোধন ও শকুনি তাঁহার সমীপে আগমন করিয়া সংবাদ দিলেন—

হে কেশব, মহারাজ ধৃতরাষ্ট্র ভীষ্ম প্রভৃতি কৌরবগণ এবং অন্যান্য ভূপালবৃন্দ সভায় সমুপস্থিত হইয়া তোমার আগমন প্রতীক্ষা করিতেছেন।

বাসুদেব তাহাদিগকে অভিনন্দনপূর্বক ব্রাহ্মণগণকে সৎকার করিয়া দারুক-সারথি-সমানীত রথে আরোহণ করিয়া অমুচরবর্গপরিবৃত হইয়া রাজসভায় গমন করিলেন।

যদুবংশাবতঃ কৃষ্ণ প্রবিষ্ট হইবামাত্র কুরুবৃদ্ধগণ আসন-পরিভ্যাগপূর্বক দণ্ডায়মান হইলেন। ধৃতরাষ্ট্র উখিত হইলে তত্রস্থ সহস্র সহস্র ভূপতি গাত্রোত্থান করিলেন। কৃষ্ণ হস্ত-মুখে সকলকে প্রত্যভিনন্দন করিলেন।

তখন সভাস্থ সকলে নির্দিষ্ট আসনে উপবিষ্ট হইলেন। কর্ণ এবং ছর্ষোধন অনতিদূরে একাসনে অবস্থিত হইলেন এবং বিছর কৃষ্ণের পার্শ্বে আসন পরিগ্রহ করিলেন। অনন্তর সকলে কৃষ্ণের প্রস্তাবের প্রতীক্ষায় তাঁহার প্রতি চাহিয়া নীরব

রহিলেন। তখন ধীমান্ বাসুদেব জলদগম্ভীরস্বরে সভাগৃহ প্রতিধ্বনিত করিয়া ধৃতরাষ্ট্রকে সম্বোধনপূর্বক কহিতে লাগিলেন—

হে ভরতবংশাবতংস, আমার বিবেচনায় কৌরব ও পাণ্ডবগণের মধ্যে সন্ধি স্থাপনপূর্বক বীরগণের বিনাশ নিবারণ করা কর্তব্য। এই প্রার্থনা করিতেই আমি আপনার নিকট আগমন করিয়াছি। হে কুরুপ্রবীর, পাণ্ডবদিগকে রাজ্যার্থ প্রদানপূর্বক তাঁহাদের সহিত সন্ধিস্থাপন ভিন্ন আমার আর অন্য প্রস্তাব করিবার নাই। উপস্থিত সভাসদের মধ্যে কাহারও যদি অন্য কোনো সংগত প্রস্তাব থাকে, তবে তাহা শ্রবণ করা যাক।

ধৃতরাষ্ট্র কহিলেন—

হে কৃষ্ণ, তোমার বাক্য ধর্মাম্মোদিত তাহার সন্দেহ নাই; কিন্তু দেখিতেছ যে, আমি স্বাধীন নহি। আমার প্রিয়কার্য অনুষ্ঠিত হয় না; অতএব তুমি দুর্ধোধনকে বুঝাইবার নিমিত্ত যত্ন করো, সে আমাদের কাহারও বাক্য গ্রাহ্য করে না। তুমি তাহাকে শাস্ত করিতে পারিলে যথার্থ বদ্ধুজ্জনোচিত কার্য হইবে।

রাজা ধৃতরাষ্ট্রের বাক্যানুসারে বাসুদেব দুর্ধোধনের অভিমুখে প্রত্যাবৃত্ত হইয়া মূঢ়বচনে কহিতে লাগিলেন—

ব্রাতঃ, তুমি যেরূপ ব্যবহার করিতেছ, তাহা তোমার বংশের উপযুক্ত হইতেছে না। সেই বিপরীত ব্যবহারজনিত

অনর্থ পরিহারপূর্বক নিজের ভ্রাতৃগণের মিত্রসকলের শ্রেয় সাধন করো। হে দুর্যোধন, পাণ্ডবদের সহিত সন্ধিস্থাপন করা তোমার গুরুজন সকলেরই অভিপ্রেত; অতএব তাহা তোমারও অনুমোদিত হউক।

কৃষ্ণের বাক্যাবসানে ভীষ্ম তাঁহার কথা সমর্থন করিয়া দুর্যোধনকে বুঝাইতে লাগিলেন—

হে দুর্যোধন, মহাত্মা কেশব তোমাকে ধর্মসংগত উপদেশ প্রদান করিলেন, তুমি তাহার অনুবর্তী হও, প্রজা-গণকে বিনষ্ট করিয়ো না, পিতামাতাকে শোকসাগরে নিমগ্ন করিয়ো না।

কিন্তু দুর্যোধন ভীষ্ম-বাক্যের সমাদর না করিয়া—ক্রোধে ঘন ঘন শ্বাস পরিত্যাগ করিতে লাগিলেন। তখন বিহ্বল কহিলেন—

আমি তোমার নিমিত্ত শোক করিতেছি না, কিন্তু তোমার বৃদ্ধ পিতামাতা যে তোমাকে উৎপাদন করিয়া হতপুত্র ও হতমিত্র হইয়া ছিন্নপক্ষ পক্ষীর ন্যায় অনাথ হইবেন, তজ্জগাই আমি শোকাকুল হইতেছি।

তখন ধৃতরাষ্ট্র পুনরায় অমুনয় বাক্যে কহিলেন—

বৎস, বামুদেবের কল্যাণকর বাক্য গ্রহণ করো, তাহাতে তোমার ঐশ্বর্য অক্ষুণ্ণ থাকিবে। যে রাজ্যার্থ তুমি দান করিবে, মহামতি কেশবের সাহায্যে তদপেক্ষা অধিক পরিমাণে রাজ্যবৃদ্ধি করিতে পারিবে। কিন্তু ইহাকে প্রত্যা-খ্যান করিলে পরাজয় অনিবার্য, তাহার সন্দেহ কী।

রাজা দুর্যোধন আর কাহারও কথায় কিছুমাত্র মনোযোগ না করিয়া কৃষ্ণকে উষ্ণভাবে প্রত্যুত্তর প্রদান করিলেন—

হে বামুদেব, আমরা ক্ষত্রধর্মাবলম্বী, শত্রুর নিকট নত হওয়া অপেক্ষা আমরা সমরক্ষেত্রে বীরশয্যা শ্রেয়স্কর জ্ঞান করি। আমি অপ্রাপ্তবয়স্ক থাকিতে পিতা আমার অনভিমতে পাণ্ডবদিগকে আমার রাজ্যের অংশ প্রদান করিয়াছিলেন। আমি জীবিত থাকিতে তাহা পুনরায় প্রত্যাপিত হইবে না। অধিক কী, সূচির অগ্রভাগে যে পরিমাণ ভূমি বিদ্রু হইতে পারে, তাহাও পাণ্ডবদিগকে প্রদান করিব না।

দুর্যোধনের উগ্রবাক্যে রুষ্ট হইয়া কৃষ্ণ উপহাস-সহকারে প্রত্যুত্তর করিলেন—

হে দুর্যোধন, তুমি যে বীর-শয্যালাভের বাসনা করিতেছ, তাহা যথাকালে অবশ্যই প্রাপ্ত হইবে। তুমি পিতা মাতা ও সমগ্র গুরুজনের বাক্য অবহেলা করিতেছ, অথচ চিন্তা করিয়াও স্বীয় দোষ দেখিতে পাইতেছ না। কিন্তু বোধ করি উপস্থিত নৃপতিবর্গ অন্তরূপ বিচার করিবেন।

কৃষ্ণ এইরূপ কহিতেছেন এমন সময়ে দূঃশাসন উত্থানপূর্বক দুর্যোধনের নিকট সমাগত হইয়া কহিলেন—

হে রাজন্, সভাস্থ সকলের মন ক্রমেই তোমার বিপক্ষে আবর্তিত হইতেছে; অতএব তোমার আর এখানে অবস্থান করা শ্রেয় নহে।

দুর্যোধন এই কথায় শঙ্কিত হইয়া অশিষ্টভাবে কর্ণ শকুনি ও দূঃশাসনকে লইয়া সভাগৃহ পরিত্যাগ করিলেন।

ধৃতরাষ্ট্র ব্যগ্রভাবে বিছুরকে কহিলেন—

বৎস, দূরদর্শিনী গান্ধারীর সমীপে সত্বর গমনপূর্বক তাঁহাকে এই সভায় আনয়ন করো, যদি মাতার বাক্যে দুর্ধোধনের সুবুদ্ধির উদয় হয়, একবার শেষচেষ্টা দেখা যাক । হায়, দুর্ধোধনকৃত এই ঘোর ব্যসন কোথায় প্রশমিত হইবে ।

বিছুর রাজাজ্ঞা পাইবামাত্র নিজক্রান্ত হইয়া অবিলম্বে যশস্বিনী গান্ধারীকে তথায় উপস্থিত করিলেন । তিনি আগত হইলে ধৃতরাষ্ট্র কহিলেন—

হে গান্ধারি, তোমার দুর্বিনীত পুত্র দুর্ধোধন ঐশ্বর্যলোভে মুগ্ধ হইয়া গুরুজন-বাক্য অবহেলা করিয়া অতি ভয়ংকর বিপদের সূত্রপাত করিতেছে । এক্ষণে সে সুহৃদ্বাক্য উল্লঙ্ঘন-পূর্বক অশিষ্টের আয় সভা ত্যাগ করিয়াছে ।

গান্ধারী কহিলেন—মহারাজ, এই যে ব্যসন সমুপস্থিত, ইহাতে তোমারই দুর্বলতা প্রকাশ পাইতেছে । তুমি দুর্ধোধনের পাপ-পরায়ণতা অবগত হইয়াও চিরকাল তাহার মতের অনুসরণ করিয়া আসিয়াছ, এক্ষণে উহাকে বলপূর্বক নিবারণ করিবার আর তোমার সাধ্য নাই ।

অনন্তর মাতৃ আজ্ঞা শ্রুত হইয়া দুর্ধোধন পুনরায় সভায় প্রবিষ্ট হইলে গান্ধারী তাঁহাকে ভৎসনাপূর্বক কহিলেন—

বৎস দুর্ধোধন, কাম ও ক্রোধের বশীভূত হইয়া তোমার প্রজ্ঞা বিলুপ্ত হওয়াতেই তুমি গুরুজনের সহপদেশ-বাক্য লঙ্ঘন করিতেছ ; কিন্তু হে পুত্র, যদি নিজের অধর্ম-

বুদ্ধিকেই না জয় করিতে পারিলে তবে রাজ্যাজয় বা রাজ্য রক্ষা করিবার আশা কিরূপে করিতেছ। বৎস, শান্তিমার্গ অবলম্বন করিয়া সকলকে রক্ষা করো, পাণ্ডবদের সহিত মিলিত হইয়া পরমশুখে সাম্রাজ্য ভোগ করো।

মাতৃবাক্যের অবসানে দুর্যোধন প্রত্যুত্তর প্রদান না করিয়া পুনরায় সভাগৃহ ত্যাগ করিলেন এবং কর্ণ শকুনি ও দূঃশাসনের সহিত মন্ত্রণা করিতে লাগিলেন।

বাসুদেব তখন সকলের সমক্ষে ধৃতরাষ্ট্রকে কহিলেন—

মহারাজ, আমি এক্ষণে সমস্ত অবস্থা অবগত হইলাম। স্পষ্টই বুঝিলাম যে আপনি স্বাধীন নহেন এবং দুর্যোধন রূঢ়-ভাবে সন্ধির প্রস্তাব অগ্রাহ্য করিতেছেন; অতএব এই সকল বৃত্তান্ত ধর্মরাজের নিকট নিবেদন করিলেই আমার কার্য শেষ হয়। এক্ষণে আপনাদের সকলকে আমন্ত্রণ করিতেছি, আমি চলিলাম।

এই বলিয়া মহামতি বাসুদেব বহির্গত হইয়া রথারোহণ-পূর্বক পিতৃঘসার নিকট বিদায় লইতে চলিলেন। তথায় তাঁহাকে সমস্ত বৃত্তান্ত জ্ঞাত করাইয়া কৃষ্ণ কহিলেন—

দেবি, দুর্যোধনের তো শেষদশা উপস্থিত হইয়াছে; এক্ষণে আপনার পুত্রদিগকে যদি কিছু বক্তব্য থাকে, তাহা আমি শ্রবণ করিতে অভিলাষী।

কুন্তী কহিলেন—বৎস, যুধিষ্ঠিরকে আমার বচনে কহিবে—

—হে পুত্র, তোমার রাজ্য-পালন-জনিত প্রচুর ধর্ম বিনষ্ট

হইতেছে ; অতএব আর ক্ষত্রধর্মে অবহেলা করিয়ো না । তোমার বুদ্ধি সতত ধর্মচিন্তায় অভিভূত হইয়া কর্মপথের বাধা ঘটায় ; অতএব সাবধান হও ।

—হে কেশব, ভীমসেন ও ধনঞ্জয়কে কহিবে—

—বৎসগণ, ক্ষত্রিয়কন্ডা যে নিমিত্ত গর্ভধারণ করেন, তাহা স্মরণ রাখিয়ো, এক্ষণে তাহা সফল করিবার সময় আগত হইয়াছে ।

—এবং কল্যাণী দ্রুপদনন্দিনীকে কহিবে—

—হে কৃষ্ণে, হে মহাভাগে, হে যশস্বিনি, তুমি এত ক্লেশ সহ করিয়াও আমার পুত্রগণের প্রতি যথোচিত আচরণ করিয়াছ, ইহা তোমার উপযুক্তই হইয়াছে ।

—হে মাধব, সকলকে আমার স্নেহান্বিতবাদ ও কুশলসংবাদ জ্ঞাপন করিবে । এক্ষণে তুমি নির্বিঘ্নে গমন করো ।

অনন্তর কুন্তীকে অভিবাদন করিয়া কৃষ্ণ তথা হইতে নিজ্জাস্ত হইয়া কর্ণকে বিশেষ প্রয়োজন জানাইয়া স্বীয় রথে আরোহণ করাইলেন এবং সাত্যকি ও অনুচরবর্গ সমভিব্যাহারে নগর হইতে প্রস্থান করিলেন । নগরের বহির্দেশে নির্জনস্থানে উপস্থিত হইয়া কৃষ্ণ কর্ণকে একান্তে কহিতে লাগিলেন—

হে কর্ণ, তুমি সর্বদাই বেদপারগ ব্রাহ্মণগণের সহিত মিলিত হইয়া বহু তত্ত্ব আলোচনা করিয়াছ, অতএব তুমি নিশ্চয়ই জানো যে, কোনো রমণীকে যে বিবাহ করে, সে তাহার কণ্ঠাবস্থায় জাত পুত্রের শাস্ত্রোক্ত পিতা হয় । তুমি স্বীয়

জন্মবৃন্তাস্ত অবগত আছি। তুমি কুন্তীর বিবাহের পূর্বপ্রসূত সূর্যদত্ত পুত্র, সূতরাং মহাত্মা পাণ্ডুই তোমার পিতা, তুমিই প্রকৃতপক্ষে জ্যেষ্ঠ পাণ্ডব; অতএব অতীত আমার সহিত গমন করো, পাণ্ডবগণকে এই বৃন্তাস্ত বিজ্ঞাপিত করা যাক। তাঁহারা তোমাকে জ্যেষ্ঠ বলিয়া জানিতে পারিলে সমস্ত আধিপত্য তোমার হস্তে সমর্পণ করিবেন। অতএব হে মহাবাহো, অতীত আমার সহিত আইস, ভ্রাতৃগণ-পরিবৃত্ত হইয়া রাজ্য-শাসনপূর্বক কুন্তীর আনন্দবর্ধন করো।

কর্ণ প্রতুষ্ট করিলেন—

হে বৃষ্ণিপ্রবীর বাসুদেব, আমি অবগত আছি যে, কুন্তীর কণ্ঠ্যবস্থায় জন্মগ্রহণ করায় আমি শাস্ত্রানুসারে পাণ্ডুপুত্ররূপেই গণ্য। কিন্তু হে জনাদর্শন, আমি জন্মিবামাত্র আমার কিছুমাত্র কুশল চিন্তা না করিয়া কুন্তী আমাকে পরিত্যাগ করিলেন। তৎকালে সূতজাতীয় অধিরথ দয়া-পরবশ হইয়া আমাকে তাঁহার পত্নী রাধার নিকট পালনার্থে সমর্পণ করিলেন। হে কৃষ্ণ, স্নেহবশত তৎক্ষণাৎ আমার মাতৃরূপিণী রাধার স্তনযুগলে ক্ষীর সঞ্চার হইয়াছিল। তদবধি উভয়ে আমাকে পুত্রনির্বিশেষে লালন করিলেন। যৌবন প্রাপ্ত হইলে আমি সূতজাতীয়া কণ্ঠ্য বিবাহ করিলাম এবং তাঁহা হইতে আমার পুত্র পৌত্রাদি জন্মগ্রহণ করিয়াছে। ইহাদের উপরই আমার সমস্ত প্রণয় আবদ্ধ হইয়াছে, অপরিমেয় ধনরত্ন বা অখণ্ড ভূমণ্ডল প্রাপ্ত হইলেও আমার ইহাদিগকে পরিত্যাগ করিবার অভিলাষ হয় না। তাহা

ছাড়া, হে বাসুদেব, আমি এতকাল দুর্যোধনের প্রদত্ত রাজ্য অকণ্টকে ভোগ করিয়া আসিয়াছি, আমাকে তিনি সর্বদাই প্রীতি প্রদর্শন করিয়াছেন এবং আমার উপর নির্ভর করিয়াই পাণ্ডবদের সহিত বিরোধে প্রবৃত্ত হইয়াছেন; অতএব এক্ষণে লোভ বা ভয়ে বিচলিত হইয়া আমি তাঁহার প্রতি মিথ্যাচরণপূর্বক তাঁহাকে নিরাশ করিতে পারিব না। তদ্ব্যতীত, যদি এই যুদ্ধে আমি সব্যসাচীর সম্মুখীন না হই, তবে আমাদের উভয়েরই ভূয়সী অকীর্তি থাকিয়া যাইবে। হে যাদবনন্দন, তুমি আমার হিতার্থে এই সকল প্রস্তাব করিয়াছ, সন্দেহ নাই, কিন্তু আমার অনুরোধ এই যে, তুমি আমার জন্মবৃদ্ধান্ত পাণ্ডবদের নিকট প্রকাশ না করো। হে অরিন্দম, ধর্মান্ধা যুধিষ্ঠির আমাকে কুন্তিপুত্র বলিয়া জানিতে পারিলে তৎক্ষণাৎ রাজ্য পরিত্যাগ করিবেন। সে রাজ্য আমি প্রাপ্ত হইলে দুর্যোধনকে না প্রদান করিয়া থাকিতে পারিব না। কিন্তু এক্ষণে দুর্যোধনের রাজ্যপ্রাপ্তি উচিত হইবে না; অতএব যুধিষ্ঠিরই চিরকাল রাজ্যশাসন করুন।

কর্ণের কথা শেষ হইলে বাসুদেব মৃদুহাস্ত-সহকারে কহিলেন—

হে কর্ণ, আমি তোমাকে সাম্রাজ্য প্রদান করিলাম, তাহা তোমার গ্রহণের অভিলাষ হইল না, অতএব আর যুদ্ধ বিনা গতি নাই। তুমি এখান হইতে প্রতিনিবৃত্ত হইয়া ভীষ্ম দ্রোণাদিকে বলিয়া যে, বর্তমান মাস সর্বতোভাবে

যুদ্ধের উপযোগী। খাদ্যদ্রব্য ও কাষ্ঠাদি প্রচুর পরিমাণে পাওয়া যায়, জল সুরস ও পথ কদমশূক। অস্ত্র হইতে সপ্তম দিবসে অমাবস্তা হইবে, ঐ তিথি যুদ্ধারম্ভের পক্ষে উপযুক্ত। তোমরা সকলেই যখন যুদ্ধক্ষেত্রে অস্থিমশয্যা প্রার্থনা করিতেছ, তখন তাহাই হইবে। ত্র্যযোধনের অমুগত রাজগণ সমরক্ষেত্রে নিধন প্রাপ্ত হইয়া সদগতি লাভ করিবেন।

কর্ণ কহিলেন—হে কৃষ্ণ, আমি এক্ষণে বিদায় গ্রহণ করি। সম্প্রতি যুদ্ধক্ষেত্রে পুনরায় তোমার দর্শন পাইব এবং পরে হয় এই ক্ষত্রাস্তকারী মহারণ হইতে উত্তীর্ণ হইয়া, নতুবা স্বর্গে গিয়া যথাকালে তোমার সহিত পুনরায় মিলিত হইব।

এই বলিয়া কর্ণ কেশবকে আলিঙ্গনপূর্বক বিষণ্ণমনে স্বীয় রথারোহণ করিয়া হস্তিনাপুরে প্রত্যাগত হইলেন। কৃষ্ণ শাস্ত্রের নিমিত্ত শেষচেষ্টাতেও অকৃতকার্য হইয়া সারথিকে রথ-চালনার আদেশ প্রদান করিলে রথ উপপ্রব্য অভিমুখে প্রধাবিত হইল।

কুরু সভা ভঙ্গ হইলে শাস্ত্রের আশা সম্পূর্ণ পরাহত জানিয়া বিতুর অতিশয় চিন্তাকুলিত চিত্তে ইতস্তত পরিভ্রমণ করিতে করিতে অবশেষে কুন্তীর ভবনে উপস্থিত হইয়া তাঁহার নিকট মনোবেদনা নিবেদন করিতে লাগিলেন—

হে কুন্তি, তুমি তো জানো, আমি যুদ্ধের কৌ পর্যন্ত বিরোধী ছিলাম, আমি কায়মনোবাক্যে শাস্ত্রের নিমিত্ত চেষ্টা করিলাম, কিন্তু কিছুই ফল হইল না। ধর্মীয়া পাণ্ডবগণ সহায়সম্পন্ন হইয়াও দীনের দ্বায় সন্ধি প্রার্থনা করিলেন,

তথাপি হৃষোধনের তাহাতে অভিরুচি হইল না। যে ঘোরযুদ্ধ অবশ্যম্ভাবী হইয়া পড়িয়াছে, তাহার ফল যে কী পর্যন্ত শোচনীয় হইতে পারে, তাহা ভাবিয়া আমি দিবানিশি নিদ্রাস্থখে বঞ্চিত হইতেছি।

মনস্বিনী কুন্তী বিদ্বরের বাক্য শ্রবণে একান্ত হুঃখিত হইলেন এবং দীর্ঘনিশ্বাস পরিত্যাগ পূর্বক চিন্তা করিতে লাগিলেন। অবশেষে তিনি কর্ণকে হৃষোধনের প্রধান নির্ভরস্থল জানিয়া জন্মবৃদ্ধান্ত জ্ঞাপনপূর্বক তাঁহাকে পাণ্ডবদের প্রতি প্রসন্ন করিবার সংকল্প করিলেন। কর্ণ পুত্র হইয়া কী নিমিত্ত তাঁহার হিতকর বাক্য উপেক্ষা করিবে।— এই কল্পনায় আশ্বস্ত হইয়া তিনি এই উদ্দেশ্যে ভাগীরথীতীরে গমন করিলেন।

তথায় দেখিলেন স্বীয় আত্মজ সত্যপরায়ণ মহাতেজ কর্ণ পূর্বমুখে বসিয়া বেদপাঠ করিতেছেন। পৃথা কর্ণের পশ্চাতে দণ্ডায়মান থাকিয়া তাঁহার জপাবসান প্রতীক্ষা করিতে লাগিলেন। অপরাহ্ন পর্যন্ত কর্ণ পূর্বমুখে অবস্থান করিয়া পরিশেষে সূর্যের সঙ্গে সঙ্গে পশ্চিমাভিমুখে আবর্তিত হইবামাত্র কুন্তী তাঁহার নয়নপথে পতিত হইলেন। তখন তিনি বিস্মিত হইয়া অভিবাদনপূর্বক কৃতাজ্জলিপুটে কহিতে লাগিলেন—

ভদ্রে, অধিরথ ও রাধার পুত্র আপনাকে অভিবাদন করিতেছে। আপনি কী নিমিত্ত এখানে আগমন করিয়াছেন। আজ্ঞা করুন কী করিতে হইবে।

কুন্তী कहিলেন—বৎস, তুমি অধিরথ বা রাধার পুত্র নহ ; স্মৃতকূলে তোমার জন্ম হয় নাই । তুমি আমারই সূর্য-দত্ত পুত্র, কণ্ঠাবস্থায় আমি তোমাকে প্রাপ্ত হইয়াছিলাম । তুমি শাস্ত্রানুসারে মহাত্মা পাণ্ডুর পুত্র হইয়া মোহবশত স্বীয় ভ্রাতৃগণের সহিত সৌহার্দ্য না করিয়া দুর্যোধনের সেবা করিতেছ, ইহা কি ভালো হইতেছে । তুমি সর্বগুণসম্পন্ন এবং আমার পুত্রগণের অগ্রজ, অতএব তোমার স্মৃতপুত্র-সংজ্ঞা তিরোহিত হওয়া কৰ্তব্য ।

কুন্তীর বাক্যাবসানে কর্ণ कहিলেন—

হে ক্ষত্রিয়ে, আমি আপনার বাক্যে আস্থা করি না, উহাতে আমার ধর্মহানি হইবে । আপনার কর্মদোষেই আমি স্মৃতজাতি মধ্যে গণ্য হইয়াছি, আপনি জন্মমাত্র আমাকে পরিত্যাগ করিয়া আমার ক্ষত্রিয়জন্ম বৃথা করিয়াছেন, কোন্ শত্রু ইহা অপেক্ষা আমার অধিক অপকার করিতে পারিত । ধৃতরাষ্ট্র-তনয়গণ আমার সর্বপ্রকার সংকার করিয়া আসিতেছেন, আপনার অমুরোধে তাঁহাদের প্রতি কী প্রকারে কৃতজ্ঞ হইব । অতএব দুর্যোধনের হিতার্থে আপনার পুত্রগণের সহিত যুদ্ধ করিব, ইহা অনিবার্য । তবে, হে পুত্রবৎসলে, আপনার প্রীতির নিমিত্ত আমি সত্য করিয়া বলিতেছি যে, যুধিষ্ঠির, ভীমসেন, নকুল ও সহদেব আপনার এই চারিপুত্রের সহিত আমার কোনো বৈর নাই, ইহাদিগকে আমি সংহার করিব না । স্মৃতরাং আপনার পঞ্চপুত্র কদাপি বিনষ্ট হইবে না—হয় অজুন নয় আমি জীবিত থাকিব ।

কুন্তী কর্ণের যথার্থ কথাসকল শ্রবণে হৃৎখে কম্পিত হইলেন, কিন্তু কোনো প্রত্যুত্তর করিতে পারিলেন না। পরিশেষে তিনি কর্ণকে আলিঙ্গন করিয়া কহিলেন—

তুমি যে যুধিষ্ঠিরাদি ভ্রাতৃচতুষ্টয়কে অভয় প্রদান করিলে ইহা যেন যুদ্ধকালে তোমার স্মরণ থাকে।

অনন্তর উভয়ে স্ব স্ব স্থানে প্রস্থান করিলেন।

৯

শাস্তির চেষ্টায় সর্বতোভাবে অকৃতকার্য হইয়া কুরু উপপ্লব্য নগরে প্রত্যাগমন পূর্বক হস্তিনাপুরে অনুষ্ঠিত সমস্ত বৃত্তান্ত পাণ্ডব সন্নিধানে সংক্ষেপে বর্ণনা করিয়া কহিলেন—

হে ধর্মরাজ, কুরু সভামধ্যে যাহা কিছু ঘটিয়াছিল সকলই ব্যক্ত করিলাম। ফলত বিনাযুদ্ধে কৌরবগণ তোমাদিগকে রাজ্য প্রত্যর্পণ করিবেন না। অতএব যুদ্ধ ব্যতীত আমি অগ্র গতি দেখিতে পাই না।

এই বলিয়া বাসুদেব বিজ্রামার্থে স্বীয় আবাস ভবনে গমন করিলেন। অনন্তর রাত্রিযোগে পাণ্ডবগণ কুরুকে একান্তে আহ্বানপূর্বক মন্ত্রণা করিতে লাগিলেন।

কৃষ্ণের বাক্যানুসারে ধৃষ্টদ্যুম্নই সপ্ত অক্ষৌহিনীর সেনাধ্যক্ষগণের নেতৃত্বপে নিযুক্ত হইলেন।

অনন্তর সকলকে কার্যারম্ভের নিমিত্ত অতিশয় ব্যগ্র দেখিয়া যুধিষ্ঠির যুদ্ধযাত্রার উদ্যোগ করিবার অনুমতি প্রদান করিলেন। আদেশ পাইবামাত্র সকলে বর্ম ধারণপূর্বক স্ব স্ব কার্যে ব্যাপ্ত হইলেন। অল্পকাল মধ্যেই অশ্বের হেবারবে, হস্তির বৃংহিতে, রথের ঘর্ঘরে ও ইতস্তত প্রধাবমান যোদ্ধাগণের—যোজনা করো, সজ্জা করো,—প্রভৃতি চীৎকারে সেই বিপুল সৈন্য-সমাগম কুরু মহাসমুদ্রের ন্যায় শব্দিত হইতে লাগিল। সর্বত্র তুমুল শব্দ-চুন্দুভি ধ্বনি সৈন্যগণের আনন্দের পরিচয় প্রদান করিতে লাগিল।

অনন্তর আয়োজনাদি কার্যে সে-রাত্রি অতিবাহিত হইলে প্রাতঃকালে সকলে প্রস্তুত হইয়া কুরুক্ষেত্রাভিমুখে যাত্রা আরম্ভ করিলেন। সৈন্যাধ্যক্ষগণ সেনামুখে অগ্রে চলিতে লাগিলেন। রাজা যুধিষ্ঠির যান বাহন অস্ত্রশস্ত্র কোষ শিল্পী ও চিকিৎসক প্রভৃতি একত্রিত করিয়া মধ্যস্থানে রহিলেন। অগ্ন্যাশ্রয় বীরগণ তাঁহাকে বেষ্টিত করিয়া মৈত্রের পশ্চাঙ্গাগে অবস্থান করিলেন।

কুরুক্ষেত্রে উপস্থিত হইয়া অর্জুন এবং বামুদেব তাঁহাদের ভীষণরব শব্দদ্বয় বাদন করিলে যোদ্ধৃগণ অতিশয় উৎসাহিত হইয়া প্রত্যেকে স্ব স্ব শস্ত্রে ঘোরতর নিনাদ করিলেন। অনন্তর যুধিষ্ঠির পরিভ্রমণপূর্বক শ্মশান, দেবালয়, আশ্রমাদি স্থানসকল পরিহার করিয়া পবিত্র সলিলযুক্ত হিরণ্যভী নামক স্রোতস্বতী-সেবিত তৃণ-ইক্ষন-সম্পন্ন এক সমতল ভূমি সেনা-নিবেশের নিমিত্ত নির্বাচন করিলেন।

তথায় কিয়ৎকাল বিশ্রামান্তে গতক্রম হইয়া তিনি মহী-পালসকল-সমভিব্যাহারে চতুর্দিক পর্যটন ও শিবিরাদি সংস্থাপনের উপযুক্ত স্থান পরিদর্শন করিতে লাগিলেন। ধৃষ্টদ্যুম্ন ও সাত্যকি শিবিরের পরিমাণ স্থির করিলে কৃষ্ণ চতুর্দিকে পরিখা খনন করাইয়া তথায় অদৃশ্যভাবে রক্ষক সৈন্যদল সংস্থাপন করিলেন। প্রথমে পাণ্ডবগণের শিবির প্রস্তুত হইলে অত্যাশ্চর্য নৃপতিগণ পরে নিজ নিজ শিবির যথা-স্থানে সন্নিবেশিত করিলেন।

প্রত্যেক শিবিরে অস্ত্রশিল্পী ও সূচিকিৎসক-সকল নিযুক্ত হইল। এবং ধর্মরাজের আদেশক্রমে তন্মধ্যে প্রভূত পরিমাণে শরাসন, জ্যা, বর্ম ও সকলপ্রকার শস্ত্রসমূহ, তদ্ব্যতীত তৃণ তুষ, অঙ্গার, মধু, ঘৃত, উদক এবং বিবিধপ্রকারের ক্ষতনিবারণী ঔষধ রক্ষিত হইল। পাণ্ডবগণ এইরূপে সম্পূর্ণ প্রস্তুত হইয়া যুদ্ধকাল প্রতীক্ষা করিতে লাগিলেন।

অনন্তর সে রজনী প্রভাত হইলে রাজা দুর্যোধন স্বয়ং সেনানিবেশে উপস্থিত হইয়া একাদশ অক্ষৌহিনী পরিদর্শন ও বিভক্ত করিলেন। হস্তী অশ্ব রথাদির মধ্যে উত্তম মধ্যম ও অধম নির্বাচনপূর্বক সেই অনুসারে তাহাদিগকে অগ্রে মধ্যে ও পশ্চাতে সন্নিবেশিত করিলেন। এবং সর্বপ্রকার সাংগ্ৰামিক যন্ত্র যাবতীয় অস্ত্রশস্ত্র ও আবশ্যকীয় ঔষধাদি সংগ্রহ করিয়া তাহা সৈন্যগণের সহিত প্রেরণ করিলেন।

কূপ, দ্রোণ, শল্য, জয়দ্রথ, কাশ্যোজাধিপতি সুদক্ষিণ, ভোজরাজ কৃতবর্মা, অশ্বখামা, কর্ণ, ভূরিশ্রবা, শকুনি ও

কাহ্নিক এই একাদশ মহারথী সৈন্যাধ্যক্ষপদে নিযুক্ত হইলেন। ত্র্যযোধন ইহাদিগকে বিধিবৎ অর্চনাপূর্বক অতিশয় পরিতুষ্ট ও স্বপক্ষে দৃঢ়বদ্ধ করিলেন।

অনন্তর উদ্যোগকার্য পরিসমাপ্ত হইলে ত্র্যযোধন সেনাধ্যক্ষগণকে সঙ্গে লইয়া মহাত্মা ভীষ্মের নিকট উপস্থিত হইলেন এবং কৃতাজলিপুটে কহিতে লাগিলেন—

হে পুরুষপ্রবীর, আমাদের সৈন্যগণ সংগ্রামার্থে প্রস্তুত হইয়া উপযুক্ত সেনাপতি অভাবে ছিন্নভিন্ন রহিয়াছে। আপনি আমার প্রিয়ানুষ্ঠান-পরতন্ত্র ও শত্রুগণের অবধ্য অতএব আপনি আমাদের সেনাপতি পদ গ্রহণ করুন। আপনার বলবীর্ষে সুরক্ষিত হইয়া আমরা দেবগণেরও অজ্জয় হইব।

ভীষ্ম কহিলেন—হে মহাবাহো, আমি তোমার অনুরোধ রক্ষা করিতে সন্মত আছি, কিন্তু তোমাদের ন্যায় পাণ্ডবগণও আমার প্রিয়পাত্র। তোমাদের আশ্রয়ে আছি অতএব তোমার পক্ষ অবলম্বন করিলাম, কিন্তু এই একটি নিয়ম সংস্থাপন করিতেছি, শ্রবণ করো। আমি সুযোগ উপস্থিত হইলে কদাচ পাণ্ডবগণকে সংহার করিব না। তবে তোমার ক্রীতির নিমিত্ত আমি প্রতিদিন সামর্থ্য অনুসারে সহস্র সহস্র সৈন্য বিনাশ করিব। আর এক কথা, আমি সেনাপতি হইলে কর্ণ সম্ভবত যুদ্ধে যোগদান করিবেন না, অতএব বিবেচনা করিয়া আমাকে নিয়োগ করো।

তখন কর্ণ কহিলেন—

হে ছর্যোধন, আমি পূর্বেই প্রতিজ্ঞা করিয়াছি যে পিতামহ জীবিত থাকিতে আমি অস্ত্র ধারণ করিব না। অতএব উনিই সেনাপতি হইয়া অগ্রে যুদ্ধ করুন। উনি বিনষ্ট হইলে আমি অর্জুনের সহিত সংগ্রাম করিব।

তখন সকলে বিধিপূর্বক ভীষ্মকে সৈন্যপত্যে অভিষিক্ত করিলেন। অনন্তর রাজা ছর্যোধনের বিপুল সৈন্যবল মহামতি ভীষ্মকে পুরস্কৃত করিয়া কুরুক্ষেত্রাভিমুখে যাত্রা করিল।

✓ (অনন্তর উভয়পক্ষের সম্মতিক্রমে একপ যুদ্ধধর্ম সংস্থাপিত হইল যে রথী রথীর সহিত, গজারোহী গজারোহীর সহিত, অশ্বাবার অশ্বাবারের সহিত এবং পদাতি পদাতির সহিত যুদ্ধ করিবে। অশ্বের সহিত যুদ্ধে প্রবৃত্ত, শরণাপন্ন, যুদ্ধে পরাভূত অথবা বিহ্বল ব্যক্তির প্রতি আঘাত করা হইবে না এবং কোনো ক্রমেই ছল প্রয়োগ করা হইবে না।)

অনন্তর ছর্যোধনের নিয়োগানুসারে কৌরবপক্ষীয় ভূপতিগণ রাত্রি অবসান না হইতেই স্নানান্তে মালা ও গুহ্র বসন পরিধান, শস্ত্র ও ধ্বজ গ্রহণ, স্বস্তিবাচন ও অগ্নিতে আহুতি প্রদান করিয়া পরস্পর-প্রদ্বাষিত হইয়া একাগ্রচিত্তে রণক্ষেত্রে গমন করিতে লাগিলেন।

পঞ্চ-যোজন-বিস্তৃত মণ্ডলাকার যুদ্ধক্ষেত্রের উভয় পার্শ্বে কৌরব ও পাণ্ডব সেনানিবেশ স্থাপিত হইয়াছিল। কৌরব সৈন্যগণ এই ক্ষেত্রের পশ্চিমাধ অধিকার করিয়া তথায় সৈন্যসজ্জায় প্রবৃত্ত হইলেন।

এদিকে যুধিষ্ঠিরও তাঁহার সেনানায়কগণকে অমুরূপ আদেশ প্রদান করিলে তাঁহারা বিচিত্র বর্ম কবচাদি ধারণ-পূর্বক শিল্পী প্রভৃতিকে শিবিরে রাখিয়া সৈন্য ও রথ গজ অশ্বাদি লইয়া ক্ষেত্রের পূর্ববিভাগে চলিলেন, কিন্তু অবশেষে যেরূপ সৈন্য বিভাগ করিবেন, এক্ষণে বিপক্ষদের ভ্রম উৎপাদনের অভিপ্রায়ে অমুরূপ ক্রমানুসারে চলিতে লাগিলেন। যুদ্ধকালে বিশৃঙ্খলা নিবারণ জন্য রাজা যুধিষ্ঠির পাণ্ডব সৈন্যগণের প্রত্যেক বিভাগের অভিজ্ঞান চিহ্নবিশেষ, ভাষাবিশেষ ও সংজ্ঞাবিশেষ নির্দেশ করিয়া দিলেন।

পাণ্ডবগণের স্বজাগ্র দৃষ্ট হইবামাত্র কৌরবগণ সহর ব্যাহিত হইতে আরম্ভ করিলেন। ভীষ্ম প্রথমত সেনাধ্যক্ষদিগকে একত্র করিয়া কহিলেন—

হে ক্ষত্রিয়গণ, ব্যাধিদ্বারা গৃহে প্রাণ ত্যাগ করা অপেক্ষা যুদ্ধক্ষেত্রে শস্ত্রদ্বারা মৃত্যুই ক্ষত্রিয়ের পক্ষে শ্রেয়। সংগ্রামই স্বর্গ-গমনের অনাবৃত দ্বার; অতএব এক্ষণে সেই দ্বার অবলম্বন-পূর্বক অভিলম্বিত লোকসকল লাভের নিমিত্ত প্রস্তুত হও।

অনন্তর কর্ণ ব্যতীত কৃষ্ণাজিনধারী সৈন্যাধ্যক্ষ-সকল দুর্ধোধনের নিমিত্ত প্রাণপর্যন্ত পণ করিয়া হুঁচুচিতে এক এক অক্ষৌহিনী সেনা পরিগ্রহ করিলেন। সেনাপতি ভীষ্ম শ্বেত উষ্ণীষ, শ্বেত কবচ ও শ্বেতচ্ত্র ধারণ করিয়া অবশিষ্ট এক অক্ষৌহিনী লইয়া সকলের আগে অবস্থান করিতে লাগিলেন। এরূপ অগণ্য সৈন্যদল ইতিপূর্বে একস্থানে কেহ প্রত্যক্ষ করে নাই।

অনন্তর দুই পক্ষের ব্যূহিত সৈন্যমণ্ডলী হইতে বীরগণের সিংহনাদ ও যানবাহনাদিষ্ট শব্দক্ৰোধদিক্ আকুলিত হইয়া উঠিল এবং দুই পক্ষের সৈন্যজালের গতিজ্ঞা-সমুখিত ধূলি-পটলে আকাশ সমাচ্ছন্ন হইয়া কিয়ৎ-কাল আর কিছুই দৃষ্টিগোচর রহিল না ।

দুই দল সম্মুখীন হইয়া স্ব স্ব অভিলষিত স্থানে স্থির হইলে ধূলিজাল অপসারিত হইয়া অপূর্ব শোভা প্রতিভাত হইল । নবোদিত সূর্যকিরণে হিরণ্য ভূষিত হস্তী ও রথসকল চপলাবিলাসিত জলদজ্বালের ন্যায় দৃশ্যমান হইতে লাগিল । বীরগণ বিচিত্র প্রভাসম্পন্ন কবচে ভূষিত হইয়া অগ্নি ও সূর্যের ন্যায় দীপ্যমান হইলেন ।

শরাসন খড়্গা গদা শক্তি অন্যান্য-প্রহরণ-সমুদায়-শোভিত উভয় সৈন্যদল উন্মত্ত মকরাবর্তযুক্ত যুগান্তকালীন সমবেত সাগর-দ্বয়ের ন্যায় প্রতীয়মান হইতে লাগিল । কাঞ্চনময় অঙ্গদ-শোভিত জলিতানলসদৃশ বহুবিধ ধ্বজসকল ইন্দ্রকেতুর ন্যায় প্রতিভাত হইল । অন্যান্য ধ্বজচিহ্নের মধ্যে ভীষ্মের পঞ্চ-তারা-মণ্ডিত তালকেতু, অর্জুনের ভীষণ কপিধ্বজ, যুধিষ্ঠিরের তারাখচিত সুবর্ণময় চন্দ্র, দুর্যোধনের মণিময় নাগচিহ্ন, ভীমসেনের সুবর্ণ সিংহধ্বজ, আচার্য দ্রোণের কমণ্ডলু ভূষিত কেতু এবং অভিমন্যুর মণি-কাঞ্চনময় ময়ূর সর্বোপরি জাজ্জল্যমান হইয়া প্রকাশ পাইল ।

অনন্তর রাজা দুর্যোধন পাণ্ডবসৈন্যকে প্রতিব্যূহিত অবলোকন করিয়া দ্রোণাচার্যকে কহিলেন—

হে আচার্য, ঐ দেখুন শক্রগণ ভীমসেন-পরিরক্ষিত ব্যূহ রচনা করিয়া আমাদের সৈন্যগণকে আক্রমণ করিবার সংকল্প করিতেছেন, কিন্তু পাণ্ডবদের সৈন্যসংখ্যা পরিমিত, আমাদের বল অপরিমিত, অসংখ্য যোদ্ধা আমাদের হিতার্থে প্রাণদানে প্রস্তুত রহিয়াছে, অতএব শঙ্কার কোনো কারণ নাই। সেনানায়কগণ প্রত্যেক ব্যূহদ্বারে অবস্থান করুন এবং আপনি স্বয়ং ভীষ্মকে রক্ষা করুন।

তখন মহামতি ভীষ্ম দুর্যোধনের প্রীতিসাধনার্থে সিংহনাদ-সহকারে প্রচণ্ড-শব্দ শঙ্খধ্বনি করিলেন। তাহাতে প্রত্যেক সেনানায়ক স্ব স্ব বিভাগ হইতে শঙ্খধ্বনিদ্বারা যুদ্ধার্থে আগ্রহ প্রকাশ করিলেন।

তদন্তরে অপর পক্ষ হইতে অর্জুন দেবদত্ত-নামক ও কৃষ্ণ স্বীয় পাঞ্চজন্ত্য নামক অতি ভীষণ-রব শঙ্খদ্বয় ধ্বনিত করিয়া কৌরবগণকে ত্রাসিত ও স্বপক্ষকে উদ্বোধিত করিলেন, তখন পাণ্ডব-সেনাধ্যক্ষগণ স্ব স্ব শঙ্খবাদনদ্বারা ব্যূহ রচনা ও যুদ্ধাযোজনের সম্পূর্ণতা জ্ঞাপন করিলেন।

অনন্তর শ্বেতাশ্বযুক্ত মণিখচিত রথারূঢ় পাণ্ডব-সেনাপতি অর্জুন কৃষ্ণকে কহিলেন—

হে বাসুদেব, উভয়সেনার মধ্যস্থলে রথ স্থাপন করো, যাহাতে কোন্ পক্ষের কোন্ যোদ্ধা কাহার সহিত যুদ্ধ করিবার উপযুক্ত, তাহা স্থির করিয়া যুদ্ধকার্য উপযুক্তরূপে আরম্ভ করিতে পারি।

তখন কৃষ্ণ অর্জুনের অভিলষিত স্থানে রথ উপনীত করিয়া কহিলেন—

হে পার্থ, ঐ ভীষ্ম দ্রোণাদি যোদ্ধা ও সমগ্র কৌরব-বীরগণ সমবেত আছেন, অবলোকন করো।

ধনঞ্জয় উভয় দলের মধ্যে তাঁহার পিতামহ, আচার্য, মাতুল, ভ্রাতা পুত্র স্বশুর ও মিত্রগণ অবস্থান করিতেছেন দেখিয়া কারুণ্য-রস-বশংবদ ও বিষণ্ণ হইয়া কহিলেন—

হে মধুসূদন, এই সমস্ত আত্মীয়গণ যুদ্ধার্থী হইয়া আগমন করিয়াছেন দেখিয়া আমার শরীর অবসন্ন ও চিন্তা উদ্ভ্রান্ত হইতেছে, গাণ্ডীব আমার হস্ত হইতে স্থলিত হইয়া পড়িতেছে। যাহাদের নিমিত্ত লোকে রাজ্য কামনা করিয়া থাকে, সেই আত্মীয় ও পরম দয়িত ব্যক্তি সকলকে বিনাশ করিয়া আমরা রাজ্যালাভ করিতে উদ্যত হইয়াছি। কিন্তু পৃথিবীর কথা দূরে থাক, ত্রৈলোক্য লাভার্থেও আমি ইহা-দিগকে বধ করিতে বাসনা করি না। ইহারা লোভে অন্ধ হইয়া যুদ্ধার্থে আগমন করিয়াছেন; কিন্তু হায়, আমরা সমস্ত বুঝিয়াও এই মহাপাপের অনুষ্ঠানে অধ্যবসায়াক্রান্ত হইয়াছি। আমাকে নিশ্চেষ্ট অবস্থায় ইহারা বিনাশ করেন সেও ভালো, কিন্তু আমি যুদ্ধ করিব না।

এই বলিয়া ধনঞ্জয় ধর্মুবাণ পরিত্যাগ পূর্বক শোকাকুল-চিন্তে রথের উপর বসিয়া পড়িলেন। তখন বাসুদেব কৃপাভিভূত বিষণ্ণ-বদন পার্থকে কহিলেন—

হে অর্জুন, এই বিষম সময়ে তোমার কী নিমিত্ত এই

অনার্যজনোচিত মোহ উপস্থিত হইল। ইহা তোমার উপযুক্ত হয় নাই। হে পরম্পূর্ণ, এই তুচ্ছ হৃদয়-দৌর্বল্য অতিক্রম করিয়া উত্থান করো।

অর্জুন কহিলেন—হে কৃষ্ণ, মহানুভব গুরুজনদিগকে বধ করা অপেক্ষা ইহলোকে ভিক্ষার ভোজন করা আমার শতগুণে শ্রেয় বোধ হইতেছে। ইহারা বিনষ্ট হইলে আমরা জীবন-ধারণেই কোনো সুখ পাইব না, তবে রাজ্য লইয়া কী করিব। হে সখে, আমি কাতরতা-বশত ধর্মাক্ত হইয়া পড়িয়াছি, অতএব আমাকে উপদেশ দাও, আমি তোমার শরণাপন্ন হইতেছি।

তখন কৃষ্ণ সস্মিতবচনে অর্জুনকে কহিলেন—

ভ্রাতঃ, যে সকল যুক্তির দ্বারা তুমি আত্মপীড়ন করিতেছ তাহা প্রথম দৃষ্টিতে সুসম্বন্ধ বটে, কিন্তু তুমি ধীরভাবে বিবেচনা করিলে তাহার ভ্রম বুঝিতে পারিবে। ক্ষুদ্র মানবীয় সুখ-দুঃখের উপর কর্তব্যাকর্তব্য নির্ভর করে না। প্রত্যেক ক্ষেত্রে সামান্যমুণ্ডাবুদ্ধিঅনুসারে ফলাফল বিচার করিতে গেলে সংশয়-শূন্য ও স্থির সংকল্প হইয়া কোনো কার্যই করা যায় না। সেই নিমিত্ত ফলাফল ও স্বীয় সুখ-দুঃখ নগণ্য করিয়া স্বশ্রেণীর নির্দিষ্ট ধর্মামুসারে কর্তব্য পালন করিতে হয়। হে ক্ষত্রিয়শ্রেষ্ঠ, তুমি হৃদয় দৃঢ় করিয়া ক্ষত্রধর্মামুসারে যুদ্ধে প্রবৃত্ত হও, তাহাতে তোমাকে কিছুমাত্র পাপস্পর্শ করিবে না। হে পার্থ, যে চিরন্তন ঘটনা-পরম্পরার ফলে এই সুমহৎ কুলকর্য আজি উপস্থিত হইয়াছে,

ইহাতে তোমার বা কোনো ব্যক্তি-বিশেষের প্রভুতা বা দায়িত্ব নাই; অতএব হে স্বজন-বংশল, তুমি এই সামান্য লাভ করো যে, তুমি কাহারও মৃত্যুর কারণ-স্বরূপ হইতে পারো না। ^১কর্ম-কারণ-প্রবাহে যাহা ঘটিবার তাহাই ঘটিতেছে। তন্মধ্যে তুমি স্বীয় কর্তব্য অকাতরে পালন করিলে তোমার ধর্মরক্ষা ও পরিণামে শাস্ত্র মঙ্গল লাভ হইবে।

কৃষ্ণের এই উপদেশ শ্রবণে অর্জুনের কুরুণাজনিত মোহ অপমৃত হইল এবং তিনি স্বীয় কুলধর্ম স্পষ্টরূপে উপলব্ধি করিয়া মনঃসংযমপূর্বক কৃষ্ণকে কহিলেন—

হে বাসুদেব, তোমার অনুগ্রহে আমার মোহাক্ষকার নিরাকৃত হইল। তুমি আমাকে যুদ্ধানুষ্ঠান করিবার যে উপদেশ প্রদান করিলে আমি অবশ্যই তাহা সাধ্যানুসারে পালন করিব।

অনন্তর অর্জুন পুনরায় গাণ্ডীব গ্রহণ করিয়া গাত্রোত্থান পূর্বক যুদ্ধকার্যে মনোনিবেশ করিলেন।

সর্ববেদজ্ঞশ্রেষ্ঠ ব্যাসদেব উভয় পক্ষের বিপুল সৈন্যমণ্ডলীর যুদ্ধক্ষেত্রে অবস্থানের সংবাদ প্রাপ্ত হইলে স্বীয় দুর্নীতির পরিণাম চিন্তায় শোকাকুল ধৃতরাষ্ট্রসমীপে উপস্থিত হইলেন এবং তাঁহাকে নিজর্নে কহিলেন—

হে রাজন, কালের পর্যায় বোধগম্য করিয়া তুমি সংগ্রামার্থ পরস্পর সম্মুখীন পুত্রগণের নিমিত্ত শোকে চিন্তা-পূর্ণ করিয়ো না। হে পুত্র, যদি সংগ্রামস্থলে ইহাদিগকে

তোমার দেখিবার ইচ্ছা হয়, তবে আমি তোমাকে দিব্যচক্ষু প্রদান করিব ।

ধৃতরাষ্ট্র কহিলেন—হে ব্রহ্মর্ষি-সন্তম, জ্ঞাতিবধ সন্দর্শনে আমি অভিলাষ করি না, কিন্তু আপনার অনুগ্রহে যুদ্ধের সমুদায় বৃত্তান্ত শ্রবণ করিতে ইচ্ছা করি ।

ব্যাসদেব ধৃতরাষ্ট্রের অভিপ্রায় অবগত হইয়া সঞ্জয়কে বরপ্রদানপূর্বক কহিলেন—

এই সঞ্জয় তোমার নিকট যুদ্ধের সমস্ত বৃত্তান্ত বলিবে । সংগ্রামের কোনো ঘটনাই ইহার অগোচর থাকিবে না । প্রকাশ্যে বা অপ্রকাশ্যে, দিব্য বা নিশায় যাহা কিছু ঘটিবে, সঞ্জয় সমস্তই অবগত থাকিবে । শত্রু ইহাকে ছিন্ন করিবে না এবং পরিশ্রম ক্লান্ত করিতে পারিবে না । হে ভরতশ্রেষ্ঠ, তুমি শোকাভিভূত হইয়ো না, আমি এই কুরুপাণ্ডবগণের কীর্তি চিরবিখ্যাত করিয়া দিব ।

মহাত্মা ব্যাসদেব ধৃতরাষ্ট্রকে এইরূপ সাস্থনা দান করিয়া প্রস্থান করিলেন ।

ব্যাস-দত্ত বরপ্রভাবে সঞ্জয় প্রত্যহ যুদ্ধক্ষেত্রে নির্বিন্ধে বিচরণপূর্বক প্রতিদিনের যুদ্ধাবসানের পর সমুদায় বৃত্তান্ত ধৃতরাষ্ট্রের নিকট আসিয়া কীর্তন করিতেন ।

১০

উভয় পক্ষের যুদ্ধসজ্জা সম্পূর্ণ হইলে যখন সেনাপতিগণ সৈন্যদিগকে যুদ্ধারম্ভের আদেশ প্রদানে উদ্বৃত্ত হইয়াছেন, তখন সহসা ধর্মরাজ যুধিষ্ঠির অস্ত্র-শস্ত্র পরিত্যাগ করিয়া রথ হইতে অবতরণপূর্বক রিপুসৈন্যভিমুখে পদব্রজে গমন করিতে লাগিলেন। জ্যেষ্ঠ ভ্রাতার এই অদ্ভুত আচরণে উদ্ভিগ্ন হইয়া পাণ্ডবগণ স্বশর রথ হইতে লক্ষ্যপ্রদানপূর্বক তাঁহার পশ্চাদ্ধাবিত হইলেন। কৃষ্ণও অর্জুনের সঙ্গে চলিলেন এবং অগ্ৰাগ্র অনেক রাজগণ কৌতূহলাক্রান্ত হইয়া তাঁহাদের অনুগমন করিলেন। মহাবীর অর্জুন জিজ্ঞাসা করিলেন—

হে ধর্মরাজ, তুমি কী নিমিত্ত পাদচায়ে শত্রুদলमध्ये গমন করিতেছ।

ভীমসেন কহিলেন—সৈন্যগণ সকলেই সুসজ্জিত হইয়া প্রস্তুত রহিয়াছে এ সময়ে তুমি অস্ত্রনিষ্কেপপূর্বক কোথায় প্রস্থান করিতেছ।

নকুল-সহদেব কহিলেন—মহারাজ, তুমি জ্যেষ্ঠ হইয়া আমাদিগকে পরিত্যাগ করিতেছ ইহাতে আমরা একান্ত ব্যথিত হইতেছি; অতএব ইহার অর্থ কী আমাদের নিকট প্রকাশ করো।

কিন্তু যুধিষ্ঠির কাহাকেও কোনো উত্তর প্রদান না করিয়া একমনে ভীষ্মের রথান্তিমুখে চলিলেন। তখন কৃষ্ণ ঈষৎ হাস্তসহকারে বলিয়া উঠিলেন—

হে পাণ্ডবগণ, তোমরা চিন্তিত হইয়ো না, আমি যুধিষ্ঠিরের অভিপ্রায় বুঝিতে পারিয়াছি, গুরুজনদের অনুমতি না লইয়া তাঁহার যুদ্ধারম্ভের প্রবৃত্তি হইতেছে না।

এই অন্তত দৃশ্য অবলোকনে কৌরবদলের মধ্যে নানারূপ কথোপকথন হইতে লাগিল। কেহ কেহ বলিল—

এই ক্ষত্রিয়-কুল-কলঙ্ক যুধিষ্ঠির নিশ্চয়ই ভীত হইয়া শরণ গ্রহণার্থে ভীষ্মের সমীপে আগমন করিতেছে। আহা, মহাবীর ভ্রাতৃগণকে লজ্জা দিয়া কাপুরুষ যুধিষ্ঠির কী প্রকারে এরূপ দুর্কার্য করিতেছে।

এই ভাবের কথা কুরুসেনামধ্যে চতুর্দিকে রাষ্ট্র হওয়ায় সৈন্যগণ পাণ্ডবদিগকে ধিক্কার প্রদান ও ধার্তরাষ্ট্রগণকে প্রশংসা করিয়া মহাহর্ষে পতাকা বিকম্পিত করিতে লাগিল।

অনন্তর যুধিষ্ঠির ভীষ্মের নিকটবর্তী হইলে তিনি কী বলেন, ভীষ্মই বা কী উত্তর করেন, শুনিবার ক্ষমতা সকলে তুষোস্ত্রাব অবলম্বন করিল। তখন মহারাজ যুধিষ্ঠির সেই আয়ুধসংকুল শত্রুদলমধ্যে ভ্রাতৃগণসহ প্রবেশপূর্বক সংগ্রামার্থ প্রস্তুত কুরুপিতামহের সমীপে উপনীত হইয়া তাঁহার চরণদ্বয় গ্রহণ করিয়া কহিলেন—

হে দুর্ধর্ষ, আমি আপনাকে আমন্ত্রণ করিতে আসিয়াছি, এক্ষণে যুদ্ধার্থে অনুমতি প্রদান ও আশীর্বাদ করুন।

ভীষ্ম যুধিষ্ঠিরের এই শিষ্টতায় পরম প্রীত হইয়া কহিলেন—

হে রাজন্, তুমি আমার সহিত সাক্ষাৎ না করিয়া যুদ্ধে প্রবৃত্ত হইলে আমি দুঃখিত হইতাম, কিন্তু এক্ষণে সম্পূর্ণ প্রসন্নমনে আশীর্বাদ করিতেছি—যুদ্ধে জয়লাভ করো।

তখন যুধিষ্ঠির পিতামহকে অভিবাদনপূর্বক আচার্য দ্রোণের নিকট উপস্থিত হইয়া যুদ্ধার্থে তাঁহার অনুমতি প্রার্থনা করিলেন।

দ্রোণাচার্য কহিলেন—হে সৌম্য, তুমি গুরুর অনুমতি ব্যতীত যুদ্ধারম্ভ করিলে আমি নিশ্চয়ই রুষ্ট হইয়া তোমার পরাজয় কামনা করিতাম, কিন্তু তুমি যখন আমার নিকট আগমন করিয়াছ, তখন আমি প্রীতমনে আশীর্বাদ করিতেছি—তোমার জয় হউক। আমি অর্থদ্বারা তোমার বিপক্ষে আবদ্ধ আছি; অতএব অতি দীনের শ্রায় তোমাকে কহিতেছি, তোমার পক্ষাবলম্বন ব্যতীত আমার নিকট বাহা ইচ্ছা প্রার্থনা করো।

তখন যুধিষ্ঠির যাক্ষ্য করিলেন—

হে গুরো, আপনি কৌরবপক্ষে সংগ্রাম করুন, কিন্তু আমার হিতার্থে মন্ত্রণা-দান করুন।

তদন্তরে দ্রোণ কহিলেন—

হে রাজন্, মহাত্মা বাসুদেব তোমার মন্ত্রী থাকিতে আমি আর কী উপদেশ প্রদান করিব। হে ধর্মরাজ, তোমার পক্ষে যখন ধর্ম আছে, তখন অবশ্যই তোমার জয় হইবে, সে

বিষয়ে শঙ্কা করিয়ো না। তবে আমি যতক্ষণ রণক্ষেত্রে উপস্থিত থাকিব, ততক্ষণ তোমার জয়লাভের সম্ভাবনা নাই, অতএব ভ্রাতৃগণ-সমভিব্যাহারে শীঘ্র আমাকে সংহার করিতে যত্নবান হইয়ো।

অনন্তর যুধিষ্ঠির কৃপাচার্যের অমুমতি গ্রহণার্থে তাঁহার নিকট উপস্থিত হইয়া কহিলেন—

হে আর্ষ, আত্মা করুন—আমি শত্রুগণকে পরাজয় করি।

কৃপ আশীর্বাদসহকারে কহিলেন—

মহারাজ, আমি তোমাদের অবধ্য, কিন্তু তজ্জ্ঞ কোনো চিন্তা নাই, আমাকে বধ না করিলেও তোমাদের জয়লাভের কোনো ব্যাঘাত হইবে না।

অনন্তর কৌরবসৈন্য হইতে বহির্গত হইবার সময়ে যুধিষ্ঠির উচ্চৈঃস্বরে কহিলেন—

যদি এই পক্ষের মধ্যে কেহ আমার হিতাকাজক্ষী থাকেন, তবে তিনি আমার নিকট আগমন করুন, আমি তাঁহাকে বরণ করিব।

তখন ধৃতরাষ্ট্রের বৈশ্য গর্ভজাত পুত্র যুয়ুৎসু সকলের প্রতি দৃষ্টি করিয়া যুধিষ্ঠিরকে কহিলেন—

হে ধর্মরাজ, আমি তোমার পক্ষ অবলম্বনপূর্বক কৌরব-গণের সহিত যুদ্ধ করিব।

যুধিষ্ঠির কহিলেন—ভ্রাতঃ, আইস, সকলে একত্র হইয়া তোমার মৃত ভ্রাতৃগণের সহিত সংগ্রাম করি। আমি শ্রীতি-

সহকারে তোমাকে স্বপক্ষে বরণ করিলাম। স্পষ্টই বোধ হইতেছে—তুমি একাকী ধৃতরাষ্ট্রের অবলম্বনস্বরূপ থাকিয়া তাঁহার বংশরক্ষা করিবে।

যুধিষ্ঠির মান্যব্যক্তিগণের সম্মান রক্ষা করিলেন দেখিয়া চতুর্দিকস্থিত ভূপতিগণ পাণ্ডবদিগকে সাধুবাদ প্রদান করিলেন এবং শত শত হৃন্দুভি ও ভেরী নিনাদিত হইতে লাগিল। পাণ্ডবপক্ষীয় বীরগণ মহা আনন্দে সিংহনাদ করিতে লাগিলেন।

যুধিষ্ঠির পুনরায় রথারোহণ ও অস্ত্রধারণ করিলে পাণ্ডু-পুত্রগণ ও অন্যান্য রাজগণ স্ব স্ব স্থান অধিকারপূর্বক বাহ পূর্ণ করিলেন।

অনন্তর দুর্যোধনের আদেশানুসারে দৃশ্যশাসন ভীষ্মকে পুরস্কৃত করিয়া সেনাগণ-সমভিব্যাহারে সংগ্রামার্থে অগ্রসর হইতে আরম্ভ করিলেন; তদ্রূপে পাণ্ডব-বাহুমুখ-রক্ষক ভীমসেন উন্মত্ত বলদের ন্যায় প্রচণ্ডরবে গর্জন করিতে করিতে স্বীয় বিভাগ লইয়া শত্রুগণের উপর নিপতিত হইলেন। তখন সেই সাগরোপম বাহিনীদ্বয় পরস্পরের সহিত মিলিত হইলে তুমুল নিনাদে আকাশমণ্ডল প্রতিধ্বনিত হইল।

মহারথসকল ক্রুদ্ধ হইয়া স্পর্ধাপূর্বক পরস্পরের সম্মুখবর্তী হইলে ঋণকাল উভয়পক্ষীয় সৈন্যদল যেন চিত্রপটস্থ বলিয়া বোধ হইতে লাগিল। ক্রমে সমুখিত ধূলিপটলে ভাস্করের প্রভা বিলুপ্তপ্রায় হইলে আর কিছুই স্পষ্টরূপে দৃষ্টিগোচর রহিল না। অজুনের ভীষ্মের সহিত,

ভীমসেনের হর্ষোধনের সহিত, যুধিষ্ঠিরের মদ্ররাজের সহিত, বিরাটের ভগদত্তের সহিত, সাত্যকির কৃতবর্মা'র সহিত এবং এইরূপে একপক্ষের প্রত্যেক বীরগণের অপরপক্ষের উপযুক্ত প্রতিদ্বন্দ্বীর সহিত কিয়ৎকাল সমভাবে ঘোর যুদ্ধ চলিতে লাগিল। কিন্তু কেহ কাহাকেও পরাজয় করিতে সক্ষম না হওয়ায় উভয়পক্ষেরই ব্যূহরচনা অক্ষুণ্ণ রহিল। সৈন্যগণের কিলকিলা শব্দ, তুল ও শব্দের গভীর নিশ্বন, বীরগণের সিংহনাদ, শরাসন-জ্যার ভীষণ ধ্বনি, আয়ুধসমূদায়ের ঝঞ্ঝনা, ধাবমান গজের ঘণ্টানিনাদ ও বজ্রতুল্য রথনির্ঘোষে চতুর্দিক পরিপূরিত হইল।

পূর্বাভূ এইভাবেই কাটিয়া গেল। উভয়পক্ষের বহুসংখ্যক সৈন্য নিহত হইলেও কোনো পক্ষই কিছুমাত্র অগ্রসর হইতে পারিল না। এরূপ তুল্য যোদ্ধ-সমাগমকে অনর্থক বলক্ষয়-কর বিবেচনা করিয়া অপরাহ্নের পূর্বভাগে কৌরবসেনাপতি ভীষ্ম অন্য কৌশল অবলম্বন করিলেন। কৃপ, শল্য, কৃতবর্মা প্রভৃতি বীরগণকর্তৃক রক্ষিত হইয়া তিনি পাণ্ডববাহের এক অরক্ষিত স্থান লক্ষ্য করিয়া সহসা সেই দিকে প্রধাবিত এবং অসংখ্য সৈন্য বিনষ্ট করিয়া ব্যূহ ভেদ করিতে উদ্যত হইলেন।

একাকী বালক অভিমুখ্য ব্যতীত নিকটে সৈন্যরক্ষক আর কেহ ছিল না। অর্জুনের তুল্যভেজা পুত্র সৈন্যগণের সমূহ বিপদ এবং ব্যূহ বিনষ্টপ্রায় দেখিয়া অকুতোভয়ে ভীষ্মপ্রভৃতি মহারথগণকে নিবারণ করিবার উদ্দেশ্যে তথায় উপস্থিত

হইলেন। তিনি প্রথমত কৃতবর্মা ও শল্যকে বিদ্ধ করিয়া ভীষ্মের প্রতি বাণ বর্ষণ করিতে আরম্ভ করিলেন এবং তৎক্ষিপ্ত অস্ত্রসমুদায় মধ্যপথেই নিবারণপূর্বক নিশিত ভল্লের দ্বারা কৃপের সুবর্ণমণ্ডিত শরাসন ছেদন করিলেন।

তখন ভীষ্ম ত্রুন্ধ হইয়া অভিমন্যুর রথধ্বজ ছেদন, তাঁহার সারথিকে আহত ও তাঁহাকে তিন বাণে বিদ্ধ করিলেন, কিন্তু মহাবীর অর্জুনতনয় কিছুতেই কম্পিত হইলেন না। তিনি দুর্যোধনপক্ষীয় বীরগণে পরিবৃত হইয়াও সকলকে একাকী নিবারণ করিতে লাগিলেন এবং শরবৃষ্টিদ্বারা প্রতিপক্ষকে সমাচ্ছন্ন করিয়া ভীষ্মকে শরনিকরে নিপীড়িত করায় দ্বিতীয় গাণ্ডীবধন্যার ন্যায় প্রতীয়মান হইলেন।

অনন্তর সুযোগ বুঝিয়া লঘুহস্ত অভিমন্যু ভীষ্মের রথধ্বজ ছেদন করিলেন। কৌরব-সেনাপতির সেই মহোচ্চ রজতময় মণিভূষিত তালধ্বজ ছিন্ন হইয়া ভূতল-পাতিত হইলে কৌরব-গণের মধ্য হইতে হাহাকার ও পাণ্ডবসৈন্য হইতে সাধুধ্বনি উথিত হইল। ইত্যবসরে ভীমসেনাদি পাণ্ডবপক্ষীয় দশজন মহারথ তথায় সমাগত হইয়া ভীষ্মের আক্রমণ বিফল করিলেন।

ইহাদের মধ্য হইতে গজারূঢ় বিরাটতনয় উত্তর মজাধিপতি শল্যের প্রতি ধাবিত হইলেন। উত্তরের মহাগজ শরাঘাতে ত্রুন্ধ হইয়া শল্যের রথের যুগকার্ঠ আক্রমণপূর্বক তাঁহার অশ্বগণকে পদাঘাতে বিনষ্ট করিল। তখন ভীষণ-যোদ্ধা শল্য সেই বাহনবিহীন রথেই অবস্থান করিয়া এক

লৌহময় শক্তি গ্রহণপূর্বক উত্তরের গায়ে তাহা নিক্ষেপ করিলেন। সেই শক্তি উত্তরের বর্ম ভেদ করিয়া তাঁহার মর্মস্থলে প্রবিষ্ট হইলে বিরাটতনয় চতুর্দিক অন্ধকারময় দেখিয়া গজক্ষক হইতে নিপতিত হইয়া প্রাণত্যাগ করিলেন। তখন মদ্ররাজ খড়া গ্রহণপূর্বক সেই হস্তীকে বিনষ্ট করিয়া কৃতবর্মার রথে আরোহণ করিলেন।

প্রিয়সম্বন্ধযুক্ত বিরাটতনয়ের এই শোচনীয় মৃত্যুতে পাণ্ডবগণ নিতান্ত ভগ্নোৎসাহ ও বিষন্ন হইলেন। সেই সুযোগে কৌরবগণ বহুসংখ্যক পাণ্ডবযোদ্ধা বিনষ্ট করিতে লাগিলে তাহাতে পাণ্ডবসেনামধ্য হইতে মহান্ হাহাকার সমুথিত হইল।

এই অবস্থায় মরীচিমালী অন্তগমনোন্মুখ হইল। তখন পাণ্ডবসেনাপতি অর্জুন কৌরবগণকে নিতান্ত পরাক্রান্ত দেখিয়া সৈন্যগণকে অবহারার্থে আদেশ করিলেন। এইরূপে ভীষণ যুদ্ধের প্রথম দিবস অবসান হইল।

অনন্তর প্রভাত হইলে দৃঢ়বাহিত পাণ্ডবসৈন্যের অগ্রভাগে সেনাপতি অর্জুনের ভীষণ কপিধ্বজ লক্ষিত হইল। সৈন্যধক্ষগণ ব্যূহের দুই পক্ষে অবস্থান করিলেন এবং মধ্যে ও পশ্চাতে অগণ্য মহারথসকল সজ্জিত হইলেন। চতুর্দিকে পর্বতশ্রেণীর আয় বারগণ ব্যূহদ্বার রক্ষা করিতে লাগিল। অধ্যস্থলে ধর্মরাজের শ্বেতচ্ছত্র সর্বোপরি শোভা পাইল, তথায় তিনি যুদ্ধারম্ভের আদেশ দিবার জন্ত স্থিরচিত্তে সূর্যোদয় প্রতীক্ষা করিতে লাগিলেন।

এদিকে দুর্যোধন সেই অভেদ ক্রৌঞ্চাধরণ নামক পাণ্ডব-
বৃহ অবলোকন করিয়া দ্রোণাচার্যপ্রমুখ সেনানায়কগণকে
কহিতে লাগিলেন—

হে বীরগণ, তোমরা সকলেই শাস্ত্রজ্ঞ ও নানাশাস্ত্রবেত্তা ।
তোমরা একত্র হইয়া দূরে থাকো—তোমরা প্রত্যেকে পাণ্ডব-
পরাজয়ে সমর্থ । আমাদের সৈন্যদলও অপরিাপ্ত ; অতএব
বহুসংখ্যক মহারথ ও সেনা কেবলমাত্র ভীষ্মের রক্ষাকার্যে
নিযুক্ত করা বিধেয় ।

এইরূপ যুক্তি স্থির হইলে ভীষ্ম তদনুসারে বৃহ রচনা
করিলেন ।

অনন্তর মহাশঙ্খধ্বনিদ্বারা উভয়পক্ষীয় সেনাধ্যক্ষগণ স্ব স্ব
বিভাগকে উত্তেজিত করিলে পুনরায় বীরসমুদায় তুমুল নিনাদে
পরস্পরের সহিত অতি ঘোর যুদ্ধে সংঘটিত হইলেন ।

ক্রমে ভীষ্ম পূর্ববৎ পাণ্ডবসেনা বিদ্রাবিত করিতে আরম্ভ
করিলে অর্জুন কৃষ্ণকে কহিলেন—

হে বাসুদেব, সত্তর পিতামহের সমক্ষে গমন করো ।
মহাবীর ভীষ্ম দুর্যোধনের হিতসাধনে একান্ত তৎপর, উহাকে
নিবারণ না করিলে আমাদের সমস্ত সৈন্য বিনষ্ট হইবে, অতএব
অতঃ উহার সহিত প্রাণপণ যুদ্ধ করিব ।

কৃষ্ণ সেই বাক্য অনুসারে রথ চালনা করিতে আরম্ভ
করিলে, অর্জুন কৌরব-সৈন্যদিগকে সংহার করিতে করিতে
ভীষ্মের রথান্ধিমুখে অগ্রসর হইলেন । অনন্তর দুই তেজের
সংস্পর্শনবৎ এই দুই মহাবীরের সংঘটনে অতি অদ্ভুত ব্যাপার

হইল। চতুর্দিকে সৈন্যমধ্যে একরূপ স্ততিবাক্য শ্রুত হইতে লাগিল :—

অহো, কী আশ্চর্য যুদ্ধ হইতেছে। একরূপ সমর আর কখনও হয় নাই। মহাবীর পার্থ ভীষ্মকে পরাজয় করিতে পারিতেছেন না এবং দুর্ধর্ষ ধনঞ্জয়ের ভীষ্মকর্তৃক পরাস্ত হইবারও কোনো সম্ভাবনা নাই। একরূপ সংগ্রাম আর কখনও হইবে না।

শ্রেষ্ঠ ধর্ম্মরগণ এই তুমুল যুদ্ধ উপলক্ষে একস্থানে আবদ্ধ থাকায় মহাবল ভীমসেন সেই অবসর অবলম্বন করিয়া কৌরব-সেনামধ্যে মহা ছলস্থূল বাধাইয়া দিলেন। করিগণ তাঁহার ভীষণ খড়্গাঘাতে ঘোরতর চীৎকার করিয়া ধরাভূলে নিপতিত হইতে লাগিল, এবং অশ্ব ও অশ্বারোহিগণ তাঁহার শরে মর্ম্মবিদ্ধ হইয়া দলে দলে ধরাভূলে শয়ন করিতে লাগিল। বৃকোদর বিচিত্রগতিতে লক্ষ প্রদানপূর্বক রথিগণকে পাতিত, এবং কাহাকে পদাঘাতে নিহত, কাহাকে বা আকর্ষণপূর্বক প্রোথিত করিতে লাগিলেন। সেই ভীম মূর্তি দর্শনে সকলে পলায়নপূর্বক ভীষ্মের নিকট আশ্রয় লাভার্থে ধাবমান হইল।

তখন কলিঙ্গদেশীয় ক্ষত্রিয়গণ ভীমসেনকে নিবারণ করিতে আসিলে তিনি ধর্ম্মবাণ গ্রহণপূর্বক প্রথমত কলিঙ্গ-দেশাধিপতি ও তাঁহার রক্ষকগণকে এবং তৎপরে বহুসংখ্যক কলিঙ্গসেনাকে শমনসদনে প্রেরণ করিলেন। ফলত তথায় কুধিরময়ী নদী প্রবাহিত হইল এবং সৈন্যগণ সাক্ষাৎ কালস্বরূপ

ভীমসেনের অদ্ভুত যুদ্ধ অবলোকন করিয়া মহা হাহাকারধ্বনি করিতে লাগিল।

সেই নিনাদ শ্রবণ করিয়া ভীষ্ম নিকটবর্তী সৈন্যগণকে ব্যাহিত করিয়া স্বয়ং ভীমসেনকে নিবারণ করিবার জন্য ধাবমান হইলেন এবং ভীম-রক্ষক পাণ্ডবগণকে শরাচ্ছন্ন করিয়া তাঁহার অশ্ব বিনষ্ট করিলেন।

তখন মহাবীর সাত্যকি সহসা অগ্রসর হইয়া ভীষ্মের সারথিকে সংহার করিলে ভীমসেন সেই অবসরে শক্তি গদা ও বহুবিধ অস্ত্র প্রক্ষেপ করিতে করিতে সাত্যকির রথারোহণপূর্বক প্রস্থান করিলেন। ভীষ্মের অশ্বগণ সারথি অভাবে তাঁহাকে লইয়া মহাবেগে রণক্ষেত্র হইতে পলায়ন করিল।

ভীষ্মের অনুপস্থিতির সুযোগ অবলম্বন করিয়া মহাবীর অর্জুন ও তাঁহার সমভেজা পুত্র অভিমন্যু পূর্ণ বিক্রম প্রকাশ-পূর্বক শত্রুগণের উপর নিপতিত হইলেন। অভিমন্যু দুর্ধোধনের পুত্র লক্ষ্মণকে একান্ত নিপীড়িত করায় স্বয়ং দুর্ধোধন শ্রেষ্ঠ কৌরব-বীর-সমভিব্যাহারে তথায় উপস্থিত হইলেন। তখন অর্জুনশরে শত শত নরপতি প্রাণত্যাগ করিতে আরম্ভ করিল, এবং সৈন্যগণ একান্ত ত্রস্ত হইয়া চতুর্দিকে পলায়ন করিলে কৌরববৃহৎ একেবারে শিথিল হইয়া পড়িল।

ইতিমধ্যে মহামতি ভীষ্ম রণক্ষেত্রে প্রত্যাবর্তনপূর্বক এই দৃশ্য অবলোকন করিয়া জ্ঞোণাচার্যকে কহিলেন—

হে দ্বিজোত্তম, এই দেখো ধনঞ্জয় কৌরব-সৈন্যমধ্যে অতি ভীষণ কার্য করিতেছেন, অতঃ আর সৈন্যগণকে পুনর্ব্যাহিত করিবার উপায় দেখিতেছি না; সূর্যও অস্তাচল-চূড়াবলম্বী হইয়াছেন; অতএব এক্ষণে অবহারের আদেশ প্রদানই কত বা।

অনন্তর কৌরবসেনা যুদ্ধপরাভূত হইলে কৃষ্ণাজুন মহা আনন্দে শঙ্খধ্বনি করিয়া সে দিবসের যুদ্ধকার্য শেষ করিলেন।

পরদিনের যুদ্ধেও অজুনের ভীষণ প্রতাপ অসহ্য হইয়া উঠিল। নীরদের বারিবর্ষণের ন্যায় কৌরবগণের উপর তিনি বাণ পরিত্যাগ করিতে আরম্ভ করিলেন। তাহারাও ব্যথিত হইয়া পুনরায় পলায়নের উপক্রম করিল। তখন দুর্যোধন ক্ষুণ্ণমনে ভীষ্মের নিকট উপস্থিত হইয়া কহিলেন—

হে পিতামহ, আপনি ও মহাত্মবিৎ আচার্য থাকিতে কৌরবসেনা পলায়ন করিতেছে, ইহা নিতান্ত বিসদৃশ বোধ হইতেছে। আমাদের সমূহ বিপদ দেখিয়াও যখন উপেক্ষা করিতেছেন, তখন স্পষ্টই বোধ হইতেছে যে, পাণ্ডবগণকে অহুগ্রহপ্রদর্শন করাই আপনার উদ্দেশ্য। আপনার এই অভিপ্রায় পূর্বে জানিতে পারিলে আমি কদাপি এ সংগ্রামে প্রবৃত্ত হইতাম না।

দুর্যোধনের এই বাক্য শ্রবণে ভীষ্ম ক্রোধভরে নয়নদ্বয় বিঘর্ণনপূর্বক কহিলেন—

হে রাজন, পাণ্ডবগণ যে দুর্জয়-পরাক্রমশালী এ কথা তোমাকে আমি পূর্ব হইতেই বার বার বলিয়াছি। যাহা

হউক, আমি যে স্বীয় কর্তব্য অবহেলা করিতেছি না, তাহা তুমি স্বচক্ষে অবলোকন করো।

এই বলিয়া ভীষ্ম পুনরায় তরঙ্গায়িত মহাসমর-সাগরে অবগাহনপূর্বক অতি আশ্চর্য্য কর্মসকল সম্পাদন করিতে লাগিলেন। তাঁহার মণ্ডলীকৃত শরাসন হইতে আশীবিধ-সদৃশ দীপ্তাগ্র শরনিকর মহাবেগে চতুর্দিকে প্রপতিত হইয়া পাণ্ডবপক্ষীয় মহারথগণকে নিপাতিত করিতে লাগিল। সমরাজ্ঞপন্থ বীরগণ ভীষ্মকে এই পূর্বদিকে, এই পশ্চিমে, পরে উত্তরে এবং মুহূর্ত্তমধ্যে দক্ষিণে সন্দর্শন করিয়া বিস্ময়াপন্ন ও ভয়বিহ্বল হইলেন। এইরূপে পাণ্ডবসৈন্য নিহত হইতে থাকিলে ক্রমে সকলে অর্জুনের সমক্ষেই পলায়নে প্রবৃত্ত হইল।

মহাতেজা কৃষ্ণ তাহা সহ্য করিতে না পারিয়া অর্জুনকে ধিক্কার প্রদানপূর্বক কহিলেন—

হে ধনঞ্জয়, যদি মুক্ত না হইয়া থাকো, তবে অবিলম্বে ভীষ্মকে প্রহার করো। ঐ দেখো, সিংহের ভয়ে ক্ষুদ্র মৃগের ন্যায় ভূপতিগণ ভীষ্মের প্রতাপে ইতস্তত পলায়ন করিতেছেন। তুমি সমরক্ষেত্রে থাকিতে ইহা শোভন হইতেছে না।

এই বলিয়া বামুদেব অর্জুনের রথ ভীষ্মের সম্মুখীন করিলে আবার সেনাপতিদ্বয়ের ঘোর যুদ্ধ উপস্থিত হইল। অর্জুন হস্তলাঘব প্রদর্শনপূর্বক পিতামহকে নিবারণ করিয়া বারংবার তাঁহার শরাসন ছেদন করায় ভীষ্ম অতিশয় শ্রীতমনে ধনঞ্জয়কে ভূরি ভূরি সাধুবাদ প্রদান করিলেন। অর্জুনও

যুদ্ধ পিতামহের আশ্চর্য যুদ্ধকৌশল ও উৎসাহ দর্শনে চমৎকৃত হইলেন এবং তাঁহাকে অধিক পীড়ন করিতে ইচ্ছা করিলেন না। কিন্তু ভীষ্ম অজুনকর্তৃক নিবারিত হইলে পাণ্ডবপক্ষীয় সেনাধ্যক্ষগণ অবসর পাইয়া শত্রুগণকে অতিশয় ব্যথিত করিলেন। অবশেষে কৌরবগণের অযুত রথ ও সপ্তশত গজ এবং প্রাচ্যসৌবীর ও ক্ষুদ্রক-দেশীয় যোদ্ধগণ সমূলে বিনষ্ট হইলে দুর্যোধনের সৈন্যগণ একান্ত হতাশাস হইয়া পড়িল এবং সেনানায়কগণ দুর্যোধনের অমুমতিক্রমে অবহারের আদেশ প্রদান করিলেন।

এইরূপে প্রতিদিন ভীষ্ম পাণ্ডবসৈন্য বিনষ্ট করিতে আরম্ভ করিলেই তিনি অজুনকর্তৃক নিবারিত হইতেন এবং অবহারের সময় পাণ্ডববিজয়বার্তায় কৌরবগণ একান্ত হতাশাস হইতেন। দুর্যোধন ক্রোধপরিপূর্ণ হৃদয়ে পিতামহের প্রতি পক্ষপাতিতার দোষারোপ করিতে কুণ্ঠিত হইতেন না। কিন্তু মহাত্মা গান্ধেয় সে সকল অন্য় অভিযোগ তুচ্ছ জ্ঞান করিয়া সুগভীর বৈরাগ্যভরে স্বীয় কর্তব্য পালন করিয়া চলিতেন।

অনন্তর অষ্টম দিবসের যুদ্ধ চলিতেছে—এমন সময়ে অজুনের অপরা-স্ত্রী নাগকন্যা উলুপীর গর্ভজাত পুত্র ইরাবান্ সহসা উপস্থিত হইল। এই প্রিয়দর্শন বালক মাতৃগৃহে প্রতিপালিত ও শিক্ষিত হইয়াছিল, এক্ষণে যুদ্ধসংবাদ প্রাপ্ত হইয়া বহুসংখ্যক নাগসৈন্যে পরিবৃত্ত হইয়া যুদ্ধক্ষেত্রে উপস্থিত হইল এবং কৌরবসেনা বিনষ্ট করিতে করিতে অগ্রেসর হইয়া

শকুনির অধিকৃত সৌবল-সৈন্যদলের উপর নিপতিত হইল। গান্ধারগণ ইরাবানকে চতুর্দিক হইতে পরিবৃত্ত করিয়া নানা স্থানে সূতীক্ষ্ম অস্ত্রে বিদ্ধ করিয়া তাহার অঙ্গ ক্ষতবিক্ষত করিল, কিন্তু ইরাবান তাহাতে ব্যথিত না হইয়া বরং অধিক ক্রোধাবিষ্ট-চিত্তে দুর্যোধন-প্রেরিত শকুনির রক্ষকগণের আগমন সম্বন্ধে গান্ধারবীরগণকে ক্রমাগত বিনাশ করিতে লাগিল। একমাত্র শকুনি বারংবার পরিরক্ষিত হইয়া পরিত্রাণ লাভ করিলেন।

তখন দুর্যোধন অতিশয় ক্রোধাবিষ্ট হইয়া ভীমকর্তৃক নিহত বক-নামক রাক্ষসের অনুচর আর্যশৃঙ্গকে ইরাবানের সংহারার্থে প্রেরণ করিলেন। সেই নিশাচর তথায় উপস্থিত হইলে ইরাবান্ খড়্গদ্বারা তাহার কামুক বিনষ্ট করিয়া তাহাকে বিশেষরূপে আহত করিল। রাক্ষস তখন মায়াযুদ্ধ অবলম্বন করিয়া আকাশমার্গে উখিত হইল কিন্তু তথায়ও ইরাবান্ তাহাকে শরনিকরে একান্ত ব্যথিত করিলে আর্যশৃঙ্গ অতি ঘোররূপ পরিগ্রহ করিয়া বালক ইরাবানকে বিমোহিত করিল এবং সেই অবসর প্রাপ্ত হইয়া সূতীক্ষ্ম অসিদ্বারা তাহার কিরীট-শোভিত সুন্দর বদনমণ্ডল ভূতলে নিপাতিত করিল।

তখন ধাতরাষ্ট্রগণ অতিশয় হ্রষ্ট হইলেন। কিন্তু অর্জুন স্থানান্তরে শক্র-নিপাতনে ব্যাপ্ত ছিলেন বলিয়া তিনি এ ঘটনার কিছুই জানিতে পারেন নাই। ভীমসেনের পুত্র ঘটোৎকচ ভ্রাতা ইরাবানের মৃত্যু সন্দর্শনে সাতিশয় ব্যথিত

হুইয়া রাক্ষসবৃন্দ লইয়া একেবারে দুর্যোধনকে আক্রমণ করিল। তাহার হস্ত হইতে দুর্যোধনকে রক্ষা করিবার নিমিত্ত মহাবীর বজ্রাধিপতি বহুসংখ্যক গজসৈন্য লইয়া তাঁহাকে বেষ্টিত করিলে, অতি ঘোরতর যুদ্ধ চলিতে লাগিল। রাজা দুর্যোধন জীবিতাশা পরিত্যাগ করিয়া সেই রাক্ষস-বৃন্দের প্রতি নিশিত শরসমূহ নিক্ষেপপূর্বক তাহাদের প্রধান প্রধান অনেককে বিনষ্ট করিলেন। তখন ঘটোংকচ একান্ত ক্রুদ্ধ হইয়া দুর্যোধনের প্রতি এক অনিবার্য মহাশক্তি নিক্ষেপ করিলে বজ্ররাজ দুর্যোধনের সমূহ বিপদ দেখিয়া সহসা স্বীয়রথদ্বারা তাঁহাকে আচ্ছাদনপূর্বক নিজগাত্রে সেই শক্তি গ্রহণ করিয়া অকাতরে প্রাণত্যাগ করিলেন।

সেই সময়ে ভীষ্ম দুর্যোধনকে রাক্ষসপরিবৃত দেখিয়া দ্রোণ-সমীপে গমনপূর্বক কহিলেন—

হে আচার্য, ঐ দেখো দুর্যোধনের বিভাগে অতি ঘোর রাক্ষসধ্বনি শ্রুত হইতেছে; অতএব এই নিশাচরের হস্ত হইতে উহাকে রক্ষা না করিলে নিস্তার নাই।

এই বলিয়া বহুসংখ্যক মহারথ-সমভিব্যাহারে ভীষ্ম ও দ্রোণ দুর্যোধনের সাহায্যার্থে গমন করিলেন। তখন দেখিলেন রাক্ষসগণের মায়াযুদ্ধ প্রভাবে শোণিতাক্ত কৌরবগণ অতিশয় ভীত ও বিবর্ণ হইয়া পরস্পরকে নিরীক্ষণ করিতেছেন এবং প্রধানগণের এই দুর্বস্থা দর্শনে অনেকে পলায়ন করিতেছে। ভীষ্ম বারংবার আক্ষেপ প্রকাশপূর্বক কহিলেন—

হে যোদ্ধগণ, তোমরা রাজা দুর্যোধনকে রাক্ষসহস্তে ফেলিয়া পলায়ন করিয়ো না।

কিন্তু তাহারা নিতান্ত বিমোহিত হওয়ায় কেহ তাঁহার কথা রক্ষা করিল না। তখন ভীষ্ম বিষমবদন দুর্যোধনকে কহিলেন—

হে রাজন, তোমার নিজেকে একরূপ বিপদমুখে পতিত করা উচিত নহে। রাজার সর্বদাই যত্নপূর্বক আত্মরক্ষা করিয়া যুদ্ধ করা কৰ্তব্য। আমরা সকলেই তোমার কার্য সাধনোদ্দেশে এখানে উপস্থিত আছি। যদি কাহারও প্রতি বিশেষ ক্রোধের সঞ্চার হয়, তবে উপযুক্ত কোনো বীরপুরুষকে তাহার বিরুদ্ধে নিয়োগ করা বিধেয়।

এই বলিয়া ভীষ্ম মহাবীর ভগদত্তকে কহিলেন—

হে মহারাজ, তুমি পূর্বে অতি অন্তত পরাক্রম প্রকাশ করিয়াছ; অতএব তুমিই ঘটোৎকচের উপযুক্ত প্রতিষেধক হইবে। এক্ষণে তুমি অবিলম্বে সেই বলদৃগু নিশাচরকে নিবারণ করো।

ভগদত্তকে এইরূপে নিয়োগ করিয়া ভীষ্ম দুর্যোধনকে নিরাপদ স্থানে স্থাপনপূর্বক পুনরায় যুদ্ধকার্যে ব্যাপ্ত হইলেন।

ইতিমধ্যে অর্জুন ভীমসেনের নিকট স্বীয় তনয় ইরাবানের যুদ্ধে আগমন, বিক্রমপ্রদর্শন ও শোচনীয় মৃত্যুর সংবাদ প্রাপ্ত হইয়া একান্ত শোকাবিষ্ট হইয়া কৃষ্ণকে কহিলেন—

হে মধুসূদন, এই সমাগত জ্ঞাতি ও বন্ধুবিনাশে আমাদের কী লাভ হইবে। এক্ষণে বিলক্ষণ উপলব্ধি করিতেছি, ধর্মরাজ্য কী নিমিত্ত পঞ্চগ্রাম মাত্র রাখিয়া বিবাদভঞ্জনর চেষ্টা করিয়াছিলেন। ক্ষত্রিয়বৃত্তিতে দিক্, যেহেতু অর্থলাভার্থে দ্রবিত ব্যক্তির মৃত্যু সম্পাদন করিতে হয়। যাহা হউক, এতদূর অগ্রসর হইয়া আর প্রত্যাবর্তনের উপায় নাই, অতএব আর বুধা কালবিলম্বে প্রয়োজন নাই। আমাকে শীঘ্র ভীষণতম যুদ্ধস্থলে লইয়া চলো।

অর্জুনের বাক্যামুসারে দ্রোণাদি-মহারথ-রক্ষিত ভীষ্ম যেখানে নিদ্রারূপে পাণ্ডবসেনা সংহার করিতেছিলেন, বাসুদেব তথায় রথ উপনীত করিলেন। তখন কুরু ধনঞ্জয়ের সাতিশয় উত্তেজিত যুদ্ধ-প্রকোপে শ্রেষ্ঠ কৌরবগণ নিবারিত ও আত্ম-রক্ষার্থে ব্যতিব্যস্ত হইলে, পাণ্ডব-সেনাধ্যক্ষগণ অবসর প্রাপ্ত হইয়া যুদ্ধের গতি বিবর্তনপূর্বক কৌরবগণকে অত্যন্ত পীড়ন করিতে আরম্ভ করিলেন।

ভীমসেন এই সুযোগে বাহ-ভেদ করিয়া ধাতরাষ্ট্রগণকে প্রাপ্ত হইয়া তাহাদিগকে নির্মমভাবে একে একে যমালয়ে প্রেরণ করিতে লাগিলেন, সে সময়ে কেহই তাহাদিগকে রক্ষা করিতে সমর্থ হয় নাই।

ক্রমে ভীমার্জুনের ভীষণ যুদ্ধপ্রভাবে শোণিত-লিপ্ত কাঞ্চনময় কবচ, সুবর্ণপুঙ্খ শর, কিঙ্কিণী-জাল-জড়িত ভগ্ন রথ পাণ্ডুবর্গ ধ্বজ এবং ছিন্নবিচ্ছিন্ন হস্তী-অশ্ব-নর-কলেবরে আচ্ছাদিত হইয়া রণস্থল অতিশয় অন্ধুতরূপ ধারণ করিল।

অনন্তর সূর্যাস্তের পর ঘোর অন্ধকার সমুপস্থিত হইলে, হতাবশিষ্ট কৌরবসৈন্য শাস্ত্রদেহে ও ভগ্নোৎসাহে শিবির-ভিমুখে প্রস্থান করিল। পাণ্ডবগণও বিজয়োৎফুল্ল-চিত্তে সৈন্য অবহার করিলেন।

অনন্তর প্রভাত হইলে মহাবীর শাস্ত্র-নন্দন সৈন্য-সমভিব্যাহারে যুদ্ধার্থে বহির্গত হইয়া বাহু নির্মাণ করিয়া তাহার মুখে স্বয়ং অবস্থান করিলেন এবং যুদ্ধিষ্ঠিরের বল প্রতিবাহিত হইলে তিনি জীবিতাশা পরিহারপূর্বক প্রজ্বলিত দাবানলের ন্যায় শত্রুবলকে দগ্ধ করিতে আরম্ভ করিলে। স্তুতীকৃত শস্ত্রসমূহে পাণ্ডবসেনা সমাচ্ছন্ন হইল এবং পাণ্ডবপাক্ষের রথ গজ ও অশ্বসকল আরোহিবিহীন হইতে লাগিল।

ক্রমে বজ্র-নির্ঘোষতুল্য তাঁহার জ্যা-তল-ধ্বনি পাণ্ডব-যোদ্ধগণের নিতান্ত ভীতিজনক হইয়া উঠিল এবং যখন সোমক সৈন্যদল নিঃশেষে নিহতপ্রায় হইল, তখন মহারথগণ ভীত্বাধাণে গাঢ় বিদ্ধ হইয়া পলায়ন করিতে আরম্ভ করিলে। কেহই তাহাদিগকে প্রতিনিবৃত্ত করিতে সমর্থ হইল না।

তাঁহারা একরূপ ভয়বিহ্বল হইয়াছিলেন যে কোনো দুই-জনকে আর একত্রে দেখা যাইতেছিল না এবং চতুর্দিক হইতে কেবল আতর্নাদ সমুথিত হইতে লাগিল। তখন বাসুদেব সৈন্যগণের তদবস্থা দেখিয়া এবং অর্জুনকে পিতামহের দেহে আঘাত করিতে উদাসীন দেখিয়া নিতান্ত উদ্বিগ্নচিত্তে রথ স্থগিত করিয়া কহিলেন—

হে পার্থ, তুমি সভাস্থলে ভীত্ব-বধের প্রতিজ্ঞা করিতেছিলে,

এক্ষণে ক্ষত্রিয় হইয়া কিরূপে নিজ বাক্য মিথ্যা করিতেছ।
তুমি ক্ষত্রধর্ম স্বরণপূর্বক সম্ভাপ পরিত্যাগ করিয়া যুদ্ধ
করো।

অর্জুন বন্ধুর প্রতি তির্যক্ দৃষ্টিপাতমাত্র করিয়া অধোমুখে
কহিলেন—

হে কৃষ্ণ, যদি অবধ্যদিগকে বধ করিয়া নরক-যন্ত্রণাই
ভোগ করিতে হইল, তবে সামান্য অরণ্য-বাস-ক্লেশে আমরা
কাতর হইলাম কেন। যাহা হউক, তোমার উপদেশানুসারে
যুদ্ধারম্ভ করিয়াছি, তোমার কথা অনুসারেই যুদ্ধ চালাইব,
অতএব যথায় অভিলাষ অশ্বচালনা করো।

তখন বাসুদেব ভীষ্ম-সমীপে অর্জুনকে উপনীত করিলে
ধনঞ্জয় অতিশয় অপ্রবৃতি-সহকারে তাঁহাকে আক্রমণ করি-
লেন, সুতরাং তাঁহার মৃদুযুদ্ধহেতু ভীষ্ম প্রভূত অবসর প্রাপ্ত
হইয়া পাণ্ডব বলক্ষয়-কার্য অবাদে চালাইতে লাগিলেন।
যুধিষ্ঠিরের সৈন্যসংখ্যা ক্রমাগত হ্রাস হইতেছে, তথাপি
অর্জুনের অনিচ্ছাপ্রেরিত লঘুবাণে তাহার কিছুমাত্র প্রতি-
কার হইতেছে না দেখিয়া কৃষ্ণ ক্রোধাক্ত ও স্বীয় প্রতিজ্ঞা
বিস্মৃত হইয়া রথ হইতে লক্ষ্যপ্রদান ও স্বীয় সুদর্শনচক্র
বিঘ্নপূর্বক ভীষ্মকে আক্রমণার্থ পদব্রজেই ধাবিত
হইলেন।

তদর্শনে অর্জুন অত্যন্ত লজ্জিত ও প্রিয়বন্ধুর নিরাশ্রয়-
ভাবে শক্রমধ্যে গমনে শঙ্কিত হইয়া সত্বর রথ হইতে অব-
তরণপূর্বক তৎপশ্চাতে ধাবিত হইলেন এবং কৃষ্ণ শতপদ

অগ্রসর না হইতেই তাঁহার বাহুযুগল ধারণ করিলেন, কিন্তু ক্রোধ-প্রজ্বলিত বাসুদেব ধৃত হইলেও অর্জুনকে আকর্ষণ-পূর্বক তাঁহাকে লইয়াই বেগে গমন করিতে লাগিলেন। তখন অর্জুন নিরুপায় হইয়া তাঁহার পাদদ্বয় গ্রহণপূর্বক অতি বিনীতবচনে সেই আরক্তনয়ন বীরকে কহিলেন—

হে মহাবাহো, নিবৃত্ত হও, তুমি যুদ্ধে যোগদান করিয়া প্রতিজ্ঞা ভঙ্গ করিলে তোমার চিরস্থায়ী অকীৰ্তি এবং তন্নিমিত্ত আমার লজ্জার সীমা থাকিবে না। আমার প্রতি যখন সমস্ত ভার অর্পিত আছে, তখন আমিই পিতামহকে সংহার করিব।

কৃষ্ণ অর্জুনের বাক্যে কোনো প্রত্যুত্তর না করিয়া আশী-বিষের জ্বালায় শ্বাস পরিত্যাগ করিতে করিতে পুনরায় রথারোহণ করিলেন। কিন্তু ইত্যবসরে ভীষ্ম সৈন্যদলকে এতই উৎপীড়ন করিয়াছিলেন যে, তাহারা কেহই সে স্থানে আর অবস্থান করিতে সক্ষম হয় নাই। যুধিষ্ঠির অর্জুনের ঔদাসীন্ম্যহেতু একান্ত বিষণ্ণচিত্ত হইয়া এবং সূর্যাস্তকাল আগতপ্রায় দেখিয়া আর বিলম্ব না করিয়াই অবহারের আদেশ করিলেন।

সেই রাত্রে যুধিষ্ঠির সকলকে মন্ত্রণার্থে আহ্বান করিয়া কৃষ্ণকে কহিতে লাগিলেন—

হে বাসুদেব, দেখো উগ্রপরাক্রম পিতামহ মাতঙ্গের নলবন-দলনের জ্বালায় আমার সৈন্যগণকে বিমর্দিত করিতেছেন; আমাদের এমন সামর্থ্য নাই যে তাঁহাকে নিবারণ করি।

এক্ষণে আমি বুঝির দুর্বলতা বশত ভীষ্মের প্রতাপে শোক-সাগরে নিমগ্ন হইতেছি, উদ্ধারের কোনো উপায় দেখিতেছি না। অতএব যুদ্ধে আমার আর স্পৃহা নাই। আমি যদি তোমাদের অমুগ্রহের যোগ্য হই, তবে এ সম্বন্ধে হিতকর উপদেশ প্রদান করো।

কৃষ্ণ যুধিষ্ঠিরের কাতরতা দেখিয়া তাঁহাকে সাস্তুনা দিয়া কহিলেন—

হে ধর্মরাজ, তোমার ভ্রাতা দুর্জয় ভীমার্জুন এবং তেজস্বী নকুল সহদেব থাকিতে বিবাদ করিয়ো না। অথবা যদি অর্জুন নিতান্ত যুদ্ধ ইচ্ছা না করেন, তবে আমাকে আদেশ করো, অস্ত্রধারণপূর্বক কুরুপ্রবীর ভীষ্মের সহিত যুদ্ধ করি। তোমাদের শত্রুই আমার শত্রু, তোমাদের বিপদই আমার বিপদ। অর্জুন আমার প্রিয়তম সখা, তাঁহার কার্যে আমি অনায়াসে প্রাণদান করিতে পারি। অর্জুন সকলের সমক্ষে ভীষ্মবধের প্রতিজ্ঞা করিয়াছেন; এক্ষণে যদি তাহা রক্ষা করিবার প্রবৃত্তি না হয়, তবে আমি তাঁহার সে প্রতিজ্ঞাভার বহন করিব।

যুধিষ্ঠির এই বাক্যে প্রীত হইয়া কহিলেন—

হে মহাবাহো, তুমি যখন আমার পক্ষে অবস্থান করিতেছ, তখন আমার সমস্ত অভিলাষ পূর্ণ হইবে সন্দেহ কী। কিন্তু তোমাকে যুদ্ধকার্যে নিয়োগ করিয়া আত্ম-গৌরবের নিমিত্ত তোমাকে মিথ্যাবাদী করিতে আমার ইচ্ছা হয় না। মহামতি ভীষ্ম দুর্ধোধনের পক্ষে যুদ্ধ করিতেছেন, কিন্তু

যুদ্ধারম্ভের পূর্বে তিনি বলিয়াছিলেন, যে, আমার হিতার্থে মন্ত্ৰণাদান করিবেন ; অতএব আইস, সকলে মিলিয়া তাঁহার শরণাপন্ন হই।

বাসুদেব কহিলেন—মহারাজ, আপনার বাক্য আমার মনোমতো হইতেছে। ভীষ্মকে স্বীয় বধোপায় জিজ্ঞাসা করিলে আমাদের উদ্দেশ্য নিশ্চয়ই সিদ্ধ হইবে।

এরূপ স্থির করিলে কৃষ্ণসহ পাণ্ডবগণ অস্ত্র ও কবচ পরিত্যাগপূর্বক ভীষ্মশিবিরে গমন করিলেন এবং তথায় প্রবেশ করিয়া তাঁহাকে অর্চনাপূর্বক শরণাপন্ন হইলেন। ভীষ্ম তাঁহাদের দর্শনলাভে অতিশয় প্রীত হইয়া স্নেহবচনে কহিলেন—

হে ধর্মরাজ, ভীমসেন, কেশব, ধনঞ্জয়, নকুল, সহদেব, তোমাদের স্বাগত। তোমাদের প্রীতিবর্ধন কোন্ কার্য করিতে হইবে।

তখন দীনাত্মা রাজা যুধিষ্ঠির কহিলেন—

হে পিতামহ, আপনি নিয়তই শরজাল বর্ষণ করিয়া আমার বিপুল সৈন্য ক্ষীণ করিতেছেন, অথচ আমরা আপনার অনিষ্টাচরণে সক্ষম নহি ; অতএব আমাদের পক্ষে কিরূপে কল্যাণ লাভ হইতে পারে, তাহা উপদেশ করুন।

স্নেহভাজন ও ধর্মপরায়ণ পাণ্ডবগণের প্রতিনিয়ত অনিষ্টাচরণ করিয়া এবং তত্বপরি অশিষ্ট দুর্যোধনের মর্মভেদী সন্দেহব্যঞ্জক বাক্যযন্ত্রণা সহ্য করিয়া করিয়া ভীষ্মের সুগভীর বৈরাগ্য-প্রভাবে জীবন ধারণের ইচ্ছা সম্পূর্ণ তিরোহিত হইয়াছিল, সুতরাং তিনি প্রসন্নমনে কহিলেন—

হে পাণ্ডবগণ, আমি জীবিত থাকিতে তোমাদের জয়-লাভের সম্ভাবনা নাই; অতএব আমি অনুমতি করিতেছি তোমরা স্বচ্ছন্দে আমাকে প্রহার করিয়ো। তোমরা যে আমার সম্মান রক্ষা করিয়াছ ইহাতেই আমি পরম পরিতুষ্ট হইয়াছি, এক্ষণে আমাকে সংহার না করিলে এ যুদ্ধের আর শেষ হইবে না। হে যুধিষ্ঠির, তোমার সৈন্যমধ্যে শিখণ্ডি-নামক যে দ্রুপদতনয় আছে, সে প্রকৃতপক্ষে পুরুষত্বপ্রাপ্ত নারী; অতএব তাহার প্রতি আমি অস্ত্রপ্রয়োগ করিতে পারি না। এই বৃদ্ধান্ত অবগত হইয়া তোমরা আমার বধের নিমিত্ত উপযুক্ত উপায় বিধান করিয়ো। ইহাই তোমাদের প্রতি আমার উপদেশ।

পিতামহকে পরাজয় করিবার উপায় অবগত হইয়া যুধিষ্ঠির মহাত্মা ভীষ্মকে অভিবাদনপূর্বক কৃষ্ণ ও ভ্রাতৃগণ-সমভিব্যাহারে স্বশিবিরে প্রত্যাগমন করিলেন। কিন্তু অর্জুন প্রাণ-পরিত্যাগ-সমুত্ত পিতামহের বাক্য শ্রবণে দুঃখ-সমস্তপ্ত ও লজ্জিত হইয়া কৃষ্ণকে কহিলেন—

সখে, বাল্যকালে ক্রীড়া করিতে করিতে ধূলি-অনুলিপ্ত-কলেবরে ষাঁহাকে পিতা সম্বোধন করিলে যিনি বলিতেন—আমি তোমার পিতা নহি, তোমার পিতার পিতা—সেই বৃদ্ধ পিতামহকে কী প্রকারে কঠিন আঘাত করিব, কী প্রকারেই বা সংহার করিব। তিনি আমার সৈন্যসমুদায় বিনাশই করুন, আমার পরাজয় বা মৃত্যুই হউক, আমি তাহা কিছুতেই করিতে পারিব না।

কৃষ্ণ বলিলেন—হে ধনঞ্জয়, তুমি ভীষ্মকে বধ করিবে বলিয়া প্রতিজ্ঞা করিয়াছ, ক্ষত্রিয় হইয়া তাহা তোমার লজ্বন করিবার উপায় নাই। তাহা ছাড়া তুমি বিবেচনা করিয়া দেখো, ভীষ্মের এ সময়ে নিশ্চয়ই মৃত্যুকাল উপস্থিত হইয়াছে, নহিলে তিনি তোমাদিগকে একরূপ উপদেশ প্রদান করিতেন না। তোমা-ব্যতীত কেহই তাঁহাকে সংহার করিতে সক্ষম হইবে না; অতএব তুমি সমরস্থলে আপনাকে কালের নিমিত্ত-স্বরূপ-মাত্র জ্ঞান করিয়া গুরুজন বা দয়িত ব্যক্তি নির্বিচারে সন্মুখীন আততায়ীকে বধ করিবে।

অর্জুন কহিলেন—হে কৃষ্ণ, যদি নিতান্তই কর্তব্য হয়, তবে শিখণ্ডীই পিতামহের বধসাধন করুন। তাঁহাকে সমক্ষে দেখিলে মহামতি ভীষ্ম অস্ত্র ত্যাগ করিবেন, ভীষ্মের মহারথ রক্ষকগণ হইতে আমি স্বয়ং শিখণ্ডীকে রক্ষা করিব, অতএব এ কার্য তাঁহার অনায়াসসাধ্য হইবে।

বাসুদেব ও পাণ্ডবগণ অর্জুনের এই বাক্যে হৃষ্টচিত্তে সন্মত হইয়া স্ব স্ব বিশ্রাম-গৃহে প্রবেশ করিলেন।

অনন্তর যুদ্ধের দশম দিবস উপস্থিত হইলে পাণ্ডবগণ ভীষ্মবধে কৃতসংকল্প হইয়া দুর্ভেদ্য বাহু নির্মাণপূর্বক শিখণ্ডীকে তাহার অগ্রে স্থাপন করিলেন। ভীমসেন ও অর্জুন তাঁহার দুই পার্শ্ব এবং অভিমুখ্য পৃষ্ঠদেশ রক্ষা করিতে লাগিলেন। সেনানায়কসকলে স্ব স্ব সৈন্যবিভাগ লইয়া ইহাদিগকে চতুদিকে বেষ্টিত করিলেন এবং এইরূপে

বাহিত হইয়া ভীষ্মকে আক্রমণার্থে শক্রসৈন্যভিমুখে অগ্নে অগ্নে অগ্রসর হইতে লাগিলেন।

অর্জুন মুহুমুহু জ্যাবিক্ষেপ ও শরপরস্পরা বর্ষণ করিতে করিতে পথরোধক যোদ্ধাদিগকে ত্রাসিত করিলে তাঁহাদের গতির কোনো বিঘ্ন রহিল না। তখন দুর্যোধন ভীষ্মকে কহিলেন—

হে পিতামহ, সৈন্যগণ শক্রশরে অতিশয় উৎপীড়িত হইতেছে; অতএব আপনি যুদ্ধে প্রবৃত্ত হইয়া উহাদিগকে রক্ষা করুন।

ভীষ্ম পাণ্ডববাহের অগ্রভাগে শিখণ্ডিকে দেখিয়া দুর্যোধনকে কহিলেন—

হে রাজন, আমি সাধ্যমতো পাণ্ডবসেনা বিনাশ করিবার প্রতিজ্ঞা করিয়াছিলাম, সে প্রতিজ্ঞা আমি অতাবধি পালন করিয়া আসিয়াছি, আজি আমি মহৎকর্ম সম্পাদনাস্থে সেনামুখে প্রাণত্যাগ করিয়া স্বামিপ্রদত্ত অগ্নের ঋণ হইতে বিমুক্ত হইব।

এই কথা বলিয়া ভীষ্ম পাণ্ডব-সৈন্য-মধ্যে অবগাহনপূর্বক আত্মশক্তি পূর্ণমাত্রায় বিকাশ করিয়া শত শত বীরকে ধরাশায়ী করিলেন। দুর্যোধনও মহতীসেনা-সমভিব্যাহারে ভীষ্মের নিকট অবস্থানপূর্বক তাঁহাকে পদে পদে রক্ষা করিতে লাগিলেন। তখন পাণ্ডব-বল রক্ষিত শিখণ্ডী অগ্রসর হইবার চেষ্টা করিলে অশ্বখামা সাত্যকির প্রতি, দ্রোণাচার্য ধৃষ্টদ্যুম্নের প্রতি, জয়দ্রথ বিরাটের প্রতি ধাবমান হইলেন এবং ক্রমে

উভয়দলের রক্ষকগণ পরস্পরের গতিরোধ করিয়া ঘোর যুদ্ধ আরম্ভ করিলেন।

সমগ্র ঘটনাবলীর প্রত্যক্ষদর্শী সঞ্জয় সেই দিন সন্ধ্যার পর রণক্ষেত্র হইতে প্রত্যাগমনপূর্বক ও চুশ্চিস্থাগ্রস্ত রাজা ধৃতরাষ্ট্রের সমীপে উপস্থিত হইয়া কহিলেন—

মহারাজ, আমি সঞ্জয়। আপনাকে অভিবাদন করি। কুরুপিতামহ ভীষ্ম অগ্নি নিপতিত হইয়াছেন। যিনি যোদ্ধা-গণের অগ্রগণ্য ও কুরুবীরগণের আশ্রয়স্থল, সেই ভীষ্ম আজি শিখণ্ডীর সহিত যুদ্ধে শরশয্যায় শয়ন করিয়াছেন।

ধৃতরাষ্ট্র কহিলেন—হে সঞ্জয়, ভীষ্ম নিহত বলিয়া কী প্রকারে তুমি আমার নিকট ব্যক্ত করিতেছ। দেবগণেরও হ্রাসদ সেই অতিরথ ভীষ্মকে পাঞ্চাল্য শিখণ্ডী কী প্রকারে যুদ্ধে নিহত করিল।

অনন্তর সঞ্জয় পূর্বরাত্রে ভীষ্মের নিকট পাণ্ডবগণের আগমন ও তাঁহার উপদেশানুযায়ী ব্যাহরচনা ও যুদ্ধারম্ভ যথাযথরূপে বর্ণনা করিয়া কহিতে লাগিলেন—

যখন শিখণ্ডিপূরস্কৃত পাণ্ডববলের সহিত কৌরবেষ্টিত ভীষ্মের সংঘটন হইল, তখন অতি ঘোর যুদ্ধ হইতে আরম্ভ হইল।

—ক্রমে ভীমার্জুন আমাদের সৈন্য বিনষ্ট করিতে করিতে ব্যূহমুখের নিকটবর্তী হইলে তাঁহাদের রক্ষিত শিখণ্ডীর রথ ভীষ্মের রথসমীপে অগ্রসর হইবার পথ প্রাপ্ত হইল। তখন অর্জুন কহিলেন—

—হে শিখণ্ডিন্, এই সুযোগে ভীষ্মের প্রতি ধাবমান হও, অথ্য কোনো চিন্তায় এক্ষণে প্রয়োজন নাই।

—এই বাক্যানুসারে শিখণ্ডি ভীষ্মকে প্রাপ্ত হইয়া তাঁহার বক্ষঃস্থলে নিশিত বাণসকল বিদ্ধ করিতে লাগিলেন। কিন্তু আপনার পিতা তাঁহার প্রতি অবজ্ঞাদৃষ্টি করিলেন মাত্র। সকলেই দেখিতে পাইলেন যে, ভীষ্ম শিখণ্ডীকে কোনোরূপ প্রত্যাঘাত না করিয়া পূর্ববৎ অথ্যাত্ম যোদ্ধৃগণের উপর বাণ বর্ষণ করিতে থাকিলেন।

—কিন্তু শিখণ্ডী এ বৃত্তান্ত বুঝিতে পারেন নাই। যাহাতে বুঝিবার অবসর না প্রাপ্ত হন, এই নিমিত্ত অর্জুন ক্রমাগত উৎসাহবাক্যে তাহাকে উত্তেজিত করিয়া কহিতে লাগিলেন—

—হে শিখণ্ডিন্, এক্ষণে ভীষ্মকে বিনাশ করিতে যত্নবান হও। তোমা-ব্যতীত এ বৃহৎ সৈন্যমধ্যে আর এমন যোদ্ধা দেখি না, যে এই মহৎকার্য সাধনের উপযুক্ত। অথ্য তুমি নিষ্ফল হইলে আমরা উভয়েই হান্স্যাস্পদ হইব।

—তখন শিখণ্ডী বলমদোন্মত্ত চিত্তে ভীষ্মকে শরজালে আবৃত করিলেন, কিন্তু এই লঘুবাণে আপনার পিতা কিছুমাত্র ব্যথিত না হইয়া হান্স্যসহকারে তাহা শরীরে ধারণ ও অবিচলিত উৎসাহে পাণ্ডবসৈন্য বিনাশ করিতে লাগিলেন। শিখণ্ডীকে অর্জুনবাণে সুরক্ষিত দেখিয়া দুর্যোধন কহিলেন—

—হে যোদ্ধৃগণ, তোমরা অবিলম্বে ধনঞ্জয়কে আক্রমণ করো, ভীষ্ম তোমাদিগকে রক্ষা করিবেন।

এই আদেশানুসারে ভূপতিগণ ছত্ৰাশনের প্রতি পতঙ্গবৎ অর্জুনের প্রতি ধাবিত হইলেন। কিন্তু তাঁহার মহাবেগশালী অস্ত্রসমূহের প্রতাপে একান্ত দক্ষ হইয়া কেহ বা প্রাণত্যাগ কেহ বা পলায়ন করিলেন। অর্জুন পূর্ববৎ শরাকর্ষণদ্বারা ভীষ্মের রক্ষকগণের অস্ত্রাঘাত হইতে শিখণ্ডীকে সম্পূর্ণরূপে মুক্ত রাখিলেন।

—অনন্তর আপনার পিতা শিখণ্ডীর এবং অন্যান্য যোদ্ধার বাণে চতুর্দিক হইতে আহত ও অতিশয় তাপিত হইয়া মৃত্যুকাল আগতপ্রায় জানিয়া আত্মরক্ষার চেষ্টা একেবারে বিসর্জন দিয়া ধনুর্বাণত্যাগ ও অসিগ্রহণ করিয়া রথ হইতে অবতরণ করিলেন। তখন করুণার্দ্ৰহৃদয় অর্জুন শিখণ্ডীর ব্যর্থ লঘুবাণে পিতামহকে অনর্থক অধিকক্ষণ যত্নগা ভোগ করিতে হইবে বিবেচনা করিয়া তাঁহাকে একে একে পঞ্চ-বিংশতি ক্ষুদ্রকদ্বারা অতিগাঢ় বিদ্ধ করিলেন, তখন কুরু-পিতামহ ভীষ্ম স্থলিতঅঙ্গ ও বিকলেন্দ্রিয় হইয়া পার্শ্বস্থিত দুঃশাসনকে কহিলেন—

—হে দুঃশাসন, এই যে বাণসকল দৃঢ় বর্ম ভেদ করিয়া আমার মর্মস্থল বিদ্ধ করিতেছে, ইহা কখনই শিখণ্ডি-প্রক্ষিপ্ত নহে। এই যে ব্রহ্মদণ্ডসমস্পর্শ বজ্রবেগের ন্যায় দুর্বিষহ শরনিকর আমার শরীর ভগ্ন করিতেছে, ইহা শিখণ্ডি-হস্তমুক্ত হইতেই পারে না। এই যে জাতক্ৰোধ লেলিহান আলীবিষের ন্যায় বিশিখজাল আমার মর্মস্থানসমুদয়ে প্রবেশপূর্বক প্রাণবিনাশ করিতেছে, ইহা অর্জুনেরই গাণ্ডীব-

নিঃসৃত তাহাতে সন্দেহ নাই। গাণ্ডীবধ্বা ব্যতীত কেহই আমাকে ধরাশায়ী করিতে সক্ষম নহে।

—এই কথা বলিতে বলিতে মহাত্মা কুরুবৃদ্ধ ধীরে ধীরে ভূপতিত হইলেন। কিন্তু তাঁহার শরীর শরসমূহে একরূপ ঘনবিন্দু হইয়াছিল, যে তাহা ধরাস্পর্শ করে নাই। আপনার পিতা পতিত হইয়াও বীরোচিত শরশয্যায় শয়ান রহিয়াছেন।

—হে মহারাজ, সেই মহাবীরের দেহের সঙ্গে সঙ্গে আমাদেরও চিত্ত পতিত হইল, সেই সূর্যপ্রভ মহাত্মার সঙ্গে সঙ্গেই আমাদের সকল আশা ভরসা অন্তমিত হইল।

ধৃতরাষ্ট্র কহিলেন—আমারই ছবুন্ধিপ্রযুক্ত অদ্য আমি পিতাকে নিহত গুনিয়া যে দুঃখ লাভ করিলাম, ইহা অপেক্ষা অধিক আর কী হইতে পারে। আমার হৃদয় নিশ্চয়ই পাষণে নির্মিত, নচেৎ এই শোচনীয় সংবাদে তাহা শতধা বিদৌর্ণ হইল না কেন। ঋষিগণ ক্ষত্রধর্মকে কী নিদারুণ করিয়া প্রদর্শন করিয়াছেন, যাহা অবলম্বন করিয়া আমরা সেই মহাত্মাকে নিহত করাইয়া রাজ্য অভিলাষ করিতেছি এবং পাণ্ডবগণও তাঁহাকে নিহত করিয়া রাজ্যপ্রার্থী হইয়াছেন। পারগামীর নৌকা অগাধ সলিলে নিমগ্ন হইলে যেরূপ হয়, ভীষ্মের মৃত্যুতে আমার পুত্রগণের নিশ্চয় তদ্রূপই বোধ হইতেছে। হায়, ভীষ্মের অভাবে এক্ষণে দুর্ধোধন কাহাকে অবলম্বন করিবেন। হে সজ্জয়, পুত্রের বিনাশজন্তু মহাশোকানল আমার অন্তঃকরণে আরুঢ় হইয়াছিল, তুমি যেন

যুতদ্বারা সেই অগ্নি উদ্ধীপিত করিয়া দিলে। এক্ষণে সেই যুদ্ধেরভূষণ ভীমকর্মী পিতার নিধনবাতী শুনিয়া আমার আর বাঙ্‌নিষ্পত্তির শক্তি নাই।

এদিকে কুরুসেনাপতি ভীষ্ম শরশয্যায় শয়ান হইলে, কৌরবগণ ইতিকতব্যবিমূঢ় হইয়া কিয়ৎক্ষণ পরস্পরের মুখাবলোকন করিতে লাগিলেন। অনন্তর দৃঃশাসন জ্যেষ্ঠের নিয়োগানুসারে স্বরিতগমনে দ্রোণাচার্যের বিভাগ অভিমুখে গমন করিলেন। তিনি কী অভিপ্রায়ে ধাবমান হইতেছেন জানিবার জ্ঞান বহুসংখ্যক যোদ্ধা তাঁহাকে বেষ্টন করিয়া চলিলেন।

অনন্তর দ্রোণ-সন্নিধানে উপস্থিত হইয়া দৃঃশাসন তাঁহাকে ভীষ্মের পতনবাতী কহিবামাত্র সেই অপ্রিয় সংবাদ শ্রবণে আচার্য সহসা মূর্ছিত হইয়া রথোপরি পতিত হইলেন। পরে সংজ্ঞালাভ করিয়া তৎক্ষণাৎ দূতদ্বারা স্বীয় সৈন্যবিভাগ নিবারিত করিলেন। তখন পাণ্ডবগণও শত্রুধ্বনি-দ্বারা যুদ্ধকার্য স্থগিত করিলেন।

সৈন্যগণ নিবৃত্ত হইলে উভয়পক্ষীয় বীরগণ কবচ ও অস্ত্র পরিত্যাগ-পূর্বক ভীষ্মের নিকট সমাগত হইয়া অভিবাদন করিয়া চতুর্দিকে দণ্ডায়মান রহিলেন। তখন কুরুপিতামহ সকলকে সম্বোধনপূর্বক কহিলেন—

হে মহাভাগগণ, তোমাদের স্বাগত, আমি তোমাদের দর্শনে অতিশয় পরিতুষ্ট হইলাম।

ক্ষণকাল পরে ভীষ্ম পুনরায় কহিলেন—

হে ভূপতিগণ, আমার মস্তক লম্বমান হইতেছে ; অতএব আমাকে উপাধান প্রদান করো ।

রাজগণ তৎক্ষণাৎ দ্রুতগতিতে বহুবিধ মহামূল্য সুকোমল উপাধান সকল আনয়ন করিলেন, কিন্তু ভীষ্ম তাহা গ্রহণ না করিয়া অর্জুনের প্রতি দৃষ্টিপাত করিয়া কহিলেন—

হে মহাবাহো, হে বৎস, তুমি আমাকে উপযুক্ত উপাধান প্রদান করো ।

তখন সাক্ষ্যলোচন ধনঞ্জয় পিতামহের অভিপ্রায় অনুমান করিয়া গাণ্ডীব আনয়নপূর্বক ভীষ্মের মস্তকের নিম্নদেশে তিনটি শর নিক্ষেপ করিলে ভীষ্ম শরশয্যার উপযোগী উপাধান প্রাপ্ত হইয়া পরিতুষ্টচিত্তে অর্জুনকে আশীর্বাদ করিলেন ।

পরে শস্ত্রসম্ভাপিত ভীষ্ম ধৈর্যগুণে বেদনা সংবরণপূর্বক পানীয় প্রার্থনা করিলেন । তখন সকলে চতুর্দিক হইতে নানাবিধ খাদ্যসামগ্রী ও সুশীতল জলপূর্ণ কুম্ভ আনয়ন করিলেন, কিন্তু পিতামহকে ইহাতে অসন্তুষ্ট দেখিয়া অর্জুন পুনরায় তাঁহার প্রকৃত অভিপ্রায় বুঝিয়া বারুণাস্থ্যদ্বারা তাঁহার দক্ষিণপার্শ্বস্থ ভূমি বিদ্ধ করিলে তাহা হইতে অতি শীতল বিমল দিব্য স্বাদু জলের উৎস উদ্ভিত হইল, তদ্বারা ভীষ্ম অতিশয় পরিতৃপ্ত হইয়া অর্জুনকে ভুরিভুরি প্রশংসা করিতে লাগিলেন ।

অনন্তর শল্যোদ্ধারকুশল সুশিক্ষিত বৈদ্যগণ সর্বপ্রকার উপকরণ লইয়া তথায় উপস্থিত হইলে, ভীষ্ম তাহা দেখিয়া কহিলেন—

হে দুর্যোধন, তুমি ইহাদিগকে উপযুক্ত সংকার করিয়া বিদায় করো। আমি ক্ষত্রিয়বাহিত পরমগতি প্রাপ্ত হইয়াছি, চিকিৎসার আর প্রয়োজন নাই। আমার মৃত্যুকাল উপস্থিত হইলে এই শরশয্যার সহিত আমার শরীর দগ্ধ করিয়ো।

অনন্তর বৈদ্যগণ প্রস্থিত হইলে ভীষ্ম দুর্যোধনকে কহিলেন—

বৎস, এক্ষণে ক্রোধ পরিত্যাগ করো। আমার একান্ত ইচ্ছা যে, আমার মৃত্যুতেই যুদ্ধের অবসান হউক। আমার মৃত্যুর পর প্রজাগণের শান্তিলাভ হউক, পার্থিবগণ শ্রীতিমান্ হইয়া পরস্পরের সহিত মিলিত হউন, পিতা পুত্রকে ভ্রাতা ভ্রাতাকে ও আত্মীয়সকল পরস্পরকে প্রাপ্ত হউন। অতএব হে রাজন্, তুমি প্রসন্ন হও। পাণ্ডবগণকে রাজ্যার্থ প্রদান-পূর্বক উহাদের সহিত সন্ধিস্থাপন করো।

এইমাত্র বলিয়া শল্য-সমুপ্ত-মর্মা ভীষ্ম বেদনাভরে চক্ষুনিমীলনপূর্বক আত্মাকে যোগস্থ করিয়া তৃষ্ণাস্তাব অবলম্বন করিলেন। পাণ্ডব, কৌরব ও সমবেত ভূপালগণ তাঁহাকে তিন বার প্রদক্ষিণ করিয়া অভিবাদন করিলেন এবং তাঁহার চতুর্দিকে পরিখাখনন ও রক্ষকনিয়োগপূর্বক সকলে বিষণ্ণ মনে স্ব-স্ব-শিবিরে প্রস্থান করিলেন।

কিন্তু মুমূর্ষু ব্যক্তির ঔষধে অনভিরুচির জ্ঞায় পিতামহের বাক্যে দুর্যোধনের আস্থা হইল না।

এদিকে মহাবীর কর্ণ ভীষ্মের পতন-সংবাদে পূর্ববৈর বিশ্বৃত হইয়া সত্বরগমনে তাঁহার নিকট উপস্থিত হইলেন। নিমীলিত-

নয়ন কুরুপিতামহকে ক্রোধিত-কলেবরে অস্তিম-শয্যায় শয়ান দেখিয়া সজ্জদয় কর্ণ তাঁহার পদতলে নিপতিত হইয়া বাম্পা-কুলকণ্ঠে কহিলেন—

হে মহাশয়, যে সর্বদা আপনার নয়নপথের অতিথি হইয়া আপনার অপ্রীতিভাজন হইত—সেই রাধেয় আপনাকে অভিবাদন করিতেছে।

তীয় এই বাক্য শ্রবণে বলপূর্বক নেত্রদ্বয় উন্মীলন করিয়া যখন দেখিলেন, তথায় আর কেহ উপস্থিত নাই, তখন রক্তকগণকে অপসারিত করিয়া পিতার শ্রায় তিনি কর্ণকে দক্ষিণ হস্তদ্বারা আলিঙ্গনপূর্বক স্নেহবচনে কহিলেন—

হে কর্ণ, তুমি সর্বদা আমার সহিত স্পর্ধা করিতে, কিন্তু এ সময়ে আমার নিকট আগমন না করিলে আমি ক্লান্ত হইতাম। আমি বিশ্বস্তমূর্ত্তে অবগত আছি, যে, তুমি রাধেয় নহ, তুমি কুন্তী-নন্দন। সত্য কহিতেছি, আমি কদাপি তোমার প্রতি দ্বেষ করি নাই। তুমি পাণ্ডবগণের বিরুদ্ধাচরণ করিতে বলিয়া আমি তোমার তেজোরোধের নিমিত্ত পরুষবাক্য কহিতাম। তোমার ছবিষহ বীরত্ব ও ধর্মনিষ্ঠা আমি বিলক্ষণ অবগত আছি। তোমার প্রতি পূর্বে যে ক্রোধ সঞ্চার হইয়াছিল, তাহা অতঃপনীত হইল। হে পুরুষপ্রবীর, আর এ বৃথা যুদ্ধে প্রয়োজন কী। তুমি স্বীয় সহোদর পাণ্ডবগণের সহিত মিলিত হইলেই এই বৈরভাব পর্য্যবসিত হয়, অতএব আমার প্রাণদানেই এ যুদ্ধের অবসান হউক।

কর্ণ কহিলেন—হে পিতামহ, আপনি যাহা কহিলেন, তাহাতে কিছুমাত্র সন্দেহ নাই। আমি যথার্থই কুন্তী-পুত্র। কিন্তু কুন্তী সে সময়ে আমাকে পরিত্যাগ করিলেন, সুতরাং অধিরথ তখন আমাকে স্নেহভরে প্রতিপালন করিলেন, পরে দুর্য়োধনের কুপায় আমি পরিবর্ধিত হইয়াছি। আমাকে আশ্রয় করিয়াই এই দুর্গিবার বৈরভাব উৎপন্ন হইয়াছে; অতএব আপনি অনুমতি করুন, আমি ধনঞ্জয়ের সহিত যুদ্ধ করি। ক্ষত্রিয়ের ব্যাধিদ্বারা মরণ কখনই বিধেয় নহে; অতএব দুর্জয় পাণ্ডবদের সহিত যুদ্ধ করিতে আমি কৃতনিশ্চয় হইয়াছি।

তখন ভীষ্ম কহিলেন—

হে কর্ণ, যদি নিতান্তই এ সুদারুণ বৈর পরিহার করিতে না পারো, তবে আমি অনুজ্ঞা করিতেছি তুমি স্বর্গকাম হইয়া ও অহংকার পরিত্যাগপূর্বক যুদ্ধ করো। আমি প্রথমাবধি এ যুদ্ধ নিবারণের বহুবিধ চেষ্টা করিলাম, কিন্তু কিছুতেই কৃতকার্য হইতে পারিলাম না।

ভীষ্ম এইরূপ কহিলে কর্ণ তাঁহাকে অভিবাদন করিয়া দুর্য়োধনের নিকট গমন করিলেন।

১১

শরশয্যায় শয়ান মহামতি ভীষ্মকে আমন্ত্রণ করিয়া কর্ণ গলদক্ষলোচনে কৌরব-সৈন্যগণের মধ্যে উপস্থিত হইয়া তাহাদিগকে নানাবাক্য-বিজ্ঞাসে আশ্বাস প্রদান করিতে লাগিলেন। ত্র্যম্বক বহুদিবসের পর কর্ণকে যুদ্ধ-ক্ষেত্রে রথারূঢ় দেখিয়া প্রফুল্লচিত্তে কহিলেন—

হে কর্ণ, তুমি সৈন্যগণের রক্ষার ভার গ্রহণ করায় অতঃ তাহাদিগকে পুনরায় সনাথ বোধ হইতেছে। এক্ষণে কী কর্তব্য, তাহা তুমি অবধারণ করো।

কর্ণ কহিলেন—মহারাজ, উপস্থিত মহাত্মারা সকলেই মহাবলপরাক্রান্ত ও সমরজ্ঞ; অতএব সকলেই সেনাপতি হইবার উপযুক্ত। কিন্তু ইহারা পরস্পরের সহিত স্পর্ধা করিয়া থাকেন, সুতরাং ইহাদের মধ্যে একজনকে সংকার করিলে মনঃক্ষুব্ধ হইয়া অবশিষ্ট সকলে হিতৈষী হইয়া যুদ্ধ করিবেন না; অতএব কোনো বিশেষ গুণে অলংকৃত ব্যক্তিকেই নির্বাচন করা বিধেয়। এই নিমিত্ত ধনুর্ধরাগ্রগণ্য সকল-যোদ্ধার আচার্য্য জ্ঞোণকে সেনাপতি করা কর্তব্য। সকলেই শ্রীতিপূর্বক শুক্র ও বৃহস্পতিতুলা ত্র্যম্বক ভারহাজের অনুগমন করিবেন।

রাজা দুর্যোধন কর্ণের বাক্য শ্রবণ করিয়া সেনা-মধ্যস্থিত, দ্রোণাচার্যকে কহিলেন—

হে আচার্য, বর্ণ-কুল-বুদ্ধি-বীরত্বে ও দক্ষতায় আপনি সকলের শ্রেষ্ঠ ; অতএব ইন্দ্র যেমন দেবগণকে রক্ষা করেন, আপনি সেইরূপ আমাদের রক্ষা করুন। আপনি সেনাপতি হইয়া দেবগণের অগ্রগামী কার্ত্তিকেয়ের ন্যায় আমাদের অগ্রে গমন করুন।

দুর্যোধনের বাক্যাবসানে ভূপতিগণ সিংহনাদে তাঁহার হর্ষোৎপাদন করিয়া দ্রোণকে জয়বাদ প্রদান করিলেন। সেনাগণের আনন্দকোলাহল নিবৃত্ত হইলে দ্রোণ সৈন্যপত্য স্বীকারপূর্বক কহিলেন—

হে দুর্যোধন, তোমরা জয়াজ্ঞী হইয়া আমাতে যে সকল গুণ আরোপ করিলে আমি যুদ্ধকালে তাহা সার্থক করিবার চেষ্টা করিব।

অনন্তর যুদ্ধের একাদশ দিবসে সেনাপতি দ্রোণ সৈন্যগণকে ব্যাহিত করিয়া ধাতরাষ্ট্রগণ-সমভিব্যাহারে যুদ্ধক্ষেত্রে যাত্রা করিলেন। কৃপ কৃতবর্মা ও দুঃশাসনপ্রভৃতি বীরগণ দ্রোণের বাম পার্শ্ব রক্ষণে নিযুক্ত রহিলেন। জয়দ্রথ কলিঙ্গ ও ধাতরাষ্ট্রগণ তাঁহার দক্ষিণে অবস্থান করিলেন। মদ্রাধিপতি প্রভৃতি বীরগণ-সমভিব্যাহারে কর্ণ ও দুর্যোধন অগ্রসর হইলেন।

কর্ণ সকলের অগ্রে গমন করিতে লাগিলেন। তাঁহার সিংহ-লাঙ্ঘিত সূর্য-সঙ্কাশ মহাকেতু স্ব-পক্ষের হর্ষবর্ধন করিয়া

শোভমান হইল। তখন কর্ণকে অবলোকন করিয়া কৌরবগণ ভীষ্মের অভাব গণনাই করিলেন না। যুধিষ্ঠিরও সৈন্য প্রতিবাহিত করিয়া ব্যাহমুখে অৰ্জুনকে সন্নিবেশিত করিলেন। উভয় সৈন্যদল সম্মুখীন হইলে চির-বৈরী কর্ণ ও অৰ্জুন পরস্পরকে নিরীক্ষণ করিতে লাগিলেন।

অনন্তর বনমধ্যে হতাশন যেমন বৃক্ষ দক্ষ করিয়া বিচরণ করে, ত্রোণ যুদ্ধকাৰ্য আরম্ভ করিয়া তদ্রূপ ভ্রাম্যমাণ হেমময় রথে পাণ্ডব-সেনা দলন করিতে লাগিলেন। বায়ুসহায় গর্জমান পর্জন্তের শিলাবর্ষণবৎ ত্রোণশরপ্রপাতে পাণ্ডবপক্ষ একান্ত ক্লিষ্ট হইল। তদদর্শনে পাণ্ডববীর-পরিবৃত ধর্মরাজ যুধিষ্ঠির সম্বর ধাবমান হইয়া তাঁহাকে নিবারণ করিলেন।

তখন তুমুল যুদ্ধ উপস্থিত হইল। শকুনি সম্মুখীন হইয়া নিশিত শরসমূহে সহদেবকে আক্রমণ করিলেন এবং ত্রোণাচার্য দ্রুপদের উপর সবেগে নিপতিত হইলেন। সাত্যকি কৃতবর্মান সহিত এবং ধৃষ্টকেতু কৃপাচার্যের সহিত যুদ্ধে প্রবৃত্ত হইলেন, কিন্তু শল্য ব্যতীত ভীমসেনের প্রতাপ কেহ সহ্য করিতে পারিলেন না।

অবশেষে শেষোক্ত দুই বীরে মহা গদাযুদ্ধ চলিতে লাগিল। মহাবেগশালী মাতঙ্গসদৃশ দুইজনই গদা উত্তোলিত করিয়া পরস্পরের উপর পতিত হইলেন, পুনরায় অন্তরমার্গে অবস্থানপূর্বক মণ্ডলগতিতে বিচরণ করিতে লাগিলেন, পরে সহসা লক্ষ্যপ্রদানপূর্বক সেই লৌহদণ্ডদ্বারা পরস্পরকে প্রহার করিলেন। কিয়ৎক্ষণ একরূপ চলিলে

উভয় বীর পরস্পরের বেগে নিপীড়িত হইয়া ক্ষতিভুলে যুগপৎ পতিত হইলেন ; কিন্তু ভীমসেন অতি সহর পুনরায় উত্থিত হইলে কৌরবগণ শল্যকে অবিলম্বে স্থানান্তরিত করিয়া রক্ষা করিলেন ।

তখন মহাবাহু গদাহস্ত বৃকোদর কৌরব-সৈন্যকে আক্রমণ করিলে জয়শীল পাণ্ডবগণ উচ্চৈঃস্বরে সিংহনাদ করিয়া তাঁহার সহিত যোগদানপূর্বক তাঁহাদিগকে কম্পিত করিতে লাগিলেন । সৈন্যরক্ষক দ্বিজশ্রেষ্ঠ দ্রোণাচার্য কৌরবগণকে ভয় দেখিয়া তাহাদিগকে আশ্বাস-প্রদানপূর্বক রোষাবেশে সহসা পাণ্ডব-সৈন্য মধ্যে প্রবিষ্ট হইয়া যুদ্ধিষ্ঠিরের প্রতি ধাবিত হইলেন এবং তাঁহার চক্ররক্ষককে বিনষ্ট করিয়া অন্যান্য বীরকে নিবারণপূর্বক তাঁহাকে শরনিকরে বদ্ধ করিলেন ।

তখন সৈন্যমধ্যে—রাজা ধৃত হইলেন,—বলিয়া মহাশব্দ সমুত্থিত হইল । এই কোলাহল দূরবর্তী অর্জুনের শ্রবণগোচর হইবামাত্র তিনি শূরগণের অঙ্গপ্রত্যঙ্গ-বাহিত অতি ভীষণ শোণিত-নদী দ্রুতগতিতে উত্তীর্ণ হইয়া রথঘোষে চতুর্দিক নিনাদিত ও কৌরবগণকে বিজ্ঞাবিত করিয়া মহাবেগে আগমন করিলেন । অনন্তর ধনঞ্জয়কৃত শরাঙ্ককারে না-দিক্ না-অন্তরীক্ষ না-মেদিনী না-কিছুই দৃষ্টিগোচর রহিল ।

এই সময় ধূলিপটলসমাচ্ছন্ন দিবাকর অস্তমিত হইল ; স্তবরাং দ্রোণাচার্য অগত্যা অর্জুনকর্তৃক পরাজিত সৈন্য-গণকে অবহারের আদেশ দিলেন । পাণ্ডবগণও হ্রষ্টচিত্তে বিজ্ঞামার্গে গমন করিলেন ।

অনন্তর পরদিনের যুদ্ধারম্ভ হইলে ত্রিগত'গণ অজু'নকে যুদ্ধার্থে আহ্বান করিতে করিতে দক্ষিণ দিকে প্রস্থান করিলেন।

তখন অজু'ন যুধিষ্ঠিরকে কহিলেন—

মহারাজ, আমি যুদ্ধে আহূত হইলে কদাচ অস্বীকার করি না ইহাই আমার ব্রত। এক্ষণে ত্রিগত'গণ আমাকে আহ্বান করিতেছে; অতএব উহাদিগকে বিনাশ করিবার অনুমতি প্রদান করুন।

পাঞ্চালবীর সত্যজিৎ অতঃ তোমার রক্ষক হইবেন। যদি দ্রোণকর্তৃক তিনি বিনষ্ট হন, তবে তুমি কোনোক্রমে রণস্থলে অবস্থান করিয়ো না।

অনন্তর যুধিষ্ঠির প্রীতি স্নিগ্ধনয়নে আলিঙ্গনপূর্বক অজু'নকে ত্রিগত'গণের সহিত যুদ্ধার্থে গমনের অনুমতি প্রদান করিলে মহাবীর ধনঞ্জয় ক্ষুধাত' সিংহের ন্যায় তাঁহাদের প্রতি ধাবিত হইলেন। তখন দ্রোণসৈন্যগণ অজু'নবিহীন যুধিষ্ঠিরকে গ্রহণ করিবার নিমিত্ত হৃষ্টচিত্তে অগ্রসর হইলে উভয় পক্ষীয় বীরগণ মহাবেগে মিলিত হইলেন।

এদিকে ত্রিগত'গণ যুদ্ধক্ষেত্রের বহির্ভাগে সমতল-ভূমিতে অবস্থান করিয়া রথদ্বারা চক্রাকার ব্যূহনির্মাণ করিলেন এবং অজু'নকে আগত দেখিয়া হর্ষভরে চীৎকার করিলেন। অজু'ন তাঁহাদিগকে সন্তুষ্ট দেখিয়া সহাস্তমুখে কৃষ্ণকে কহিলেন—

হে বাসুদেব, এই মুমূর্ষু ত্রিগত'গণকে অবলোকন

করো। ইহারা রোদন করিবার স্থলে হর্ষ প্রকাশ করিতেছে, অথবা অভিলষিত লোকসকল প্রাপ্তির সম্ভাবনায় ইহারা সত্যই আনন্দিত হইতেছে।

এই বলিয়া অর্জুন ত্রিগর্তরাজের সম্মুখে রথস্থাপনপূর্বক সুবর্ণালংকৃত দেবদত্ত-শঙ্খধ্বনি করিলেন। তখন ত্রিগর্তগণ সকলে মিলিয়া এককালে অর্জুনের প্রতি বাণনিষ্ক্ষেপ করিতে লাগিলেন। তন্মধ্যে ত্রিগর্তরাজের এক ভ্রাতা অর্জুনের কিরীটে অস্রাঘাত করিলে ধনঞ্জয় প্রথমেই তাঁহার শিরশ্ছেদন করিলেন এবং পরে অবিচ্ছিন্ন শরনিকরে তাঁহাদের সৈন্যগণকে সংহার করিতে লাগিলেন। তখন তাহারা একান্ত ভীত হইয়া দুর্যোধনের সৈন্যসমুদায়ের সহিত মিলিত হইবার নিমিত্ত পলায়নের উপক্রম করিলে ত্রিগর্তরাজ ক্রোধাবিষ্ট হইয়া কহিলেন—

হে বীরগণ, তোমরা পলায়ন করিয়ো না। কৌরবগণের সমক্ষে সেরূপ ভয়ানক শপথ করিয়া এক্ষণে কিরূপে তাঁহাদের নিকট গমন করিবে।

এই কথায় সৈন্যগণ উত্তেজিত ও পুনরায় মিলিত হইয়া যুদ্ধে প্রবৃত্ত হইল। অর্জুন তাহাদিগকে প্রত্যাগত দেখিয়া বাসুদেবকে কহিলেন—

হে কেশব, বোধ হয় ত্রিগর্তগণ জীবনসম্বন্ধে রণ পরিত্যাগ করিবে না, আরও নিকটে রথ লইয়া চলো। আজি তুমি আমার ভূজবল ও গাণ্ডীব মাহাত্ম্য অবলোকন করিবে।

তখন কৃষ্ণ অপূর্ব কৌশল প্রদর্শনপূর্বক মণ্ডল অবলম্বন

ও গতি প্রত্যাগতি সহকারে ত্রিগত সৈন্যমধ্যে বিচরণ করিতে আরম্ভ করিলে অর্জুন দ্বিগুনীকৃত তেজে অস্ত্রবর্ষণ করিয়া এককালে সম্মুখস্থিত সমগ্র বীরগণকে যমালয়ে প্রেরণ করিলেন। পরে অবশিষ্ট ত্রিগতগণকে শরনিকরে অতিশয় পীড়ন করিতে লাগিলেন।

অবশেষে সমস্ত ত্রিগতগণ জীবিতাশা পরিত্যাগপূর্বক একসঙ্গে বাণ বর্ষণ আরম্ভ করিলে অর্জুন ও কৃষ্ণ তাহাতে একান্ত আচ্ছন্ন হইয়া আর পরস্পরেরও দৃষ্টিগোচর রহিলেন না। ত্রিগতগণ ইহা দেখিয়া উহাদিগকে নিহত-বোধে বস্ত্রবিধূননপূর্বক মহা কোলাহল করিতে লাগিল। বাসুদেব ক্ষত-বিক্ষতাক্ত ও একান্ত ক্লান্ত হইয়া বলিতে লাগিলেন—

হে পার্থ, তুমি তো অক্ষত আছ। আমি তোমাকে দেখিতে পাইতেছি না।

তাহার বাক্য শ্রবণে অর্জুন বায়ব্যাস্ত্রে সেই সমস্ত শরজাল অপসৃত করিলেন এবং তৎপরে তাহাদিগকে নিতান্ত ব্যাকুল করিয়া ভল্লাস্ত্রদ্বারা কাহারো মস্তক, কাহারো হস্ত, কাহারো উরুদেশ ছেদন করিতে লাগিলেন। তখন নিঃশেষিতপ্রায় ত্রিগত-সৈন্য অর্জুনের প্রভাব আর সহ্য করিতে না পারিয়া পলায়ন করিল।

অর্জুনও শত্রুগণকে পরাজিত দেখিয়া সত্ত্বর যুধিষ্ঠিরের নিকট প্রত্যাগত হইবার নিমিত্ত রথচালনা করিলেন এবং তাহার গতিনিবারণকারী সৈন্যদলকে পদ্মবনপ্রবিষ্ট মাতঙ্গের আয় বিমর্দিত করিয়া অতি বেগে ধাবমান হইলেন।

অর্জুনের অবারিত গতি দর্শনে প্রাগজ্যোতিষেশ্বর ভগদত্ত স্বীয় মেঘসংকাশ হস্তীর উপর হইতে তাঁহার প্রতি অশ্রুবর্ষণ আরম্ভ করিলেন।

তখন হস্তী ও রথে ঘোরতর সংগ্রাম আরম্ভ হইল। মহাবাহু ভগদত্ত অনায়াসে অর্জুনের শরনিকর নিরাকৃত করিয়া রথসহ তাহাকে ও কৃষ্ণকে বিনাশ করিবার মানসে হস্তী সঞ্চালন করিলেন। মহামতি জনার্দন সেই গজকে কালান্তক যমের ত্রায় আগমন করিতে দেখিয়া অতি সহর রথ দক্ষিণপার্শ্বস্থ করিলেন।

সেই সুযোগে অর্জুন পশ্চাদ্দেশ হইতে হস্তী ও আরোহীকে বিনষ্ট করিতে পারিতেন, কিন্তু ধর্ম স্মরণ করিয়া তাহা করিলেন না। তখন সেই মহাগজ অবিশ্রাম পাণ্ডব-সৈন্য সংহার করিতে থাকিলে অর্জুনের ক্রোধের পরিসীমা রহিল না। তিনি সুতীক্ষ্ণ শরদ্বারা হস্তীর বর্ম ছেদন করিলেন এবং ভগদত্ত-নিষ্কিপ্ত অস্ত্রসমুদায় নিবারণ করিয়া তাঁহাকে গাঢ়বিদ্ধ করিলেন। তখন ভগদত্ত ধনঞ্জয়েয় মস্তকে এক তোমর নিক্ষেপ করিলে সেই আঘাতে তাঁহার কিরীট বিবর্তিত হইল। পূর্থাৎ কিরীট যথাস্থানে সন্নিবেশিত করিয়া রোষভরে ভগদত্তকে কহিলেন—

হে প্রাগজ্যোতিষেশ্বর, এই সময়ে সকলকে উত্তমরূপে নিরীক্ষণ করিয়া লও। আমার কিরীট যে বিপর্যস্ত করে, তাহার আর রক্ষা নাই।

এই বাক্যে ভগদত্ত যৎপরোনাস্তি ক্রুদ্ধ হইয়া এক অন্ধুশ

নিষ্কেপ করিলেন। অজুঁন তাহা নিবারণ করিতে পারিলেন না দেখিয়া কৃষ্ণ সত্বর তাঁহাকে আচ্ছাদনপূর্বক স্বীয় শরীরে তাহা গ্রহণ করিলেন। ইহাতে মহাবীর ধনঞ্জয় নিতান্ত ক্লিষ্টচিত্তে কৃষ্ণকে কহিলেন—

হে মধুসূদন, তুমি প্রতিজ্ঞা করিয়াছিলে যুদ্ধ করিবে না, এক্ষণে তাহা রক্ষা করিলে না। আমি অশস্ত্র বা ব্যসনাপন্ন হইলে অবশ্য আমাকে রক্ষা করা তোমার কর্তব্য হইত, কিন্তু আমি অস্ত্রধারী ও যুধ্যমান থাকিতে সমর-ব্যাপারে হস্তক্ষেপ করা তোমার উচিত হয় নাই।

এই বলিয়া অজুঁন সহসা হস্তীর কুস্তান্তরে নারাচ নিষ্কেপ করিলেন। তখন ভগদত্ত বারংবার হস্তিচালনার চেষ্টা করিলেও কৃতকার্য হইলেন না। সেই হস্তী মর্মাহত হইয়া ক্রিয়ংক্ষণ মধ্যেই স্তব্ধগাত্র ও অবনি-তলগত হইল এবং আত্মস্বরে চীৎকার করিয়া প্রাণত্যাগ করিল। সেই সময়ে ধনঞ্জয় অর্ধচন্দ্রবাণে ভগদত্তের হৃদয় ভেদ করিলে তিনিও ধর্ম্মবাণ পরিত্যাগপূর্বক পঞ্চদ্ব প্রাপ্ত হইলেন। তখন অজুঁন পুনরায় অনিবারিত গতিতে যুধিষ্ঠিরের নিকট গমন করিতে লাগিলেন।

ওদিকে অজুঁন স্থানান্তরিত হইলে দ্রোণাচার্য্য প্রতি হর্ষেণ ব্যাহরচনা করিয়া যুধিষ্ঠিরকে গ্রহণ করিবার মানসে পাণ্ডবসৈন্য-অভিমুখে অগ্রসর হইতে লাগিলেন, তখন যুধিষ্ঠির প্রতিবাহ্য নির্মাণ করিলে দ্রোণ ও তাঁহার রক্ষক-গণের মধ্যে তুমুল যুদ্ধ উপস্থিত হইল। যেমন বায়ুবেগে

মেঘমণ্ডল ছিন্নভিন্ন হয়, তদ্রূপ দ্রোণাচার্যের গতিরোধক সৈন্যদল নিতান্ত বিক্ষিপ্ত হইতে লাগিল। সে সুযোগে মহাবীর দ্রোণ যুধিষ্ঠিরকে প্রাপ্ত হইয়া তাঁহাকে শরনিকরে আচ্ছন্ন করিলেন।

গজযুধপতিকে মহাসিংহ আক্রমণ করিলে করিগণ যেরূপ আতঁনাদ করে, যুধিষ্ঠিরকে দ্রোণকর্তৃক আক্রান্ত দেখিয়া পাণ্ডবসেনা সেইরূপ কোলাহল আরম্ভ করিল। তখন অর্জুন-নির্দিষ্ট রক্ষক সত্যজিৎ সহসা দ্রোণের প্রতি ধাবমান হইয়া তাঁহার সারথি ও অশ্বকে গাঢ় বিদ্ধ করিয়া মণ্ডলাকারে বিচরণপূর্বক আচার্যের ধ্বজচ্ছেদন করিলেন। ইহাতে দ্রোণ ক্রুদ্ধচিত্তে দশ বাণে সত্যজিৎকে কলেবরবিদ্ধ করিলেও তিনি কিছুমাত্র কম্পিত না হইয়া পুনরায় দ্রোণকে প্রহার করিলেন।

পাণ্ডবগণ সত্যজিৎকে এতাদৃশ পরাক্রম দর্শন করিয়া বীরনাদ ও বসনকম্পনে তাঁহার অভিনন্দন করিলেন। দ্রোণাচার্য বারংবার সত্যজিৎকে শরাসন ছেদন করিতে লাগিলেন, কিন্তু সেই সত্যপরাক্রম বীর ক্রমাগত অশ্রু শরাসন গ্রহণপূর্বক অবিচলিত-চিত্তে ঘোরতর সংগ্রাম করিতে লাগিলেন। অবশেষে অবসর পাইবামাত্র আচার্য অর্ধচন্দ্রবাণে সত্যজিৎকে মস্তকচ্ছেদন করিলেন। তখন অর্জুনের উপদেশক্রমে যুধিষ্ঠির জয়শীল আচার্যের সম্মুখে অবস্থান না করিয়া যুদ্ধক্ষেত্র হইতে প্রস্থান করিলেন।

যুধিষ্ঠিরকে প্রাপ্ত না হইয়া দ্রোণ ক্রোধভরে রণক্ষেত্রে

বিচরণপূর্বক বহুসংখ্যক পাঞ্চালকে বিনষ্ট করিলেন। ইতাবসরে অর্জুন ভগদত্তকে সংহারান্তে পশ্চিমধ্যে অসংখ্য কৌরবসৈন্য বিনষ্ট করিয়া সেই স্থানে উপস্থিত হইলে পাণ্ডবগণ নবোৎসাহ-লাভপূর্বক একান্ত দুর্ধর্ষ হইয়া উঠিলে সেই সময়ে দ্রোণ-সৈন্য ক্ষণমাত্রও তাঁহাদের সমক্ষে অবস্থান করিতে সক্ষম হইল না। দ্রোণাচার্য চতুর্দিক হইতে আক্রান্ত হইয়া বিফল মনোরথে তথা হইতে প্রস্থান করিলেন। তখন দুর্যোধন স্বপক্ষকে নিতান্ত হান্তাম্পদ হইতে দেখিয়া আচার্যের অনুমতিক্রমে অবহারের আদেশ প্রদান করিলেন।

অনন্তর পরদিন প্রভাতে হতাবশিষ্ট ত্রিগতংগ পুনরায় অর্জুনকে রণক্ষেত্রের বহির্দেশে আহ্বান করিয়া তাঁহার সহিত ঘোর সমরে ব্যাপ্ত হইলেন। সেই সময়ে দ্রোণ তাঁহার বাক্যানুসারে দুর্ভেদ্য চক্রব্যূহ রচনাপূর্বক অপ্রতিহতগতিতে পাণ্ডবগণের প্রতি আগমন করিলেন।

অনন্তর রাজা যুধিষ্ঠির আচার্যকে হৃদ্যাস্তভাবে আগমন করিতে দেখিয়া শঙ্কিতমনে উপায় চিন্তা করিতে লাগিলেন। দ্রোণকৃত দুর্ভেদ্য চক্রব্যূহ প্রবেশে আর কাহাকেও সক্ষম না দেখিয়া অবশেষে তিনি অর্জুন-সমতেজা অভিমমূ্যর উপর এই দুর্বহভার সমর্পণ করিয়া কহিলেন—

বৎস, আমরা কিরূপে এই চক্রব্যূহ ভেদ করিব কিছুই বুঝিতে পারিতেছি না। এক্ষণে অর্জুন প্রত্যাগমন করিয়া যাহাতে আমাদিগকে নিন্দা করিতে না পারেন, তুমি সেইরূপ অনুষ্ঠান করো।

অভিমন্যু কহিলেন—হে আৰ্য, আমি এই বাহ-
প্রবেশের কৌশল জ্ঞাত আছি বটে, কিন্তু ইহা হইতে
নির্গমনের উপায় অবগত নহি; অতএব প্রজ্বলিত হুতাশনে
পতঙ্গ-প্রবেশের ন্যায় এই বিপদাবহ কার্যে কি গমন করা
কর্তব্য।

তখন যুধিষ্ঠির কহিলেন—

বৎস, তুমি বাহ একবার ভেদ করিলে আমরা সকলেই
তোমার পশ্চাতে প্রবিষ্ট হইয়া তোমাকে রক্ষা ও কৌরব-
গণকে বিনষ্ট করিব; অতএব তুমি আমাদিগকে শক্রমধ্যে
প্রবেশের দ্বার করিয়া দাও।

মহাবীর অভিমন্যু এইরূপে অভিহিত হইয়া সারথিকে
কহিলেন—

হে স্নমিত্র, তুমি অবিলম্বে জ্রোণ-সৈন্য্যভিমুখে রথ
চালনা করো।

অভিমন্যু বারংবার এই আদেশ করিলে সারথি কহিল—

হে আয়ুধ্মন, আপনি অতি গুরুভার গ্রহণ করিতেছেন।
এরূপ হুঃসাহস আপনার উচিত হইতেছে কি না তাহা বিশেষ
বিবেচনাপূর্বক যুদ্ধে প্রবৃত্ত হউন।

তখন অর্জুননন্দন হাসিয়া কহিলেন—

ক্ষত্রিয়-পরিবৃত্ত জ্রোণের কথা দূরে থাক্, আমি ঐরাবত-
সমাক্রাট ত্রিংশাধিপতির সহিতও যুদ্ধ করিতে পশ্চাৎপদ হইয়া
না; অতএব তুমি অবিলম্বে রথচালনা করো।

সারথির বাক্য এইরূপে অনাদৃত হইলে সে অতিশয়

উদ্বিগ্ন-চিত্তে সুবর্ণ-মণ্ডিত পিঙ্গল-বর্ণ অশ্বগণকে দ্রোণ-সৈন্যভিमुखে চালনা করিল। তখন পাণ্ডব-বীরগণও অভিমন্যুকে অনুসরণ করিতে লাগিলেন। ভাগীরথীর শ্রোতের সমুদ্রপ্রবেশের জায় দ্রোণ-সৈন্যের সহিত অভিমন্যুর সমাগম অতি তুমুল হইয়া উঠিল। তথাপি তিনি অনায়াসে দ্রোণের সমক্ষেই ব্যাহভেদপূর্বক তন্মধ্যে প্রবেশ করিলেন।

কিন্তু তাঁহার অনুগমনে প্রবৃত্ত পাণ্ডবগণ জয়জয়ধ্বনি করিয়া ব্যাহ দ্বারেই নিবারিত হইলেন। সমবেত প্রযত্ন সত্ত্বেও তাঁহারা কিছুতেই দৈববলে বলীয়ান্ সিদ্ধুরাজকে অতিক্রম করিতে সমর্থ হইলেন না। সেই সুযোগে কৌরবগণ পুনরায় দৃঢ়-ব্যাহিত হইয়া চতুর্দিক হইতে অভিমন্যুকে বেষ্টিত করিলেন।

অনন্তর দুর্যোধন প্রথমে অর্জুন-তনয়কে প্রহার করিতে আরম্ভ করিলেন, কিন্তু সে মহাবীরের প্রতাপ শীঘ্রই তাঁহার পক্ষে অসহ্য হইয়া উঠিলে দ্রোণাচার্য, অশ্বখামা, কৃপা, কর্ণ, শল্য ও কৃতবর্মা অভিমন্যুকে নিবারিত করিয়া দুর্যোধনকে মুক্ত করিলেন। আশ্রয়লাভ হইতে এইরূপে গ্রাস আচ্ছিন্ন-হওয়া অভিমন্যুর সহ্য হইল না; তিনি শরজালে সকলের অশ্ব ও সারথিকে ব্যাহিত করিয়া মহারথগণকে পরাভূত করিয়া সিংহনাদ করিতে লাগিলেন।

পরে সন্নিহিত শল্যকে শরনিকরে গাঢ়তর বিদ্ধ করিয়া তাঁহাকে মূর্ছাপন্ন করিলেন। তদর্শনে সৈন্যগণ সিংহ-

নিপীড়িত যুগের শ্রায় পলায়ন করিতে লাগিল। শল্যের কনিষ্ঠ ভ্রাতা জ্যেষ্ঠকে বাধিত দেখিয়া অভিমন্যুকে আক্রমণ করিলে লঘুহস্ত অর্জুন-তনয় এককালে তাঁহাকে, তাঁহার সারথিকে এবং চক্রবর্তক-দ্বয়কে সংহার করিলেন।

তখন বহুসংখ্যক যোদ্ধা কেহ অশ্বে কেহ রথে কেহ গজে একসঙ্গে অভিমন্যুকে আক্রমণ করিলে তিনি কিছুমাত্র শঙ্কিত না হইয়া হাস্তমুখে তাহাদের মধ্যে যে অগ্রসর হইল, তাঁহাকেই নিপাতিত করিলেন।

পরে মহাবীর অর্জুন-নন্দন সমরান্ধ্রণে পরিভ্রমণ করিয়া দ্রোণ, কর্ণ, কৃপ, শল্য প্রভৃতি ভূপতিগণকে বাণ-বিদ্ধ করিতে আরম্ভ করিলে তাঁহার লঘুচারিহুপ্রযুক্ত তাঁহাকে একই সময়ে চতুর্দিকে বর্তমান বলিয়া বোধ হইতে লাগিল। দুর্যোধন ক্রুদ্ধ হইয়া কহিতে লাগিলেন—

হে ভূপগণ, দেখো, শিষ্য-পুত্র অভিমন্যুকে আচার্য স্নেহবশত নিধন করিতে ইচ্ছা করিতেছেন না। তিনি বধোদ্ধত হইলে এই বালক কখনই নিস্তার পাইত না। অর্জুন-পুত্র দ্রোণকর্তৃক রক্ষিত হইয়া আপনাকে বীর্যবান জ্ঞান করিতেছে; অতএব এই পৌরুষাভিমানী মূঢ়কে শীঘ্র সংহার করো।

এই বাক্য শ্রবণে দুঃশাসন দর্পভরে কহিলেন—

যেমন রাহু দিবাকরকে গ্রাস করে, আমি তদ্রূপ সকলের সমক্ষেই অভিমন্যুকে সংহার করিব।

এই বলিয়া তিনি উঠেঃশ্বরে ধ্বনি করিয়া ক্রোধভরে

অভিমম্বুর উপর শরবর্ষণ করিতে লাগিলেন। অনন্তর সেই রথ যুদ্ধ-বিশারদ বীরদ্বয় দক্ষিণে ও বামে বিচিত্র মণ্ডলাকারে বিচরণপূর্বক সংগ্রাম আরম্ভ করিলেন। মহাবীর অভিমম্বু কহিলেন—

অদ্ব আমি সৌভাগ্যক্রমে সমরে তোমাকে সম্মুখীন দেখিলাম। আমার পিতৃব্যগণকে যে কটুবাক্যসকল কহিয়াছিলে এক্ষণে আমি তাহার প্রতিশোধ লইব।

এই বলিয়া দুঃশাসনের বিনাশ নিমিত্ত অর্জুন-নন্দন অগ্নির স্নায় তেজঃসম্পন্ন ভীষণ বাণ নিক্ষেপ করিলেন। মহাবাহু দুঃশাসন তাহাতে গাঢ় বিদ্ধ হইয়া রথোপরি শয়ান ও মূর্ছিত হইলেন। তাঁহার সারথি তাঁহাকে তদবস্থ দেখিয়া রণস্থল হইতে অপমৃত করিল।

তখন ধার্তরাষ্ট্রগণের পরম হিতকারী মহাধনুর্ধর কর্ণ ক্রোধান্বিতচিত্তে সুতীক্ষ্ণ সায়কদ্বারা অভিমম্বুকে বিদ্ধ করিলেন; কিন্তু অর্জুন-তনয় কিছুমাত্র বিচলিত না হইয়া কর্ণকে বহুসংখ্যক শরে বিদ্ধ করিয়া সম্মুখীন সমগ্র রথিগণকে অতিশয় ব্যাধিত করিলেন; ফলত কেহই তাঁহার কৌরব-সৈন্য-দলন নিবারণ করিতে পারিলেন না। অভিমম্বু-বিক্ষিপ্ত বিষম বিশিখসকল রথ ভগ্ন এবং নাগ ও অশ্বসমুদায় নিধন করিতে লাগিল। আয়ুধ অঙ্গুলীত ও অঙ্গদ-সমন্বিত হেমাভরণ-ভূষিত ছিন্নবাহু ও মাল্যকুণ্ডল-সমলংকৃত নর-মস্তকসকল ধরাতে নিপতিত হইতে থাকিল।

ওদিকে সৈন্যগণ দেখিয়া স্তম্ভিত হইয়া রহিল যে,

পাণ্ডবগণ ধৃষ্টদ্যুম্ন বিরাট ক্রশদ প্রভৃতি মহারথগণ-রক্ষিত হইয়াও যতবার অভিমন্যুকে রক্ষা করিবার জন্য সেই চক্রবাহ প্রবেশের চেষ্টা করিলেন, ততবার একাকী সিদ্ধুরাজ জয়দ্রথ অভিমন্যু-বিদারিত বাহুদ্বার অবরুদ্ধ রাখিয়া তাঁহা-দিগকে নিবারণ করিলেন। অবশেষে অবসর-প্রাপ্ত কৌরব-গণকর্তৃক সেই চক্রবাহ পুনরায় দৃঢ়বদ্ধ হইলে তাহাদের প্রবেশের আশা সম্পূর্ণ তিরোহিত হইল। সুতরাং শেষ পর্যন্ত অরক্ষিত অর্জুন-নন্দন একাকী সমুদ্রমধ্যস্থিত মকরের-শায় সেই সুমহৎ সৈন্যদলকে বিক্ষোভিত করিতে লাগিলেন।

ক্রমে তিনি যখন একান্ত দুর্ধর্ষ হইয়া উঠিয়া কর্ণাদি বীরগণকে বারংবার নিবারণপূর্বক ছুর্যোধনের পুত্র লক্ষ্মণ মদ্ররাজনন্দন রুক্মরথ-প্রভৃতি বহুসংখ্যক রাজকুমার ও মহারথ কোশলাধিপতি বৃহদলকে সংহার করিলেন, তখন কৌরবগণ অতিশয় উদ্বিগ্ন হইয়া ভ্রোণাচার্যের শরণাপন্ন হইলেন।

কর্ণ কহিলেন—হে ব্রহ্মন, আপনি অবিলম্বে ইহার উপায় না করিলে অর্জুন-পুত্র আমাদের সকলকেই একে একে সংহার করিবে।

আচার্য শ্রীতমনে প্রিয়শিষ্যপুত্রের সমর-পরাক্রম অবলোকন করিতেছিলেন, তিনি কহিলেন—

হে বীরগণ, তোমরা কি এপর্যন্ত অভিমন্যুকে একবারও বিশ্রাম করিতে দেখিয়াছ। অর্জুন-তনয়ের লঘুচারিত্র অবলোকন করো। কৌরবমহারথগণ যে ক্রোধপরবশ হইয়াও

উহাকে ব্যথিত করিবার অণুমাত্র অবসর প্রাপ্ত হইতেছেন না, ইহাতে আমি শিশুপুত্রের প্রতি একান্ত প্রসন্ন হইয়াছি। উহার শরজালে আমি ব্যথিত হইয়াও সন্তুষ্ট হইতেছি।

কর্ণ কহিলেন—হে আচার্য, সময় পরিত্যাগ করা নিতান্তই লজ্জাকর বলিয়াই আমি এখানে এখনও অবস্থান করিতেছি। এই মহাতেজা অর্জুনকুমারের দারুণ শর-নিকরে আমার শরীর অতিশয় দগ্ধ হইয়াছে।

তখন মহাবীর দ্রোণাচার্য হস্তসহকারে কহিলেন—

হে রাধেয়, এই অভিমন্যুর কবচ অভেদ্য। উহার বন্ধনকৌশল আমিই উহার পিতাকে শিক্ষা দিয়াছিলাম; অতএব তোমরা বৃথা বাণ-বর্ষণ করিতেছ। যদি উহাকে পরাজয় করিতে বাসনা থাকে, তবে দ্বৈরথ-যুদ্ধ পরিত্যাগ করিয়া তোমরা সম্মিলিত হইয়া প্রথমে উহাকে নিরস্ত্র ও বিরথ করো, পশ্চাৎ সংগ্রাম করিও। উহার হস্তে অস্ত্র থাকিতে উহাকে পরাজয় করা তোমাদের সাধ্য নয়।

দ্রোণ-বাক্য শ্রবণমাত্র সকলে সত্বর একত্র হইয়া কেহ অভিমন্যুর ধনু, কেহ অশ্ব, কেহ সারণি, কেহ কেহ উহার নিষ্কিপ্ত অস্ত্রসমুদায় ছেদন করিতে—দ্রোণ, কৃপ, অশ্বখামা ও কৃতবর্মা। কারুণ্যশূন্য হইয়া এককালে সেই বালককে প্রহার করিতে আরম্ভ করিলেন।

তখন অভিমন্যু খড়্গাচর্ম-ধারণপূর্বক অশ্বহীন রথ হইতে লক্ষ্যপ্রদান করিলে দ্রোণ তাঁহার খড়্গা ও কর্ণ তাঁহার চর্ম ছেদন করিলেন। একে একে সকল অস্ত্র বিনষ্ট হইলে

অভিমন্যু নির্ভীকচিত্তে একমাত্র অবশিষ্ট চক্র ধারণপূর্বক
 দ্রোণের প্রতি ধাবিত হইলেন। সেই সময়ে বীরগণ-পরিবৃত
 শোণিতামূলিপ্ত-কলেবর অপ্রাপ্তবয়স্ক কুমার অপূর্বরূপ ধারণ
 করিলেন। ভূপতিগণ সেই অলৌকিক তেজোদীপ্তি সন্দর্শনে
 উদ্বিগ্ন হইয়া সমবেত অস্ত্রবর্ষণদ্বারা সেই চক্র খণ্ড খণ্ড করিলেন।

সেই অবসরে দ্ব্যশাসনপুত্র গদাহস্তে তাঁহার উপর
 নিপতিত হইয়া তাঁহার মস্তকে গদাঘাত করিল। সেই
 অকস্মাৎ আঘাতে তরুশ্রেণী মর্দনাস্তর নিবৃত্ত সমীরণের ন্যায়
 হস্ত্যশ্বরথসহ অসংখ্য বীর নিপাতনান্তে সেই পূর্ণচন্দ্রনিভানন্
 অভিমন্যু ভূ-বিলুপ্তিত হইয়া প্রাণত্যাগ করিলেন।

তখন কৌরব সৈন্যমধ্যে মহা হর্ষধ্বনি উথিত হইয়া
 গগনভেদ করিলে পাণ্ডবগণ এই শোচনীয় ঘটনা পরিজ্ঞাত
 হইলেন। সৈন্যগণ অতিশয় ভীত হইয়া যুদ্ধিষ্ঠিরের সমক্ষেই
 পলায়নের উপক্রম করিল। যুদ্ধিষ্ঠির কহিলেন—

হে বীরগণ, মহাবাহু অভিমন্যু একাকী বহু সৈন্যমধ্যে
 পতিত হইলেও সমরে পরাভূত না হইয়া ক্ষত্রিয়ের পরমগতি
 লাভ করিয়াছেন। তোমরা তাঁহার দৃষ্টান্ত অনুসরণ করো,
 পলায়ন করিয়ো না।

এই বাক্যে লজ্জিত হইয়া পাণ্ডব-যোদ্ধগণ হৃদাস্ত-
 বেগে কৌরবগণকে আক্রমণপূর্বক বিমূখ করিলেন। এই
 সময় দিন ও রজনীর সন্ধিস্থল উপস্থিত হইলে মরীচিমালী
 অস্ত্রসকলের প্রভাহরণপূর্বক রক্তোৎপলতুল্য কলেবরে
 অস্তাচলচূড়া অবলম্বন করিলেন। তখন উভয়পক্ষ সমর-

ব্যায়ামে একান্ত অবসন্ন হওয়ায় সংগ্রামস্থল দেখিতে দেখিতে জনশূন্য হইল।

পাণ্ডববীরগণ অতিশয় বিষন্ন-চিত্তে রথ কবচ ও শরাশন পরিত্যাগপূর্বক অভিমহ্যুর চিন্তায় ভারাক্রান্ত অন্তঃকরণে যুধিষ্ঠিরের চতুর্দিকে উপবিষ্ট হইলেন। ধর্মরাজ অতিশয় কাতর মনে বিলাপ করিতে লাগিলেন—

হায়, মহাবীর অভিমহ্যু আমারই নিয়োগে শক্রবৃহ-
মধ্যে একাকী প্রবেশপূর্বক প্রাণত্যাগ করিল। আমরা
সেই বালকের প্রতি হৃৎসহ ভারাপণ করিয়া তাহাকে রক্ষা
করিতে সমর্থ হইলাম না। অত্ন আমি কিরূপে ধনঞ্জয় ও
পুত্রবৎসলা সুভদ্রাকে অবলোকন করিব। আজি জয়লাভ,
রাজ্যলাভ বা স্বর্গলাভ কিছুই আর প্রীতিজনক বোধ হইতেছে
না।

লোক-ক্ষয়কর সে ভয়ানক দিনের অবসানে মহাবীর
অর্জুন দিব্যাস্ত্রজালে ত্রিগর্তগণকে নিঃশেষে সংহার করিয়া
স্বীয় জয়শীল রথে আরোহণপূর্বক বাসুদেবের সহিত যুদ্ধ-
বৃত্তান্ত আলোচনা করিতে করিতে শিবিরে উপস্থিত হইলেন।
সেনানিবেশ নিরানন্দ ও শ্রী-ভ্রষ্ট দেখিয়া অর্জুন উদ্বিগ্ন-চিত্তে
কহিতে লাগিলেন—

হে জনার্দন, আজি মঙ্গলত্বর্ষ-নিষন ও হনুভিনাদসহ
শঙ্খধ্বনি হইতেছে না কেন। যোদ্ধৃগণও আমাকে দেখিয়া
অধোমুখে ইতস্তত পলায়ন করিতেছে। হে মাধব, কোনো
ঘোরতর বিপদ উপস্থিত হয় নাই তো।

এইরূপ কথোপকথনে কৃষ্ণ অর্জুন শিবিরে প্রবেশ করিয়া দেখিলেন যে, পাণ্ডবগণ নিতান্ত বিমর্ষ ও বিচেতন-প্রায় হইয়া বসিয়া আছেন। দুর্মনায়মান ধনঞ্জয় শিবির-মধ্যে ভ্রাতা ও পুত্রগণের সকলকেই অবলোকন করিলেন; কিন্তু অভিমন্যুকে দেখিতে পাইলেন না। তখন তিনি ব্যাকুলকণ্ঠে কহিলেন—

হে বীরগণ, তোমাদের সকলেরই মুখ বিবর্ণ দেখিতেছি এবং তোমরা কেহই আমাকে আজি অভিনন্দন করিতেছ না। বৎস অভিমন্যু কোথায়। সে অদীনাত্মা প্রত্যহ প্রত্যাগমন-পূর্বক আমাকে অভ্যর্থনা করে। আজ আমি শত্রু-সংহার করিয়া আগমন করিতেছি; কিন্তু সে কেন হস্তমুখে আমাকে সম্ভাষণ করিতেছে না। শুনিলাম, আজ আচার্য চক্রব্যূহ নিমাণ করিয়াছিলেন, তোমরা অভিমন্যুকে তাহার মধ্যে প্রবিষ্ট হইতে দাও নাই তো। এ ব্যূহ সে ভেদ করিতে জানে মাত্র, আমি তাহাকে নিষ্ক্রমণের কৌশল উপদেশ করি নাই।

অনন্তর সকলকে নিরস্তর দেখিয়া অর্জুন প্রকৃত ব্যাপার বুঝিতে পারিয়া অসহ-শোকে বিলাপ করিতে লাগিলেন—

হা পুত্র, তোমাকে বার বার নিরীক্ষণ করিয়াও তৃপ্ত হইতাম না, এক্ষণে কাল এই ভাগ্যহীনের নিকট হইতে তোমাকে হরণ করিল। আমার হৃদয় বজ্রসারবৎ কঠিন সন্দেহ নাই, এইজন্তই সে দীর্ঘবাহুর অদর্শনে এখনও ইহা বিদীর্ণ হইতেছে না। এক্ষণে বুঝিলাম কী নিমিত্ত গবিত

ধাতরাষ্ট্রগণ সিংহনাদ করিতেছিল। কৃষ্ণও আগমনকালে কৌরবগণের প্রতি যুযুৎসুর এই তিরস্কার-বাক্য শ্রবণ করিয়াছিলেন—

—হে অধামিকগণ, তোমরা অজুর্নকে পরাজয় করিতে অসমর্থ হইয়া এক বালকের প্রাণ-সংহার করিয়া বৃথা আনন্দিত হইতেছ।

মহাত্মা বাসুদেব ধনঞ্জয়কে পুত্রশোকে নিতান্ত কাতর দেখিয়া তাঁহার সাস্বনার্থে কহিলেন—

হে ধনঞ্জয়, এরূপ ব্যাকুল হইয়ো না। শূরগণের এই গতিই বাঞ্ছনীয়। অভিমন্যু বীরজনাভাজিত দিব্য লোক প্রাপ্ত হইয়াছে সন্দেহ নাই। তোমার ভ্রাতা ও বন্ধুগণ তোমার শোক সন্দর্শনে একান্ত সমুপ্ত ও অভিভূত হইতেছেন, অতএব তুমি আত্মসংযমপূর্বক তাহাদিগকে আশ্বস্ত করো।

কিয়ৎক্ষণ এইরূপে অভিমন্যু-বধ সংক্রান্ত ঘটনাবলী চিন্তা করিতে করিতে ক্রমে তিনি ক্রোধে অধীর হইয়া উঠিলেন। তখন করে করে নিপীড়ন ও উন্মত্তের শায় দৃষ্টি-পাতপূর্বক যুধিষ্ঠিরকে সম্বোধন করিয়া কহিলেন—

মহারাজ, আমি প্রতিজ্ঞা করিতেছি, কালই জয়দ্রথকে বিনাশ করিব। সে পাপাত্মা আমাদের পূর্ব সদ্যবহার বিস্মৃত হইয়া দুর্ধোধনের পক্ষ অবলম্বনপূর্বক এই শোচনীয় দুর্ঘটনার হেতুস্বরূপ হইয়াছে; অতএব কালই তাহাকে সংহার করিব।

—হে পুরুষশ্রেষ্ঠগণ, আমি যাহা কহিলাম, যদি তাহা অনুষ্ঠান না করি, তবে আমি যেন পুণ্যলব্ধ লোক প্রাপ্ত না হই। যদি জয়দ্রথকে বধ করিতে না পারি, তবে যেন বিশ্বাসঘাতী মাতৃপিতৃহন্তার গতি লাভ করি। যদি কাল পাপাত্মা জয়দ্রথ জীবিত থাকিতে দিবাকর অন্তগত হয়, তবে এই স্থানে তোমাদের সমক্ষে আমি প্রজ্জ্বলিত ছতাশনে প্রবিষ্ট হইব।

মহাবীর ধনঞ্জয় এই প্রতিজ্ঞা করিয়া বামে ও দক্ষিণে গাণ্ডীব ও তুর্গীর নিক্ষেপ করিলে সেই শব্দ গগন স্পর্শ করিল। বাসুদেব সুগভীর পাঞ্চজন্ত শঙ্খধ্বনি করিয়া সেই ভীষণ প্রতিজ্ঞা সমর্থন করিলেন। তখন অর্জুনও দেবদত্ত শঙ্খধ্বনি করিলেন এবং চতুর্দিকে সৈন্তমধ্য হইতে সহস্র বাত্মধ্বনি ও সিংহনাদ প্রাতুভূত হইল।

কৌরবগণ চরদ্বারা এই মহাশব্দের কারণ অবগত হইলে সিদ্ধুরাজ ভয়ে বিমুগ্ধচিত্ত হইয়া অনেকক্ষণ চিস্তার পর অবশেষে সভায় গমনপূর্বক কহিলেন—

হে ভূপালগণ, ধনঞ্জয় আমাকে শমনভবনে প্রেরণ করিবার সংকল্প করিতেছেন; অতএব হয় আপনারা আমাকে রক্ষা করিবার সমুচিত ব্যবস্থা করুন; না হইলে আপনাদের মঙ্গল হউক, আমি স্বস্থানে প্রস্থানপূর্বক প্রাণরক্ষা করি।

জয়দ্রথ ভয়ব্যাকুলিত-চিত্তে একরূপ কহিলে, কার্য-সাধন-তৎপর হুর্ধোধন কহিলেন—

হে সিদ্ধুরাজ, ভীত হইয়ো না । এই সকল বীরগণের মধ্যে তুমি অবস্থান করিলে কেহ তোমার অনিষ্টসাধনে সক্ষম হইবে না । আমার একাদশ অক্ষৌহিনী কল্য তোমারই রক্ষার নিমিত্ত যত্ন করিবে । কর্ণ, ভুরিশ্রবা, শল্য, সুদক্ষিণ, দ্রোণ, অশ্বখামা, শকুনিপ্রভৃতি বীরগণ তোমার চতুর্দিকে অবস্থান করিবেন । তুমি স্বয়ংও রথিশ্রেষ্ঠ ; অতএব অর্জুনকে ভয় করিবার কোনই কারণ নাই ।

জয়দ্রথ এইরূপে ত্তর্যোধনকর্তৃক আশ্বাসিত হইয়া তাঁহার সহিত দ্রোণাচার্যের নিকট গমনপূর্বক তাঁহার শরণাপন্ন হইলেন ; তখন দ্রোণ জয়দ্রথকে অভয় প্রদানপূর্বক কহিলেন—

হে রাজন, আমি তোমাকে অর্জুন-ভয় হইতে পরিত্রাণ করিব, সন্দেহ নাই । আমি তোমার রক্ষার নিমিত্ত এমন এক ব্যূহ প্রস্তুত করিব, যাহা অর্জুন কদাচ উত্তীর্ণ হইতে পারিবেন না, অতএব ভীত হইয়ো না, যুদ্ধে প্রবৃত্ত হও ।

দ্রোণের বাক্যে শঙ্কশূন্য হইয়া জয়দ্রথ যুদ্ধে কৃতসংকল্প হইলেন । তখন সমুদায় কোরবসৈন্য হৃষ্টচিত্তে সিংহনাদ ও বাদিত্র-বাদন করিতে আরম্ভ করিল ।

সে রজনী প্রভাত হইলে মহাবীর দ্রোণাচার্য স্বয়ং অশ্ব-সঞ্চালনপূর্বক প্রলয়বেগে পরিভ্রমণ করিয়া ব্যূহরচনা করিতে লাগিলেন । অনন্তর সৈন্যগণ যথাস্থানে সন্নিবেশিত হইলে তিনি জয়দ্রথকে কহিলেন—

—হে সিদ্ধুরাজ, তুমি, কর্ণ, অশ্বখামা, কূপ ও শতসহস্র

চতুরঙ্গিণী সেনায় রক্ষিত হইয়া আমার ছয় ক্রোশ পশ্চাতে অবস্থান করো। শ্রেষ্ঠ বীরগণ স্ব-স্ব-সৈন্যবিভাগ লইয়া মধ্যস্থল রক্ষা করিবেন। আমাকে অতিক্রমপূর্বক এই বীরশ্রেণী ভেদ করিয়া সূর্যাস্তের পূর্বে তোমাকে প্রাপ্ত হওয়া পাণ্ডবগণের কথা দূরে থাক, স্বয়ং দেবগণেরও অসাধ্য হইবে।

জয়দ্রথ দ্রোণকর্তৃক এইরূপে আশ্বাসিত হইয়া গান্ধার-দেশীয় যোদ্ধা ও বর্মধারী অশ্বারোহিণ-সমভিব্যাহারে আচার্য-নির্দিষ্ট স্থানে গমন করিলেন। ধৃতরাষ্ট্রপুত্র দুঃশাসন ও দুর্মর্ষণ সর্বাগ্রগামি-সৈন্যমধ্যে রহিলেন। তৎপশ্চাতে দ্রোণ শকটাকারে সৈন্যের সংস্থানপূর্বক ব্যাহরচনা করিয়া স্বয়ং সেই ব্যুহমুখে অবস্থান করিলেন। তৎপশ্চাতে জয়দ্রথের নিকট গমনের পথ রোধ করিয়া ভোজরাজ কৃতবর্মা ও কাষোজরাজ সুদক্ষিণ এই শকট ব্যাহের চক্রাকারে স্ব স্ব সৈন্যবিভাগ সন্নিবেশিত করিলেন।

এই সূর্যহং ব্যাহের পশ্চাতে বহুযোজন ব্যবধানে সূচি-নামক অপর এক গূঢ় ব্যুহ রক্ষিত হইল। ইহার মধ্যে কর্ণ দুর্ধোধন শল্য কৃপ প্রভৃতি বীরগণ জয়দ্রথকে আচ্ছাদন করিয়া অবস্থিত হইলেন। এই অদ্রুত কৌশলযুক্ত ব্যুহদ্বয় অবলোকন করিয়া কৌরবগণ জয়দ্রথকে রক্ষিত ও অর্জুনকে প্রতিজ্ঞানুসারে চিতানলে দগ্ধ বলিয়া নিশ্চয় করিলেন।

অনন্তর পাণ্ডবসৈন্য প্রতীব্যাহিত হইলে অর্জুন যুধিষ্ঠিরের রক্ষার্থে উপযুক্ত ব্যবস্থা করিয়া কহিলেন—

হে বামুদেব, যেখানে তুমি বর্ষণ অবস্থান করিতেছে সেই স্থানে প্রথমত রথ লইয়া চলো। আমি ঐ গজ-সৈন্য ভেদ করিয়া অরি-বাহু মধ্যে প্রবিষ্ট হইব।

মহাবাহু কৃষ্ণ এই বাক্য অনুসারে রথচালনা করিলে অর্জুনের সহিত কৌরবগণের ভীষণ সংগ্রাম সমুপস্থিত হইল। মেঘ ঘেমন পবিত্রোপরি ঝারি বর্ষণ করে, মহাবীর অর্জুন তদ্রূপ অরাতিগণের উপর শরবর্ষণ করিতে আরম্ভ করিলেন। তাহাতে অসংখ্য রথী পদাতি ও মাতঙ্গ বিনষ্ট হইলে কৌরব-যোদ্ধগণ হতোৎসাহ ও পলায়নপর হইল।

তখন দুঃশাসন ভ্রাতার সৈন্য-বিভাগকে তদবস্থ দেখিয়া ক্রোধভরে অর্জুনাভিমুখে গমনপূর্বক গজসৈন্যদ্বারা তাহাকে বেঁটন করিলেন। ক্ষত্রিয়শ্রেষ্ঠ ধনঞ্জয় সাযকদ্বারা তাহাদের কলেবর ছিন্ন ভিন্ন করিতে করিতে সেই উদ্ভাল-তরঙ্গ-সংকুল মহাসাগরের ন্যায় ক্ষুদ্র শত্রুদল ভেদ করিয়া তন্মধ্যে প্রবেশ-পূর্বক সন্নতপর্ব তল্লদ্বারা গজাক্রুত পুরুষগণের মস্তকচ্ছেদন করিতে লাগিলেন।

এইরূপে কতকগুলি গজ ভূপতিত ও কতকগুলি আরোহিণী হইয়া সৈন্যামধ্যে ভ্রমণ করিতে আরম্ভ করিলে সৈন্যগণ পুনরায় পলায়নের উপক্রম করিল। দুঃশাসন ও পার্থশরে জর্জরিতাঙ্গ হইয়া দ্রোণ-রক্ষিত বাহু মধ্যে আশ্রয় লইলেন।

তখন অর্জুন সেই শকটাকার বাহু-মুখ প্রাপ্ত হইয়া আচার্যের সহিত সম্মিলিত হইলেন। তিনি প্রথমত বিনীত-

ভাবে গুরুর নিকট ব্যাহপ্রবেশের অনুমতি চাহিলে দ্রোণ হস্তসহকারে কহিলেন—

হে অর্জুন, তুমি অগ্রে আমাকে জয় না করিয়া কদাচ জয়দ্রথকে প্রাপ্ত হইতে পারিবে না।

এই বলিয়া দ্রোণ তীক্ষ্ণ শরজালে অর্জুনকে আচ্ছাদন করিলে তিনি গুরুর সহিত যুদ্ধে প্রবৃত্ত হইলেন। উভয় বীর হস্তলাঘব প্রদর্শনপূর্বক পরস্পরের অস্ত্র নিবারণ জ্যাচ্ছেদন ও এককালে বহু অস্ত্রবর্ষণ করিয়া বহুক্ৰণ অতি আশ্চর্য কৌশলযুক্ত যুদ্ধ করিতে লাগিলেন। তখন ধীমান বাসুদেব প্রকৃত কার্যসাধনের প্রতি দৃষ্টি রাখিয়া অর্জুনকে কহিলেন—

হে মহাবাহো, আমাদের আর কালক্ষেপ করা উচিত হয় না। আচার্যের সহিত বহুক্ৰণ যুদ্ধ করা হইয়াছে; অতএব চলো উহাকে অতিক্রম করিয়া ব্যাহ-প্রবেশ করি।

অর্জুন এই কথায় সন্মত হইলে কৃষ্ণ দ্রোণকে প্রদক্ষিণ-পূর্বক মহাবেগে তাঁহাকে লজ্জন করিয়া ব্যাহ-মধ্যে ধাবমান হইলেন। দ্রোণাচার্য তাঁহাকে অবরোধ করিবার অক্ষমতা অনুভব করিয়া কহিলেন—

হে পার্থ, তুমি না শত্রু পরাজয় না করিয়া কদাচ নিবৃত্ত হও না। তবে এক্ষণে কোথায় পলায়ন করিতেছ।

জয়দ্রথ-বধোৎসুক ধনঞ্জয় কহিলেন—

হে আচার্য, আপনি আমার গুরু, শত্রু নহেন; সুতরাং আমার সে নিয়ম আপনার সম্বন্ধে খাটে না।

এই বলিয়া তিনি যুধামন্যু ও উত্তমৌজা এই দুই চক্রবাক লইয়া বিশাল শত্রু-সেনামধ্যে প্রবেশ করিলেন।

তখন কাশ্যোজ ও ভোজরাজ অর্জুনকে নিবারণ করিতে আরম্ভ করিলেন। প্রতাপশালী পাণ্ডুতনয়ের বিষম বিশিখ-প্রভাবে অশ্বসকল গাঢ় বিদ্ধ, রথসমুদয় ছিন্ন ভিন্ন এবং আরোহিসমেত কুঞ্জরগণ ভূতলে নিপতিত হইতে লাগিল। বহু যোদ্ধার সহিত একাকী সংগ্রাম করিতে বাধ্য হওয়ায় অর্জুনের গতিরোধ হইতেছে অবলোকন করিয়া তাঁহার উত্তেজনাক্ষেপে কৃষ্ণ কহিলেন—

হে পার্থ, তোমার আর এই বীরগণের প্রতি দয়া করিবার প্রয়োজন নাই। আমাদের অণুকার নির্দিষ্ট কার্যের জন্য অল্পমাত্র সময় অবশিষ্ট আছে।

এই কথায় অর্জুন মহাবেগে বাণবর্ষণ আরম্ভ করিলে কৃতবর্মা ও সুদক্ষিণ মূছিতপ্রায় হইলেন, সেই অবসরে বাসুদেব অলক্ষিতবেগে তাঁহাদের রক্ষিত ভোজ ও কাশ্যোজ সৈন্যদল অতিক্রম করিলেন।

এদিকে মধ্যদিনান্তে দিনমণি অস্তাচলশিখরাভিমুখী হইলে, অর্জুন বহুসংখ্যক কৌরব-যোদ্ধা নিপাতন এবং সৈন্যদলকে বিজ্রাবণ ও বিলোড়নপূর্বক শ্রান্ত-দেহে ক্ষত-বিক্ষতাজ অশ্ব লইয়া শকটবাহ মধ্য হইতে নিষ্ক্রান্ত হইলেন, তখন বহুদূরে ব্যাহিত শ্রেষ্ঠমহারথগণ-রক্ষিত জয়দ্রথের অবস্থান-ভূমি দৃষ্ট হইতে লাগিল।

অর্জুন কহিলেন—হে মাধব, আমাদের অশ্ব নিতান্ত শ্রান্ত ও শরাদিত হইয়াছে ; অতএব তাহাদিগকে বিশ্রাম দিবার এই উপযুক্ত অবসর ।

কৃষ্ণ এই বাক্য অনুমোদন করিলে মহাবীর অর্জুন অসম্ভ্রান্ত-চিত্তে রথ হইতে অবতরণপূর্বক গাণ্ডীবহস্তে রথ ও অশ্বসহ বাসুদেবকে রক্ষার নিমিত্ত অবস্থান করিলেন । তখন অশ্ববিদ্ধা-সুনিপুণ কৃষ্ণ অর্জুন-শর-রক্ষিত ক্ষেত্রमध्ये অশ্বগণকে মোচন করিয়া স্বহস্তে তাহাদের শল্যোদ্ধার ও গাত্র পরিমার্জনপূর্বক তাহাদিগকে জলপান করাইলেন ।

অনন্তর কিয়ৎক্ষণ বিশ্রামানন্তর অশ্বগণের শ্রম ও গ্লানি অপনোদন হইলে কৃষ্ণ তাহাদিগকে পুনরায় যোজনা করিয়া অর্জুনের সহিত রথাক্রুত হইলেন । তখন অশ্বগণ যেন পুনর্জীবন প্রাপ্ত হইয়া জয়দ্রথের দিকে দ্রুতবেগে রথ লইয়া চলিল ।

অর্জুনকে অপ্রতিহত-গতিতে ধাবমান দেখিয়া কোরব-সৈন্যमध्ये মহাকোলাহল উপস্থিত হওয়ায় দুর্ধোধন অর্জুনকে নিবারণ করিবার জন্য সত্তর উপস্থিত হইলেন । তখন অর্জুন ক্রুদ্ধ হইয়া তাঁহাকে আক্রমণ করিলে সৈন্যাগণ-मध्ये—রাজা হত হইলেন বলিয়া হাহাকার-ধ্বনি উপস্থিত হইল । কিন্তু দুর্ধোধন যখন অর্জুন-বিক্ষিপ্ত প্রচণ্ড অস্ত্রসমুদয় অনায়াসে সহ্য করিয়া তাঁহাকে ও কৃষ্ণকে বিদ্ধ করিতে আরম্ভ করিলেন, তখন সকলে একান্ত বিস্ময়াবিষ্টচিত্তে চতুর্দিক হইতে সিংহনাদ করিতে আরম্ভ করিল ।

কৃষ্ণ কহিলেন—হে পার্থ, কী আশ্চর্য, তোমার বাণসকল বার্থ দেখিয়া আমি অতিশয় বিস্মিত হইতেছি। আজ কি পূৰ্বাপেক্ষা গাণ্ডীবের অথবা তোমার মুষ্টির বা বাহুদ্বয়ের বলহানি হইয়াছে।

অর্জুন কহিলেন—হে বাসুদেব, নিশ্চয়ই আচার্য্য দুর্যোধনের গাত্রে অভেদ কবচ বন্ধন করিয়াছেন, সে কবচের বন্ধন গুরু কেবল আমাকেই শিক্ষা দিয়াছিলেন। মনুষ্য-নিষ্কিপ্ত বাণের কথা দূরে থাক, ইন্দ্রের অশনিতেও উহা বিভিন্ন হইবার নহে। কিন্তু স্ত্রীলোকের ন্যায় দুর্যোধন কেবল বেন গাত্রের শোভার্থে এই কবচ ধারণ করিয়াছে, সে ইহার উপযুক্ত যুদ্ধপ্রণালী কিছুই অবগত নহে; অতএব সে এখনি আমার ভুজবল অবগত হইবে।

এই বলিয়া ধনঞ্জয় বর্মভেদচেষ্টা পরিত্যাগ করিয়া, দুর্যোধনের শরমুষ্টি ও শরাসন ছেদন এবং অশ্ব ও সারথি বিনাশপূর্বক তাহার রথ খণ্ড খণ্ড করিয়া ফেলিলেন। তখন দুর্যোধনের রক্ষার্থে অসংখ্য কৌরব-সৈন্য তথায় উপস্থিত হইয়া অর্জুনের গতিরোধ করিল।

দিবার শেষভাগে অর্জুনকে এইরূপে অবরুদ্ধ দেখিয়া ধূলি-দূষিত ও ঘর্মাক্ত-কলেবর বাসুদেব সাহায্যের নিমিত্ত বার বার পাকজন্য শব্দে প্রবল ধ্বনি করিতে আরম্ভ করিলেন।

যুধিষ্ঠির ভীমের নিকট উপস্থিত হইয়া কহিলেন—

হে ভীম, যে বীর একমাত্র রথে দেব গন্ধর্ব ও

দৈত্যগণকে পরাজয় করিয়াছে, আমি তোমার সেই ভ্রাতা অর্জুনের ধ্বজদণ্ড আর দেখিতে পাইতেছি না।

এই কথা বলিতে বলিতে যুধিষ্ঠির একান্ত কাতর হইয়া মোহাবিষ্ট হইলেন। ভীম ভ্রাতাকে তদবস্থ দেখিয়া অতিশয় উদ্বিগ্ন হইয়া কহিলেন—

হে ধর্মরাজ, তোমাকে কখনও এক্রূপ কাতর দেখি নাই, পূর্বে আমরা অবসন্ন হইলে তুমি আমাদের আশ্বাস প্রদান করিতে; অতএব এক্রূপে শোক পরিত্যাগ করিয়া আমাদের আজ্ঞা করো—কোন কর্ম করিতে হইবে।

এই কথায় কথঞ্চিৎ প্রকৃতিস্থ হইয়া যুধিষ্ঠির কহিলেন—

হে বৃকোদর, প্রিয়দর্শন অর্জুন সূর্যোদয়ের সময়ে জয়দ্রথ-বধার্থে কৌরব-সৈন্যমধ্যে প্রবিষ্ট হইয়াছেন, এখনও প্রত্যাগত হইতেছেন না, এই আমার শোকের মূল কারণ।

ভীমসেন কহিলেন—মহারাজ। আর বৃথা শোক করিয়ো না। আমি এখনই চলিলাম।

অনন্তর ভ্রাতৃ-হিতনিরত মহাবীর ভীম অস্ত্র-শস্ত্র গ্রহণ পূর্বক শঙ্খধ্বনি ও সিংহনাদ করিয়া যাত্রা করিলেন। মারুতগামিঅশ্ব-সংযোজিত রথে তিনি সেনাদিগকে বিমর্দন ও নিবারণকারী বীরগণকে অতিক্রম করিয়া দ্রোণ-রক্ষিত ব্যূহমুখে মহাবেগে ধাবিত হইলেন।

আচার্য কহিলেন—হে ভীমসেন, আমি অতঃপর তোমার

বিপক্ষ, আমাকে পরাজয় না করিয়া তুমি কদাচ সৈন্যমধ্যে প্রবেশ করিতে সক্ষম হইবে না।।

ভীম এই বাক্যে রুষ্ট হইয়া প্রত্যুত্তর করিলেন—

হে ব্রহ্মন, ইতিপূর্বে আমরা আপনাকে গুরু ও বন্ধু বলিয়া জানিতাম, অতঃ আপনি বিপরীত ভাব ধারণ করিতেছেন। যাহা হউক আমি কৃপাপরবশ অর্জুন নহি। আপনি যদি বিপক্ষ হইতে ইচ্ছা করিয়া থাকেন, তবে আমিও অবিলম্বে শত্রুবৎ আচরণ করিব।

এই বলিয়া ভীমপরাক্রম ভীমসেন কালদণ্ড-সদৃশ গদা বিঘূর্ণনপূর্বক তাহা দ্রোণের প্রতি নিক্ষেপ করিলেন। দ্রোণ আশ্চর্য্যরসে অস্ত্র উপায় না দেখিয়া তৎক্ষণাৎ রথ হইতে লক্ষ্যপ্রদান করিলে সেই প্রচণ্ড গদাঘাতে সারথি অশ্ব ও রথ এককালে বিনষ্ট হইল।

তখন ধাতরাষ্ট্রগণ চতুর্দিক হইতে ধাবিত হইয়া ভীমকে আক্রমণ করিলেন, কিন্তু তিনি অনায়াসে সম্মুখাগত ব্যক্তিগণকে সংহার করিয়া উদ্ধত বায়ু যেমন পাদপ-দলকে বিমর্দন করে, তদ্রূপ কৌরবসেনাকে দলন ও অতিক্রম করিলেন।

এইরূপে ব্যূহের পশ্চাদর্শে উপনীত হইয়া ভীম দেখিলেন যে, ভোজ ও কাশ্ব্যাজরাজ-রক্ষিত সৈন্যগণের সহিত সাত্যকি তুমুল যুদ্ধে ব্যাপ্ত আছেন। সেই সুযোগ অবলম্বন করিয়া ভীমসেন অলক্ষিতভাবে শকটব্যূহ হইতে নিক্ষেপিত হইলেন এবং অদূরে কৃষ্ণাৰ্জুন-সমেত কপিধ্বজ রথ তাঁহার দৃষ্টিগোচর

হইলে তিনি বর্ষাকালীন জলদপটলের গভীর গর্জনের শ্রায় ভয়ংকর সিংহনাদ করিলেন ।

পরিচিত ভীমকণ্ঠ শ্রবণে কৃষ্ণার্জুন বারংবার হর্ষধ্বনি করিয়া তাহার উত্তর প্রদান করিলেন । সেই শব্দ যুধিষ্ঠিরের ঋতিগোচর হইলে তিনি একান্ত প্রীতমনে ভীমসেনের প্রশংসা করিয়া ভাবিতে লাগিলেন—

অহো, ভীম যথার্থই আমার আজ্ঞা প্রতিপালনপূর্বক আমাকে অর্জুনের কুশলসংবাদ জ্ঞাপন করিল । এক্ষণে সেই অরাতিবিজয়ী অর্জুনসম্বন্ধে আমার হুশ্চিন্তা তিরোহিত হইল ।

ভীমকে ব্যূহ হইতে উত্তীর্ণ দেখিয়া ধাতরাষ্ট্রগণ জীবিতাশা পরিত্যাগ করিয়া তাঁহাকে পুনরায় পশ্চাৎ হইতে আক্রমণ করিলেন ; কিন্তু মহাবল বৃকোদর স্বীয় প্রতিজ্ঞা পালনপূর্বক তাহাদিগকে একে একে যম-সদনে প্রেরণ করিতে আরম্ভ করিলেন । এইরূপে ধৃতরাষ্ট্রের একত্রিশ পুত্র নিহত হইলে ভীমকে নিবারণার্থে মহাবীর কর্ণ সূচি-ব্যূহ হইতে অগ্রসর হইয়া আসিলেন ।

তখন উভয় বীরের মধ্যে ঘোর যুদ্ধ আরম্ভ হইল । কর্ণ অনায়াসে ভীম-নিষ্কিপ্ত অস্ত্রসমুদায় খণ্ড খণ্ড করিলেন । ভীম ধনুর্যুদ্ধ নিষ্ফল দেখিয়া অসিচর্ম ধারণপূর্বক রথ হইতে অবতরণ করিলেন ; কিন্তু কর্ণ অস্ত্রদ্বারা সে অসিচর্মও বিনষ্ট করিলেন ; এবং অস্ত্রহীন ভীমের প্রতি ধাবমান হইলেন । তখন নিরুপায় ভীমসেন পলায়ন করিয়া মৃত-গজ-কলেবর-সকলের মধ্যে বিচরণপূর্বক আশ্রয় লাভ করিলেন ।

এই সময়ে কর্ণ বিশেষ অবসর প্রাপ্ত হইয়া ও কুন্তীর নিকট স্বীয় প্রতিজ্ঞা স্মরণপূর্বক ভীমসেনকে সংহার করিলেন না। তিনি ভীমের আশ্রয়স্বরূপ গজদেহ ছিন্ন করিয়া রথগমনের পথ নির্মাণপূর্বক তাঁহাকে প্রাপ্ত হইলেন এবং ধনুষ্কোটিদ্বারা প্রহারপূর্বক সহাস্রাবদনে কহিলেন—

অহে ভীম, তুমি অস্ত্রবিদ্যা কিছুমাত্র অবগত নহ, রণস্থল তোমার উপযুক্ত স্থান নহে। মাদৃশ ব্যক্তির সহিত যুদ্ধ করিতে গেলে এরূপ অবস্থা ঘটয়া থাকে।

ভীম অঙ্গস্পৃষ্ট সেই কর্ণের কামূক তৎক্ষণাৎ আচ্ছিন্ন করিয়া তদ্বারা তাঁহাকে প্রতিপ্রহার করিয়া কহিলেন—

আরে মূঢ় স্বয়ং ইন্দ্রেরও জয় এবং পরাজয় উভয়ই হইয়া থাকে। আমিও তোমাকে ইতিপূর্বে বহুবার পরাজয় করিয়াছি, তবে কেন বৃথা শ্লাঘা করিতেছ। তুমি একবার আমার সঙ্গে মল্লযুদ্ধে প্রবৃত্ত হও, তাহা হইলে তোমার প্রকৃত পৌরুষ বুঝা যাইবে।

কিন্তু কর্ণ সকলের সমক্ষে তাহাতে পশ্চাৎপদ হইয়া স্বস্থানে প্রস্থান করিলেন।

অর্জুন যখন দুস্তর সৈন্যসাগর পার হইয়াছিলেন, সে সময়ে তাঁহার চক্ররক্ষকদ্বয় তাঁহার সহিত উত্তীর্ণ হইতে পারেন নাই। এক্ষণে যুধামন্যু ও উত্তমৌজা সৈন্যমণ্ডলীর বহির্ভাগ দিয়া অর্জুনের অহুসন্ধানে তথায় উপস্থিত হইলেন। রথহীন ভীম ও সাত্যকি তাঁহাদের একরথে আরোহণ করিয়া অর্জুনের অহুসরণ করিলেন। তখন জয়দ্রথ-বেষ্টনকারী

দুর্যোধন কর্ণ কৃপ অশ্বখামাপ্রভৃতি বীরগণ এবং স্বয়ং সিদ্ধুরাজ যুদ্ধার্থে প্রস্তুত হইলেন ।

সমস্ত দিনের চেষ্টার পর অবশেষে জয়দ্রথকে সম্মুখে অবস্থিত দেখিয়া অর্জুন ক্রোধপ্রদীপ্ত নেত্রে তাঁহাকে যেন দঙ্ক করিতে লাগিলেন ।

দুর্যোধন কহিলেন—হে কর্ণ, অর্জুনের সহিত তোমার যুদ্ধের এই সময় উপস্থিত হইয়াছে ; অতএব যাহাতে জয়দ্রথ বিনষ্ট না হয়, তাহার চেষ্টা করো । দিবাভাগের অভ্যন্তরাত্র অবশিষ্ট আছে, অতএব অর্জুনের যুদ্ধের বিদ্র বিধান করিতে পারিলেই আমরা জয়দ্রথ-রক্ষায় কৃতকার্য হইব এবং স্বীয় প্রতিজ্ঞা অনুসারে অর্জুন অনলে প্রবেশ করিলে আমরা যুদ্ধেও জয়লাভ করিব ।

তদন্তরে কর্ণ কহিলেন—

মহারাজ, ইতিপূর্বেই মহাপরাক্রান্ত ভীমসেনের সহিত যুদ্ধকালে আমার কলেবর ছিন্নবিচ্ছিন্ন হইয়াছে, যাহা হউক আমি তোমার নিমিত্তই প্রাণ ধারণ করিয়া আছি ; অতএব সাধ্যমতো অর্জুনকে নিবারণ করিব ।

ইত্যবসরে অর্জুন জয়দ্রথকে প্রাপ্ত হইবার জন্য কৌরবসৈন্য সংহার করিতে আরম্ভ করিয়া বীরগণের ভূজদণ্ড ও মস্তকচ্ছেদন করিয়া অনতিকালমধ্যে ধরণীতল কুধিরাভিষিক্ত করিলেন । অবশেষে দুর্যোধন কর্ণ শল্য অশ্বখামা ও কৃপ জয়দ্রথকে পশ্চাত্তাণ্ডে রাখিয়া অর্জুনকে আক্রমণ করিলেন । সেই সঙ্গে অন্যান্য কৌরব-বীরগণ ভাস্করকে লোহিতবর্ণ

দেখিয়া মহা উৎসাহসহকারে কার্মুক আনত করিয়া তাঁহার প্রতি শত শত সায়ক প্রয়োগ করিতে আরম্ভ করিলেন।

মহাবীর ধনঞ্জয় ক্রুদ্ধ হইয়া প্রথমত অগ্রবর্তী কর্ণের অশ্ব ও সারথি বিনাশপূর্বক তাঁহার মর্মস্থান বিদ্ধ করিলেন এবং পরে কর্ণ রুধিরাক্ত কলেবরে অশ্বখামার রথে আশ্রয় গ্রহণ করিলে তিনি অশ্বখামা ও মদ্ররাজের সহিত যুদ্ধে প্রবৃত্ত হইলেন। কৌরবগণ-নিষ্কিপ্ত শরজালে যে গাঢ় অন্ধকার হইয়াছিল, পার্থ তাহা দিব্যাস্ত্রদ্বারা অনায়াসে দূরীকৃত করিলেন। এইরূপে মহাবীর অর্জুন অরাতীগণের জীবন ও কীৰ্ত্তি বিলোপ করিয়া মূর্তিমান মৃত্যুর ন্যায় রণস্থলে ভ্রমণ করিতে লাগিলেন।

ক্রমে সৈন্যগণ সেই দেবরাজের অশনি-নির্ঘোষতুল্য গাণ্ডীব-টংকারধ্বনি শ্রবণ করিয়া বাতাহত সমুদ্রজলের ন্যায় অতিশয় উদ্ভ্রাস্ত হইয়া চতুর্দিকে বিক্ষিপ্ত হইয়া পড়িল। কিন্তু অচিরে সূর্যাস্তের আশায় উৎফুল্ল কৌরব-প্রধানগণ পরস্পরের রথ সংশ্লিষ্ট করিয়া অবিচলিতচিত্তে জয়জয়ধ্বনি বেষ্টনপূর্বক অর্জুনের বাণ নিবারণ করিতে লাগিলেন। তন্নিমিত্ত মহাবীর ধনঞ্জয় জয়জয়ধ্বনি আক্রমণ করিবার কোনো ছিদ্র প্রাপ্ত হইলেন না।

এই শংকটের অবস্থায় অন্তগমনোন্মুখ বিভাকর ক্ষণকাল তিমিরাবৃত্ত হইল। ইহাতে কৌরবগণ সূর্যকে অন্তগত জ্ঞান করিয়া সতর্কতা পরিত্যাগপূর্বক হর্ষপ্রকাশ করিতে লাগিলেন

এবং জয়দ্রথও আনন্দভরে আশ্রয়স্থান পরিত্যাগপূর্বক উল্লসিত আননে অস্তগত সূর্যের দিকে দৃষ্টিবদ্ধ করিলেন।

একমাত্র বাসুদেব প্রকৃত অবস্থা বুঝিতে পারিয়াছিলেন, তিনি তৎক্ষণাৎ অর্জুনকে কহিলেন—

হে পার্থ, সূর্য প্রকৃতপক্ষে অস্তগত হয় নাই, ক্ষণকাল অদৃশ্য হইয়াছে মাত্র, তুমি এই অবসরে অনায়াসে জয়দ্রথের মস্তক ছেদন করিতে পারিবে।

এই কথায় অর্জুন সত্তর সিদ্ধুরাজের রথাভিমুখে ধাবমান হইলে জয়দ্রথ-রক্ষকগণ সংশয়াক্রান্ত হইয়া পূর্ববৎ তাঁহাকে বেষ্টন করিবার সুযোগ পাইলেন না। সৈন্যগণও ধনঞ্জয়ের রোষাবিষ্ট আগমনে ভীত হইয়া তাঁহাকে পথ প্রদান করিল। তখন অর্জুন অভিমুখ্যার মৃত্যুর হেতুস্বরূপ সেই জয়দ্রথকে প্রাপ্ত হইয়া স্বক্কা-লেহনপূর্বক কৃতসঙ্কান ভীষণ শর পরিত্যাগ করিলেন। শৌনপক্ষী যেরূপ শকুন্তকে হরণ করে, তদ্রূপ গাণ্ডীব-নিমুক্ত সেই বাণ জয়দ্রথের মস্তক হরণ করিল।

ইত্যবসরে সূর্য তিমির-মুক্ত হইয়া লোহিত-কলেবরের শেবাংশ প্রকাশ করিলে, সকলে দেখিলেন যে সূর্যাস্তের পূর্বেই অর্জুন স্বীয় প্রতিজ্ঞা সফল করিয়াছেন।

তখন জয়ঘোষণার্থে কৃষ্ণ পাঞ্চজন্ম শঙ্খ প্রদ্ব্যাপিত করিলে ভীম ঘোরতর সিংহনাদে দিগ্বিদিক পরিপূর্ণ করিলেন। তৎপ্রবণে যুধিষ্ঠির জয়দ্রথ-বধ বৃত্তান্ত অহুমান করিয়া উচ্ছ্বসিত আনন্দভরে বাত্মক্ষনিদ্বারা অস্তরীক্ষ প্রতিধ্বনিত করাইলেন।

এদিকে ত্র্যযোধন সিদ্ধুরাজের নিধনে হতাস্বাস হইয়া বাম্পাকুল-লোচনে ও দীনবদনে ভগ্নদশন ভূজঙ্গের শ্রায় নিঃস্বাস পরিত্যাগ করিতে লাগিলেন। অনন্তর তিনি দ্রোণ-সমীপে গমনপূর্বক কহিলেন—

হে আচার্য, অস্বপক্ষীয় মহীপালগণের বিনাশ অবলোকন করুন। যে সকল ভূপালগণ আমাকে রাজ্য প্রদান করিবার অভিলাষ করিয়াছিলেন, এক্ষণে তাঁহারা সমস্ত ঐশ্বর্য পরিত্যাগপূর্বক ধরাসনে শয়ান রহিয়াছেন। আমি অতি কাপুরুষ, যেহেতু মিত্রগণকে স্বীয় কার্য সাধনার্থে মৃত্যুমুখে নিপাতিত করিলাম। হে গুরো, আপনিই আমাদের মৃত্যু বিধান করিয়াছেন। আমার নিমিত্ত যখন এই রাজগণ অরক্ষিত হইয়া বিনষ্ট হইয়াছেন, তখন আর আমার জীবনধারণে প্রয়োজন কী।

দ্রোণ প্রত্যুত্তরে কহিলেন—

যে ত্র্যযোধন, কেন অনর্থক আমাকে বাক্যবাণে বিদ্ধ করিতেছ। আমি তো তোমাকে সতত বলিয়াই থাকি যে, অর্জুন অজেয়। আমরা ত্রিলোকমধ্যে যাহাকে সর্বাপেক্ষা শ্রেষ্ঠ যোদ্ধা মনে করিতাম, সেই ভীষ্ম ইহারই প্রভাবে সমরশায়ী হইলেন। তবে আমি যে তোমার সৈন্যরক্ষায় কৃতকার্য হইতেছি না, তাহাতে আমার অপরাধ কোথায়। বৎস, দ্যুত-সভায় শকুনি যে অক্ষনিক্বেপ করিয়াছিল, সেইগুলি এক্ষণে অর্জুনের হস্তে সুতীক্ষ্ণ শররূপ ধারণ করিয়া তোমার সৈন্য বিনষ্ট করিতেছে। অধর্মের ফল হইতে

নিষ্কৃতি নাই। যাহা হউক পাণ্ডবগণ সহ পাঞ্চাল-সৈন্য আমাকে আক্রমণ করিতে আসিতেছে; অতএব এক্ষণে আমি তোমার বাক্য-শল্যে একান্ত পীড়িত হইলেও প্রাণপণ যুদ্ধ করিতে চলিলাম, তুমিও সাধ্যমতো সৈন্যরক্ষাকার্ষে মনোযোগ করো।

এই বলিয়া দ্রোণাচার্য ব্যথিত-মনে পাণ্ডব-সৈন্যের প্রতি ধাবিত হইয়া যুধিষ্ঠিরকে আক্রমণ করিলেন। দ্রোণ-শরে সৈন্যগণকে নিপীড়িত দেখিয়া ভীমার্জুন কোরব-সৈন্যমধ্যে প্রবেশপূর্বক আচার্যকে নিবারণ করিলেন।

তখন যে অসংখ্যবীর-নিপাতন ভয়ংকর সংগ্রাম উপস্থিত হইল তন্মধ্যে সকল শত্রুর উপর গাণ্ডীবের ভীষণ নিশ্চন ঘন ঘন ঞ্ফত হইতে লাগিল। ভীমসেন ধাতরাষ্ট্রের প্রতি নারাচ সন্ধানপূর্বক তাহাদিগকে বজ্রাহত পাদপের ন্যায় ভূতল-পাতিত করিতে লাগিলেন। মহাধনুর্ধর সাত্যকিও স্বীয় বিক্রম প্রদর্শন করিতে ক্রটি করেন নাই। তিনি বিবিধ প্রকার শরযুদ্ধ আরম্ভ করিয়া বিশিখদ্বারা বীরগণের মস্তক এবং ক্ষুরপ্রদ্বারা গজসমুদায়ের গুণ্ড ও অশ্বগণের গ্রীবা ছেদন করিলেন। তাহাদের চীৎকারশব্দে সমাগত ঘোররূপা রজনী ভীষণতর হইয়া উঠিল।

তদৃষ্টে রাজা দুর্যোধন কর্ণকে কহিলেন—

হে মিত্রবৎসল, ঐ দেখো ইন্দ্রতুল্য পরাক্রমশালী পাণ্ডব ও পাঞ্চালগণ হৃষ্টচিত্তে সিংহনাদ করিতেছে। এক্ষণে তুমি অশ্বপক্ষীয় যোদ্ধগণকে পরিজ্ঞান করো।

কর্ণ কহিলেন—মহারাজ, আমি জীবিত থাকিতে তোমার বিষাদ করিবার প্রয়োজন নাই। আমি আজি পাণ্ডবগণের সহিত সমাগত পাঞ্চাল কেকয় ও বৃষ্ণিগণকে পরাজয়পূর্বক তোমাকে সাম্রাজ্য প্রদান করিব।

অর্জুন কৃষ্ণকে কহিলেন—

হে বামুদেব, ভুজঙ্গম যেমন পাদস্পর্শ সহ্য করিতে পারে না, আমি তদ্রূপ রণস্থলে সূতপুত্রের পরাক্রম সহ্য করিতে সমর্থ নহি। অতএব শীঘ্র কর্ণ সমীপে রথ সঞ্চালন করো।

কর্ণের অমোঘ-শক্তির বৃদ্ধান্ত অবগত থাকায় কৃষ্ণ প্রত্যুত্তরে কহিলেন—

হে অর্জুন, এক্ষণে নানা কারণে তোমার কর্ণের অভিযুখীন হওয়া উচিত হইতেছে না। নিশাচর ঘটোৎকচ উহাকে উপযুক্তরূপে নিবারণ করিতে পারিবে; অতএব তাহাকে এই কার্যে নিয়োগ করো।

কৃষ্ণের উপদেশানুসারে অর্জুন ঘটোৎকচকে আহ্বান করিয়া কহিলেন—

বৎস, এক্ষণে যুদ্ধে তোমার পরাক্রম প্রদর্শনের উপযুক্ত সময় উপস্থিত; রাক্ষসী-মায়াপ্রভৃতি তোমার যাহা কিছু অস্ত্র আছে তাহা অবলম্বন করিয়া কর্ণকে নিবারণ করো।

ঘটোৎকচ কহিল—হে মহাত্মন, আপনার অনুমতিক্রমে আমি অণু কর্ণের সহিত একরূপ যুদ্ধ করিব, যাহা লোকে সহজে বিশ্বস্ত হইতে পারিবে না।

অরাতি-ঘাতন নিশাচর ঘটোৎকচ এই বলিয়া কর্ণের সহিত তুমুল সংগ্রাম আরম্ভ করিল। কর্ণ কোনো ক্রমে ঘটোৎকচকে অতিক্রম না করিতে পারিয়া দিব্যাস্ত্র বিস্তার করিলেন। তদদর্শনে ঘটোৎকচ রাক্ষসী মায়া পরিগ্রহণপূর্বক ভয়ংকর শস্ত্রধারী রাক্ষস-সৈন্যেরদ্বারা পরিবৃত্ত হইল। সেই নিশাচরগণ রাত্রিপ্রভাবে সমধিক বীর্যশালী হইয়া শিলা-বর্ষণ আরম্ভ করিয়া কৌরবগণকে বিশেষরূপে ব্যথিত করিল।

একমাত্র কর্ণ অবিচলিতচিত্তে সেই রাক্ষসী মায়া নিরাকৃত করিতে যত্নবান হইলেন। রাক্ষসগণ মায়াযুক্ত বিফল দেখিয়া অস্ত্রবর্ষণের দ্বারা কর্ণকে সংহার করিতে চেষ্টা করিল। ঘন ঘন নিষ্কিপ্ত শর শক্তি শূল গদা চক্রপ্রভৃতিতে কৌরবগণ আক্রান্ত ও অভিভূত হইতে লাগিলেন। অশ্বগণ ছিন্ন, কুঞ্জরগণ প্রমথিত ও শিলাঘাতে রথসমুদায় নিষ্পিষ্ট হইল।

অবশেষে অস্ত্রজ্বালসমাচ্ছন্ন কর্ণ ব্যতীত কেহই রণস্থলে অবস্থান করিতে পারিল না। কিন্তু মহাবীর ঘটোৎকচ যখন এক শতদ্বী নিষ্ক্রেপ করিয়া এককালে কর্ণের অশ্বচতুষ্টয় বিনাশ করিল, তখন বিরথ রাধেয় কৌরবগণকে পলায়মান এবং ঘটোৎকচকে জয়শীল অবলোকন করিয়া তৎকালোচিত কর্তব্য চিন্তা করিতে লাগিলেন। চতুর্দিক হইতে কাতরস্বরে কৌরবগণ অশ্রুনয় করিতে লাগিলেন—

হে সূতনন্দন, কৌরবসেনা বৃষ্টি অজুই সমূলে বিনষ্ট হয়। তুমি সত্বর বাঁসবদত্ত শক্তি প্রয়োগে এই নিশাচরকে

সংহার করো। এ ঘোর রজনী উত্তীর্ণ হইতে পারিলে বীরগণ পরে অর্জুনকে পরাজয় করিবার অবসর পাইবেন। অতএব তাঁহার নিমিত্ত এই অমোঘ শক্তি বৃথা পোষণ না করিয়া উহা এখনই প্রয়োগ করো।

মহাবীর কর্ণ সেই ভয়ংকর নিশীথসময়ে স্বীয় পক্ষের আতঁনাদ উপেক্ষা করিতে না পারিয়া অর্জুন-বধ-নিমিত্ত সেই বহুযত্ন-রক্ষিত অমোঘ শক্তি গ্রহণ ও নিক্ষেপ করিবামাত্র উহা ঘটোৎকচের হৃদয় ভেদ করিয়া উর্ধ্বগতি অবলম্বনপূর্বক ইন্দ্রের নিকট প্রত্যাগত হইল। কৌরবগণ নিশাচর-হস্ত হইতে পরিত্রাণ পাইয়া পরমাহ্লাদে সিংহনাদ ও শঙ্খধ্বনি করিলেন। হৃষীকেশ কর্ণকে যথোচিত পূজাপূর্বক তাঁহাকে স্বীয় রথে আরোপিত করিয়া সৈন্য-মধ্যে প্রবিষ্ট হইলেন।

কিন্তু পাণ্ডবগণকে ভীম-তনয়ের শোকে অতিশয় কাতর দেখিয়াও কৃষ্ণ তাঁহাদিগকে ব্যথিত করিয়া হর্ষ প্রকাশ করিতে লাগিলেন। তখন অর্জুন কহিলেন—

হে বাসুদেব, বৎস ঘটোৎকচের মৃত্যুতে আমরা সকলেই শোকাতঁ হইয়াছি, কিন্তু তুমি কী নিমিত্ত অনুপযুক্ত সময়ে আনন্দ করিতেছ।

কৃষ্ণ কহিলেন—হে অর্জুন, কর্ণ আজি ইন্দ্রদত্ত মহাশক্তি পরিত্যাগ করিয়া আমাদের অতিশয় প্রীতিকর কার্যের অনুষ্ঠান করিয়াছেন। কর্ণের নিকট এই মহা অস্ত্র থাকিতে স্বয়ং যমও তাঁহার সমক্ষে বিরাজ করিতে সক্ষম হইতেন না। মহাতেজা কর্ণ যেদিন কবচ ও কুণ্ডলের বিনিময়ে ইন্দ্রের নিকট এই

শক্তি প্রাপ্ত হইয়াছিলেন, তদবধি তিনি তোমার বিনাশনিমিত্ত তাহা সম্বন্ধে রক্ষা করিয়াছিলেন ;—হে পার্থ, অতঃপর শক্তি-শূন্য হওয়ায় উহাকে নিপতিত জ্ঞান করিতে পারো। এই নিমিত্ত আমি তোমাকে নিষেধ করিয়া নিশাচরকে উহার সহিত যুদ্ধার্থে প্রেরণ করিয়াছিলাম। যতদিন তোমার যত্নস্বরূপ এই শক্তির প্রতিকার করিতে পারি নাই, ততদিন আমার নিদ্রা ও হর্ষ তিরোহিত হইয়াছিল। অতঃপর আমার কৌশল সফল হওয়ায় আনন্দ করিতেছি।

—যাহা হউক, এক্ষণে আমাদের সৈন্যগণ হাহাকার-রবে ইতস্তত পলায়ন করিতেছে, বোধ হয় মহাবীর দ্রোণ তাহা-দিগকে আক্রমণ করিয়াছেন ; অতএব হে অরিন্দম, তুমি তাঁহাকে নিবারণ করো।

তখন যুধিষ্ঠিরের আজ্ঞাক্রমে সমগ্র যোদ্ধৃগণ দ্রোণজিগীষু হইয়া অর্জুনের সহিত মহাবেগে ধাবমান হইলেন। রাজা দুর্যোধন তদৃষ্টে রোষাবিষ্টচিত্তে আচার্যের রক্ষার্থে কৌরবগণকে নিয়োগ করিলেন। কিন্তু উভয়পক্ষের শ্রাস্তবাহন বীরগণ রাত্রি অধিক হওয়ায় নিদ্রালু হইয়াছিলেন, সুতরাং নিশ্চেষ্টবৎ যুদ্ধ করিতে লাগিলেন। সেনাপতি অর্জুন তাঁহাদিগকে তদবস্থ দেখিয়া উচ্চৈঃস্বরে কহিলেন—

হে সেনাগণ, তোমরা অন্ধকারে সমাবৃত ও নিতান্ত পরিশ্রান্ত হইয়াছ ; অতএব কিয়ৎক্ষণ যুদ্ধ হইতে নিবৃত্ত হইয়া এই রণভূমিতেই নিদ্রা যাও।

কৌরব-সেনাপতি দ্রোণও সেই বাক্য অনুমোদন করিলে

কৌরব ও পাণ্ডব-সৈন্যগণ অর্জুনের ভূয়সী প্রশংসা করিয়া কেহ বাহনের উপর কেহ ক্ষিতিতলে শয়ন করিয়া নিদ্রাস্থ লাভ করিল।

অনন্তর নয়ন-প্রীতিবর্ধন পাণ্ডবর্ণ চন্দ্রমা মাহেন্দ্রী দিক্ অলংকৃত করিলে ক্রমে ভূমণ্ডল জ্যোতির্ময় হইয়া উঠিল। ঐ আলোকে সৈন্যগণ প্রবোধিত হইয়া রাত্রির শেষভাগে পুনরায় যুদ্ধার্থে প্রস্তুত হইল।

অনন্তর কৌরবসৈন্য দুই ভাগে বিভক্ত হইল। এক ভাগ দ্রোণের এবং অপর ভাগ দুর্ধোধনের ও কর্ণের অধীনে ঘোরতর সংগ্রাম আরম্ভ করিল। তখন যুদ্ধিষ্টির কহিলেন—

হে কেশব, অভিমন্যুবধে জয়দ্রথের অতি অল্প অপরাধ ছিল, কিন্তু তজ্জন্তু অর্জুন তাহাকে সংহার করিলেন। আমার মতে যদি কোনো বিশেষ শত্রুকে বিনাশ করা আমাদের অবশ্য কর্তব্য হয়, তবে অগ্রে দ্রোণ ও কর্ণকে সংহার করা অর্জুনের কর্তব্য। উহাদের সাহায্যে দুর্ধোধন আশ্রয় হইয়া যুদ্ধকার্য চালনা করিতেছেন।

যুদ্ধিষ্টির এই বলিয়া দ্রোণকে আক্রমণ করিলে অর্জুন অগ্ন্যাগ্নী বীরগণের সহিত তাহাকে রক্ষা করিতে লাগিলেন। সর্বাগ্রে দ্রুপদ ও বিরাট দ্রোণের প্রতি ধাবমান হইলেন, কিন্তু দ্রোণ অনায়াসেই তাহাদের নিকৃষ্ট অস্ত্রসমূহ খণ্ড খণ্ড করিলেন। তখন বিরাট এক তোমর ও দ্রুপদ এক প্রাস নিক্ষেপ করিলে দ্রোণ অতিশয় রুষ্ট হইয়া সেই অস্ত্রদ্বয়

ছেদনপূর্বক সুশাণিত ভল্লদ্বারা দ্রুপদ ও বিরাটকে যমসদনে প্রেরণ করিলেন—

তদৃষ্টে দ্রুপদ-তনয় ধৃষ্টদ্যুম্ন প্রতিজ্ঞা করিলেন—

অন্য যদি দ্রোণ আমার হস্ত হইতে মুক্তিলাভ করেন, তবে যেন আমি ক্ষত্রিয়লোক হইতে পরিভ্রষ্ট হই।

তখন একদিকে পাঞ্চালগণ এবং অন্যদিকে অর্জুন অবস্থান করিয়া দ্রোণাচার্যকে প্রহার করিতে আরম্ভ করিলেন। তথাপি দেবরাজ যেমন রোষাবিষ্ট হইয়া দানবদল সংহার করিয়াছিলেন, তদ্রূপ দ্রোণাচার্য পাঞ্চালগণের প্রাণনাশ করিতে আরম্ভ করিলেন। তখন পাণ্ডবগণ বলিতে লাগিলেন—

অর্জুন যখন কোনোমতেই গুরুর অনিষ্টাচরণ করিবেন না, তখন আচার্যের হস্তেই যে আমরাগকে পরাজিত হইতে হইবে তাহার সন্দেহ কী।

এই কথা শ্রবণে কৃষ্ণ কহিলেন—

হে অর্জুন, তুমি ব্যতীত কেহই বলপ্রভাবে দ্রোণকে নিহত করিতে সক্ষম নহে, সুতরাং অপর কাহারও দ্বারা আচার্যের পরাজয় সাধন করিতে হইলে কৌশল অবলম্বন না করিলে উপায় নাই। অশ্বখামার মৃত্যু হইয়াছে শুনিলে আচার্য প্রিয়তম পুত্রের শোকে নিস্তেজ হইয়া পড়িবেন, অতএব কোনো ব্যক্তি তাঁহাকে অশ্বখামার মৃত্যুসংবাদ প্রদান করুক।

এ প্রস্তাবে অর্জুন কর্ণপাতই করিলেন না, কিন্তু কৃষ্ণের

অনুরোধে অনন্তোপায় যুধিষ্ঠির অতিকষ্টে উহাতে সম্মত হইলেন। অনন্তর কিংকর্তব্য অবধারিত হইলে তদনুসারে ভীমসেন অবস্থি-রাজের অশ্বখামা নামক এক গজ সংহার-পূর্বক অতি লজ্জিত মনে দ্রোণ-সমীপে গমন করিয়া—অশ্বখামা নিহত হইয়াছে—বলিয়া চীৎকার করিতে আরম্ভ করিলেন।

দ্রোণাচার্য সেই দারুণ শোকাবহ সংবাদ শ্রবণমাত্র অতিশয় বিষন্নচিত্ত হইলেন। কিন্তু পুত্রকে অমিত-পরাক্রম-শালী জানিয়া তিনি ধৈর্যাবলম্বনপূর্বক এই সংবাদের সত্যতা সমর্থনের প্রতীক্ষায় ধৃষ্টদ্যুম্নের সহিত যুদ্ধ করিতে লাগিলেন। তখন কৃষ্ণ পুনরায় যুধিষ্ঠিরকে কহিলেন—

হে রাজন, যদি আচার্য রোষপরবশ হইয়া এইরূপে আর অর্ধদিন যুদ্ধ করেন, তবে নিশ্চয়ই তোমার সমুদায় সৈন্যদল নিঃশেষিত হইবে; অতএব তুমি স্বয়ং দ্রোণকে অশ্বখামার মৃত্যু-সংবাদ পুনরায় না জানাইলে আমাদের আর উপায় নাই। প্রাণরক্ষার্থে মিথ্যা কহিলে পাপস্পর্শ হয় না। ভীমের কথায় আচার্য অনাস্থা প্রদর্শন করিয়াছেন, কিন্তু তুমি কহিলে তিনি নিশ্চয়ই বিশ্বাস করিবেন।

ধর্মরাজ যুধিষ্ঠির ভবিষ্যের অমূল্যজ্ঞানীয়তা উপলব্ধি করিয়া এবং আচার্যকে নিম্নমভাবে ধর্মধর্ম নির্বিচারে সৈন্যসংহারে প্রবৃত্ত দেখিয়া কৃষ্ণের উপদেশপালনে সম্মত হইলেন। কিন্তু দ্রোণসমীপে উপস্থিত হইয়া জয়াভিলাষ এবং মিথ্যাকথনভয়ে যুগপৎ আক্রান্ত হইয়া তিনি—অশ্বখামা

হত হইয়াছেন—এই কথা স্পষ্ট বলিয়া অস্পষ্টরূপে গজ শব্দ উচ্চারণ করিলেন। ভীমের বাক্য যুধিষ্ঠিরের দ্বারা সমর্থিত হইলে জ্ঞোণ পুত্রশোকে অতিশয় অবসন্ন হইয়া বিচেতনপ্রায় হইলেন।

সেই সন্ধ্যোগ পাইবামাত্র ধৃষ্টদ্যুম্ন তরবারি বিঘৃণিত করিয়া স্বীয় রথ হইতে লক্ষ প্রদান করিলেন। তখন অজুন অতিশয় অনুকম্পাপরতন্ত্র হইয়া—আচার্যকে বিনাশ করিয়ো না—বলিয়া চীৎকার করিতে করিতে ধৃষ্টদ্যুম্নকে নিবারণোদ্দেশে তৎপ্রতি ধাবমান হইলেন; কিন্তু তিনি আগত হইবার পূর্বেই ক্রপদ-নন্দন জ্ঞোণকে প্রাপ্ত হইয়া তাঁহার মস্তকচ্ছেদনপূর্বক তাঁহাকে ভূপাতিত করিলেন। তদর্শনে ভীমসেন বাহ্মাফোটনদ্বারা ধরাতল কম্পিত করিয়া মহাহ্লাদে ধৃষ্টদ্যুম্নকে আলিঙ্গনপূর্বক কহিলেন—

হে অরাতিনিপাতন, কর্ণ ও দুর্ধোধন অনুরূপদশা প্রাপ্ত হইলে আমি তোমাকে সমরবিজয়ী বলিয়া পুনরায় আলিঙ্গন করিব।

মহাবলপরাক্রান্ত জ্ঞোণাচার্য পাঁচ দিন ঘোরতর যুদ্ধ করিয়া নশ্বর-দেহত্যাগাস্তে ব্রহ্মলোক প্রাপ্ত হইলে দুর্ধোধন-প্রভৃতি মহীপালগণ সৈন্য অবহারপূর্বক একান্ত বিমনায়মান হইয়া শোকাকুল অশ্বখামাকে বেষ্টনপূর্বক সান্ন্যাস দিতে দিতে সেই দীর্ঘ রজনী অতিবাহিত করিলেন। অনন্তর রাজা দুর্ধোধন কহিলেন—

হে কর্ণ, আমি তোমার বলবীৰ্য এবং আমার প্রতি

তোমার অটল সৌহার্দের বিষয় বিলক্ষণ অবগত আছি।
আমার সেনাপতি মহারথ ভীষ্ম ও দ্রোণাচার্য মিহত
হইয়াছেন। এক্ষণে তুমি ভিন্ন আমার আর গতি নাই।

মহাবীর কর্ণ এইরূপে অভিহিত হইয়া কহিলেন—

হে কুরুরাজ, আমি পূর্বেই তোমাকে বলিয়া রাখিয়াছি
যে, পাণ্ডবগণকে সবাঙ্কবে পরাজয় করিব; অতএব এক্ষণে
তোমার নিয়োগানুসারে আমি নিশ্চয়ই সেনাপতিত্ব গ্রহণ
করিব। তুমি নিশ্চিত-চিত্তে শত্রুগণকে পরাজিত বলিয়াই
স্থির করিতে পারো।

তখন রাজা দুর্যোধন বিজয়াভিলাষী ভূপালগণের সহিত
গাত্রোত্থান করিয়া সুবর্ণময় ও মৃন্ময় পূর্ণকুম্ভ, হস্তী, গণ্ডার ও
বৃষের বিধান, বিবিধ সুগন্ধি দ্রব্য এবং সুসংভূত অশ্বাস্ত্র
উপকরণদ্বারা পট্টাবস্ত্রাবৃত ও আসনোপবিষ্ট মহাবীর কর্ণকে
বিধিপূর্বক সেনাপতিপদে অভিষিক্ত করিলেন।

অনন্তর কর্ণের অভিপ্রায়ানুসারে রাত্রিশেষে তূর্যপ্রভৃতি
বাদনদ্বারা সৈন্যগণকে সুসজ্জিত হইবার আজ্ঞা প্রদান করা
হইল। এই সময়ে কৌরবগণ মহাধনুর্ধর কর্ণকে ধ্বাস্তনাশক
ভানুর আয় রথে অবস্থিত দেখিয়া ভীষ্ম দ্রোণ ও অশ্বাস্ত্র
বীরগণের বিনাশ ছুঃখ বিস্মৃত হইলেন।

বীরবর সূতপুত্র শঙ্খ-শব্দে যোধগণকে দরাসিত করিয়া
বিপুল কৌরবসৈন্যদ্বারা মকরবাহু নির্মাণ করিলেন। এই
বাহুর মুখে কর্ণ, নেত্রদ্বয়ে শকুনি ও উলূক, মস্তকে অশ্বখামা,
মধ্যদেশে সৈন্যগণ-পরিবেষ্টিত দুর্যোধন, গ্রীবায় অশ্বাস্ত্র

ধাতরাষ্ট্রগণ, চরণচতুষ্টয়ে নারায়ণীসেনা-পরিবৃত কৃতবর্মা, দাক্ষিণাত্যগণ-বেষ্টিত কুপাচার্য এবং স্ব-স্ব-সৈন্যদল লইয়া মহাবীর ত্রিগর্তরাজ ও মদ্ররাজ শল্য বিরাজ করিতে লাগিলেন।

নরশ্রেষ্ঠ কর্ণ এইরূপে যুদ্ধযাত্রা করিলে ধর্মরাজ অর্জুনের প্রতি দৃষ্টিপাত করিয়া কহিলেন—

ভ্রাতঃ, ঐ দেখো মহাবীর কর্ণ বীরগণাভিরক্ষিত কৌরব-সেনাকে কী প্রকারে শ্রেণীবদ্ধ করিয়াছেন। কিন্তু উহাদের শ্রেষ্ঠ যোদ্ধারা সকলেই নিহত হইয়াছেন; অতএব তোমার জয়লাভসম্বন্ধে আমি আর সংশয় করি না। তুমি যুদ্ধ করিলে আমার হৃদয় হইতে দ্বাদশবর্ষ সংস্থিত শল্য উদ্ধৃত হয় তুমি এক্ষণে উপযুক্ত প্রতিবাহ নিৰ্মাণ করো।

জ্যেষ্ঠের এই কথা শ্রবণানন্তর অর্জুন অর্ধচন্দ্রাকৃতি ব্যাহরচনা করিলেন। ব্যাহের বামপার্শ্বে ভীমসেন, দক্ষিণে মহাধনুর্ধর ধৃষ্টদ্যুম্ন, মধ্যে অর্জুন-রক্ষিত ধর্মরাজ এবং পৃষ্ঠদেশে নকুল সহদেব অবস্থান করিতে লাগিলেন।

তখন হস্তী অশ্ব ও মনুষ্যসংকুল কুরু-পাণ্ডব-সৈন্যদল পরস্পরকে প্রহার করিতে আরম্ভ করিলে প্রধান যোদ্ধগণ নানাবিধ অস্ত্রদ্বারা নর-মস্তকচ্ছেদনপূর্বক তদ্বারা পৃথিবী পরিব্যাপ্ত করিলেন। ক্রমে মহারথগণ সম্মুখসমরে সজ্জাচিত হইলে সে দিবস ক্রমান্বয়ে বহুবিধ দ্বৈরথ-যুদ্ধ চলিতে লাগিল। অবশেষে কর্ণ অতিশয় দুর্ধর্ষ হইয়া উঠিলে কেহই তাঁহাকে নিবারণ করিতে সক্ষম হইলেন না। মাতঙ্গণ

তাঁহার নারাচ-প্রহারে অবসন্ন হইয়া ভীষণ শব্দসহকারে চতুর্দিকে পরিভ্রমণ করিতে আরম্ভ করিল এবং পদাভিগণ দলে দলে বিনষ্ট হইতে লাগিল।

স্বীয় সৈন্যদলকে এইরূপে নিপীড়িত দেখিয়া পরিশেষে নকুল কর্ণের প্রতি ধাবিত হইয়া তাঁহাকে ও তাঁহার সারথিকে বিদ্ধ করিলেন। তখন মহাবীর কর্ণ ক্রোধাবিষ্ট হইয়া ভীষণতর আকার ধারণপূর্বক নকুলকে শরনিকরে সমাচ্ছন্ন করিয়া তাঁহার শরাসন ছেদন করিলেন, এবং তিনি অশ্ব ধনু গ্রহণ করিবার পূর্বেই তাঁহার সারথি ও অশ্ব বিনষ্ট করিয়া তাঁহার অস্ত্রশস্ত্রসমবেত রথ খণ্ড খণ্ড করিয়া ফেলিলেন। নকুল রথহীন ও অস্ত্রশূণ্য হওয়ায় নিজেকে নিরুপায় দেখিয়া পলায়ন করিতে লাগিলেন। তখন সূতপুত্র হস্ত্যপূর্বক পশ্চাৎদ্রাবিত হইয়া তাঁহার গলদেশ জ্যা-রোপিত কামুকদ্বারা আকর্ষণপূর্বক সেই রুদ্ধকণ্ঠ যোদ্ধাকে কহিলেন—

হে মাদ্রী-নন্দন, তুমি আমার সহিত বৃথা যুদ্ধ করিতে আসিয়াছিলে। যাহা হউক এক্ষণে লজ্জিত হইবার প্রয়োজন নাই; কিন্তু আর মহাবলপরাক্রান্ত কৌরবদের সহিত যুদ্ধে প্রবৃত্ত হইয়ো না।

মহাবীর কর্ণ তৎকালে নকুলকে অনায়াসে সংহার করিতে পারিতেন, কিন্তু কুন্তীর নিকট স্বীয় প্রতিজ্ঞা স্মরণপূর্বক তিনি মাদ্রী-তনয়কে পরিত্যাগ করিয়া পাঞ্চাল-গণের প্রতি ধাবিত হইলেন এবং চক্রাকারে পরিভ্রমণ করিয়া

তাহাদিগকে মর্দন করিতে লাগিলেন। তখন পাঞ্চাল-সারথিগণ চক্রশ্রজ বা অক্ষবিহীন রথে জীবিতাবশিষ্ট রথিগণকে লইয়া পলায়ন করিতে আরম্ভ করিল।

এইরূপে বীরবর সূতপুত্রের সায়কপ্রভাবে যুদ্ধে প্রবৃত্ত যোধগণের হৃদশার আর পরিসীমা রহিল না। অর্জুন এতক্ষণ স্থানান্তরে সংসপ্তকগণের সহিত যুদ্ধে ব্যাপ্ত ছিলেন। কৃষ্ণ পাণ্ডব-সেনাকে অতিশয় বিচলিত ও পলায়নপর দেখিয়া কহিলেন—

হে ধনঞ্জয়, তুমি কী বৃথা ক্রৌড়া করিয়া সময় নষ্ট করিতেছ। সত্ত্বর এই সংসপ্তকগণকে নিপাতিত করিয়া কর্ণ-বধের চেষ্টা করো।

মহাবীর অর্জুন কৃষ্ণের বাক্যে উত্তেজিত হইয়া দানবহস্তা ইন্দ্রের আয় বলপ্রকাশপূর্বক অবশিষ্ট সংসপ্তকগণকে আক্রমণ করিলেন। তিনি যে কখন শরগ্রহণ কখন শরসন্ধান আর কখনই বা শরনিষ্ক্ষেপ করিতে লাগিলেন, তাহা অবহিত হইয়াও কেহ জানিতে পারিল না। বাসুদেবও অর্জুনের হস্তলাঘব দর্শনে চমৎকৃত হইলেন।

অনন্তর সেই স্থানের কৌরবপক্ষীয় সৈন্যসমূহ সম্পূর্ণ পরাজিত হইলে অর্জুন কর্ণ-বধে কৃতনিশ্চয় হইয়া তাঁহার প্রতি ধাবিত হইলেন। পথিমধ্যে অশ্বখামা ও দুর্যোধন তাঁহাকে নিবারণ করিবার চেষ্টা করিলেন, কিন্তু অর্জুন তৎক্ষণাৎ তাঁহাদের কামূক, অশ্ব ও সারথি বিনষ্ট করায় ক্ষণকালও বাধা প্রাপ্ত হইলেন না।

অনন্তর কর্ণ যেখানে ক্রোধাবিষ্ট হইয়া পাণ্ডব-সৈন্য বিলোড়ন করিতেছিলেন, অর্জুন তথায় উপস্থিত হইয়া হস্তমুখে অস্ত্রজাল বর্ষণপূর্বক কর্ণের বাণসমূহ প্রতিহত করিয়া শরনিকরে নভোমণ্ডল সমাচ্ছন্ন করিলেন। অর্জুনের শরজাল মুষলের ন্যায়, পরিঘের ন্যায়, শতস্রীর ন্যায় ও অতি কঠোর বজ্রের ন্যায় নিপতিত হইতে লাগিল। কৌরব-সৈন্যগণ তাহাতে নিহতমান হইয়া নিমৌলিত-লোচনে ভ্রমণ ও আতঁনাদ করিতে লাগিল।

এই সময়ে ভানুমান্ অস্ত্রাচলশিখরে আরোহণ করিল এবং রণক্ষেত্র-সমুখিত ধূলিপটলপ্রভাবে অন্ধকার গাঢ়তর হওয়ায় আর কিছুই দৃষ্টিগোচর রহিল না। তখন কৌরব মহারথগণ পুনরায় রাত্রিযুদ্ধ-সম্ভাবনায় নিতান্ত ভীত হইয়া সৈন্যগণ-সমভিব্যাহারে রণস্থল হইতে অপগমন করিলেন। অগত্যা সেনাপতি কর্ণকে যুদ্ধকার্য স্থগিত করিতে হইল। পাণ্ডবগণ জয়শ্রী লাভ করিয়া শত্রুগণকে উপহাস এবং কৃষ্ণার্জুনের স্তুতিবাদ করিতে করিতে স্ব-শিবিরে গমন করিলেন।

পরদিন মেঘ-গর্জনের ন্যায় সহস্র তূর্য ও অযুত ভেরীর ঘোরতর শব্দ কর্ণের যুদ্ধযাত্রা বিজ্ঞাপনপূর্বক কৌরব-সৈন্যগণকে উদ্বোধিত করিল।

এদিকে রাজা যুধিষ্ঠির কৌরব-সেনামুখে কর্ণকে অবলোকন করিয়া শত্রুস্ব ধনঞ্জয়কে কহিলেন—

হে অর্জুন, ঐ দেখো মহাবীর সূতপুত্র সংগ্রামার্থ মহাব্যাহরচনা করিয়াছেন। এক্ষণে তুমি কর্ণের সহিত যুদ্ধ

করো, আমি কৃপের সহিত সমরে প্রবৃত্ত হইতেছি, আর ভীমসেন দুর্যোধনের সহিত, নকুল বৃষসেনের সহিত, সহদেব শকুনির সহিত ও সাত্যকি কৃতবর্মা'র সহিত সংগ্রামে মিলিত হউন।

অজুন অনুমতিপ্রাপ্ত হইয়া যাত্রার পূর্বে কহিলেন—

মহারাজ, তোমার পাদস্পর্শ করিয়া প্রতিজ্ঞা করিতেছি যে, কর্ণকে সংহার না করিয়া আমি রণস্থল হইতে প্রত্যাগমন করিব না।

অনন্তর অপরাহ্নকালে ভীমসেনের সমক্ষেই মহাবীর কর্ণ সোমকসৈন্যগণকে অতিশয় নিপীড়িত করিতে আরম্ভ করিলে মহাতেজা বৃকোদরও দুর্যোধনের সৈন্যমধ্যে প্রবিষ্ট হইয়া অতি অদ্ভুত বলপ্রকাশ করিতে প্রবৃত্ত হইলেন। ক্রমে তাঁহার যুদ্ধপ্রভাবে কৌরব-সৈন্যগণ ভগ্ন হইতে আরম্ভ করিলে দুর্যোধন অশ্বখামা ও দুঃশাসন প্রভৃতি বীরগণ তাঁহার প্রতি ধাবিত হইলেন।

সর্বাগ্রে মহাবীর দুঃশাসন শরনিকর বর্ষণপূর্বক নির্ভয়ে ভীমসেনের সহিত যুদ্ধ আরম্ভ করিলেন। তখন বীরদ্বয় পরস্পরের বধাভিলাষী হইয়া দেহবিদারণক্ষম সূতীক্ষ্ম বাণ-সমূহে পরস্পরকে আচ্ছন্ন করিলেন। মহাপরাক্রমশালী বৃকোদর ক্রোধাবিষ্ট হইয়া দুঃশাসনের প্রতি এক সুশাণিত শক্তি প্রয়োগ করিলেন, প্রজ্বলিত উষ্কার হ্রায় সেই শক্তি সমাগম হইতেছে দেখিয়া দুঃশাসন আকর্ণসমাকৃষ্ট দশ শরে তাহা মধ্যপথেই খণ্ড খণ্ড করিয়া ফেলিলেন। তদর্শনে

কৌরবগণ অতিশয় আহ্লাদিত হইয়া তাঁহার সেই মহৎকার্যের প্রশংসা করিতে লাগিলেন ।

অনন্তর মহাবীর দুঃশাসন সমরাক্ষেপে আশ্চর্য কৌশল প্রদর্শনপূর্বক পুনরায় ভীমসেনকে বিদ্ধ করিয়া তাঁহার শরাসন ছেদন ও সারথিকে আহত করিলেন । তখন ভীম দুইটি ক্ষুরপ্রদ্বারা দুঃশাসনের কামূক ও ধ্বজদণ্ড খণ্ড খণ্ড করিয়া তাঁহার সারথির মস্তকচ্ছেদন করিলেন । তখন রাজকুমার দুঃশাসন স্বয়ং বজ্রা গ্রহণপূর্বক অশ্বগণকে স্ব-বশে রাখিয়া অন্য শরাসনে এক অশনিতুল্য ভীষণ বাণ যোজনা করিয়া তাহা ভীমসেনের প্রতি পরিত্যাগ করিলেন । সেই শরে নিভিন্নকলেবর ও স্থলিতদেহ হইয়া ভীমসেন বাহুপ্রসারণ-পূর্বক রথমধ্যে পতিত হইলেন, কিন্তু অবিলম্বে পুনরুত্থিত হইয়া তিনি দুঃশাসনকে কহিলেন—

অহে ছুরাশ্বনু, তুমি তো আমাকে বিদ্ধ করিলে ; এক্ষণে আমার এই গদাপ্রহার সহ করো ।

এই বলিয়া মহাবল বৃকোদর এক দারুণ গদা পরিত্যাগ করিবামাত্র তাহা ভীষণ বেগে দুঃশাসনের মস্তকে নিপতিত হইয়া তাঁহাকে রথ হইতে দশ ধনু অন্তরে প্রক্ষিপ্ত করিল এবং তাঁহার রথ ও অশ্ব চূর্ণ করিয়া ফেলিল । দুঃশাসন উত্থানশক্তি-রহিত হইয়া কম্পিত-কলেবরে ভূতলে বিলুপ্তিত হইতে লাগিলেন ।

তখন সেই বীরজন-ভূয়িষ্ঠ ঘোরতর সংগ্রামস্থলে দুঃশাসনকে পতিত দেখিয়া ধাতরাষ্ট্রগণ-কৃত সমস্ত অত্যাচার

ভীমসেনের স্মৃতিপথে উদিত হইল। বনবাস-ক্লেশ জ্যোপদীর কেশাকর্ষণ, বস্ত্রহরণ এবং অন্যান্য বিবিধ প্রকার লাঞ্ছনাসংকলন স্বরণ করিতে করিতে অসহিষ্ণু বৃকোদর ক্রোধে প্রজ্বলিত হইয়া রথ হইতে লক্ষ্যপ্রদান করিলেন এবং ক্ষণকাল সোৎসুক নয়নে দুঃশাসনকে নিরীক্ষণ করিয়া স্থায়ী প্রতিজ্ঞা সফল করিবার নিমিত্ত তিনি শিতধার অসি সমুদ্রত করিয়া ভূতলশায়ী দুঃশাসনের উপর পদার্পণপূর্বক তাঁহার বক্ষঃস্থল বিদ্ধ করিলেন এবং উচ্ছ্বসিত রুধিরে অঞ্জলি পরিপূর্ণ করিয়া তিনি সমবেত স্তম্ভিত বীরগণকে কহিলেন—

হে কৌরবগণ, আজি আমি পাপাত্মা দুঃশাসনকে যমালয়ে প্রেরণ ও তাহার রুধিরপানপূর্বক প্রতিজ্ঞামুক্ত হইলাম। এক্ষণে দুঃখোদনরূপ দ্বিতীয় পশুকে নিহত করিলে এই মহা-সংগ্রাম-যজ্ঞ সমাপ্ত হইবে।

এই সময়ে সেই রক্তাক্ত-কলেবর লোহিতাক্ত অচিন্ত্যকর্মী ভীমসেনকে হুঁচুচিন্তে বিচরণ করিতে দেখিয়া যোধগণের মধ্যে কেহ অশ্রুটস্বরে চীৎকার করিল, কাহারও বা হস্ত হইতে অস্ত্র খসিয়া পড়িল, কেহ কেহ সংকুচিতনেত্রে মুখ বিবর্তন করিল, এবং সৈন্যগণ ভয়ে পলায়ন করিতে আরম্ভ করিল।

ইত্যবসরে মহাবীর অর্জুন যুধিষ্ঠিরের নিকট হইতে রণস্থলে আগমন করিলে একদিক্ হইতে তিনি এবং অপর দিক্ হইতে মহাবীর কর্ণ শত্রুগণকে বিদারণ করিতে করিতে পরস্পরাভিমুখে অগ্রসর হইতে লাগিলেন। উভয় পক্ষীয়

চতুরঙ্গিণী সেনা সেই বীরদ্বয়কর্তৃক নিপীড়িত হইয়া সিংহ-
তাড়িত যুগযুগের ন্যায় পলায়ন করিতে লাগিল। ভূপালগণ
কর্ণের হস্তিকেতু এবং অর্জুনের কপিশ্বজ্ঞ এতদুভয় রথকে
ঘোরনির্ঘোষে পরস্পরের প্রতি ধাবমান দেখিয়া বিস্ময়াবিষ্ট-
চিত্তে সিংহনাদ-সহকারে সেই বীরদ্বয়কে অনবরত সাধুবাদ
প্রদান করিতে লাগিলেন। কর্ণকে উৎসাহ প্রদানার্থে কৌরব-
গণ চতুর্দিকে বাদিত্রধ্বনি সমুথিত করিল এবং পাণ্ডবপক্ষীয়
শঙ্খ ও তূর্য্যনির্ঘোষে অর্জুনের অভিনন্দন করা হইল।

অনন্তর উদ্ভিন্নদন্ত মদমত্তমাতঙ্গদ্বয় যেমন পরস্পর সংঘটিত
হয় কর্ণার্জুনও তদ্রূপ সম্মিলিত হইলেন। মহাবীর কর্ণ দশ
শরে ধনঞ্জয়কে প্রথমে বিদ্ধ করিলে অর্জুনও হাস্ত্য করিয়া
সূতপুত্রের বক্ষঃস্থলে শিতধার দশ শর নিক্ষেপ করিলেন।
তৎপরে সেই বীরদ্বয় অসংখ্য সূপুঙ্খ সায়েকে পরস্পরকে ক্ষত-
বিক্ষত করিলেন।

এই সময়ে ভ্রোগপুত্র অশ্বখামা জুর্যোধনের হস্তধারণ-পূর্বক
কহিলেন—

মহারাজ, এক্ষণে ক্ষান্ত হও। যাহাতে মহারথ ভীষ্ম
এবং অস্ত্রবিদ্যা-বিশারদ পিতা নিহত হইয়াছেন; সে যুদ্ধে
ধিক, আমি ও আমার মাতুল অবধ্য বলিয়াই জীবিত
আছি; কর্ণ বিনষ্ট হইলে তুমিও পরিত্রাণ পাইবে না;
অতএব, হে কুরুরাজ, তুমি অমুমতি দাও, আমি ধনঞ্জয়কে
নিবৃত্ত হইতে অমুরোধ করি; তিনি নিশ্চয়ই আমার কথা
রক্ষা করিবেন।

দুর্যোধন এইরূপে অভিহিত হইলে ক্ষণকাল চিন্তানিমগ্ন থাকিয়া অবশেষে কহিলেন—

সখে, তুমি যাহা কহিলে তাহা সত্য, কিন্তু ভীমসেন শাদুর্লভের আয় দুঃশাসনকে হনন করিয়া যে-সকল বাক্য প্রয়োগ করিয়াছেন, তাহা তোমার অবিদিত নাই, তাহার পর আর কিরূপে শাস্তি সম্ভবে। কর্ণকেও এই বহুদিন-বাস্তিত্ব দ্বৈরথ যুদ্ধ হইতে নিবৃত্ত করা কৰ্তব্য নহে। হে গুরুপুত্র, আমি ভীত হইবার কোনো কারণ দেখিতেছি না। প্রচণ্ড বায়ু যেমন মেরু পর্বতকে ভগ্ন করিতে পারে না, তদ্রূপ অর্জুনও কখনই মহাবীর কর্ণকে পরাজয় করিতে সক্ষম হইবে না।

এদিকে, সেই পরস্পর-প্রহার-প্রবৃত্ত প্রতিদ্বন্দ্বিধয় অনবরত জ্যা-নিশ্বন ও তলধ্বনি করিয়া বিবিধ অস্ত্রসকল পরিত্যাগ করিতেছিলেন। এই সময়ে মহাবীর ধনঞ্জয়ের শরাসন-জ্যা অতিমাত্র আকৃষ্ট হওয়ায় ঘোররবে সহসা ছিন্ন হইয়া গেল। সেই অবসরে লঘুহস্ত সূতপুত্র বহুসংখ্যক ক্ষুদ্রক ও কঙ্কপত্র-ভূষিত অগ্ন্যাগ্ন বাণে ধনঞ্জয়কে সমাচ্ছন্ন করিলেন। অর্জুনের রক্ষকগণ সমীপে আগত হইয়া বহুবিধ চেষ্টা করিলেও কিছুতেই কর্ণশর খণ্ডন করিতে না পারায় কৃষ্ণ ও অর্জুন গাঢ় বিদ্ধ হইয়া রুধিরাক্ত হইলেন। কৌরবগণ তদদর্শনে আপনাদিগকে সমরবিজয়ী জ্ঞান করিয়া আনন্দধ্বনি ও সিংহনাদ করিতে লাগিলেন।

তখন মহাবীর ধনঞ্জয় ক্রোধভরে শরাসন জ্যা অবনামিত

করিয়া কর্ণের শরসমুদায় নিরাকৃত করিলেন। তাঁহার মহাস্ত্রপ্রভাবে অন্তরীক্ষ পরিব্যাপ্ত হওয়ায় পক্ষিগণের গতিরোধ হইল। কর্ণ অর্জুনের অশনিতুল্য শরে অতিশয় ব্যথিত হইলেন এবং তাঁহার রক্ষকগণ আত্মীয়দিগকে নিহন্ত্রমান দেখিয়া পলায়ন করিতে আরম্ভ করিল। কিন্তু মহাবীর কর্ণ রক্ষককর্তৃক পরিত্যক্ত হইয়াও নিভীকচিত্তে অর্জুনকে আক্রমণ করিতে লাগিলেন।

এইরূপে বলবীৰ্য পৌরুষ ও অস্ত্রকৌশল-প্রভাবে কখনো কর্ণ ধনঞ্জয় অপেক্ষা, কখনো অর্জুন সূতপুত্র অপেক্ষা প্রবল হইলেন।

অনন্তর বহুক্ষণ যুদ্ধ হইলে যখন কর্ণ কোনো ক্রমেই ধনঞ্জয়কে অতিক্রম করিতে পারিলেন না, প্রত্যুত তন্নিষ্কিপ্ত শরনিকরে সাতিশয় সন্তপ্ত হইয়া উঠিলেন তখন বহুদিন যত্নরক্ষিত বিষমুখ সর্পবাণ তাঁহার স্মৃতিপথে উদয় হইল। তিনি অর্জুনের মস্তক ছেদনার্থে সেই জ্বালাকরাল ভয়ংকর শর পরিত্যাগপূর্বক কহিলেন—

অর্জুন, এইবার তুমি নিহত হইলে।

মহাত্মা বাসুদেব সেই সূতপুত্র-নিষ্কিপ্ত নাগাস্ত্র অন্তরীক্ষে প্রজ্জ্বলিত দেখিয়া সুশিক্ষিত অশ্বগণকে ইঙ্গিত করিবামাত্র তাহারা জালু আকুঞ্চিত করিয়া ভূতলে অবস্থানপূর্বক রথের অগ্রভাগ সহসা অবনত করিয়া দিল। তখন সেই অর্জুনের গ্রীবার প্রতি লক্ষিত শর তাঁহার সুদৃঢ় ইন্দ্রদন্ত কিরীটে নিপতিত হইয়া তাহা চূর্ণ করিয়া ফেলিল।

ধনঞ্জয় অনাকুলিত-চিত্তে শ্বেতবসনদ্বারা কেশকলাপ-বন্ধনপূর্বক দণ্ডবিষট্টিত সর্পের শ্মায় ক্রোধাবিষ্ট হইয়া যমদণ্ড-সদৃশ লৌহময় সূদৃঢ় বাণে কর্ণের বক্ষঃস্থল ভেদ করিলেন। স্মৃতপুত্র অর্জুনের বাণে রক্তাক্ত ও শিথিলমুষ্টি হইয়া শরাসন ও তুগীর পরিত্যাগপূর্বক রথোপরি মূর্ছিত হইলেন। তখন পরমধার্মিক ধনঞ্জয় আতুর ব্যক্তিকে প্রহার করা অমুচিত বিবেচনায় কর্ণকে সেই ব্যাসনকালে বিনাশ করিবার চেষ্টা করিলেন না। বাসুদেব তদর্শনে ব্যস্ত হইয়া কহিলেন—

হে অর্জুন, তুমি কী নিমিত্ত প্রমত্ত হইতেছ। অরাতি ছর্বল হইলেও তাহাদিগকে নিধন করিবার নিমিত্ত পণ্ডিতগণ কাল প্রতীক্ষা করেন না।

হে অর্জুন, কর্ণ বিমোহিত হইতেছেন, অতএব এই বেলা অস্ত্র-প্রয়োগে উহাকে সংহার করো।

ইতিমধ্যে কর্ণ চেতনা লাভ করিলেন ও ধনঞ্জয়ের বাণ-বর্ষণে অত্যন্ত বিচলিত হইয়া কর্ণ পুনরুদ্দীপিত উদ্দমসহকারে ব্রহ্মাস্ত্র ত্যাগ করিতে আরম্ভ করিলে ক্রমে তিনি পুনরায় প্রবল হইয়া উঠিলেন। এই সময়ে সহসা দক্ষিণ চক্র পক্ষে নিমগ্ন হইলে কর্ণের রথ অচল হইল। কর্ণ ক্রোধে অশ্রু বিসর্জনসহকারে অর্জুনকে কহিলেন—

হে পার্থ, দৈববশত আমার রথচক্র ধরণীতে প্রোথিত হইয়াছে, অতএব তুমি মুহূর্তকাল যুদ্ধ স্থগিত রাখো, আমি মহীতল হইতে উহাকে উদ্ধার করি। হে অর্জুন তুমি মহৎ-

কুলসম্ভূত ও ক্ষত্রধর্মজ্ঞ, এই নিমিত্তই আমি কহিতেছি—
এক্ষণে কাপুরুষের স্থায় আমাকে প্রহার করিয়ো না।

কর্ণের কথার উত্তরে কৃষ্ণ কহিতে লাগিলেন—

হে সূতপুত্র, তুমি ভাগ্যক্রমে এই সময়ে ধর্ম স্মরণ করিতেছ। নীচাশয়েরা দুঃখে নিমগ্ন হইলেও নিজ দুষ্কর্ম বিস্মৃত হইয়া দৈবকে নিন্দা করে। তোমার অভিমতে যখন দ্রৌপদীকে দ্যুতসভায় অপমান করা হইয়াছিল, তখন তোমার ধর্ম কোথায় ছিল। যখন অক্ষকৌড়ায় অনভিজ্ঞ ধর্মরাজকে শকুনির দ্বারা শঠতাপূর্বক পরাজয় করা হইয়াছিল, তখন তোমার ধর্ম কোথায় ছিল। আর যখন তোমরা সপ্ত মহারথ সমবেত হইয়া বালক অভিমন্যুকে পরিবেষ্টনপূর্বক বধ করিয়াছিলে, তখনই বা তোমার ধর্ম কোথায় ছিল। এখন তুমি ধর্ম ধর্ম করিয়া তালু শুষ্ক করিলে কী হইবে।

বাসুদেবের এই কথায় কর্ণ লজ্জায় অধোবদন হইয়া নিরুত্তর রহিলেন। অনন্তর তিনি নিরুপায় হইয়া অচল রথ হইতেই অতি ঘোর বাণসমূহ বর্ষণ করিতে আরম্ভ করিলেন। তন্মধ্যে সহসা এক ভয়ংকর বাণ ভীষণবেগে পরিত্যক্ত হইয়া অর্জুনের বক্ষঃস্থলে প্রবেশপূর্বক তাঁহাকে অতি গাঢ়রূপে বিদ্ধ করিল। সেই মর্মঘাতী আঘাতে তাঁহার শিথিল হস্ত হইতে গাণ্ডীব শ্রস্ত হইয়া পড়িল এবং তিনি কম্পিতকলেবরে ক্ষণকাল অবসন্ন হইয়া রহিলেন।

সেই অবসরে কর্ণ রথ হইতে লক্ষ্যপ্রদানপূর্বক প্রাণপণে

পক্ষ হইতে রথচক্র উদ্ধার করিবার চেষ্টা করিতে লাগিলেন ; কিন্তু সেই গাড় নিমগ্ন চক্রকে কিছুতেই উত্তোলন করিতে সক্ষম হইলেন না। ইত্যবসরে অর্জুন প্রকৃতিস্থ হইলেই বাসুদেব কহিলেন—

হে অর্জুন, কর্ণ পুনরায় রথে আরোহণ না করিতেই উহার মস্তক ছেদন করো।

তখন অর্জুন তুণীর হইতে ইন্দ্রের বজ্রসদৃশ এক বাণ গ্রহণ ও গাণ্ডীবে যোজনা করিলেন। ব্যাদিতাস্ত্র কৃতাস্ত্রের আয় সেই ভীষণ অস্ত্র অর্জুনকর্তৃক আকর্ণ আকৃষ্ট ও পরিত্যক্ত হইলে তাহা প্রজ্বলিত উষ্ণার আয় দিম্বাগুল উদ্ভাসিত করিয়া কর্ণের মস্তক ছেদনপূর্বক শরৎকালীন নভোমণ্ডল হইতে নিপতিত দিবাকরের আয় তাঁহার দেহ হইতে ভূতলে পাতিত করিল। সূতপুত্রের উন্নত কলেবরও কুলিশ-বিদলিত গৈরিকস্রাবী গিরি-শিখরের আয় ধরাশায়ী হইল।

তখন বাসুদেব যৎপরোনাস্তি আহ্লাদিত হইয়া অতি গম্ভীরস্বরে শঙ্খধ্বনি করিতে লাগিলেন এবং অশ্রুপাণ্ডব-পক্ষীয় বীরগণ অর্জুনের সমীপে আগমন করিয়া তাঁহাকে সংবর্ধনাপূর্বক সিংহনাদ এবং অস্ত্রাদি বিধূনন করিতে লাগিলেন।

এদিকে দুর্যোধন শোকসাগরে একান্ত নিমগ্ন হইয়া—
হা কর্ণ,—বলিয়া বারংবার বিলাপ পরিতাপ করিতে করিতে হতাবশিষ্ট ভূপালগণের সহিত অতি কষ্টে স্ব-শিবিরে প্রবেশ করিলেন। কৌরবগণ বিবিধ যুক্তিদ্বারা কুরুরাজকে সাস্থনা

দিবার নিমিত্ত নিরন্তর যত্নবান হইলেন, কিন্তু তিনি প্রিয়সখা ও প্রধান আশ্রয়স্থল কর্ণের নিধন ঘটনা চিন্তা করিয়া কিছুতেই সুখ বা শান্তিলাভে সমর্থ হইলেন না ।

তখন দুর্যোধন অশ্বখামাকে সম্বোধনপূর্বক কহিলেন—

হে গুরুপুত্র, এ সময়ে কাহাকে সেনাপতিপদে অভিষিক্ত করিব তৎসম্বন্ধে তুমিই উপদেশ প্রদান করো । এক্ষণে তোমা-ভিন্ন আমার আর গতি নাই ।

তদন্তরে অশ্বখামা কহিলেন—

মহারাজ, মদ্রাধিপতি শল্য বলবীৰ্য যশপ্রভৃতি অশেষ-গুণসম্পন্ন । এই কৃতজ্ঞ বীর স্বীয় ভাগিনেয় যুধিষ্ঠিরকে পরিত্যাগ করিয়া আমাদের নিকট উপস্থিত হইয়াছেন ; অতএব ইহাকে সেনাপতিরূপে বরণ করিলে আমরা জয়-লাভের আশা করিতে পারিব ।

এই বাক্য অনুসারে দুর্যোধন কৃতাজলিপুটে মদ্ররাজের নিকট নিবেদন করিলেন—

হে মিত্রবৎসল, মিত্র ও অমিত্র পরীক্ষার কাল উপস্থিত হইয়াছে । আমরা যদি আপনার অনুগ্রহের পাত্র হই, তবে এক্ষণে সেনাপতিপদে অভিষিক্ত হউন । ইন্দ্র যেমন দানব-গণকে বিনাশ করিয়াছিলেন, আপনিও তদ্রূপ পাণ্ডব ও পাঞ্চালগণকে বিনাশ করুন ।

শল্য কহিলেন—

হে কুরুরাজ, তুমি যাহা অনুমতি করিতেছ, আমি তাহাই করিব । পাণ্ডবগণের কথা দূরে থাক্, সুরগণ যুদ্ধে উত্তম

হইলেও আমি তাঁহাদের বিপক্ষে যুদ্ধ করিতে কাতর হই না।

রাজা দুর্যোধন মদ্ররাজকে উৎসাহযুক্ত দেখিয়া হৃষ্টমনে তাঁহাকে শাস্ত্র বিধি অনুসারে অভিষিক্ত করিলেন। অনন্তর সকলে পরামর্শ করিয়া এই যুদ্ধনিয়ম সংস্থাপন করিলেন যে, কোনো ব্যক্তি একাকী পাণ্ডবগণের সহিত যুদ্ধ করিবে না; পরন্তু সকলে মিলিয়া পরস্পরের রক্ষা বিষয়ে নিরন্তর যত্ন করিয়া যুদ্ধক্ষেত্রে বিচরণ করিবে।

অনন্তর প্রভাত হইলে প্রবলপ্রতাপশালী মদ্ররাজ সর্বতোভদ্র ব্যূহ রচনা করিয়া স্বয়ং মদ্রদেশীয় বীরগণে পরিবৃত্ত হইয়া তাহার মুখে অবস্থান করিলেন। কৌরবগণ পরি-রক্ষিত মহারাজ দুর্যোধন ব্যূহের মধ্যভাগে, সংসপ্তকগণকে লইয়া কৃতবর্মা বামপার্শ্বে, যবনসেনা-পরিবেষ্টিত কৃপাচার্য দক্ষিণ পার্শ্বে এবং কাশ্বজগণ-সমবেত অশ্বখামা পৃষ্ঠদেশে অবস্থান করিতে লাগিলেন। শকুনি ও উলূক অশ্বসৈন্য-সমভিব্যাহারে সর্বাগ্রে পাণ্ডবগণের অভিমুখে ধাবমান হইলেন।

অনন্তর মদ্ররাজ সুসজ্জিত রথে আরোহণপূর্বক বেগশালী শরাসনে অনবরত টংকার প্রদানপূর্বক শত্রুদলনার্থে ধাবমান হইলে দুর্যোধনের মনে পুনরায় আশার সঞ্চার হইল। এদিকে পাণ্ডবগণও প্রতিব্যূহ নির্মাণপূর্বক কৌরবগণের আক্রমণ নিবারণ করিলেন। ধৃষ্টদ্যুম্ন শিখণ্ডী ও সাত্যকি শল্যের সৈন্যের প্রতি গমন করিলেন, অর্জুন কৃতবর্মারক্ষিত সংসপ্তক-

গণের প্রতি, সোমকগণের সহিত ভীমসেন কৃপাচার্যের প্রতি এবং নকুল ও সহদেব সসৈন্য শকুনি ও উলূকের প্রতি ধাবমান হইলেন।

ক্রমে শল্যের বিক্রম অসহ্য হইয়া উঠিল। তিনি একাকীই যেন সমগ্র পাণ্ডব-সৈন্যের সহিত যুদ্ধ করিতে লাগিলেন এবং যুধিষ্ঠিরকে শরনিকরে অতিশয় ব্যথিত করিয়া তুলিলেন। তখন মহারথ ধর্মরাজ রোষভরে—হয় জয়লাভ করিব, না হয় বিনষ্ট হইব—এই স্থির করিয়া পুরুষকার অবলম্বনপূর্বক ভ্রাতৃগণ ও বাহুদেবকে কহিলেন—

হে নরসন্তমগণ, ভীষ্ম-দ্রোণ-কর্ণ প্রভৃতি যে সকল বীরগণ দুর্যোধনের নিমিত্ত সমরস্থলে পরাক্রম প্রকাশ করিয়াছিলেন, তোমরা তাঁহাদিগকে স্ব স্ব অংশানুসারে নিপাতিত করিয়াছ। এক্ষণে আমার অংশে এই মহারথ শল্য অবশিষ্ট আছেন; অতএব আমিই ইহাকে পরাজয় করিব। নকুল ও সহদেব আমার চক্ররক্ষা করিবেন, সাত্যকি ও ধৃষ্টদ্যুম্ন আমার দুই-পার্শ্বে থাকিবেন। ধনঞ্জয় আমার পৃষ্ঠরক্ষায় নিযুক্ত হইউন এবং ভীমসেন আমার অগ্রে অবস্থান করুন। আমি সত্য বলিতেছি আজি জয় হউক আর পরাজয় হউক আমি ক্ষত্র-ধর্ম অনুসারে মাতুলের সহিত যুদ্ধে প্রবৃত্ত হইব।

রাজা যুধিষ্ঠির এইরূপ প্রতিজ্ঞাকৃত হইয়া মদ্রাধিপতি শল্যের সন্নিধানে গমন করিলেন। তখন মহাবীর মদ্ররাজ যুধিষ্ঠিরের প্রতি ইন্দ্রনিমুক্ত বারিধারার ন্যায় অনবরত শর-নিকর বর্ষণ করিতে লাগিলেন। তৎকালে কেহই তাঁহার

কোনো রক্ত প্রাপ্ত হইল না। অনন্তর ধর্মরাজও অস্ত্রবর্ষণে প্রবৃত্ত হইলে দুই বীর শাদুলদ্বয়ের দ্বারা পরস্পরকে ক্রান্ত বিক্ষত করিতে লাগিলেন। অল্পক্ষণমধ্যেই মহাবীর শল্য এক খরধার ক্ষুরের দ্বারা যুধিষ্ঠিরের কামূক ছেদন করিলে ধর্মরাজ অতিশয় রুষ্ট হইয়া অগ্নি শরাসন গ্রহণপূর্বক নতপর্ব বাণসমূহে শল্যের সারথি ও অশ্ব বিনষ্ট করিলেন। তখন অশ্বখামা মদ্ররাজকে স্বীয় রথে আরোপিত করিয়া প্রস্থান করিলেন।

কিন্তু যুধিষ্ঠিরের সিংহনাদ এবং পাণ্ডবগণের আনন্দধ্বনি কিছুতেই সহ্য না করিতে পারিয়া শল্য সহস্র অগ্নি রথে অরোহণপূর্বক যুধিষ্ঠিরের সমক্ষে প্রত্যাগত হইলেন। তখন পাণ্ডব পাঞ্চাল ও সোমকগণ তাঁহাকে চতুর্দিক হইতে বেষ্টিত করিলেন। তদর্শনে দুর্য়োধনও কৌরবগণকে লইয়া তাঁহার রক্ষার নিমিত্ত অগ্রসর হইলেন। অনন্তর মদ্রাধিপতি সহসা যুধিষ্ঠিরকে বক্ষস্থলে বিদ্ধ করিলে ধর্মরাজ উত্তেজিত হইয়া মহাবেগে শল্যের উপর শরাঘাত করিয়া তাঁহাকে মর্হিতপ্রায় করিয়া অতিশয় আহ্লাদিত হইলেন।

তখন মহাবীর কৃপ ছয় শরে যুধিষ্ঠিরের সারথির শিরশ্ছেদনপূর্বক তাহাকে ভূতলে পাতিত করিলেন। তাহাতে মহাবল বৃকোদর মদ্ররাজের ধনু বিখণ্ড করিয়া তাঁহার অশ্বগণ বিনষ্ট করিলেন। এবং ধুষ্টদ্যুম্ন শিখণ্ডী সাত্যকি প্রভৃতি বীরগণ শল্যকে শাণিত শরনিকরে সমাচ্ছন্ন করিলেন।

সেই শরজালে বিমোহিতপ্রায় হইয়া মজ্ঞরাজ অশ্ববিহীন রথ পরিত্যাগপূর্বক খড়্গ-চর্ম হস্তে লইয়া যুধিষ্ঠিরের প্রতি ধাবিত হইলেন। শল্য অধিকদূর অগ্রসর হইবার পূর্বেই ধর্মরাজের বিপদ অবলোকনে ভীমসেন ভল্লদ্বারা সেই খড়্গ-চর্ম ছেদন করিলেন। মহাতেজা বৃকোদরের সেই অন্তত্কার্য সন্দর্শনে পাণ্ডবগণ আনন্দভরে সিংহনাদ করিতে লাগিলেন।

কিন্তু মজ্ঞরাজ অশ্বহীন হইয়াও যুধিষ্ঠিরকে আক্রমণ করিবার সংকল্প পরিত্যাগ না করিয়া রিক্তহস্তেই ধাবমান হইলেন। তখন ধর্মরাজ ক্রোধে প্রদীপ্ত হইয়া এক প্রচণ্ড শক্তি গ্রহণ ও প্রযত্নসহকারে নিক্ষেপ করিয়া হস্ত প্রসারণ-পূর্বক মহাতর্জুন-গর্জন-সহকারে কহিলেন—

হে মজ্ঞরাজ, এইবার তুমি নিহত হইলে।

সেই শক্তি শল্যের বক্ষে প্রবিষ্ট হইয়া মর্মস্থলসমুদায় ভেদ করিলে তিনি রুধিরসিক্ত-কলেবরে বাহুপ্রসারণ করিয়া ভূতলে নিপতিত হইলেন। হোমাবসানে প্রশমিত অগ্নির আয় সেই মহারথ ধরাশয্যায় সুষুপ্তি লাভ করিলে সেনাপতি-বিহীন বলসকল বিশৃঙ্খলভাবে হাহাকার করিয়া পলায়ন করিতে লাগিল। তাহাদের ব্যগ্রগতিতে সমরাক্ষণ ধূলি-রাশিতে সমাচ্ছন্ন হইলে আর কিছুই দৃষ্টিগোচর রহিল না।

পাণ্ডবপক্ষীয় বীরগণ কৌরবসৈন্যকে নিতান্ত ছিন্ন ভিন্ন দেখিয়া হ্তস্তান্তঃকরণে তাহাদের বিনাশার্থে সোৎসাহে ধাবিত হইলেন। তখন দুর্যোধন সারথিকে কহিলেন—

হে সূত, ধনুর্ধর ধনঞ্জয় আমাদের সৈন্যদিগকে অতিক্রম করিবার চেষ্টা করিতেছেন ; অতএব তুমি এক্ষণে সৈন্যগণের পশ্চাত্তাগে রথ চালনা করো । আমি সমরে অবস্থান করিয়া যুদ্ধে প্রবৃত্ত হইলে সৈন্যগণ নিশ্চয়ই প্রতিনিবৃত্ত হইবে ।

সারণি দুর্যোধনের এই বীরজনোচিত বাক্য প্রতিপালন করিলে অবশিষ্ট পদাতিগণ রাজাকে অসহায় পরিত্যাগ করিয়া ঘাইতে অনিচ্ছুক হইয়া প্রাণপণে যুদ্ধার্থে পুনরায় দণ্ডায়মান হইল এবং যোধগণও জীবিতাশা পরিত্যাগপূর্বক সংগ্রামে মনোনিবেশ করিয়া ধনঞ্জয়ের উপর বাণবর্ষণ করিতে আরম্ভ করিলেন । কিন্তু মহাবীর ধনঞ্জয় গাণ্ডীবপ্রভাবে তাহাদের অস্ত্রসকল অনায়াসে বিফল করিলেন ।

তাঁহার অশনিসদৃশ শরসমূহ জলধরনিমুক্ত বারিধারার জ্বায় নিপতিত হইলে কোরবসৈন্যগণ তাহা কোনোক্রমেই সহ্য করিতে পারিল না । কেহ বাহনবিহীন, কেহ অস্ত্রশূণ্য, কেহ বা অস্ত্রাঘাতে বিমোহিত এবং কেহ কেহ পুনরায় পলায়ন-পরায়ণ হইল । অনেক বীর শিবিরে পুনরাগমনপূর্বক রথ ও অস্ত্র সংগ্রহ করিয়া রণক্ষেত্রে গমন করিতে লাগিলেন ।

এই সময়ে ধৃতরাষ্ট্রের দ্বাদশ পুত্রমাত্র হতাবশিষ্ট ছিলেন, তাঁহারা দলবদ্ধ হইয়া ভীমসেনকে আক্রমণ করিলেন । মহাবীর বৃকোদর কোপাবিষ্ট হইয়া ক্ষুরপ্রদ্বারা কাহারও শিরশ্ছেদন, ভল্লদ্বারা কাহাকে বা নিপাতিত এবং নারাচদ্বারা কাহারও প্রাণসংহার করিয়া ক্রমে নানাবিধ অস্ত্রদ্বারা একে

একে তাঁহাদের সকলকেই যমসদনে প্রেরণ করিলেন এবং স্বীয় প্রতিজ্ঞা হইতে মুক্ত হইয়া মহা আনন্দধ্বনি করিতে লাগিলেন ।

তখন অল্পমাত্র অবশিষ্ট কৌরববীরগণ পুনরায় দীন-ভাবাপন্ন হইলেন । তাঁহাদের অবস্থা দেখিয়া কৃষ্ণ অর্জুনকে কহিতে লাগিলেন—

হে পার্থ, অসংখ্য জ্ঞাতি-শত্রু নিহত হইয়াছে । আমাদের যোধগণ স্বীয় কার্য সমাধানান্তে স্ব-স্ব সৈন্যমধ্যে বিশ্রাম করিতেছেন । দুর্যোধন অবশিষ্ট সৈন্যদল ব্যুহিত্ত করিয়া তন্মধ্যে অবস্থানপূর্বক অসহায়ভাবে ইতস্তত দৃষ্টিপাত করিতেছেন, ইতাবশিষ্ট কৌরববীরগণ কেহই এসময়ে তাঁহার নিকটে নাই । অতএব যুদ্ধকার্য শেষ করিবার এই প্রকৃত অবসর । তুমি এই সুযোগে দুর্যোধনকে সংহারপূর্বক চির-প্রজ্বলিত বৈরানল নির্বাপিত করো ।

তদন্তরে অর্জুন কহিলেন—

সখে, ভীমসেন ধৃতরাষ্ট্রের আর সমুদায় পুত্র সংহার করিয়াছেন, অতএব দুর্যোধনেরও তাঁহার হস্তেই নিহত হওয়া সংগত । এক্ষণে অনুমান পাঁচ শত অশ্ব দুই শত রথ এক শত মাতঙ্গ ও তিন সহস্র পদাতি তদুপরি অশ্বখামা কৃপাচার্য ত্রিগত রাজা উলুক শকুনি ও কৃতবর্মা এই মাত্র কৌরবসৈন্য অবশিষ্ট দেখিতেছি । কিন্তু আজি কৃতান্তের হস্ত হইতে কাহারও পরিজ্ঞান নাই । আমি অতীত ধর্মরাজকে শত্রুশূন্য করিব সংকল্প করিয়াছি ; অতএব রথচালনা করো ।

যদি দুর্যোধন পলায়ন না করেন, তবে তিনিও আমার হস্তে প্রাণত্যাগ করিবেন।

এই কথায় বাসুদেব দুর্যোধন-সৈন্যভিষ্মকে অশ্ব সঞ্চালন করিলেন। তখন অশ্ব-সৈন্য লইয়া শকুনি তাঁহাদের গতিরোধ করিলেন। এই সময়ে অমিতপরাক্রম সহদেব স্বীয় প্রতিজ্ঞা স্মরণপূর্বক শকুনির প্রতি ধাবমান হইয়া তাঁহাকে শরাঘাতে অতিশয় সন্তপ্ত করিলেন। এবং এক ভুলে সম্মুখাগত উলূকের শিরশ্ছেদন করিয়া কহিতে লাগিলেন—

হে সুবলনন্দন, ক্ষত্রিয়ধর্মামুসারে স্থির হইয়া যুদ্ধ করো। দ্যুতসভামধ্যে যে আল্লাদ প্রকাশ করিয়াছিলে এক্ষণে তাহার ফল ভোগ করো।

মহাবীর সহদেব এই কথা বলিয়া ক্রোধভরে শকুনিকে প্রহার করিতে আরম্ভ করিলেন। শকুনি পুত্রের নিধনদর্শনে বাস্পাকুলনয়নে ক্ষণকাল বিহ্বরের তৎকালীন হিতবাক্যসমুদায় স্মরণ করিলেন, পরে সহদেবের সম্মুখীন হইয়া নিক্ষিপ্ত অস্ত্র-সকল নিবারণের চেষ্টা করিতে লাগিলেন।

কিন্তু তিনি ক্রুদ্ধ মাদ্রী-তনয়ের বেগ কিছুতেই সহ্য করিতে সক্ষম হইলেন না। অবশেষে শরযুদ্ধ নিষ্ফল জ্ঞান করিয়া খড়্গ গদাপ্রভৃতি অস্ত্র প্রয়োগ করিতে লাগিলেন, কিন্তু তাহাও সহদেব মধ্যপথেই খণ্ড খণ্ড করিয়া ফেলিলেন। পরিশেষে শকুনি এক সুবর্ণমণ্ডিত প্রাস ধারণপূর্বক তাহা নিক্ষেপ করিতে উদ্যত হইলেন। তখন রোষানলে দগ্ধ মাদ্রীতনয় সেই সমুদ্রত প্রাস সমেত সৌবলের ভূজদ্বয়

যুগপৎ ছেদন করিয়া উচ্চৈঃস্বরে সিংহনাদ করিলেন। অনন্তর আর এক ভল্ল গ্রহণপূর্বক তিনি সেই দুর্গাতির মূলভূত মস্তকও নিপাতিত করিলেন।

কৌরবসৈন্যগণ শকুনিকে নিহত দেখিয়া শঙ্কিতচিত্তে চতুর্দিকে পলায়ন করিতে লাগিল এবং পাণ্ডবপক্ষ হইতে মহা শঙ্খধ্বনি প্রাভূত হইল। এই সময়ে ইতস্তত ধাবমান কৌরবসৈন্যের উপর ভীমার্জুন একসঙ্গে নিপাতিত হইলে তাহারা আর কোনোক্রমেই পরিত্রাণ পাইল না। দুই চারি-জন ব্যতীত সেই সাগরোপম ত্রয়োদশ অক্ষৌহিণীমধ্যে সমরক্ষেত্রে আর কেহই উপস্থিত রহিল না।

ভূপালগণের মধ্যে একমাত্র কুরুরাজ দুর্যোধন জীবিত রহিলেন। তিনি এই সময়ে দশ দিক শূন্য দেখিয়া এবং পাণ্ডবগণের হর্ষধ্বনি শুনিয়া প্রস্থান করাই শ্রেয় বিবেচনা করিলেন। তদনুসারে তিনি একমাত্র গদা হস্তে ধারণ করিয়া বিচূরের উপদেশ স্মরণ ও চিন্তা করিতে করিতে পাদচারে পূর্বদিকে গমন করিতে লাগিলেন। এক বিস্তীর্ণ হ্রদের মধ্যে তাহার এক জলস্তম্ভ নির্মিত ছিল, তিনি সেই স্থানে লুকায়িত থাকিবার অভিপ্রায়ে ধাবিত হইলেন।

সন্ধ্যাও এই সময়ে কৌরবশূন্য রণক্ষেত্র হইতে প্রস্থান করিতেছিল পশ্চিমধ্যে কুরুরাজের সহিত তাহার সহসা সাক্ষাৎ হইল। তখন দুর্যোধন ব্যগ্রভাসহকারে তাহার নিকট উপস্থিত হইয়া বারবার নিরীক্ষণ ও গাত্রস্পর্শপূর্বক কহিলেন—

হে সঞ্জয়, এক্ষণে তোমাব্যতীত আর আমার পক্ষের কাহাকেও জীবিত দেখিতেছি না। আমার ভ্রাতৃগণের ও সৈন্যদলের কী দশা হইল তাহা কি অবগত আছ।

সঞ্জয় কহিল—মহারাজ, আমি স্বচক্ষে প্রত্যক্ষ করিয়াছি, আপনার সমগ্র সেনাসহ ভ্রাতৃগণ নিহত হইয়াছে। কেবল কৌরবপক্ষের তিনজন মাত্র জীবিত আছেন বলিয়া শ্রুত হইলাম।

দুর্যোধন দীর্ঘ নিশ্বাস পরিত্যাগপূর্বক কহিলেন—

হে সঞ্জয়, তুমি পিতাকে কহিবে যে আপনার আত্মজ দুর্যোধন ক্ষতবিক্ষতশরীরে সমর হইতে বিমুক্ত হইয়া হৃদমধ্যে প্রবেশপূর্বক আত্মরক্ষা করিয়াছেন।

কুরুরাজ এই কথা বলিয়া নিকটবর্তী হৃদ-সমীপে গমনপূর্বক তন্মধ্যস্থিত জলস্তম্ভে প্রবিষ্ট হইলেন। কিয়ৎক্ষণ মধ্যেই কৃপাচার্য অশ্বখামা ও কৃতবর্মা ক্ষত-বিক্ষত-কলেবরে শ্রান্ত বাহন লইয়া সেই স্থানে উপস্থিত হইলেন। সঞ্জয়কে দেখিবারাত্র দ্রুতবেগে অশ্ব সঞ্চালনপূর্বক নিকটে উপস্থিত হইয়া তাঁহারা কহিলেন—

হে সঞ্জয়, আজি সৌভাগ্যবশত তোমাকে জীবিত দেখিলাম। আমাদের রাজা দুর্যোধন কি জীবিত আছেন।

তখন সঞ্জয় দুর্যোধনের হৃদপ্রবেশ বৃত্তান্ত জ্ঞাপন করিলে সকলে মিলিয়া বহুক্ষণ বিলাপ পরিতাপ করিয়া অবশেষে সঞ্জয়কে কৃতবর্মার রথে আরোপণপূর্বক তাঁহারা শিবিরে প্রস্থান করিলেন।

কৌরবসৈন্যকে নিঃশেষিত দেখিয়া ধৃতরাষ্ট্রতনয় যুযুৎসু চিন্তা করিতে লাগিলেন—

মহাবল পরাক্রান্ত পাণ্ডবগণ রাজা দুর্যোধনকে পরাজয় এবং অবশিষ্ট কৌরববীর ও আমার ভ্রাতৃগণকে নিহত করিয়াছেন। এক্ষণে ভাগ্যক্রমে একমাত্র আমিই জীবিত রহিয়াছি। শিবিরস্থ ভৃত্যগণ সকলেই পলায়ন করিতেছে। রাজবনিভাদিগকে লইয়া এক্ষণে আমার হস্তিনাপুর প্রত্যাগমন করা উচিত হইতেছে।

যুযুৎসু এইরূপ বিবেচনা করিয়া যুধিষ্ঠিরের নিকট তাহা নিবেদন করিলে করুণ-হৃদয় ধর্মরাজ তাঁহাকে আলিঙ্গনপূর্বক তৎক্ষণাৎ বিদায় দিলেন। তিনি তখন কৌরব-সচিবগণের সহিত রাজমহিলাগণের রক্ষক হইয়া তাঁহাদিগকে হস্তিনাপুরে উপনীত করিলেন। বিজ্ঞতম মহাত্মা বিহুর যুযুৎসুকে অবলোকন করিয়া তাঁহাকে সাধুবাদ প্রদানপূর্বক কহিলেন—

বৎস, তুমি কৌরব-রমণীগণকে আশ্রয় প্রদান করিয়া সময়োচিত কার্য ও কুলধর্ম রক্ষা করিয়াছ। আমি ভাগ্যক্রমে সেই বীরক্ষয়কর সংগ্রাম হইতে তোমার প্রত্যাগমন সন্দর্শন করিলাম। এক্ষণে তুমি অদূরদর্শী অব্যবস্থিতচিন্ত রাজ্যলোলূপ হতভাগ্য অন্ধনৃপতির একমাত্র যষ্টিস্বরূপ হইয়া রহিলে।

রমণীগণের প্রস্থানে ও ভৃত্যবর্গের পলায়নে কৌরব-শিবির একান্ত শূন্য দেখিয়া সঞ্জয়সহ অবশিষ্ট কৌরববীরত্রয় তথায় অবস্থান করিতে পারিলেন না। তাঁহারা পুনরায়

হৃদয়ের নিকট গমন করিলেন এবং তীরে দণ্ডায়মান হইয়া সলিলনিমগ্ন রাজা দুর্যোধনকে সম্বোধনপূর্বক কহিলেন—

মহারাজ, এক্ষণে তুমি সমুখিত হইয়া আমাদের সহিত আগমন করো এবং অরাতিগণের সহিত যুদ্ধে প্রবৃত্ত হইয়া হয় রাজ্য না হয় সুরলোক প্রাপ্ত হও । পাণ্ডবদের অল্পমাত্র সৈন্য অবশিষ্ট আছে । আমরা সমবেত হইয়া আক্রমণ করিলে তাহারা নিশ্চয়ই বিনষ্ট হইবে ।

তদন্তরে দুর্যোধন কহিলেন—

হে মহারথগণ, ভাগ্যবলে তোমরা সেই লোকক্ষয়কর সংগ্রাম হইতে বিমুক্ত হইয়া জীবিত রহিয়াছ । এক্ষণে আমার অঙ্গ ক্ষতবিক্ষত হইয়াছে, তোমরাও পরিশ্রান্ত, পাণ্ডবগণের অবশিষ্ট সৈন্যদলও নিতান্ত অল্প নহে । অতঃপাশ্চ বিজ্ঞাম করিয়া কল্যাণ আমি নিশ্চয়ই তোমাদের সমভিব্যাহারে যুদ্ধে প্রবৃত্ত হইব ।

তখন মহাবীর অশ্বখামা কহিলেন—

মহারাজ, তুমি হৃদমধ্য হইতে উখিত হইয়া নিশ্চিন্তচিত্তে অবস্থান করো, আমরাই বিপক্ষগণকে বিনাশ করিব । আমি প্রতিজ্ঞা করিতেছি, শত্রুবিনাশ না করিয়া কদাপি কবচ পরিত্যাগ করিব না ।

এই সময়ে কতকগুলি ব্যাধ সেই স্থান দিয়া পাণ্ডব-শিবিরে মাংসাদি লইয়া যাইতেছিল । তাহারা পরিশ্রান্ত হইয়া হৃদকূলে উপবেশনপূর্বক এই সকল কথোপকথন শুনিয়া স্পষ্টই বুঝিতে পারিল যে, রাজা দুর্যোধন জলমধ্যে প্রবিষ্ট

আছেন। ইতিপূর্বেই রাজা দুর্যোধনকে অনুসন্ধান করিবার বিশেষরূপ উদ্যোগ চলিতেছিল এবং শিবিরে যে কোনো লোক গমনাগমন করিত তাহাকেই এসম্বন্ধে আদেশ দেওয়া হইত। এক্ষণে এই বৃত্তান্ত অবগত হইয়া সেই ব্যাধগণ বিপুল ধনপ্রাপ্তির আশায় সহর মহারাজ যুধিষ্ঠিরের শিবিরভিमुखে ধাবমান হইল। তথায় উপস্থিত হইয়াই উহার দ্বারীর নিষেধ মান্য না করিয়া দ্রুতগমনে একেবারে রাজ-সমীপে গমনপূর্বক সমস্ত বৃত্তান্ত নিবেদন করিল।

পাণ্ডবগণ দুর্যোধনের কোনো সন্ধান না পাইয়া কলহের মূলোচ্ছেদসম্বন্ধে হতাশ্বাস হইয়া বিষমচিন্তে অবস্থান করিতে-ছিলেন। চতুর্দিকে প্রেরিত দূতগণ প্রত্যাগত হইয়া ক্রমান্বয়ে বলিতেছিল যে কুরুরাজের কোনো সংবাদ পাওয়া যাইতেছে না। এই অবস্থায় ব্যাধগণকথিত বৃত্তান্ত শ্রবণে সকলে অতিশয় আশ্লাদিতচিন্তে তাহাদিগকে প্রভূত ধনদানে তুষ্ট করিয়া অবিলম্বে হ্রদভিमुखে যাত্রা করিলেন।

তখন ভীষণ সিংহনাদ ও ঘোর কলকলা শব্দ প্রাহুভূত হইল। দুর্যোধনকে প্রাপ্ত হইয়াছি—বলিয়া বীরগণ মহা চীৎকার করিতে লাগিলেন এবং বেগে ধাবমান রথিগণের চক্রনির্ঘোষে ধরণী কম্পিত হইতে লাগিল। এইরূপে পাণ্ডবগণের সহিত ষ্টষ্টহ্মাশ্ব শিখণ্ডী উত্তমৌজা যুধামন্যু সাত্যকি দ্রৌপদীর পঞ্চপুত্র এবং হতাবশিষ্ট পাণ্ডালগণ চতুরঙ্গ সৈন্য লইয়া ধর্মরাজের অনুগমন করিলেন।

কৃপাচার্য অশ্বখামা ও কৃতবর্মা এই তুমুল নিনাদ শ্রবণ করিয়া হর্ষোধনকে কহিলেন—

মহারাজ, সমরবিজয়ী পাণ্ডবগণ এইস্থানে আগমন করিতেছেন ; অতএব তুমি অনুজ্ঞা করো, আমরা প্রস্থান করি ।

হর্ষোধন—তথাস্তু,—বলিয়া সেই সলিলমধ্যে অলঙ্কিত-ভাবে অবস্থান করিতে লাগিলেন । কৃপাচার্য প্রভৃতি মহারথ-গণ বহুদূরে এক বটবৃক্ষমূলে গমনপূর্বক রথ হইতে অশ্বগণকে বিমুক্ত করিয়া অপেক্ষা করিতে লাগিলেন ।

ইতিমধ্যে পাণ্ডবগণ সেই হৃদ-কূলে উপনীত হইলে যুধিষ্ঠির লুঙ্কায়িত হর্ষোধনকে সন্মোদনপূর্বক উচ্চৈঃস্বরে কহিতে লাগিলেন—

হে কুরুরাজ, তুমি স্বপক্ষের সমস্ত ক্ষত্রিয় ও স্বীয় বংশ বিনষ্ট করিয়া এক্ষণে কী নিমিত্ত নিজ জীবন রক্ষার্থে জলাশয়ে প্রবেশ করিয়াছ । তোমাকে সকলে বীরপুরুষ বলিয়া কীর্তন করিয়া থাকে, কিন্তু আজি তোমাকে প্রাণভয়ে লুঙ্কায়িত দেখিয়া তাহা মিথ্যা বলিয়া বোধ হইতেছে ; অতএব তুমি অচিরে সলিল হইতে গাত্রোত্থানপূর্বক হয় আমাদিগকে পরাজয় করিয়া রাজ্যলাভ করো, না হয় আমাদের হস্তে পরাজিত হইয়া বীরলোক প্রাপ্ত হও ।

এই কথা শ্রবণে হর্ষোধন জলমধ্যে হইতে যুধিষ্ঠিরকে কহিলেন—

মহারাজ, প্রাণীমাত্রেরই যে প্রাণভয় থাকিবে তাহাতে

আর আশ্চর্য্য কী। কিন্তু আমি সেজন্তু পলায়ন করি নাই। আমি রথ ও অস্ত্রহীন অবস্থায় একান্ত পরিশ্রান্ত হইয়া এখানে শ্রমাপনোদন করিতেছি মাত্র। তুমি অনুচরবর্গের সহিত কিয়ৎক্ষণ বিশ্রাম করো, পরে আমি সলিল হইতে উত্থিত হইয়া যুদ্ধ করিব।

যুধিষ্ঠির কহিলেন—হে দুর্যোধন, আমরা যথেষ্ট বিশ্রান্ত রহিয়াছি এবং বহুক্ষণ তোমাকে অনুসন্ধান করিয়াছি, অতএব অবিলম্বে যুদ্ধে প্রবৃত্ত হও।

তখন দুর্যোধন কহিলেন—

মহারাজ, আমি যাহাদের জন্ত রাজ্যলাভ অভিলাষ করিয়াছিলাম, আমার সেই ভ্রাতৃগণ সকলেই স্বর্গে গমন করিয়াছেন। অতএব তুমিই এই হস্ত্যশ্বশূন্য বদ্ধবান্ধববিহীন ভূমিখণ্ড ভোগ করো। আমার সদৃশ নৃপতি একরূপ রাজ্য-শাসনে অভিলাষ করে না।

তদন্তরে যুধিষ্ঠির কহিলেন—

হে দুর্যোধন, তুমি জলমধ্যে অবস্থানপূর্বক বৃথা বিলাপ করিতেছ, উহাতে আমার কিছুমাত্র দয়ার সঞ্চার হইতেছে না। আর তোমার রাজ্যদানের ভান করিয়াই বা লাভ কী। তোমার দান করিবার অধিকারই বা কোথায় এবং তোমার প্রদত্ত রাজ্য আমিই বা গ্রহণ করিব কেন। অতঃপর তুমি ও আমি, দুইজনের জীবিত থাকিবার আর উপায় নাই; অতএব অনর্থক বাক্যব্যয় না করিয়া হয় রাজ্য না হয় স্বর্গলাভ করো।

তখন রাজা দুর্যোধন যুধিষ্ঠিরের তিরস্কার-বাক্য আর সহ্য করিতে না পারিয়া সহসা জলমধ্য হইতে বহির্গত হইয়া কহিলেন—

হে কুন্তীনন্দন, তোমাদের বন্ধুবান্ধব রথ ও বাহন সমস্তই রহিয়াছে, আমি একে পরিশ্রান্ত, তাহাতে সৈন্য ও অস্ত্রশস্ত্র-বিহীন হইয়া কিরূপে তোমাদের সহিত যুদ্ধ করিব। এক ব্যক্তির সহিত অনেকের যুদ্ধ কোনো ক্রমেই ধর্মসংগত হয় না। হে পাণ্ডবগণ, আমি তোমাদের দেখিয়া কিছুমাত্র ভীত হইতেছি না, একে একে তোমাদের সঙ্গে যুদ্ধ হইলে আমি সকলকেই বিনাশ করিতে পারি।

কুরুরাজের এই বাক্য শ্রবণে যুধিষ্ঠির কহিলেন—

হে দুর্যোধন, তুমি ভাগ্যক্রমে আজি ক্ষত্রিয়ধর্ম স্মরণ করিতেছ; কিন্তু তোমরা যখন বহুসংখ্যক মহারথ একত্র হইয়া বালক অভিমন্যুকে বিনাশ করিয়াছিলে তখন তোমার সে প্রজ্ঞা কোথায় ছিল। বিপৎকালে সকলেই ধর্মচিন্তা করিয়া থাকে, কিন্তু সম্পদের সময় পরলোকের দ্বার রুদ্ধ অকলাকন করে। যাহা হউক, তুমি এক্ষণে কবচ পরিধান ও অভীষ্ট আয়ুধ গ্রহণপূর্বক আমাদের মধ্যে যে কোনো অভিলষিত ব্যক্তির সহিত যুদ্ধ করো। আমি সত্য করিয়া কহিতেছি, তুমি আমাদের মধ্যে একজনকে বিনাশ করিতে পারিলেই সমুদয় রাজ্য তোমার হইবে।

সেই কথায় দুর্যোধন অতি হৃষ্টচিত্তে বর্মধারণ, কেশকলাপ বন্ধন ও গদাগ্রহণপূর্বক কহিলেন—

হে ধর্মরাজ, তুমি যখন আমাকে একজনের সহিত যুদ্ধের অনুমতি প্রদান করিলে তখন তোমাদের মধ্যে যাহার ইচ্ছা আমার সঙ্গে গদাযুদ্ধে প্রবৃত্ত হও। গদাযুদ্ধে তোমরা কেহই আমার সমকক্ষ নহ। যাহার ইচ্ছা আমার সম্মুখে গদাহস্তে দণ্ডায়মান হইয়া আমার বাক্যের সত্যাসত্যতা পরীক্ষা করো।

দুর্যোধন এইরূপ আশ্বাস দিতে আরম্ভ করিলে বাসুদেব ক্রোধাবিষ্ট হইয়া যুধিষ্ঠিরকে কহিলেন—

মহারাজ, তুমি কোন্ সাহসে দুর্যোধনকে একজনমাত্রের বিনাশ দ্বারা রাজ্যলাভের অনুমতি করিলে। ঐ দুরাশ্রম যদি তোমাকে বা অর্জুনকে বা নকুল সহদেবকে বরণ করিত, তাহা হইলে তোমাদের কী দুর্দশা হইত। গদাযুদ্ধে বোধ হয় কেহই তোমরা উহার সমকক্ষ নহ। ভীমসেন অধিক বলবান, কিন্তু দুর্যোধনের অভ্যাস অধিক এবং এস্থলে অভ্যাসেরই প্রাধান্য। এক্ষণে নিশ্চয়ই বোধ হইতেছে যে পাণ্ডবগণের অদৃষ্টে কখনই রাজ্যলাভ নাই—বিধাতা উহাদিগকে বনবাস বা ভিক্ষাব্রত অবলম্বন করিবার জন্যই সৃষ্টি করিয়াছেন।

এই কথা শুনিয়া মহাতেজা ভীমসেন ঈষৎ হাস্তসহকারে কহিলেন—

হে মধুসূদন, তুমি বৃথা বিবাদগ্রস্ত হইয়ো না। আজি আমি নিশ্চয়ই দুর্যোধনকে বিনাশ করিয়া বৈরানল নির্বাণ করিব।

তখন বামুদেব আশ্বস্ত হইয়া ভীমসেনকে প্রশংসা করিয়া কহিলেন—

হে বীর, ধর্মরাজ তোমার বাহুবলেই অরাতিবিহীন হইবেন, সন্দেহ নাই। এক্ষণে তুমি অতিশয় সাবধান হইয়া যুদ্ধে প্রবৃত্ত হও।

এই সময়ে তীর্থপর্যটনানন্তর বৃষ্টিপ্রবীর বলরাম যুদ্ধ-বৃত্তান্ত জ্ঞাত হইবার নিমিত্ত সে স্থানে উপস্থিত হইলেন। তাঁহাকে দেখিয়া সকলে ব্যগ্রতাসহকারে তাঁহার অভ্যর্থনা ও পাদবন্দন করিয়া সমগ্র বৃত্তান্ত অবগত করাইলেন। ভীমসেন ও দুর্যোধন গদা উচ্ছত করিয়া গুরুকে যথোচিত অভিবাদন করিলেন। বলরাম সকলকে আলিঙ্গন করিয়া কহিলেন—

হে বীরগণ, আমি দ্বিচত্বারিংশ দিবস হইল তীর্থযাত্রা করিয়াছি ; কিন্তু এখনো তোমাদের যুদ্ধকার্য শেষ হয় নাই। আমি মনে করিয়াছিলাম এ-যুদ্ধের সহিত কোনোপ্রকারে লিপ্ত থাকিব না, কিন্তু এক্ষণে শিষ্যদ্বয়ের গদাযুদ্ধ দেখিতে অভিলাষ হইতেছে। তবে এস্থান অপেক্ষা পুণ্যতীর্থ কুরুক্ষেত্রই যুদ্ধের উপযুক্ত স্থান ; অতএব চলো, সকলে মিলিয়া সেখানে গমন করি।

বলদেবের উপদেশ অনুসারে সকলে কুরুক্ষেত্রে প্রস্থান করিলেন এবং তথায় উপযুক্ত সমরাজ্ঞ নির্বাচনপূর্বক বলরামকে মধ্যস্থলে আসন প্রদান করিয়া অগ্র সকলে চতুর্দিকে যুদ্ধদর্শনার্থে উপবিষ্ট হইলেন।

অনন্তর বর্মধারী ভীমসেন মহাকোটি গদাহস্তে এবং উজ্জ্বল ও সুবর্ণবর্মপরিহিত দুর্যোধন এক দুর্জয় গদা লইয়া রণস্থলে দণ্ডায়মান হইলেন। তখন মহাবলপরাক্রান্ত দুর্যোধন গভীরগর্জনে ভীমকে যুদ্ধে আহ্বান করিলে ভীমসেন কহিলেন—

হে দুর্যোধন, 'ইতিপূর্বে যে-সকল দুর্কর্ম করিয়াছ, তাহা স্মরণ করো। আমি এইবার তোমাকে তাহার সমুচিত দণ্ড প্রদান করিব।

তদন্তরে দুর্যোধন কহিলেন—

অহে কুলাধম, আর বৃথা বাক্যব্যয়ে প্রয়োজন নাই। মুখে যাহা বলিতেছ, কার্যে তাহা পরিণত করো।

এই কথায় সৈন্যগণ দুর্যোধনের প্রশংসা করায় তিনি অতিশয় পরিতুষ্ট হইলে ভীম ক্ষুণ্ণ হইয়া গদা উত্তত করিয়া ধাবমান হইলেন। তখন তাঁহারা পরস্পর জিগীষাপরবশ হইয়া তুমুল যুদ্ধ আরম্ভ করিলেন। রণস্থলে ঘোরতর প্রহারশব্দ সমুখিত হইল এবং দুই গদার সংঘটনে চতুর্দিক অগ্নিস্ফুলিঙ্গ বিক্ষিপ্ত হইতে লাগিল। অনন্তর সেই বীরদ্বয় পরস্পরের রক্তাশ্বেষণে প্রবৃত্ত এবং আত্মরক্ষায় যত্নবান হইয়া বিচিত্র গতি প্রত্যাগতি, অবস্থান পরিমোক্ষ, প্রহার বন্ধন, আক্কেপ পরাবর্তন সংবর্তনাদি কৌশল প্রদর্শনপূর্বক পরস্পরকে দ্রুত বিক্ষত করিতে লাগিলেন।

অবশেষে দুর্যোধন দক্ষিণ মণ্ডল ও ভীম বাম মণ্ডল অবলম্বন করিলে দুর্যোধন ভীমের পার্শ্বদেশে এক প্রচণ্ড আঘাত

করিলেন এবং ভীমসেন ক্রুদ্ধ হইয়া প্রতিপ্রহারার্থে বজ্রতুল্য ভীষণ গদা উত্তত ও বিঘূর্ণিত করিলে দুর্যোধন সেই গদার উপর গদাঘাত করিয়া তাঁহাকে নিবারণ করিলেন। তদর্শনে সকলে বিস্ময়াবিষ্ট হইল।

ক্রমে মহাবীর কুরুরাজ্য বিবিধ কৌশল প্রদর্শন করিয়া সমরাস্ত্রণে সঞ্চরণ করিতে থাকিলে সকলেই তাঁহাকে সমধিক যুদ্ধনিপুণ বলিয়া বোধ করিলেন। তাঁহার গদাভ্রমণবেগ অবলোকন করিয়া পাণ্ডবগণের অস্তঃকরণে অতীব ভীতির সঞ্চার হইল।

অনন্তর বৃকোদরের মস্তকে দুর্যোধন এক গদাঘাত করিলে তিনি তাহাতে কিছুমাত্র বিচলিত না হইয়া ক্রোধ-প্রজ্বলিতচিত্তে কুরুরাজ্যের প্রতি তাঁহার গদা নিক্ষেপ করিলেন; কিন্তু রাজা দুর্যোধন অনায়াসে সেই নিক্ষিপ্ত গদা নিষ্ফল করিয়া অরক্ষিত ভীমসেনের বক্ষে এক প্রচণ্ড আঘাত করিলেন, তাহাতে তিনি অতিশয় ব্যথিত হইয়া বিমোহিতপ্রায় হইলেন, কিন্তু তাহা সত্ত্বেও তিনি কোনো প্রকার ধৈর্যচ্যুতি প্রকাশ না করায় দুর্যোধন তাঁহাকে অবিচলিত ও প্রতিপ্রহারোত্তত জ্ঞান করিয়া দ্বিতীয় আঘাত করিবার ছিদ্র অবলম্বনের সুযোগ সম্বন্ধে বঞ্চিত হইলেন।

পরে প্রকৃতিস্থ হইয়া নিতান্ত রোষাবিষ্টচিত্তে মহাবল বৃকোদর পুনরায় গদাগ্রহণপূর্বক কুরুরাজ্যের প্রতি ধাবমান হইয়া তাঁহার পার্শ্বদেশে এক আঘাত করিলে দুর্যোধনের শরীর ক্ষণকাল অবসন্ন হওয়ায় তাঁহার অবনত জামুদ্বয় ধরা-

স্পর্শ করিল, তদর্শনে পাণ্ডবপক্ষীয়গণ সিংহনাদ করিতে লাগিলেন।

ভীমসেনের এই অভিনন্দন কুরুরাজের নিতান্ত অসহ্য হইল। তিনি উত্তেজিত হইয়া শিকানৈপুণ্য প্রদর্শনপূর্বক ভীমকে বারংবার প্রহার করিতে আরম্ভ করিলেন, তাঁহার বর্ম ক্রমে ছিন্নভিন্ন হইয়া গেল এবং মহাবীর বৃকোদর বহু-কষ্টে ধৈর্য রক্ষা করিয়া সমরারঙ্গে অবস্থিত রহিলেন। তখন বাসুদেব অতিশয় হুশ্চিন্তাগ্রস্ত হইয়া অর্জুনকে কহিলেন—

সখে, দুর্যোধন যে শ্রেষ্ঠ যোদ্ধা, সে বিষয়ে কোনো সন্দেহ নাই; অতএব শ্রায়যুদ্ধে ভীমসেন কিছুতেই কৃতকার্য হইবেন না। শঠ দুর্যোধনকে শঠতাপূর্বক বিনাশ করাই কর্তব্য। স্বয়ং দেবরাজও ছলদ্বারা স্বীয় কার্য সিদ্ধ করিয়া থাকেন। এক্ষণে ভীমসেন তাঁহার উরুভঙ্গের প্রতিজ্ঞা পালন-পূর্বক দুর্যোধনকে নিপাতিত করুন, নহিলে ধর্মরাজ বিষম সংকটে পড়িবেন। তোমার জ্যেষ্ঠ কী নির্বোধ। উনি কী বিবেচনায় একজনের পরাজয়ে রাজ্যদানের প্রতিজ্ঞা করিলেন।

অর্জুন এই কথা শুনিয়া স্বীয় বামজামুতে আঘাত করিয়া ভীমসেনকে সংকেত করিলেন। তখন বৃকোদর অর্জুনের ইঙ্গিতে স্বীয় প্রতিজ্ঞা সম্বন্ধে প্রবোধিত হইয়া গদা উত্তত করিয়া বাম মণ্ডল অবলম্বন করিলেন। সুযোগ বুঝিয়া তিনি স্বেচ্ছাক্রমে রুদ্ধ প্রদর্শন করিলে দুর্যোধন বঞ্চিত হইয়া তাঁহার প্রতি ধাবমান হইলেন। তখন ভীমসেন সহসা

তাঁহাকে আক্রমণ করিলে ছর্ষোধন লক্ষ্যপ্রদানপূর্বক পরি-
ত্রাণ পাইলেন, কিন্তু তিনি উদ্বেগ-উখিত হইবামাত্র ভীম
তাঁহার জামুদ্বয় লক্ষ্য করিয়া নিয়ম-বিরুদ্ধ আঘাত করিলে
ছর্ষোধন ভগ্নোক্ত হইয়া ভূতলে নিপতিত হইলেন। তখন
ক্রোধপরায়ণ বৃকোদর উন্মত্তের আয় তাঁহার সমীপবর্তী হইয়া
তাঁহার মস্তকে বারংবার পদাঘাত পূর্বক কহিলেন—

অহে ছরাশ্বন, তুমি যে আমাদের প্রতি উপহাস ও
জ্রোপদীকে অপমান করিয়াছিলে এই তাহার ফল ভোগ করো।

ভীমসেনের এই নীচ-জনোচিত ব্যবহারে দর্শকগণের মধ্যে
কেহ সন্তুষ্ট হইলেন না। ধর্মরাজ সেই আত্মশ্লাঘানিরত
বৃকোদরকে তিরস্কারপূর্বক কহিলেন—

হে ভীমসেন, তুমি বৈরত্ব হইতে মুক্ত হইয়াছ এবং
সদুপায়েই হউক আর অসদুপায়েই হউক স্বীয় প্রতিজ্ঞা
পরিপূর্ণ করিয়াছ। এক্ষণে ক্ষান্ত হও, আর অধর্ম সঞ্চয়
করিয়ো না। ইহার সৈন্য বহু ভ্রাতা ও পুত্রগণ নিহত হওয়ায়
এই বীর এক্ষণে সবপ্রকারে শোচনীয়, তদুপরি এই কুরুরাজ
আমাদের ভ্রাতা, অতএব তুমি কিরূপে নৃশংসের ন্যায়
দুর্ব্যবহারে প্রবৃত্ত হইতেছ।

অনন্তর যুধিষ্ঠির দীনভাবে ছর্ষোধনের নিকটে গমনপূর্বক
অশ্রুকণ্ঠে কহিলেন—

ভ্রাতঃ, তুমি পূর্বকৃত কর্মের ঘোরতর ফল ভোগ
করিয়াছ, এক্ষণে আর শোক করিয়ো না। যত্নাই তোমাকে
আশ্রয় প্রদান করিবে। আমরাই নিভাস্ত হতভাগ্য, যে-

হেতু বহুশূন্য রাজ্য শাসন ও ভ্রাতৃবধুগণকে শোকার্ত
নিরীক্ষণ করিতে হইবে।

এদিকে গদায়ুদ্ধবিশারদ বলরাম দুর্যোধনকে অধর্মযুদ্ধে
পাতিত দেখিয়া ভীষণ আতর্নাদ-সহকারে কহিতে লাগিলেন—

নাভির অধঃস্থলে গদাঘাত করা বিধেয় নহে, ইহা শাস্ত্র-
সিদ্ধ সর্বজন-বিদিত নিয়ম, কিন্তু মহামূর্থ ভীমসেন তাহা
অতিক্রম করিয়া স্বেচ্ছাচারে প্রবৃত্ত হইল।

এই কথা বলিতে বলিতে হলায়ুধ বলদেব তাঁহার লাঙ্গল
উত্তত করিয়া ভীমসেনের প্রতি ধাবিত হইলেন।

তখন বাসুদেব স্বীয় বাহুযুগলদ্বারা তাঁহাকে ধারণপূর্বক
নিবারণ করিয়া বিনোতবচনে কহিতে লাগিলেন—

হে মহাত্মন, তুমি ক্রোধ সম্বরণ করো। বিবেচনা
করিয়া দেখো যে পাণ্ডবগণ আমাদের নিকট আত্মীয়, ইহারা
কৌরবগণকর্তৃক অগাধ বিপদ সাগরে পাতিত হইয়া এক্ষণে
বহুকষ্টে উত্তীর্ণ হইয়াছেন। ইহাদের উন্নতিতেই আমাদের
উন্নতি ; অতএব ইহাদের বিরুদ্ধাচরণ বিধেয় নহে। তদ্ব্যতীত
ভীমসেন সভামধ্যে দুর্যোধনের উরুভঙ্গের প্রতিজ্ঞা করিয়া-
ছিলেন, ক্ষত্রিয় হইয়া সে প্রতিজ্ঞা তিনি পালন না করিয়া
পারেন না।

বাসুদেবের অমুনয়বাক্যে নিবৃত্ত হইয়া বলরাম ক্রুদ্ধবচনে
উত্তর করিলেন—

হে কুক, আত্মীয়তা বা লাভালাভের কথা বৃথা
বলিতেছ। অর্থ ও কামই ধর্মনাশের প্রধান কারণ। তুমি

যতই যুক্তি প্রদর্শন করো না কেন ভীমসেন যে অধর্মাচরণ করিয়াছেন, সে ধারণা আমার মন হইতে দূরীকৃত হইবে না। লোকমধ্যেও তাহার কুটযোদ্ধা বলিয়া চির অখ্যাতি রহিয়া যাইবে।

বলরাম এই কথা বলিয়া মহারোষে রথারোহণপূর্বক দ্বারকাভিমুখে প্রস্থান করিলেন।

তখন রাজা দুর্যোধন কহিলেন—

হে কৃষ্ণ, সসাগরা বসুন্ধরার শাসন, বিপক্ষগণের মস্তকোপরি অবস্থান এবং অন্যান্য ভূপালগণের তুল্য সুখ-সন্তোষ ও ঐশ্বর্যলাভ করিয়াছি; পরিশেষে ধর্মপরায়ণ-কৃত্রিয়-বাহিত্য পরমগতি প্রাপ্ত হইলাম। এক্ষণে ভ্রাতৃবর্গ ও বন্ধুবান্ধবের সহিত আমি স্বর্গে চলিলাম, তোমরা এই শোকসমাকুল শূন্যরাজ্য গ্রহণ করো।

অনন্তর দুর্যোধন দেহ ত্যাগ করিলেন।

তাঁহার উক্ত বাক্যে পাণ্ডবগণকে বিষন্ন দেখিয়া কৃষ্ণ কহিতে লাগিলেন—

হে ভ্রাতৃগণ, এক্ষণে আমাদের অভিপ্রায় সিদ্ধ হইয়াছে, সায়ংকালও উপস্থিত; অতএব চলো, উপযুক্ত স্থানে গমনপূর্বক যুদ্ধাবসানে মাতুলিক কার্যের অনুষ্ঠান করা যাক।

এইরূপ কথোপকথন করিতে করিতে বাসুদেবসহ পাণ্ডবগণ সাত্যকিকে সঙ্গে লইয়া পবিত্রসলিলা নদীতীরে গমন করিলেন এবং তথায় কৃষ্ণের উপদেশানুসারে মাতুলিক-ক্রিয়া সম্পাদনার্থে রাত্রিযাপন করা স্থির করিলেন।

১২

পাণ্ডবগণের পুরপ্রবেশের আয়োজন সম্পূর্ণ হইলে, ধর্মরাজ কংলাজিনসংবৃত শ্বেতবর্ণ ষোড়শ-বলীবদের দ্বারা আকৃষ্ট সুবহুং শুভ্র রথে আরোহণ করিলে ভীমপরাক্রম ভীমসেন তাঁহার রথরশ্মি গ্রহণ, মহাবীর অর্জুন তাঁহার মস্তকে শ্বেতছত্র ধারণ এবং মাদ্রীপুত্রদ্বয় দুই পার্শ্বে অবস্থান-পূর্বক শ্বেত চামর ব্যঞ্জন করিতে লাগিলেন। এইরূপে পঞ্চভ্রাতা রথারূঢ় হইলে ধৃতরাষ্ট্র-তনয় যুয়ুৎসু এবং বাসুদেব ও সাত্যকি পৃথক্ পৃথক্ রথে উহাদের অনুগমন করিতে লাগিলেন। অন্ধরাজ ধৃতরাষ্ট্র গান্ধারীর সহিত মনুশ্যবাহু যানে সকলের অগ্রে এবং কুন্তী দ্রৌপদীপ্রভৃতি মহিলাগণ নানাবিধ যানে বিচরকর্তৃক রক্ষিত হইয়া সঙ্গে চলিতে লাগিলেন। এইরূপে পরিবার-বেষ্টিত হইয়া মহারাজ যুধিষ্ঠির হস্তিনাপুরাভিমুখে যাত্রা করিলেন।

অনন্তর মহারাজ যুধিষ্ঠির ক্রমে ক্রমে সেই রাজমার্গ অতিক্রম করিয়া রাজভবন-সমীপে উপনীত হইলে পৌরগণ তাঁহার সন্নিধানে সমাগত হইয়া কহিতে লাগিল—

মহারাজ, আপনি সৌভাগ্য ও পরাক্রমপ্রভাবে ধর্মামুসারে শত্রুগণকে পরাজয় করিয়া পুনর্বার রাজ্যলাভ করিয়াছেন। এক্ষণে আমাদের অধীশ্বর হইয়া ধর্মামুসারে প্রজাপালন করুন

এইরূপে ধর্মরাজ সাধুগণে পূজিত ও সুহৃদ্বর্গে পরিবৃত্ত হইয়া স্বীয় বিস্তীর্ণ রাজ্যে অভিষিক্ত হইলেন। মাল্যক্রিয়া শেষ হইলে তিনি কহিলেন—

হে বিপ্রগণ, মহারাজ ধৃতরাষ্ট্র আমাদের পিতৃতুল্য; অতএব যদি আমার প্রিয়কার্যসাধন আপনাদের উদ্দেশ্য হয়, তবে আপনারা সতত তাঁহার শাসনানুবর্তী ও হিতানুষ্ঠান-পরতন্ত্র থাকিবেন, আমি সমস্ত জ্ঞাতি বধ করিয়াও কেবল তাঁহার সেবা করিবার জন্ত জীবন ধারণ করিয়া আছি। এক্ষণে এই সমগ্র সাম্রাজ্য এবং পাণ্ডবগণ তাঁহারই অধীনে রহিল। মহাশয়গণ, আমার এই কথা আপনারা বিশ্বস্ত হইবেন না।

অনন্তর পৌর জ্ঞানপদবর্গ সকলে প্রস্থিত হইলে যুধিষ্ঠির ভীমসেনকে যৌবরাজ্য প্রদানপূর্বক ধীমান বিহরকে মন্ত্রণা কার্যে, বৃদ্ধ সঞ্জয়কে কার্যাকার্য নিধারণে, নকুলকে সৈন্যের তত্ত্বাবধানে, অর্জুনকে রাজ্যরক্ষায়, সহদেবকে শরীর রক্ষায় এবং পুরোহিত ধৌম্যকে দৈবকার্যের অনুষ্ঠানে নিযুক্ত করিয়া কহিলেন—

তোমরা সতত অধ্যবসায়ের সহিত রাজ্য ধৃতরাষ্ট্রের আদেশ প্রতিপালন করিবে। এবং পৌর ও জ্ঞানপদবর্গের কোনো কার্য উপস্থিত হইলে তাহা বৃদ্ধ রাজার আজ্ঞা লইয়া সম্পাদন করিবে। এক্ষণে তোমরা সকলে ক্ষত-বিক্ষত-দেহ ও শ্রান্ত ক্লান্ত রহিয়াছ; অতএব স্ব-স্ব গৃহে গমনপূর্বক শ্রমাপনোদন ও বিজয়সুখলাভ করো।

